

近代中國史料叢刊續編第四十五輯
沈雲龍主編

卷施閣集

洪亮吉著

年譜·文甲集卷一——卷六

文藻出版社

有限公司
印行

裴君詩集

文甲集十卷 乙集十卷 詩集

二十卷 附鮑軒詩八卷

乾隆乙卯仲秋刊於貴陽節署

卷施閣甲乙集目錄 并自叙

少湍慈訓長乃薄遊契心五嶽涉足八州所咨聞見冀寡
悔尤泉乎通籍登覽殆周盤盤經史復預校雠庶幾一得
參乎九流亮吉識

文甲集卷一

意言二十篇

卷二

釋歲

卷三

釋舟

卷四

貴州水道攷上

卷五

貴州水道攷中

卷六

貴州水道攷下

卷七

書四篇 釋一篇

卷八

序六篇 書二篇

卷九

奏摺一 序傳二篇 考三篇 墓表二篇

卷十

疏一篇 書二篇 序三篇 傳二篇 行狀一篇

文乙集卷一

連珠三十二篇 敘錄十八篇 銘二篇 頌二篇

卷二

七招 賦二篇

卷三

雜文十篇

卷四

雜文十二篇

卷五

雜文九篇

卷六

雜文十二篇

卷七

雜文八篇

卷八

雜文十篇

卷九

未刻

代言五篇

雜文篇

卷十

未刻

雜文十篇

洪北江先生年譜

門人旌德呂培等同編次

先生姓洪氏諱亮吉字君直一字稚存號北江晚號更生行一江蘇常州府陽湖縣左廂花橋里人先世本居歙縣洪坑系出唐宣歙觀察使經綸始避唐敬宗諱改宏氏爲洪氏三十六世至先生高祖千運府君諱德健國子監生封中憲大夫娶程恭人生子二長爲先生曾祖秋山府君諱璟康熙戊寅拔貢生山西大同知府崇祀交城大同名宦祠娶汪恭人歙國子監生世昌女繼娶徐恭人歙處士成教女生子十一次爲先生祖封旅府君諱公案國子監生考授直隸州同知贈承德郎

年譜
贅於常州趙氏遂遷居焉娶趙安人武進戶部尙書諡
恭毅申喬孫女翰林院侍讀熊詔女生子五次爲先生
父午峰府君諱翹國子監生累贈奉直大夫娶蔣太宜
人武進歲貢生封奉政大夫金聲孫女雲南嶧峨知縣
敷淳女生先生兄弟二人

乾隆十一年丙寅先生一歲以九月初三日子時生於常
州中河橋東南興隆里賃宅中宅後有積水池先生生
於池南西舍

十二年丁卯先生二歲

十三年戊辰先生三歲

十四年己巳先生四歲午峰府君命先生伯姊課之識字

先生每字必詢其義日晚皆爲蔣太宜人述之是年凡識七八百字

十五年庚午先生五歲在家塾從季父希李先生授禮記大學中庸兩篇正月八日仲弟靄吉生

按先生從父四人長諱翰字翮飛行一國子監生未婚卒次卽午峰府君次諱翔字雲上行三次諱翻字君佐行四國子監生贈修職郎次諱翱字希李行六先生仲弟字赤存行二

十六年辛未先生六歲在家塾授論語七月二十日午峰府君客鎮洋縣署得疾歸未至家五十里以廿四日申時卒於洛社舟次越日殯於城東天寧寺華房先生隨

蔣太宜人暨三姊一弟守殯宮凡五十日始歸

十七年壬申先生七歲以午峰府君卒貧無所依隨蔣太
宜人及姊弟寄居外家外王母龔太孺人之意也時外
家亦窘蔣太宜人率諸女勤女工自給并儲修脯俾先
生就外家塾受經率夜四鼓方就寢事詳機聲燈影圖
記及南樓憶舊詩是歲塾師爲莊覲五先生城西坂上
鄉人同學則其子駢剛表兄肇新廷耀馨凡四人讀論

語畢

十八年癸酉先生八歲在外家塾從惲牧菴先生銘受孟
子惲先生武進縣學附生憫先生幼孤而慧常分館餐
食之後其孫與三以乾隆甲午科舉順天鄉試爲先生

同歲生惲先生猶及見之

十九年甲戌先生九歲在外家塾從黃敬菴先生朝俊受孟子及毛詩國風黃先生武進縣學增生課讀極嚴是秋先生適楊氏從母亦以婺居貧苦無依率二女僦從兄啟宸後樓以居與外家相近移舍日值先生讀孟子既醉以酒一章解塾詣其處龔太孺人及蔣太宜人適在坐因舉宐其室家句命之屬對卽應聲曰飽乎仁義龔太孺人極賞之自此益鍾愛焉是歲表弟定熙亦入塾與先生年相若後卒於叔素園先生官舍先生有詩哭之

按先生舅氏三人長名樹誠字實君國子監生贈登

仕郎次名琦字素園乾隆甲子舉人江西德興知縣
皆蔣太宜人兄次名蘅字曙齋乾隆壬午科副榜貢
生 賜檢討銜出嗣世父淮安教授文元後爲蔣
太宜人弟事皆詳先生所撰外家記聞一卷處士肇
新少府廷耀上舍馨處士定熙奎耀皆實君先生子
蔣太宜人之姪先生之配蔣宜人兄弟也

二十年乙亥先生十歲在外家塾從黃先生受毛詩畢

二十一年丙子先生十一歲蔣太宜人率先生歸興隆里

舊宅從旁舍塾師受尙書同學生徒十餘人不能徧課
每篇音訓譌者恆至十數日夕歸蔣太宜人令之背誦
必爲泣而正焉如濟河惟兗州兗讀作袞之類九月八

日叔父君佐先生卒於廣西百色廳寓舍無子以仲弟爲之後十二月伯姊適城北前橋村芮處士光照

二十二年丁丑先生十二歲從周線里岳介錫先生受禮記是冬舅氏素園先生以國史館謄錄議敘選授江西德興知縣迎養龔太孺人於官舍自此蔣太宜人益貧苦無所依

二十三年戊寅先生十三歲仍就外家從表兄肇新受禮記及周易塾課畢先生始學作詩嘗作中秋卽景詩有月出百尺樓花香三重門之句不敢示人惟以示表弟定熙冬十月舅氏實君先生卒於德興官舍表兄肇新奔喪西上因從陳蕤賓先生寶讀書先是丙子科陳先

生赴江寧鄉試舟覆於江午峰府君往館世執漳浦蔡
太守觀瀾江寧官署塗次遇之急募舟以拯并助館金
一笏爲試費陳後以己卯舉於鄉與先生亦中表兄弟
也課徒之暇喜錄唐宋詩餘于是先生亦學作小令并
與表兄馨日課漢魏六朝三唐詩成誦乃己是月仲姊
適同里汪上舍德潤

二十四年己卯先生十四歲在鹿苑菴從董獻策先生舒
傳授春秋左傳并學作制舉文半篇董先生常州府學
附生同學十數人惟與楊布衣毓舒交最密暇卽唱酬
往還是歲作詩數十篇及斥釋氏文一首

二十五年庚辰先生十五歲在西廟溝謝氏塾從唐麟臣

先生爲垣受左傳及史記漢書雜文唐先生武進縣學
附生工詩三月上巳先生始作制舉文全篇題爲則以
學文一句文成後唐先生極賞之同學爲謝孝廉榕上
舍振祺等四人孝廉與先生極契後中乾隆戊申科順
天榜舉人是歲先生有附塾驅兒諸詩及送表弟定熙
至江西官署詩集中始有存稿

二十六年辛巳先生十六歲從茭蒲里繆映藜先生謙受
唐宋雜文及制舉義繆先生江陰縣學廩生同學爲陸
上舍焜布衣文在張布衣先甲兄弟凡十餘人三月初
應童子試不售

二十七年壬午先生十七歲在百花樓巷莊氏塾從金壇

荆廷緯先生汝翼受公羊穀梁及制舉義荆先生金壇
縣學廩生先生從表姊子長於先生八歲舉業最工因
是始識作文法荆先生後以是科副榜貢生中順天癸
卯舉人已酉進士官華亭教諭卒是歲同學爲莊上舍
述兄弟二人始學作古文有祭花神文及園居南樓夜
宿初生十五六等詩初與唐上舍鵬訂交間有唱和焉
二十八年癸未先生十八歲在城北四十里郵村鄒翁元
士家塾仍從唐麟臣先生習制舉義同學爲鄒福梅廷
梅金川三人鄒翁極重先生欲以女妻之知有所聘乃
止五月解館歸卽染時疾復延及全家蔣太宜人病瀕
危者數次大母趙安人大父封旅府君卽於是月相繼

卒先生承重居廬至匝月後病稍瘳八月初復赴鄒氏塾是秋舅氏素園先生罷官奉龔太孺人旋里先生解塾卽從蔣太宜人仍居外家與表兄馨從表兄定安尤契倡酬談讌每徹晨夕郭北篇中井鄉歌諸詩皆是年作也

二十九年甲申先生十九歲從北後街余芑貽先生豐受唐宋古文及制舉義余先生常州府學附生奇賞先生有異才之目每課文日先生常兼作數篇或一題卽製其二其三午餘諸同學方構思未就輒已交卷時蒙擊節嘆賞歲暮解塾獨爲詩送先生次卽賞楊生清輪後楊成乾隆甲辰進士里中皆謂余先生有知人之鑒焉

是歲同學爲余先生子明經彤及楊章秦畢諸生共十餘人有雲谿春詞獨酌謠諸詩始學爲駢體文

三十年乙酉先生二十歲在外家團瓢書屋授表弟兆詢

經

素同先生子

歲得脩脯錢二千八百暇卽從舅氏曙齋先

生問業時表兄馨從表兄定安皆授徒於家三人昕夕往還無間有春園唱和集又與里中諸名士結社訂交始廣有題阿房宮圖諸詩填詞四十餘首

三十一年丙戌先生二十一歲仍在外家授徒從學則表

弟兆詢從表弟榮

從舅氏秀君子

衡章

族舅氏濟川子

三人歲入脩脯

錢七千正月二十五日叔父雲上先生卒六月應童子試不售是歲詩社以洗研池賦檳榔行雲谿竹枝詞命

題先生試列第一又在楊氏騰光館會課凡四十八皆里中名宿先生年最少從舅氏榕盒先生閱其文奇賞之亦列爲第一此後先生常詣舍南竹屋問字至辛卯秋客皖江乃已又賦中秋減字木蘭花詞十首同輩傳鈔殆徧劉文學宸贈詩云才子清眠起夜分新詞字字鏤香雲何當共握琉璃管寫盡羊欣白練裙是歲詩詞約及百首

按雲上先生四子長開吉字元愷爲先生從兄次顯吉字尙儀次亘吉字禹平次良吉字元良皆先生從弟蔣榕盒先生名和寧乾隆壬申進士由翰林院編修改官湖廣道監察御史

三十二年丁亥先生二十二歲適汪氏仲姊以先生制義
不進因與蔣太宜人謀復令先生在張王廟西潘氏塾
從時月圃先生元福受作文法束脩二十千皆仲姊獨
任之時先生乾隆壬申舉人中甲戌明通榜工帖括同
學則潘上舍尙基方上舍起莘青陽陳上舍蔚江陰陳
秀才宏器諸人尙基之叔振煥亦舊識也六月應童子
試不售七月諸同學就江寧鄉試先生又儻鹿苑菴後
雲依閣讀書每夜輒至三鼓僧徒厭之託言有賃宅者
遷先生入菴旁土室中上漏下濕居之晏然冬十月外
王母龔太孺人病劇先生自塾中歸侍疾衣不解帶者
旬日及卒慟哭嘔血七七竟始奉蔣太宜人歸興隆里

舊宅是歲有南樓贈書圖記訪從叔縣尉至昆山紀游
天外王母諸雜體詩

三十三年戊子先生二十三歲在仲姊宅授汪甥楷經汪
氏居天井里室宇深邃宅中所延經師則同里段布衣
聖烈李布衣瑞寬與先生爲三其羣從皆好賓客每有
文讌三人者恆首坐焉九月十六日蔣宜人來歸先生
贅於外家凡三日始同歸興隆里舊宅宜人蔣太宜人
兒寶君先生女也婚甫五日卽赴弔邵先生齊燾於常
熟邵先生乾隆壬戌翰林主常州龍城書院奇賞先生
與黃君景仁是歲有催粧詞哭邵先生及游虞山詩又
有寓興詩二十首及東鄰棄婦等詩寓興詩後卽失去

三十四年己丑先生二十四歲仍館汪氏正月叔姊適同里史君德孚五月應童子試補陽湖縣學附生七月與諸同人訪城西徐墅陳刺史明善於亦園與無錫邵秀才辰煥江陰屠進士紳同里劉文學駿中表莊上舍寶書趙上舍懷玉唱和詩極多是月長女傳簫生未幾殤有贈趙表弟七言長歌

按先生少孤午峰府君未及命名初名蓮字華峰是年以縣試第二府試第三院試第八補縣學生督學則副都御史滿洲景福也後以壬辰年改名禮吉辛丑年就試禮部以嫌名當有所避復改今名莊爲先生從母之子後官聊城縣丞趙爲先生祖母兄兩浙

鹽驛道侗教之孫後以庚子 召試舉人官內閣

中書青州府同知

三十五年庚寅先生二十五歲仍館汪氏從學者甥楷及汪生植等三人七月偕黃君景仁附瓜船至江寧鄉試九月榜發薦而不售有游京口三山及江寧雜詩是秋敲錢唐袁大令枚於江寧大令謂先生詩有奇氣逢人輒誦之始與里中董太守思駟左刺史輔訂交

三十六年辛卯先生二十六歲仍館汪氏從學者汪董諸生等四人五月偕趙表弟懷玉赴江陰同寓趙孝廉敬業寓齋科試一等四名補增廣生七月十日次女傳綬生越歲春卽痘殤借楊秀才繼曾炳文劉上舍培基是

江寧鄉試同寓秦淮河房九月榜發不售十一月先生以館穀不足養親買舟至安徽太平府謁朱學使筭時學使尙未抵任沈太守業富素重先生留入府署未匝月適安徽道俞君成欲延書記太守以先生應聘已至蕪湖有留上朱學使書學使得之甚喜以爲文似漢魏卽專使相延入幕以臘月八日復抵太平黃君景仁已先在署學使作書徧致同朝謂甫到江南卽得洪黃二生其才如龍泉太阿皆萬人敵云是年秋在江寧與汪明經中顧進士九苞訂交及入學使署又與邵進士晉涵高孝廉文照王孝廉念孫章孝廉學誠吳秀才蘭庭交最密由是識解益進始從事諸經正義及說文玉篇

每夕至三鼓方就寢是年所作詩文逾百篇

三十七年壬辰先生二十七歲在安徽學使署隨厯徽州寧國池州安慶廬州鳳陽七府六安一州徧游采石青山敬亭黃山齊雲齊山諸名勝六月以歸省旋里七月仍赴太平十一月以兩世六棺未舉歸奉先生祖父母及午峰府君叔父雲上君佐兩先生叔母趙孺人櫛葬於城北前橋村新塋是冬以所負多訪蔣編修士銓汪孝廉端光於揚州編修解橐金助之乃得歸已迫除夜矣是歲作文二十餘篇詩二百餘首

三十八年癸巳先生二十八歲時四庫館始開江浙搜采遺書安徽省設局太平聘先生總司其事沈太守業富

并延兼管書記閏三月十六日長子怡孫生七月朱學
使以閱卷乏人復延先生偕試徽寧二府九月自徽州
偕汪孝廉端光歸里由新安江徧遊嚴陵富春及錢唐
山水諸勝唱和幾及百首十月先生以不能家食往謁
胡按察季堂於蘇州因訪趙表弟懷玉於穹窿同游東
西兩洞庭入林屋洞探金庭玉柱之勝宿包山寺二夕
記游詩約十餘首月杪復歸時錢文敏公維城居憂在
里見先生詩文奇之徒步過訪焉是冬移居白馬三司
徒里賃宅十二月聞朱學使離任入都因附江陰繆君
晉階赴廣西便舸至太平送之
繆君爲先生舅氏素圖
先生時選來賓縣界
脾司巡檢
挈家赴任貧不能歸沈太守業富袁大令枚皆薄助行

資於歲除日騎驢抵里有感族人饋新炭詩作兩晉南
北史樂府二卷

三十九年甲午先生二十九歲正月赴江陰補壬辰年歲
試先是錢文敏公會語學使彭閣學元瑞謂先生爲昌
黎復生由是閣學亦久知先生十三日補試準附一等
三名後又次蔣編修士銓元韻贈先生七古一篇薦入
常鎮通道袁君鑿署授徒歲修百二十金并令在揚州
安定書院肄業膏火費亦及百金自此將母稍裕七月
偕黃君景仁赴江寧鄉試同寓明徐氏東園舊址是科
闈中得文及五策已定作元房師賈先生景說

乾隆丁丑進士

官蘇州總
捕同知

以首藝有別解與兩主司力爭因定作副榜

第一馬座師則翰林院侍讀學士今文華殿大學士董公誥司經局洗馬今兵部尙書劉公權之也榜發座師及學使皆惋嘆不置十月復詣揚州冬杪始歸偕汪孝廉端光唱和詩極多是歲始與孫君星衍訂交同里則孫黃趙諸君外復偕楊君倫呂君星垣徐君書受唱酬無間里中號爲七子

四十年乙未先生三十歲彭閣學薦入江寧陶太守易署中修校李錯尙史匝月事竣太守亦重先生因延課其孫兼管書記四月以太守作滿入都因歸省親七月復至江寧九月太守擢惠潮嘉兵備道先生以親老不能遠游因就句容林大令光照聘課其壻漳浦鄭秀才聯

華時孫君星衍尊人孝廉勳官句容教諭而訓導全椒
朱君沛縣丞錢唐汪君蒼霖皆工詩愛客縣中紳士王
廣文吉士兄弟沈公子衣言亦慕與先生交凡客句容
三月文謙殆無虛日又徧游茅山棲霞紀游詩約數十
篇臘杪始歸里門十二月十日次子盼孫生

四十一年丙申先生三十一歲正月仍至句容縣署二月
歸里旋至揚州及江寧訪友三月復往句容校縣試文
四月以林大令罷任歸里時浙江學使王公杰欲延先
生校文七月往謁學使於紹興值其扃試例不當通刺
資斧幾至乏絕及試畢往謁學使一見先生如舊相識
遂偕往試台州處州二府中途麻天台雁蕩諸勝皆有

詩紀事十月二十六日蔣太宜人在里猝得中風疾卒
春秋六十有三仲弟以先生在千里外恐得訃後驚悼
有他變卽作札言太宜人病狀屬姊壻史君德孚持至
處州并促偕歸到日亦直扃試留書而返先生於試畢
得書星夜遄返十一月十四日晡時舟至咸墅堰距常
州三十里疾步至城有僕窺園父仇三爲營卒途遇之
問家中狀仇以實告先生驟聞哀耗五內昏迷方度八
字橋忽失足墮水兩岸陡削人不及救隨流至滕公橋
有汲者見髮颺水上攬之得人試心口尙微温始呼衆
集救問里中識者其昇至家救者不知先生疑爲避債
赴水及審狀則皆曰孝子孝子悲嘆而散天嚴寒衣履

冰濕鄰人蔣松圓釋先生衣自解衣衣之舉家號哭呼
救久之方蘇搶呼痛哭幾不欲生水漿不入口者五日
諸姊以大義責先生始稍進米飲七七內僅啜糲粥席
藁枕由晝夜號哭終喪不進肉食不入內室所服皆白
衣冠不御緇布自以未及侍蔣太宜人含歛哀感終身
嗣後每遇忌日輒終日不食客中途次不變三十年如
一日是歲在苦次撰次蔣太宜人行述

四十二年丁酉先生三十二歲居憂在里授徒從學者汪
甥楷劉生登禾孫生星衡瑀及張楊諸生凡七人長子
飴孫時已五歲亦日課以爾雅十數行十一月座師劉
公權之視學安徽遣人相延先生亦以營葬乏資遂於

長至前由陸程赴太平并約孫君星衍偕行劉公相待
有加以先生衣縞素不肯更易因約值節日朔望皆聽
獨處專遣人司飲食在學署一載率以爲常又因先生
舉孫君學行因并款畱以助衡校自是先生與孫君助
學使校文外共爲三禮訓詁之學畱太平度歲

四十三年戊戌先生三十三歲在安徽學使署二月隨試
太平徽州寧國池州四府五月中始返太平偕孫君至
句容學署度夏七月復同詣太平隨試江北諸州府十
一月在滁州因葬事先歸以十一月廿六日耐葬蔣太
宜人於午峰府君墓知友在百里以內者咸來會葬如
高郵金君蘭無錫楊君芳燦兄弟及同里孫君等皆館

於白馬三司徒里賃宅旬日方去先生在家次三日夜
負土成墳始歸歲暮以負債多借孫君至句容聞座師
劉公遭母憂復親詣太平弔唁至除夕前仍回句容

四十四年乙亥先生三十四歲仲弟以少孤失學假仲姊
資學爲賈累歲虧折資本至無以償時先生服闋歸里
決計攜弟北上別謀進取又以無行資袁觀察鑒薦入
常州黃太守澤定署閱府試文薄有所贈方得成行過
揚州汪孝廉端光復助以行資始舍舟從陸道遇漢軍
繆秀才公儼今名公恩聯車北行五月初二日抵都居黃君
景仁寓齋時四庫館甫開讎校事繁座師董公誥爲總
裁官屬總校江寧孫舍人溶延先生至打磨廠寓齋總

司其事歲脩二百金仲弟亦送入方略館効力先生節
嗇所入半給仲弟館費以半寄歸爲衣食之資迎養叔
母余孺人季父希李先生於家用度益窘每遇訪友或
假書十里五里無不步行八月應順天鄉試不售時翁
學士方綱蔣編修士銓程吏部晉芳周編修厚轅吳編
修錫麒張舍人墳共結詩社首邀先生及黃君入會每
一篇出人爭傳之是以先生遇雖甚困而友朋之樂以
此二年爲最九月朔日女紡孫生是年得駢體文四十
首詩詞約二百篇

四十五年庚子先生三十五歲在孫舍人寓校書仲弟以
思家得咯血疾新歲益甚先生質衣具資遣人送歸時

甫近上元以無衣不克出門託疾斷慶弔絕過從者凡兩月時方

南巡諸臣例獻賦頌先生爲山陰梁尙書國治製頌十八章首

邀

容賞于是都下求屬稿者甚衆先生亦精力絕人日爲孫舍人校官書八巨冊類有攷證數十條夜則製進呈冊頁一通每至三鼓方休是年恭遇

萬壽頌述之文益多自二月至七月所製凡五六十篇得酬金四百兩時前橋新塋前地一畝欲爲豪家估買先生得家問卽以所得金之半寄歸先與立券豪家遂不能奪仲弟病痊後復假貸北來先生爲盡償宿逋并取還前

典質之物類皆賣文錢也八月應順天鄉試出闈卽爲四川查按察禮聘掌書記入蜀歲修四百金先生以屢困場屋不復有進取心九月朔遂辭孫舍人暫寓蓮花寺待查公同行適其方擢四川布政使未卽就道初七日揭曉中式第五十七名舉人孫舍人同獲雋查公遂力止先生無行于是復遷寓舍人宅是科座師爲協辦大學士漳浦蔡文恭公新刑部左侍郎無錫杜公玉林內閣學士滿洲嵩貴公房師爲掌貴州道監察御史清苑李公孔陽李公閱薦首場卽得疾二場屬吳江丁郎中雲錦代閱三場屬嘉定曹中允仁虎代閱座師以制藝皆散體已定作詞榜第一矣忽中允得五策以爲額

亭林復生蔡文恭公取閱亦深賞之遂移入前列以五
策進 呈揭曉後未一月房師卽以疾逝先生與同
門生視含歛并稱貸而厚賻之是歲與黃君及欽州馮
編修敏昌順德張解元錦芳唱和及詩社所作共得詩
百餘篇雜文數十篇著三國疆域志二卷

四十六年辛丑先生三十六歲在孫舍人寓校書時移寓賈家胡

同三月應禮部試本房山陰王編修增閱卷呈薦闈中

已定作江南第二本矣固始吳副憲玉綸爲副總裁旋

以軍機中書汪君學金卷易之先是孫君星衍已入關

并札言陝西巡撫畢公沅欽慕之意先生遂決意游秦

四月十六日偕崔同年景儀西行崔方至四川定省時征逆回

京兵入陝道出山西因迂道由館陶臨清至河洛抵開封而資斧已竭適舊友楊司務仁基同年管戶部世銘皆在開封共假資以行五月望後抵西安寓開元寺一宿畢公聞先生來倒屣以迎翊日遂延入節署時幕中爲長洲吳舍人泰來江寧嚴侍讀長明嘉定錢州判帖及孫君與先生凡五人陝西尙有回警日偕畢公籌兵畫餉暇卽分韻賦詩常至丙夜間游牛頭香積諸寺尋曲江及漢唐古跡又代莊州判斫修延安府志歲杪方竣是月二十五日適汪氏仲姊以疾卒先生聞訃哭之慟仲弟以尙未議敘留都每月揭資寄之是年道中懷古紀游及唱和詩共得二百首雜文數十篇

四十七年壬寅先生三十七歲在西安節署三月偕同人
至牛頭寺看桃花抵終南山麓始返四月黃君景仁以
將赴選謀資入秦寓開元寺者三月間旬必偕孫君出
訪之或同游名勝竟日而還六月至朝邑訪莊大令所
回塗過潼關赴陸司馬維垣之約時陸署同州知府其
子戶部鍾爲先生庚
子同 留二日卽順道游華山宿玉泉院質明坐竹塹行
二十里至青柯坪久憩自此以上
皆當步行遂自千尺幢直上小
駐媪神洞飲泉由仙人窅日月崖蒼龍嶺至三天門塗
皆危絕攀鉄索穿石脇方得上先生步行若飛餘人不
能及也從天門東折詣玉女峯坐洗頭盆側蒼栢滿崖
夕陽欲下天風泠泠渺非人境復上謁金天宮宮在落

雁峯下距峯頂尙五里道士供果餌畢因至後山松檜
亭視新月亭址卽秦昭王與天神博處時七月哉生魄
日也薄暝仍回金天宮蔬食後出屋視星斗皆大於瓜
皎潔異常倦宿東軒徹夜有聲不絕蓋呼吸可通帝坐
矣四鼓招道童秉炬上落雁峯視日出峯頂僅十餘步
左爲華池右則鐵屋一間祀老子時夜尙昏黑忽閃電
自隔河來八百里中條山畢見久之海日始上霞光萬
千較黃山仙掌峯所見又不尙矣躡久下嶺天尙昏黑
無所見復秉炬西至蓮花峯視巨靈擘山處又南折至
環翠巖望山南諸峯并訪陳希夷習靜石屋徑從原路
下山未刻至玉泉院華陰知縣來訪足力已竭幾不能

具禮兩日後始復舊以初八日返節署九月舊友湯大令大奎以輸餉至甘肅過陝相訪并出炙研瑣談屬爲點定是歲凡得詩百餘首文二十餘篇著漢魏音四卷撰淳化長武二縣志

四十八年癸卯先生三十八歲在西安節署三月莊公子

達吉約游鄜縣

尊人斫方署縣事

因同由興平抵馬嵬驛夜宿

各有題壁詩畱鄜縣五日登太白山從新開路至上池一勺久憇別日復上五丈原望陳倉岐山回塗過蓋屋徧訪仙游樓觀諸勝時太倉王上舍開沃主講蓋屋因畱宿書院中二日由鄜縣歸西安五月得黃君景仁安

已臨終遺札以身後事相屬先生由西安假驛騎四晝

夜馳七百里抵安邑哭之于蕭寺中爲措資送其柩歸里時季父希李先生畱滯漢口約先生同歸先生遂自蒲州渡河由襄陽至漢陽而季父已先行座師杜公方鞫獄武昌喜先生至邀畱旬日陪遊黃鶴樓西塞山及隔江大別梅子諸山至七月望夜方行八月朔日抵里門因爲黃君營墓先是畢公知所居賃宅逼隘因贈資爲購宅卽今花橋北居第也以十月初三日移居焉十二月偕陸同年壽昌趙表弟懷玉計偕北上復迂道至句容江寧乃克成行時將

南巡車馬皆乏僱小車前行除夕住拈花集度歲是歲紀游詩

百餘首澄城縣志二十卷

四十九年甲辰先生三十九歲正月十八日抵都門二月

偕江陰繆孝廉汝和寓泡子河觀音寺

時已締兒女姻其第四子先生

瑋也

三月應禮部會試試畢偕同人游西山榜發薦而不

售本房編修祥慶公閱卷最遲至四月四日方以三場
並薦總裁蔡文恭公及紀公昀奇賞之紀公尤擊節五
策必欲置第一時內監試豐潤鄭侍御激以得卷遲疑
之欲移置四十名外紀公堅執不允因相與忿詈不可
解總裁胡公高望調停其事遂置不錄紀公於卷末賦
惜春詞寄意出關卽先詣寓齋相訪焉先生以四月出
都由山西赴陝道中爲田家詩寓意以資斧告匱迂道
訪沈運使業富于運城五月半抵潼關聞畢公祈雨太

白山因至盤屋仙遊寺相見翊日同游樓觀半道聞甘肅回警畢公卽回西安調撥兵餉先生以病督辦盤屋縣署旬日方返西安莊公子達吉繪元都訪古圖有百韻詩紀事是月十九日第三子符孫生時西安修濬城隍未竟而西事頗急畢公屬先生及孫君將假出游爲名規畫其事六月程編修晉芳乞假來陝抵署卽病不起畢公與先生等日爲營畫醫藥及沒皆躬視舍歛民歲著公羊穀梁古義二卷詩文合百餘首

五十年乙巳先生四十歲在西安節署正月畢公入

觀并摩唐開成石經進 呈擬薦先生孫君及吳縣江布衣聲

國朝三體石經卽在西安刻石以進爲當勦者所阻而止二月偕嚴侍讀長明游紫閣白閣圭峯草堂寺由瀝水橋巡第五橋諸舊蹟時畢公調撫河南趙先生至開封遂於月杪由陝入汴至則豫省方積旱又河工事填委不復有關中唱酬之樂矣五月十一日季父希李先生卒十一月自豫南回枉道至固始謝大令聘署齋盤桓旬日方還里門仲弟以議敘從九品需次省先生於開封先生致書曹州守太谷吳君署俾就近食力焉後以史氏錫女歸其子上舍耶回里後歲歉甚復節嗇衣食贍諸親友間亦與錢大令維喬蔣太守熊昌諸人爲銷寒小集是歲得紀游詩百首修固始縣志

按希李先生二子長名原吉字思周次名炳吉皆先生從弟

五十一年丙午先生四十一歲在里中二月借錢大令維喬等買舟至浙江省從舅氏榕盒先生時舅氏曙齋先生父子楊孝廉夢符孫振學吳祖健蔣承曾陸繼曾四上舍並以事至杭崔浣青恭人暨公子景侃亦往任所連舫十數徧游錫山虎溪復至元墓靈巖流連篇什繼以清歌極琴尊游覽之樂抵錢塘日卽居蔣表弟重耀寓齋榕盒先生子間日游龍井天竺靈隱淨慈諸名勝與邵編修晉涵楊孝廉蔣上舍崔公子吟咏常至徹夜留月餘復歸里中三月重赴開封節署八月登封陸大令續

萼延修縣志并約爲嵩山之游以十月由鄭州密縣抵
登封陟太室少室訪嵩陽書院暨啟母石手搨三石闕
銘信宿少林寺乃回甫抵開封聞榕盒先生之訃哭之
慟是歲南北紀游詩約百五十首著東晉十六國疆域
志修登封縣志爲友人改纂懷慶府志

五十二年丁未先生四十二歲正月偕孫君星衍計偕北
上入都寓繩匠胡同三月應禮部會試榜發不售以五
月初抵里時競渡方盛與莊表兄寶書陳大令賓陸廣
文壽昌日爲泛舟之游五月構卷施閣于宅西稍有樹
石及小池日偃仰其中畢公屢書促行十一月偕莊舍
人復旦重赴開封節署是歲得詩二百首撰乾隆府廳

州縣圖志

五十三年戊申先生四十三歲在開封節署賦寒食紀游詩四十首和者數十人八月畢公擢督兩湖先生偕行以九月五日抵武昌節署時楊進士倫亦主講于此時與出游晴川黃鶴諸勝唱和甚多歲暮畢公甫自荊州堤工回署汪明經中毛州判大瀛方上舍正澍章進士學誠亦先後抵署談燕之雅不減關中

五十四年己酉先生四十四歲正月二日計偕北行毛州判大瀛餞先生於江北三山徑梅已半開矣由漢陽北上元夕後抵開封居同年徐大令書受寓齋數日渡河至武陟訪王大令復不遇因獨游濟源謁濟瀆廟至盤

谷欲往王屋山不果二月抵都居孫君星衍琉璃廠寓齋三月應禮部會試榜發不售五月八日抵里七月之杭州訪友畱旬餘乃歸八月仲弟選授崇文門副使時同年李太守廷敬官常州延修府志并選唐百家詩以九月進署十二月返舍與錢大令維喬莊公子達吉爲消寒小集是歲得詩六十餘首

五十五年庚戌先生四十五歲正月元夕趁山東使船計偕入都至王家營以船行甚遲復由陸取道泰安登泰山至高老橋日已逼暮欲逕上同伴不可乃還以二月杪抵都居仲弟海岱門三條胡同寓齋三月應禮部會試四月初九日榜發獲雋座師爲東閣大學士王文端

公杰吏部侍郎後官體仁閣大學士朱文正公珪工部
侍郎鄒公奕孝房師爲刑部員外郎後官安襄鄖道王
公奉曾也先是朱文正公雖未識面然知先生名已久
入闈後欲暗中摸索得先生作第一人及得李君賡云
卷有駭策問數條以爲先生擬第一復得朱君文翰卷
用古文奇字又以爲先生遂置李君卷第六而以朱君
冠多士及拆號而先生名在第二十六乃相與嘆息以
爲名次亦有定數云 殿試先生卷條對詳明讀卷大
臣進呈第一

欽定第一甲第二名五月初一日引

見授職翰林院編修七月派克 國史館纂修官是秋先生與

仲弟移寓三里河清化寺街饒有竹木之勝查給事瑩
舊宅也歲除先生以遺負多避債至城東數日除夕抵
暮乃歸是歲偕同年張太史問陶唱酬甚多所得詩文
數十首

五十六年辛亥先生四十六歲在京供職正月十六日長
子館孫娶婦汪氏仲姊季女也四月蔣宜人率眷屬由
水路抵都十月石經館開派克收掌及詳覆官時至國
子監監視刻石以蔣衡所書十三經字多譌俗有上石
經館總裁書欲一一更正不能從也是歲偕法學士武
善劉檢討錫五伊刑部秉綬何工部道生王孝廉芑孫
唱酬甚多

五十七年壬子先生四十七歲在京供職三月老差引

見蒙

記名八月克順天鄉試同考官十四日又在闈中奉視學貴州之

命向例未散館翰林無爲學政者有之自先生及同年石修撰韞玉始蓋異數也九月榜發得士董履坦等十三人副榜希齡等二人卽日至海淀

御園謝

恩兼請

聖訓印蒙

召見

垂詢鄉貫科第甚悉并

命速赴新任先生退卽束裝十六日次子盼孫殤二十四日挈家上道十月半抵樊城眷屬暨賓友山水程進發先生馳驛先行十一月十三日抵貴陽巡撫嘉興馮公光熊等皆出郭相迓十五日接印任事卽緘題觀風十三府一廳所屬生童以衙署逼窄捐貲構署後樓閣卽今聽事西紅香館聽雨篷曉讀書齋千葉蓮臺等是也十二月初三日眷屬抵署從子繩孫悼孫史甥超宗並隨著讀書延表姪蔣上舍維垣教之從弟顯吉原吉再從姪建禾蔣表弟曜西汪甥楷屠甥景儀及桂陽李秀才萬坤先後至署佐理閱文及幕中雜事是歲得詩七十餘

首

五十八年癸丑先生四十八歲在貴州任二月出巡上游
歲試安順南籠大定遵義四府五月回署六月歲試貴
陽府八月出巡下游歲試平越思南石阡鎮遠思州銅
仁六府十一月回署先生每課士皆終日坐堂皇評隲
試卷積弊悉除又麻試諸府皆拔其尤者送入貴陽書
院肄業一歲捐廉俸數百金助諸生膏火又購經史足
本及文選通典諸書俾資諷誦其在省日每月必自課
之令高等諸生進署講貫詩文娓娓不倦款以飲饌獎
之銀兩由是黔中人士皆知勵學好古甲寅乙卯兩科
書院諸生中式者至五十餘人內如胡吏部萬清花給

諫杰黃大令鶴何編修應杰張工部本枝邱編修煌翟
編修錦觀徐進士時英蘇大令廷棻焦進士承煒劉進
士煜兄弟賀進士世清等連翩擢第餘皆領鄉薦及登
拔萃科以去五六年間所識拔之士無仍爲諸生者是
歲具摺奏請以禮記鄭康成注易陳灝奉

旨交部議奏爲部臣所格不行凡得紀游詩及雜文共百五十

首著意言二十篇

五十九年甲寅先生四十九歲在貴州任二月出巡下游
歲試都勻黎平二府都勻試畢陸行至三脚壘由都江
舟行古之牂柯江也至古州復登陸時彭提督廷棟兼
攝古州總兵與孫司馬鑑出迓邀游五榕山入諸葛洞

時方仲春百卉齊放菜甲花黃及一二十里先生嘗云
江南無此春景也畱一日始行沿路苗寨中皆合隊出
迎男吹蘆笙衣錦衣插雉尾女則衣黑襜褕以銀圈飾
頸富者至一二十圍晚至館驛必東西列亭下唱歌以
荷包及銀犒之方去黎平以歲科並試畱四十日乃行
中途麻游南泉山少寨洞獅子崖諸勝奇麗皆目所未
睹先生並有游紀三四五月科試鎮遠思州銅仁思南
石阡平越都勻七府五月十四日返署先一日長孫穀
曾生八月值甲寅

恩科錄送士子入闈九月科試上游安順南籠二府十一月回

署是歲所得詩文百餘篇著釋歲釋舟二篇

六十年乙卯先生五十歲在貴州任正月十九日布政使
以下奉邀巡撫馮公及先生至城南甲秀樓張讌放燈
酒半得銅仁苗石柳鄧戕官起事耗署按察使張公繼
辛貴東道尼堪富什渾公聞信卽行甫曙馮公繼往自
此至任滿入都苗氛未清數公並在軍營時有書函往
復頗叅規畫焉三月科試大定遵義二府五月回署六
月科試貴陽府八月值乙卯正科錄送士子入闈九月
以將報滿蔣宜人先率子婦回里十一月十日先生自
省城啟行督撫密摺陳奏聲名以爲清廉愛士數十年
所未有諸生送者自圖寧關至貴定三日中常不絕熊
生煥章楊生大奎隨行皆新中式無力入都者十五日

抵鎮遠新任學使談君祖綬亦至當卽交印由洪江進
發十二月抵辰州晤湖督畢公沅湖南巡撫姜公晟十
九日抵荊州姻家崔太守龍見以公事出晤崔浣青恭
人錢上舍伯垌兄弟廿四日抵襄陽晤房師安襄鄖道
王公奉會除夕抵河南南陽府度歲是年得詩數十首
著貴州水道攷三卷門下士爲先生校刊附鮎軒卷施
閣二集

嘉慶元年丙辰先生五十一歲元日偕南陽鎮總兵袁果
南陽府知府完顏岱等至

惺殿行朝賀禮初二日上道初七日至滎澤過河半渡風大
作舟幾覆薄暮仍返南岸因步行攜從子悼孫及兩門

生至惠濟橋行館草宿越一日月夜復渡河夜半忽冰
凌大下衝舟至四十里外方得泊明蚤復至滎陽驛索
人夫帆纜始成行午刻抵北岸十四日抵安陽晤同年
趙大令希璜元夕宿磁州廿八日入都廿九日詣宮
門覆

命時先以任滿日黔省督撫保奏過優蒙

諭見面時題奏當日軍機處將原摺先遞旋即

召見

諭問黔中課士情形黔楚苗匪近狀民情安擾官吏賢否甚悉

又

垂詢祖父兄弟并甲第師生良久方遣出是年以

皇上登極

恩詔贈先生父承德郎母安人復以本身妻室應得

封典贈祖父母如例二月僦寓兵馬司前街四月散館一等

奉

旨留館六月派本衙門撰文七月派克 咸安宮官學總裁入

月移寓沙土園八角琉璃井官房有亭池樹石之勝是

歲得詩約百首

二年丁巳先生五十二歲在京供職二月廿四日長孫女

生三月初三日奉

旨在上書房行走侍 皇曾孫奕純讀書即日移寓澄懷園近

光樓下五月

恩賜葛紗宮扇香串藥定有差蔣宜人率子婦等抵都八月丁

酉朔

皇上糴奠于太學奉

旨借李編修鈞簡石修撰韞玉王編修宗誠分獻後殿是日四

子胥孫生其母侍姬鄭氏  人蔣宜人前以多病爲

先生購得之命隨入都侍巾櫛焉十月仲弟以嗣母余

太孺人年邁乞養歸先生垂淚送之自此亦有歸志矣

十二月

恩賜

御書福字風羊鹿尾諸品有差是歲得詩文七十餘首刊東晉

甌域志竣

三年戊午先生五十三歲在京供職元夕後仍遷入澄懷
園直廬正月十二日仲弟副使君卒于里門二月廿七
日大考翰詹諸員於

正大光明殿

欽命題爲井鮒賦春雨如膏詩征邪教疏先生於疏內力陳內
外弊政至數千言情詞剴切閱卷者皆動色初擬二等
前列旋置三等二名三月初二日引

見蒙

高宗純皇帝記名時甫得仲弟凶訃痛哭不食者累日卽於初七
日陳情引疾二十五日挈家屬從陸路南回四月二十
五日抵里哭仲弟於厝舍五月詣蘇州哭畢公沉於其

墓七月望日送舅氏曙齋先生暨長子飴孫至江寧鄉
試九月榜發飴孫中式第四十二名舉人曙齋先生亦
以年過八十循例

欽賜舉人十月因長子飴孫至高淳謁房師張君其縉先生偕

至宐興徧游善卷龍池之勝旋即歸里初十日叔母余
太孺人卒先生經理喪事踰月不出戶庭十一月至杭
州訪阮學使元秦觀察瀛寓西湖漱石居半月而歸十
二月葬余太孺人於前橋先塋并卜葬仲弟於塋南計
家村是歲得詩文約百首刻十六國疆域志竣

四年己未先生五十四歲在里門正月爲洞庭包山之游
回舟復至香雪海探梅月杪返里二月驚聞

高宗純皇帝升遐以

內廷翰林例應奔赴隨卽束裝北上三月初二日抵都奉

旨在

觀德殿隨班哭臨因赴本衙門銷假暫寓同年戴刑部敦元

鐵廠寓齋四月派克

實錄館纂修官偕總裁諸公首先訂定條例承纂第一分書卽

高宗純皇帝初登極時事也是月以

高宗純皇帝升祔

太廟

恩詔贈先生父奉直大夫母宜人本身妻室並請

封典如例克己未科會試磨勘官

殿試受卷官五月奉

旨教習己未科庶吉士分課湯君金釗張君惠言貴君慶等十

四人移寓

西華門南池子關帝廟八月第一分

實錄告成先呈

御覽先生以春初束裝匆遽在都車馬衣履一切未具遂于二十日在本衙門乞假已准擬於九月初二日叩送

高宗純皇帝梓宮後南行時川陝餘匪未靖湖北安徽尙率兵防堵時發

諭旨籌餉調兵先生目擊時事晨夕過慮每聞川陝官吏偶言軍營情狀感嘆焦勞或至中宵不寐自以曾蒙

恩遇不當知而不言又以翰林無言事之責不應違例自動章
奏因反覆極陳時政數千言於二十四日上書 成親
王及座師吏部尙書朱公珪左都御史劉公權之冀其
轉達

聖聽發書後始以原稿示長子飴孫告以當弃官待罪是日宿
宣南坊蓮花寺與知交相別同人皆懼叵測先生議論
眠食如常二十五日卽經 成親王等將原書先後進
呈奉

旨傳至軍機處指問旋有

旨落職交軍機大臣會同刑部嚴審定擬具奏二十六日王大
等在都虞司設問並面傳

諭旨洪亮吉係讀書人不必動刑先生感激

聖恩秋地痛哭一一如問指陳無隱當經 王大臣等擬以大

不敬律斬立決奉

旨免死發往伊犁交將軍保寧嚴行管束二十七日卽行時事
出倉猝車馬行李俱無所出姻家崔大令景儼方在都
門謁選偕同年王編修蘇同里莊上舍曾詒等日夜捩
揣滿洲侍郎成格公時官戶部主事素未識先生自以
屋券質銀三百兩爲助方得成行計在刑部三日夜及
自刑部至兵部暨出彰儀門慰問者不絕於道其中多
有未經識面者先生一一謝之崔莊二君及同里張庶
常惠言陶孝廉登瀛皆送至蘆溝橋信宿而返二十八

日至良鄉遣長子飴孫旋里支持家事遂挈二僕一車夫以行統計自京師至西安二千六百五十里計程二十六日自西安至蘭州一千六百九十里計程十八日自蘭州至肅州一千四百七十里計程十八日自肅州嘉峪關至伊犁萬一千里計程七十二日先生行篋蕭然資斧屢見匱乏賴故交素識殷勤贈贖饋食解衣始得過行抵戍在直隸山西則如李大令景梅蔣刺史榮昌陳大令曰壽在陝西則如朱太守勳莊刺史忻費大令溶錢州判站在甘肅則如楊戶部芳燦布政揆姜按察開陽唐大令以增周二尹能珂皆先生素交也十月初八日抵西安重僱車馬留三日乃行十一月初四日

抵蘭州十二月初一日抵肅州重僱出關長車除夕在
鎮西府度歲事皆詳遣戍伊犁雜記是歲得詩一百四
十首自西行以後遵

旨不飲酒不賦詩

五年庚申先生五十五歲在伊犁途次正月二日自鎮西
府西行十六日抵烏魯木齊二月初十日抵伊犁惠遠
城自八月二十七日由都起程至是凡行百六十一日
始抵戍所先是伊犁將軍保寧妄測

聖意於未到之先先遞奏摺中有該員如蹈故轍卽一面正法
一面入奏等語奉

殊眦此等迂腐之人不必與之計較保公之意始息到日派辦

冊房事務并給西城官墅一所先生自抵伊犁除謁見將軍外蹤跡不出戶庭所居環碧軒高柳百株亭亭蔽日軒下谿水四周暇則靜坐攤書間或巡欄閒步而已是年四月 京師亢旱

皇上虔禱

三壇祈求雨澤因

命清理庶獄分別減等又

赦刑部及各省詳查永遠監禁人犯分別省釋其在新疆年久未經釋回者俱分別開單候

旨加恩先生以到戍未及三年例不開列自四月二十四日

皇上親禱

社稷壇之後經旬尙未得雨閏四月初三日因奉

上諭從來聽言爲郅治之本拒諫乃失德之大朕從不敢自作聰明飾非文過採擇羣言折衷而用兼聽並觀惟求一是而已去年編修洪亮吉既有欲言之事不自具摺陳奏轉向成親王及朱珪劉權之私宅呈送原屬違例妄爲經成親王等先後呈進原書朕詳加披閱寔無違碍之句仍有愛君之誠惟視朝稍宴小人熒惑等句未免過激令王大臣等詢問擬以重辟施恩改發伊犁然此後言事者日見其少卽有言者亦論官吏之常事而於君德民隱休戚相關之實絕無言者豈非因洪亮吉獲咎鉗口不敢復言以至朕不聞過下情復壅爲害甚鉅洪亮吉所論實足啟沃朕心故銘諸座右時常觀覽若實有悖逆亦不能褻法沽名不過違例奔競取巧營私之咎况皆屬子虛何須

置辨而勤政遠佞更足警省朕躬今特明白宣諭王大臣并洪亮吉原書使內外諸臣知朕非拒諫飾非之主實爲可與言之君諸臣倖遇可與言之君而不與言夫失致君之道負朕求治之苦心矣王大臣看此諭先行廻奏仍各殫心竭思隨時密奏軍機大臣卽傳諭伊犁將軍保寧將洪亮吉釋放回籍等因欽此是日午刻

皇上硃筆親書

諭旨交軍機頒發中外下午以後同雲密布卽得甘霖
御製得雨敬述詩紀事

御製詩注有納言克己乃爲民請命之大端本日親書諭旨將去年違例上書發往新疆之編修洪亮吉立予釋回宣諭中外

并將其原書裝潢成卷常置座右以作良規正在頒發是夜子時甘霖大沛連宵達晝旋據報近郊入土三寸有餘保定一帶亦皆深透

天鑒中誠捷於呼吸可感益可畏也等語是月二十七日先生在
伊犁欽奉

諭旨於將軍署庭涕泣叩首恭謝

聖恩訖卽呈明將軍以五月初一日東還統計居伊犁僅及百
日同人言自闢新疆以來漢員

賜環之速未有如先生者有紀

恩詩四首記事同人皆贈詩送別二十日抵烏魯木齊六月初
六日抵哈密二十一日抵肅州換車而行七月十三日

年譜
抵蘭州十六日次孫宛曾生是月杪抵西安八月十六日抵開封九月初七日抵里親故語舊幾如隔世因自號更生居士十二月小除夕女紡孫適江陰繆氏繆罈梓入贅於家是歲得詩九十五首補作伊犁紀事等詩九十七首雜文十四篇著天山客話二卷紀程二卷外

家紀聞二卷

六年辛酉先生五十六歲在里門自二月以後偕里中耆宿爲壺牒之會每逢花辰令節與趙觀察翼莊宮允通敏徵君宇遠蔣通守騏昌吳封君端彝陳大令賓蔣表兄廷耀等往還唱酬無間每歲皆然其於莊大令述祖臧明經鏞堂則時時相與商榷經義屢有辨證焉五月

十三日孫宛曾殤六月避暑焦山定慧寺詩僧慧超巨
超皆從論詩同年曾都轉煥邀遊揚州平山堂數日仍
返焦山七月孫總戎廷璧邀游太湖東西二山遂至消
夏灣觀荷十月松大道李觀察廷敬邀游吳淞江鎮洋
汪庶子學金邀游趣園遂自蘇州徧游婁東諸勝而返
是歲得詩二百十九首文三十一篇

七年壬戌先生五十七歲在里門旌德譚君子文居下洋
鎮自建洋川書院延課諸郡生童聘先生主講席遂以
二月攜第三子符孫壻繆梓至洋川與諸生講經談菘
每至宵分遠近聞風從游者日衆四月旋里八月青陽
陳明經蔚邀游九華麻天臺東巖諸勝復游黃山浴朱

砂泉重至洋川書院十月旋里十九日蔣宜人卒有悼
亾八首記事作蔣宜人行狀十二月吳江徐待詔達源
邀遊黎里旬餘而返先生自塞外歸尤喜導揚後進每
遇世交子弟才藻過人者輒向名公鉅卿稱道不置同
里如劉編修嗣綰莊上舍曾詒黃孝廉載華丁明經履
恆陸孝廉繼輅秀才耀適黃上舍乙生莊秀才綬甲周
孝廉儀曄陸上舍鏞高秀才星紫瞿孝廉溶等皆得獎
勵之益其專心古學者如劉孝廉逢祿董上舍士錫諸
人則以漢魏諸儒昂之其在蘇州松江鎮江徽州寧國
池州及浙江東西諸郡簪屐所至從游最多每有異才
必加獎許其尤邀心賞者至折輩行相交請質文字纍

彙常盈几案至有數千里轉輾介紹以求詩文題字者如雲南師大令範袁明經揆四川郭主簿蘭芬等不可勝計至如羽士緇流素工吟咏者亦欲得一言以爲幸偶歸里中及所過之地戶屢恆滿樽酒過從論文考古動輒移晷先生不憚其煩也是歲得詩百七十七首文三十五篇著左傳詁二十卷

八年癸亥先生五十八歲在里門正月同年會都轉煥過訪因偕同里趙觀察翼劉宮贊種之莊宮允通敏舅氏曙齋先生莊庶常誥男謝庶常齡爲詞館之會畱燕數日始行二月嵯政額勒布公聘主揚州梅花書院因游京口諸山遂至平山堂看梅四月以揚州講席酬應較

繁辭之而歸仍赴洋川書院是月廿八日次孫女生五月旋里六月至焦山定慧寺避暑旬餘而返八月仍赴洋川書院十一月自洋川由水程沿江至蕪湖張太守祥雲陳孝廉懿本畱游後湖蠓磯諸勝遂訪孫觀察星衍於江寧月杪旋里偕同里諸公爲消寒雅集杯酒往還更迭置讌十二月復游上海偕李觀察廷敬及幕中諸客爲消寒會旬日返里十二日葬蔣宜人于前橋先塋昭穴復遷塋仲弟副使君於穆穴先生自營生壙戒子孫毋得更葬爲詩以記之葬事旣畢因至句容茅山徧游青元館華陽岡乾元觀與舊友王司馬周南談燕竟日而返是歲於宅西西圃小築泉石創曙華臺更生

齋得詩二百九十九首文三十二篇刊竣乾隆府廳州
縣圖志五十卷著比雅十二卷

九年甲子先生五十九歲在里門正月率長子岱孫弔平
學使恕於江陰同年邢大令澍邀游長興龍華寺遂泛
湖至長興自長興訪王少寇昶於青浦李觀察廷敬復
邀游上海徧訪南園吾園及葉氏也是園三月重赴洋
川書院四月自洋川至歙縣洪源謁先祠展大同府君
之墓五月旋里初七日第五子麟孫生六月送書院諸
生至江寧鄉試畱居報恩寺精舍匝月八月重游上海
李觀察邀同先生及吳祭酒錫麒祝編修莖趙表弟懷
玉諸人以中秋夜泛月至吳淞江飲宴達旦各有詩紀

事十月如臯汪觀察爲霖邀游北園遂偕登狼山絕頂望海訪水繪園故址回塗溯江復至焦山小憩十二月至蘇州游天平支喇諸山久住吾與菴遂往鄧尉香雪海探梅而返是歲得詩二百五十九首文二十一篇

十年乙丑先生六十歲在里門正月自宜興渡太湖至長興偕詩僧巨超游下山遂自湖州至天台徧游天台石梁赤城瓊臺諸勝宿桐栢宮國清寺數日而返三月涇縣李大令德淦聘修縣志設志局於蕭公祠先生日與縣人趙舍人良霽廣文紹祖左明經煊朱廣文煥等訂定志例酬酢往還無間五月旋里六月重至涇縣志館八月旋里復爲太湖包山之游徧訪石公山林屋洞緣

楊灣諸處九月三日爲先生周甲初度長子飴孫等於
里第授經堂稱觴二日初十日第三子符孫娶婦崔氏
乾隆辛巳進士分巡湖北荆宜施道永濟崔君龍見之
孫乾隆壬子科副榜貢生甘肅兩當知縣景儼之女也
十月由京口溯江至星子縣登匡廬絕頂自香爐峰厓
石門澗天池佛手巖黃龍澗秀峰寺諸勝回塗重至涇
縣是月七日次孫女殤十二月旋里是歲得詩三百四
十三首文二十二篇

十一年丙寅先生六十一歲在里門正月至杭州以元夕
泛舟西湖遂至餘杭縣徧游徑山大滌山諸勝宿洞霄
宮回舟復至邵尉看梅二月寧國魯太守銓聘修寧國

府志設志局于城北戚氏故居先生以涇縣志事將成
 命長子飴孫先往編校自留寧國訂定條例間訪敬亭
 南湖之勝四月自寧國至涇縣由水程旋里五月復至
 寧國七月自寧國至涇縣遂由旌德太平往游黃山浴
 朱砂泉宿紫雲菴復自黟縣祁門溪行至崇安縣游武
 夷山徧麻九曲溪及天樞玉女諸峯入桃源紫雲洞自
 上饒玉山舟行旋里是月四日孫凱曾生第三子符二
孫所生
 十三日第三子婦崔氏卒八月二十三日孫彪曾生長子
節孫所生十月重赴涇縣十一月以涇縣志告成自涇縣至
 寧國塢繆梓補江陰縣學生十二月由寧國旋里是歲
 得詩三百十七首文二十二篇著六書轉注錄八卷編

纂涇縣志三十二卷

十二年丁卯先生六十二歲在里門正月往游金焦二山
小憇定慧寺二月舟行至於潛縣游東西天目山宿禪
源寺數日而返重赴寧國志局第三子符孫侍行五月
旋里避暑焦山定慧寺六月重至寧國是月二十日次
女生二十二日側室鄭氏卒七月自寧國至江寧八月
嘉興李太守賡芸邀游煙雨樓遂游常熟虞山至嘉興
復渡浙江至紹興登北榦山訪快閣天池之勝十月重
至寧國十一月以府志告成自寧國旋里是歲常州大
旱秋霧復傷稼禾苗不成飢民皇皇城邑尤甚先生首
請于蔣太守榮昌及武進陽湖兩明府設局營田廟捐

資施賑先生總理局事自捐三百金爲倡餘按城鄉各
商賈殷戶酌資勸捐每日卯刻入局漏下一二十刻始
返風雨無間又慮賑鬻賑米有疾疫及狼藉粒米之虞
於是改賑以錢自十二月至戊辰四月每月放賑一次
計在局四閱月凡捐銀一萬七千九百餘兩錢十萬六
千四百餘千所賑飢口二十萬四千九百六十餘其鄉
歸鄉辦者不在此數閭閻稍蘇而災厲不作鄉人感之
是歲得詩二百九十二首文二十四篇編纂寧國府志

五十卷

十三年戊辰先生六十三歲在卑門二月六日偕陽湖畢
明府開煜在武廟放第二次賑三月十六日偕陽湖馬

明府紹援在西廟放第三次賑是月自江陰渡江至通州遊雲台山及狼山登支雲塔觀海四月十八日偕馬明府在武廟放第四次賑是月至杭州小住湖上游雲棲理安諸寺回舟復觀吳門競渡而返六月避暑焦山定慧寺是月二十日適芮氏伯姊卒先生哭之慟浹旬不出戶庭八月率第三子符孫至江寧鄉試回塗復至揚州訪友重憇焦山以中秋月夕徧游月波臺巨公崖與詩僧巨超等談游竟夕十月江行至漢陽訪洪山南湖晴川黃鶴之勝月杪旋里十二月游荆溪南山入張公洞里許而還初五日孫序曾生第三子符孫妾戈氏所生是歲靖江朱方伯勳居憂寓郡中先生偕方伯及其客陳司馬

玉鄰唱酬往來最數得詩二百七十一首文二十篇
十四年己巳先生六十四歲在里門正月至蘇州鄧尉看
梅久憇吾與菴三月重游焦山小憇定慧寺及海門菴
四月廿二日先生偶患脇疾服醫家消導之劑月杪漸
愈五月初五日脇痛復劇飲食漸減猶日坐歲寒堂未
嘗偃臥有問疾者皆自謝之初九日服醫家降伐之劑
脇痛未減時有喘逆十二日氣息漸微家人環問頻云
無所苦彌留之際老媪抱幼孫彪曾侍側呼先生猶徐
應之未刻先生卒越一日殯于北江草堂子怡孫等以
是年十二月二十四日申時葬先生于武進縣德澤鄉
前橋祖塋昭穴

卷施閣文甲集卷第一

陽湖洪亮占學

意言二十篇

父母篇第一

生死篇第二

百年篇第三

禍福篇第四

剛柔篇第五

治平篇第六

生計篇第七

百物篇第八

修短篇第九

鬼神篇第十

天地篇第十一

夭壽篇第十二

僊人篇第十三

喪葬篇第十四

好名篇第十五

守令篇第十六

吏胥篇第十七

文采篇第十八

真偽篇第十九

形質篇第二十

父母篇

人有百年之父母有歷世不易之父母百年之父母生我者是也歷世不易之父母天地是也人何以生無不知生于父母也人何以死亦可知仍歸于父母乎且人之生稟精氣于父稟形質于母此其所以生也及其死歸精氣于天歸形質于地此其所以死也離百年之父母歸歷世不易之父母雖有孝如魯參孝已者亦何事悲乎且我未歸之先我百年之父母先已歸歷世不易之父母矣則我無論生無論死亦何嘗有離父母之一日乎難者曰人無離父母之一日則吾之生吾之死父母主之乎抑歷世不易

之父母主之乎曰皆不能也夫生于土而死于土者林木是也生于水而死于水者魚鼈是也及問其所以生所以死之故林木不知魚鼈不知水與土亦不知則人之生死即歷世不易之父母亦安得知之乎且以吾視之所謂歷世不易之父母似今古如一矣安知不又有消長代謝于其間耶是歷世不易之父母尚不能不流轉于氣數之中而況乎所生者也魚鼈之生也若與水無預而卒不能離水以求生林木之生也若與土無預而究不能離土以求活人之生也若與天地無預而亦不能外天地以自存是則所謂父母而已當其偶然而生是天地間多一我也多一我而天地之精氣不加減及其倏然而死是天地間少

一我也少一我而天地之精氣不加增卽積而爲千我焉積而爲萬我焉其生與死之數于天地亦不能少有所增減也林木與土相忘故能遂其生魚鼈與水相忘故能畢其命人與天地相忘故能終其天年且不特此也天地自生人以來皆與之相忘矣故來也無所凝去也無所滯不啻率億萬子姓之同過于逆旅也然雖相忘而實未嘗相離卽云有生死乎人雖亾而精氣不亾精氣不亾是人亦不亾矣人不亾則直與天地同燬耳吾故曰未嘗有離父母之一日也

生死篇

生者以生爲樂安知死者不又以死爲樂然未屆其時不

知也生之時而言死則若有重憂矣則安知死之時而言
生不又若有重憂乎生之時而貪生知死之後當悔也死
之時而貪死知生之後又當悔也抑謂死而有知耶死而
有知則凡死者皆有知吾將以死覲吾親戚合吾良友見
百年以內所未見之人聞百年以內所未有之事是死之
樂甚于生也且吾有形質即有疾病欣戚今無形質矣是
寒暑所不能侵也哀樂所不能及也適孰如此也以爲死
而無知耶吾嘗飲極而醉焉醉之樂百倍于醒也以其無
所知也吾嘗疲極而臥焉臥之樂百倍于起也以其無所
知也適孰如此也又或如列子之言死之與生之往一返
死于此者安知不生于彼是始生之日即伏一死之機雖

自孩提焉少壯焉耄耄焉皆與死之塗日近不至于死不止也因是知死之日亦即伏一生之機雖或暫焉或久焉或遲之又久焉皆與生之途日近不至于生不止也然則吾于人之始生當弔之以爲日復一日去死之途不遠矣于人之死也當賀之以爲雖或久或暫然去生之途不遠矣吾安知世不以吾之以死爲可賀以生爲可弔爲惑耶吾又安知不有人以世之以生爲可樂以死爲可悲者爲更惑耶

百年篇

生年至百者少吾欲驗百年之境于一日內驗之而已鷄初鳴人初醒時孩提之時也發念皆善生機滿前覺吾所

欲爲之善若不及待披衣而起者日旣出人旣起之時猶弱冠之時也沈憂者至此時而稍釋結念不解者至此時而稍紿耕田者入田讀書者入塾商賈相與整飭百物估量諸價凡諸作爲百事踴躍卽久病者較量夜間亦覺稍減日之方中飢者畢食出門入門事皆振作蓋壯盛之時也夫精神者人之先天也飲食者人之後天也日將午正陰陽交嬪之時則先天之精神有不能不藉後天之飲食以接濟者矣然先天爲陽陽則善念多故有人鬱大忿于胸匿甚怒于內至越宿而起而忿覺少平怨覺少釋甚或有因是而永遠解釋者非忿之果能平怨之果能釋則平且以後之善念有以勝之也是陽勝陰也至後天爲陰陰

則惡念生好勇鬥狠之風徃徃起于酒食醉飽之後亦猶
聖人所云壯之時血氣方剛戒之在鬥正此時也是陰勝
陽也又一生之事業定于壯盛之時一日之作爲定于日
午之候過此雖有人起于衰暮事成于日昃者然不過百
中之一不可以爲例也至未申以後則一日之緒餘猶人
五六十以後則一生之緒餘力強者至此而衰心勤者
至此而懈房帷之中晏晏寢息是衰莫之時也于是勇徃
直前者至此而計成敗徑直不顧者至此而慮前後沉憂
者至此而益結病危者至此而較增視日出之時判然如
出兩人矣非一人之能判然爲兩則一日之陰陽昏旦有
以使之然也此一日之境也即百年之境也苟能靜體一

日之境則百年之境亦不過如是矣

禍福篇

人即有不孝于家不弟于室者未有不畏官法人即有不孝于家不弟于室者未有不畏鬼神二者較之其畏官法也尚覺有不可奈何至畏鬼神也則出于中心之誠而已然其畏鬼神者謂畏其聰明正直乎抑畏其能作禍福乎必曰畏其能作禍福耳然如果有鬼神如果能作禍福則必擇其可禍者禍之可福者福之而已有人于此孝于家弟于室而不奉鬼神鬼神能禍之乎則知有人于此不孝于家不弟于室而日日奉鬼神鬼神亦能福之乎然人之于鬼神也明知不能福而其奉之也究不敢改其于父兄

也明知當孝當弟而不孝不弟也亦究不改則鬼神不特
尊于官法並尊于長上矣且世人見慢鬼神者必耳而目
之以爲必得陰譴見人之不孝不弟者雖亦心知其非而
權其輕重覺比之慢鬼神者罪尚可減則本未倒置之甚
矣吾故曰人能以畏官法之心畏其父兄則可謂知所畏
矣人能以敬鬼神之心敬其父兄則又可謂知所敬矣又
世俗之言曰雷誅不孝故凡不孝不弟者畏鬼神並甚畏
雷不知不然也夫古來之不孝者莫如商臣冒頓未聞雷
能殛之也雷所擊者皆下愚無知之人下愚無知之人即
不孝雷應怒之矣雷能怒商臣冒頓而不能怒下愚無知
之人豈雷亦畏強而擊弱乎畏強而擊弱尚得謂雷乎世

又言雷誅隱惡刑罰之所不到者雷則取而誅之夫人有
隱惡亦卽有陰德有隱惡而刑罰不及者天必暴其罪以
誅之以明著爲惡之報則有隱德而獎賞所不及者天亦
當表其德以賞之以明著爲善之效記云爵人于朝與衆
共之刑人于市與衆棄之天既設雷霆之神于衆見衆聞
之地殺人以明惡無可逃則又當設星辰日月之神于衆
見衆聞之地福人以明善必有報而後天下之人始曉然
于人世賞罰所不及者天亦得而補之也若云天殺人則
使人知天福人則不使人知則無以勸善矣無以勸善非
天之心也不賞善而專罰惡亦非天之心也今既無星辰
日月之神福人則所云雷霆殺人者亦誣也吾故曰天不

命雷擊人鬼神亦不能禍福人文子之言曰倚于不祥之木爲雷霆所撲爲雷所擊者皆偶觸其氣而殞非雷之能擊人也雷不能擊人鬼神亦不能禍福人而人顧舍其父兄長上而畏雷霆鬼神不亦舛乎

剛柔篇

世傳老子見舌而知守柔而以爲柔之道遠勝剛非也老子之言曰齒堅剛則先弊焉舌柔是以存不知一人之身骨榦最剛肉與舌其柔者也人而委化則肉與舌先消釋而後及齒與骨是則齒與骨在之時而舌與肉已不存矣老子存亾先後之說非臨沒時之謬論乎不特此也以天地之大言之山剛而水柔未聞山之剛先水而消滅也以

物之一體言之則枝葉柔而本剛未聞本之先枝葉搖落也且天不剛無以制星辰日月地不剛無以制五嶽四瀆人不剛無以制百骸四體孔子曰吾未見剛者又曰剛毅木訥近仁孟子曰其爲氣也至大至剛剛之德可貴如此而守柔之說何爲乎且日有剛有柔未聞人以剛日出則凶柔日出則吉也人之性有剛有柔未聞剛者常得凶而柔者常得吉也語有之籩籛之人口柔戚施之人面柔夸毗之人體柔使柔而得吉則籩籛戚施之人攸徃咸宜矣而不然也老子號有道者豈爲此不然之論以誑世乎此蓋道家者流託爲老子之言以自售其脂韋醜忝之術耳何以見之說苑云韓平子問叔向曰剛與軟孰堅對曰臣

年八十齒再墮而舌尚存若以時論之叔向尚在老子之前必不反引老子之說以爲說明矣明舊有是言而道家者流竊其說以欺世又託之于老子並託之于商容皆不足信者也若必曰彘可勝剛則吾寧爲龍泉太阿而折必不爲游藤引蔓以長存者矣

治平篇

人未有不樂爲治平之民者也人未有不樂爲治平既久之民者也治平至百餘年可謂久矣然言其戶口則視三十年以前增五倍焉視六十年以前增十倍焉視百年百數十年以前不啻增二十倍焉試以一家計之高魯之時有屋十間有田一頃身一人娶婦後不過二人以二人居

屋十間食田十頃寬然有餘矣以一人三計之至子之世而父子四人各娶婦即有八人八人即不能無傭作之助是不下十人矣以十人而居屋十間食田一頃吾知其居僅僅足食亦僅僅足也子又生孫孫又娶婦其間衰老者或有代謝然已不下二十餘人以二十餘人而居屋十間食田一頃即量腹而食度足而居吾以知其必不敷矣又自此而曾焉自此而元焉視高曾時口已不下五六十倍是高曾時爲一戶者至曾元時不分至十戶不止其間有戶口消落之家即有了男繁衍之族勢亦足以相敵或者曰高曾之時隙地未盡闢閭屢未盡居也然亦不過增一倍而止矣或增三倍五倍而止矣而戶口則增至十倍

二十倍是田與屋之數常處其不足而戶與口之數常處其有餘也又況有兼併之家一人據百人之屋一戶占百戶之田何怪乎遭風雨霜露飢寒顛踣而死者之比乎曰天地有法乎曰水旱疾疫即天地調劑之法也然民之遭水旱疾疫而不幸者不過十之一二矣曰君相有法乎曰使野無閑田民無剩力疆土之新闢者移種民以居之賦稅之繁重者酌今昔而減之禁其浮靡抑其兼併遇有水旱疾疫則開倉廩悉府庫以賑之如是而已是亦君相調劑之法也要之治平之久天地不能不生人而天地之所以養人者原不過此數也治平之久君相亦不能使人不生而君相之所以爲民計者亦不過前此數法也然一

家之中有子弟十人其不率教者常有一二又况天下之
廣其遊惰不事者何能一一遵上之約束乎一人之居以
供十人已不足何況供百人乎一人之食以供十人已不
足何況供百人乎此吾所以爲治平之民慮也

生計篇

今日之畝約凶荒計之歲不過出一石今時之民約老弱
計之日不過食一升率計一歲一人之食約得四畝十口
之家即須四十畝矣今之四十畝其寬廣即古之百畝也
四民之中各有生計農工自食其力者也商賈各以其贏
以易食者也士亦挾其長傭書授徒以易食者也除農本
計不議外工商賈所入之至少者日可餘百錢士傭書授

徒所入日亦可得百錢是土工商一歲之所入不下四千聞五十年以前吾祖若父之時米之以升計者錢不過六七布之以丈計者錢不過三四十一人之身歲得布五丈即可無寒歲得米四石即可無飢米四石爲錢二千八百布五丈爲錢二百是一人食力即可以養十人即不耕不織之家有一人營力于外而衣食固已寬然矣今則不然爲農者十倍于前而田不加增爲商賈者十倍于前而貨不加增爲士者十倍于前而傭書授徒之館不加增且昔之以升計者錢又須三四十矣昔之以丈計者錢又須一二百矣所入者愈微所出者益廣于是士農工賈各減其值以求售布帛粟米又各昂其價以出市此即終歲勤

動畢生皇皇而自好者居然有溝壑之憂不肖者遂至生
攘奪之患矣然吾尚計其勤力有業者耳何況戶口既十
倍于前則游手好閒者更數十倍于前此數十倍之游手
好閒者遇有水旱疾疫其不能束手以待斃也明矣是又
甚可慮者也

百物篇

人謂天生百物專以養人不知非也水之氣蒸而爲魚林
之氣蒸而爲鳥原隰之氣蒸而爲蟲蛇百獸如謂天專生
以養人則水之中蛟鱓食人天生人果以爲蛟鱓乎林麓
之中熊羆食人天生人果以供熊羆乎原隰之內虎豹食
人天生人果以給虎豹乎蛟鱓能殺人而人亦殺蛟鱓熊

罷虎豹能殺人而人之殺熊羆虎豹者究多于人之爲熊
罷虎豹所殺則一言斷之曰不過恃強弱之勢衆寡之形
耳蛟鱉之力勝人則殺人人之力勝蛟鱉則殺蛟鱉熊羆
虎豹之勢衆于人則殺人人之勢衆于熊羆虎豹則殺熊
羆虎豹若果云天爲人而生則水之中有魚鼈不宜有蛟
鱉矣林麓之中有貂狐貓貉不宜有熊羆矣原隰之中有
麋鹿野獸不宜有虎豹矣解者曰此固非人所常食者也
若家之六畜牛羊豕犬鷄之類則天實爲人而生者矣抑
知亦不然天果爲人而生則當使之馴伏不攪甘心爲人
所食乃可今牛與羊之角有觸人至死者獠犬有噬人至
死者矣豈天之爲人而生者反以是而殺人乎又自唐宋

以來人之食犬者漸少使天果爲人而生則唐宋以來應亦肖人之嗜欲而別生一物不得復生犬矣人之氣蒸而爲蟣蝨馬牛羊亦然蟣蝨之生還而自嚙其膚豈人亦有意生蟣蝨以還而自嚙者乎推而言之植物無知默供人之食而已必謂物之性樂爲人之食是亦不然也

命理篇

人之生修短窮達有命乎曰無有也修短窮達之有命聖人爲中材以下之人立訓耳亦猶釋老造輪回果報之說豈果有輪回果報乎曰無有也輪回果報之有說亦釋氏爲下等之人說法耳何以言修短窮達無命夫天地之內有人亦猶人生之內有蟣蝨也天地之內人無數人身之

內蟣蝨亦無數夫人身內之蟣蝨有未成而遭殺者矣有成之久而遭殺者矣有不遭殺而自生自滅于緣督縫衽之中者矣又有湯沐具而死者矣有滌濯多而死者矣如謂人之命皆有主者司之則蟣蝨之命又將誰司之乎人不能一一司蟣蝨之命則天亦不能一一司人之命可知矣或謂人大而蟣蝨小然由天地視之則人亦蟣蝨也蟣蝨亦人也蟣蝨生富貴者之身則居于紈綺白縠之內蟣蝨生貧賤者之身則集于鶉衣百結之中不得謂居于紈綺白縠者蟣蝨之命當富貴也居鶉衣百結之中者蟣蝨之命當貧賤也吾鄉有蟣蝨多而性卞急者舉衣而投之火夫舉衣而投之火則無不死之數矣是豈蟣蝨之命同

如此乎是亦猶秦卒之坑新安趙卒之坑長平歷陽之縣
泗州之城一日而化爲湖之類也蟻蝨無命人安得有命
然中材以下不以命之說拘之則囂然妄作矣亦猶至愚
之人不以輪囷果報之說怵之則爲惡不知何底矣吾故
曰中人以下不可不信命是聖人垂戒之苦心也亦猶至
愚之人不可不信輪囷果報亦釋氏爲下等人說法之苦
心也亦卽釋氏所恃以不廢之一術也

鬼神篇

鬼神之說上古無有上古之所謂神者山川社稷之各有
司存是也上古之所謂鬼者高曾祖考是也三代之衰始
有非鬼神而謂之鬼神者杜伯之射周宣王趙先之殺晉

厲公以及天神降莘河神崇楚是矣然此直名之爲怪不可言神不可言鬼何也鬼不能以弓矢殺人及壞大門抉寢門皆非鬼所能又聰明正直之謂神豈有天神而與人接談河神而崇人以求食者乎吾故曰三代以上有真鬼神三代以下不聞有真鬼神而有怪鬼神有理怪則無理鬼神者吾當畏之怪者不必畏也不必畏則視吾氣之强弱氣強則搏之氣弱則爲所攝而已人未有見高曾祖考崇其子孫者人未有見山川社稷之神崇其管內之民者也則知鬼神者不害人其爲人害者皆反常之怪耳若怪而名之爲鬼是直以高曾祖考待之也怪而名之爲神是直以山川社稷凡著在祀典者待之也可乎不可乎

天地篇

信如所言則山川社稷風雲雷雨皆有神乎曰無也高曾祖考皆有鬼乎曰無也山川社稷風雲雷雨之神林林總總皆敬而畏之是山川社稷風雲雷雨之神即生于林林總總之心而已高曾祖考之鬼凡屬子孫亦無不愛而慕之是高曾祖考之鬼亦即生于子孫之心而已曰伊古以來有親見山川社稷風雲雷雨之神者又有親見高曾祖考之鬼者則奈何曰此或托其名以示神假其號以求食非真山川社稷之神高曾祖考之鬼也何以言之山川之神本無主名若社稷之神則所謂句龍及后稷也句龍爲烈山氏之子句龍倘有神則應服烈山氏之衣冠后稷者

帝嚳之子也。稷倘有神，亦應服帝嚳時之衣冠。今童巫之見社稷之神者，言服飾一如祠廟中所塑唐宋衣冠之象，則必非句龍后稷明矣。且山川社稷風雲雷雨有神，則天地益宜有神。吾聞輕清者爲天，重濁者爲地。未聞輕清之中更結爲臺殿宮觀及天神之形質也，重濁中更別具房廊舍宇及地祇之形質也。且天苟有神，則應肖天之圓以爲形；地苟有神，則亦應規地之方以爲狀。今世所傳天神地祇之形，則皆與人等是，則天地能造物之形而轉不能自造其形，不能自造其形，乃至降而學人之形，有是理乎？推而言之，華山之形削成而四方，泰山之形岑嶠而軒舉，使皆有神，則華山之神亦應肖削成四方之形，泰山之神

應亦模岑嶠軒舉之狀皆不得學人之形以爲形也至于
鬼之無則又一言以蔽之曰人而爲鬼則已歸精氣于天
歸形質于地矣歸于天者復能使之麗于我乎歸于地者
復能使之塊然獨立一肖其生時乎記有之憊乎如有見
慨乎如有聞又曰臨之在上質之在旁爲人子孫者不忍
自死其高曾祖考則一念以爲有即有矣實則不然也黎
邱之鬼慣倣人子姪之狀潁川之鬼又慣倣人父祖之形
其實豈真子姪豈真父祖乎則世之所言見高曾祖考之
鬼亦猶此矣

天壽篇

夫人之天壽秉于自然未聞保攝之即能多斲削之即能

少也何則禽獸之壽常不及人未聞禽獸之能斲削以人而論富貴者之壽與貧賤者差等貧賤者不能學富貴者之斲削明矣推而言之人有謂服食養氣而卽可以長生者亦斷斷不然夫古之通養生之術明服食之方者莫如軒轅軒轅之壽至堯舜時已不存保嗇神氣調和性情莫如榮啟期抱犢子榮啟期抱犢子至春秋之末已不存今試置兩人于此一則清靜寡欲調神房闈之中一則適性任情馳騫聲色之內究其後則清靜寡欲者之年壽與適性任情者相去必不甚遠何則清靜無欲者非無嗜欲其所秉弱也適性任情者非故不惜其生其所秉強也是則人之夭壽由于所秉之強弱矣然必云所秉之強加以保

攝焉即可長生不死則又不然試以花葉觀之花葉之在樹有不及時而落者矣有過時而後落者矣其灌溉得宜猶人之有保攝也其落之先後猶人所秉之有強弱也而皆不能不落則秉有強弱而歸于盡則一矣又以蟄蟲觀之有桀惡者矣有濡弱者矣或先霜雪之辰而蟄或及霜雪之辰而始蟄蟄有先後而同歸于蟄則一也花葉不能有榮而不悴蟲豸不能有出而不蟄則人又安能有生而不死乎世又謂清虛宗滅之地又有仙仙則不死者也夫仙而在于清虛宗滅之地則必不飲不食而後可也傳曰蠶食而不飲二十二日而化蟬飲而不食三十日而蛻蜉蝣不食不飲三日而死若不飲不食而可不死則蜉蝣不

宜死矣若不飲不食而死即可以緩則蟬蛻不宜三日死矣解者曰仙非不飲食也不火食也記有之曰東方曰夷被髮文身有不火食者矣南方曰蠻雕題交趾有不火食者矣若不火食而可不死則東方南方之人何不皆不死也或曰東方南方之人今已火食則前不火食之時其不死之人今又皆安在也明人之所賴以生者恃有飲食并恃有火食今乃云不飲食不火食即可不死則說正與情理相反矣且人而能仙則應上古中古之時多而後古之時少何今所傳之仙及人所值之仙率皆唐宋以後之人是豈上古中古之仙至唐宋時而盡死今之所爲仙者又適皆唐宋以來數代之人乎夫仙而果又有代謝則無樂

其爲仙矣是又進退失據之論也吾故曰世無仙世亦無
長生不死之人人之命有短長由人氣稟有強弱所致耳
仙人篇

曰世果有仙子肯爲之乎曰不爲也夫生者行也死者歸
也人不可以久行而不歸則人亦不可以久生而不死明
矣試以人之老驗之記曰八十九十曰耄注耄昏忘也百
年曰期頤注老昏不復知服味善惡孝子期于盡養道而
已是人至八十九十年即不死而精神智慧已離不過
徒存形質而已使過此以往則其冥然罔覺者更不知何
如縱云長生不死是徒有生之名而已無生之樂也又嘗
以人之夜驗之人即精神至強至丙夜未有不思偃息者

矣至偃息之候而強其如旦晝時之作爲焉不能也卽或強其作爲其疲憊有不可勝言者矣以是知人卽精神至強至八十焉九十焉百年焉未有不思怛化者矣至怛化之候而強其如少壯時之舉動焉不能也卽或強其舉動而其疲憊亦有不可勝言矣是知朝而作夜而息少而壯壯而老而死皆理之常也且人之欲仙者謂其有知乎謂其無知乎謂其無知則不如死則必曰謂其有知也謂其有知而飲食衣服已不知美惡何況宮室苑囿乎何況妻子仕宦一切所繫戀者乎又釋名云老而不死曰仙仙遷也遷入山也故其字人旁作山是又因年命之長復遭遷徙之苦卽入山不死亦不過如述異記之張光始洞微

志之雞窠老人悟無所知與木石鹿豕同居而已又豈有生之樂乎吾故曰世本無仙卽有仙而不可爲者以此也
喪葬篇

喪葬之制古今人惑雖不同然其爲惑則一也古人之惑空地上以實地下于是一棺之費累及千金一壙之幽藏及百物以爲不如是不足以明人子之心也是其惑尙近于愛親今人之惑營一塚之地或遲及十年謀一穴之吉必訪及百輩于是有至曾元之時尚未及葬其高曾者大率貧賤者尚易而富貴者則益難富貴而骨肉支派少者尚易富貴而骨肉支派多者則愈難至有兄延一客弟聘一師兄購于南弟營于北始則各不相謀繼則各以爲是

喪庭出而復返卜日成而屢移其故云何則祈福之念十
倍于愛親之心爲子孫之謀百倍于爲祖父之計也是則
古人之厚葬尚近于愛親而今人之營塚則實欲爲已謀
爲子孫謀耳其心術之不可問一至此乎又古人喪葬之
所飾不過芻靈楮幣而已今則更增僧尼道士簫鼓饒吹
于是而死喪之家則一室皆滿絲麻袒免之親不及僧尼
道士之衆也袒跣哭泣之哀不及簫鼓饒吹之喧也甚至
有爲附身附棺之具力不及者尚可從減而必借此以飾
觀者矣夫饒吹軍中之樂也鐘鼓管籥吉賓嘉之禮也而
行于喪家可乎尤可恨者僧尼道士所誦之經又必爲解
寃釋罪之語是真視吾親爲愆尤叢集之身不如此則罪

莫可釋寃莫可解也何其以君子之道待僧尼道士而以至不肖者待吾祖若考乎其始愚民爲之其後士大夫踵而行之孔子曰始作俑者其無後乎作俑之害尚至無後吾不知始創延僧尼道士簫鼓鐃吹者又將何如也

好名篇

甚矣名之累人也聖賢能不好名乎孝經曰揚名于後世論語曰君子疾沒世而名不稱焉是聖賢不能忘名也崔杼之惡至弑君而憂其名之傳賈充之惡至戕主而憂其謚之著是大姦大慝仍不能忘名也則名不可好乎曰好名之弊亦尚足以扶世何則人而能好名類皆聰穎拔萃之人也聰穎拔萃之人有賞之不能勸罰之不能懲而名

之一字即足以拘之者矣然則名亦可假乎曰不能也有
聖賢之名有忠孝之名聖之名而可假則莊周列御寇之
徒假之矣賢之名而可假則郭解樓緩之徒假之矣忠孝
之名而可假則王莽趙宣之徒假之矣等而下之至才士
詩文之名亦無不然文有文之精神詩有詩之精神精神
能永百年者則傳至百年焉精神能永之十世五世者則
傳之十世五世焉精神能歷劫不磨者則傳之歷劫而不
磨焉皆非已所能預也已尙不能預而何可以假乎然則
吾欲救天下好名之弊亦惟使之各務實而已語有之實
至者名歸之有聖賢之實者自有聖賢之名而莊周列御
寇之徒不能假也有忠孝之實者自有忠孝之名而王莽

趙宣之倫不能假也有文士之實者自有文士之名而傳
百年傳十世五世及歷劫不磨亦纖屑不能假也

守令篇

守令親民之官也一守賢則千里受其福一令賢則百里
受其福然則爲守令者豈別有異術乎亦惟視守令之居
心而已往吾未成童侍大父及父時見里中有爲守令者
戚友慰勉之必代爲之慮曰此缺繁此缺簡此缺號不易
治未聞及其他也及弱冠之後未入仕之前二三十年之
中風俗趨向頓改見里中有爲守令者戚友慰勉之亦必
代爲慮曰此缺出息若干此缺應酬若干此缺一歲之可
入已者若干而所謂民生吏治者不復挂之齒頰矣乎是

爲守令者其心思知慮親戚朋友妻子兄弟奴僕媪保于
得缺之時又各揣其肥瘠及相率抵任矣守令之心思不
在民也必先問一歲之陋規若何屬員之饋遺若何錢糧
稅務之贏餘若何而所謂妻子兄弟親戚朋友奴僕媪保
者又各挾谿壑難滿之欲助之以謀利于是不幸一歲而
守令數易而部內之屬員轄下之富商大賈以迄小民已
重困矣其間卽有稍知自愛及實能爲民計者十不能一
二也此一二人者又常被七八人者笑以爲迂以爲拙以
爲不善自爲謀而大吏之視一二人者亦覺其不合時宜
不中程度不幸而有公過則去之亦惟慮不速是一二人
之勢不至歸于七八人之所爲不止且有爲今日之守令

而并欲誦三十年以前守令之無術者然吾又嘗驗之三十年以前守令之拙者滿任而歸或罷任而反其贏餘雖不多然恒足以溫飽數世今則不然連十舸盈百車所得未嘗不十倍于前也而不十年不五年及其身已不能支矣無待其子孫也則豈前之拙者誠拙而今之巧者誠巧乎亦居心微有不同者乎

吏胥篇

今日之勢官之累民者尙少吏胥之累民者甚多何則今之吏胥非古之吏胥也三代以前府史胥徒庶人在官者是矣漢以來諸曹掾史三老嗇夫游徼亭長里魁什伍等類是矣三老掌教化嗇夫主知民善惡爲役先後知民貧

富爲賦多少游徼掌徼巡禁司姦盜亭長主求捕盜賊承
望都尉里魁掌一百家什主十家伍主伍家以相檢察而
已三代時府史胥徒之賢者即可遞升爲上士中士下士
漢以來三老嗇夫掾史之賢者即可遞升爲丞尉守令其
人又皆通曉經術明習法令不特不至擾民或尙可有益
于民今則不然由吏胥而爲官者百不得一焉登進之途
既絕則營利之念益專又自唐宋以後流品日分凡世門
望族以及寒俊之室類不屑爲吏胥其爲之而不顧者不
過四民中之奸桀狡僞者耳姓名一入卯簿則或呼之爲
公人或呼之爲官人公人官人之家一室十餘口皆鮮衣
飽食咸不敢忤其意其始鄰里畏之四民畏之甚至士大

夫亦畏之。若有奸狡桀出把持官府之人，則官府亦畏之矣。何則？官即欲侵漁其民，未有不假手于吏胥者。又況吏胥之于鄉里，其貧富厚薄，或能瞞官不能瞞吏。自一金至百金千金之家，吏皆若燭照數計。究之入于官者什之三，其入于吏胥者已十之五矣。不幸一家有事，則選其徒之壯勇有力機械百出者，蠶擁而至，不至破其家不止。即間遇有吏胥之親戚故舊，亦必不稍貸，是其權上足以把持官府，中足以凌脅士大夫，下足以魚肉里閭子。以傅子孫，以傳孫，其營私舞弊之術益工。則守令閭里之受其累者，益不淺則奈何？曰：此輩即必不可少，亦惟視其必不可少者留之餘，則寧缺無濫而已。蓋吏之暴如虎，與其使一州

邑多數十百虎也毋寧減之又減今州縣之大者胥吏至千人次至七八百人至少亦一二百人此千人至一二百人者男不耕女不織其仰食于民也無疑矣大率十家之民不足以供一吏至有千吏則萬家之邑亦囂然矣夫朝廷之正供有常卽官府之營求亦尙有數而胥吏則所謂無厭者也况守令所以得罪者大半由吏胥始則導之貪導之酷導之歛怨于民及至守令陷于法而爲吏胥者不過笞杖而已革役而已至新舊交代之時則又夤緣而入故吳越之俗以爲有可避之官無可避之吏職是故也然則有牧民之責者可不先于胥吏加之意乎

文采篇

人之有文采猶草木之有華鳥獸之有毛羽也桃李之華可謂艷矣而不聞以之傲檜柏鸚鸞孔雀翠文犀虎豹之羽毛可謂麗矣而不聞以之傲兩翼之禽四足之獸人則不然有一篇之奇一字之麗則亟亟表暴若不可終日焉語有之花葉之好者來摘毛羽之文者來射文采之盛者來忌然吾謂非人之忌之已實有以致人之忌也夫范蔚宗之文不及班馬而其視班馬也不足比數杜審言之詩不過沈宋而其視沈宋也若不足比數是則文人相輕一至此乎蓋古今來氣量之窄者莫如文人雖以屈原之忠而銜憤以致自沉賈誼之達治體而自傷以致夭折皆其氣量窄之故也且爲草木計者願爲桃李乎願爲檜柏乎爲

禽獸計者願爲麒麟角端及垂天之鵬乎抑願爲孔雀及
虎豹乎爲人計者願立德立功立言以致不朽乎抑僅願
以文采表見乎吾固謂人不可自命爲文人不得已爲文
人亦當鑒于艸木之華鳥獸之羽毛而不自炫竒鬻異元
紫芝在陸渾人不知其能文陶淵明之在柴桑人不知其
能詩則善矣

真僞篇

今世之取人者莫不喜人之真厭人之僞是則僞不可爲
矣而亦不然襁褓之時知有母而不知有父然不可謂非
襁褓時之真性也孩提之時知飲食而不知禮讓然不可
謂非孩提時之真性也至有知識而後知家人有嚴君之

義焉其奉父也有當重于母者矣飲食之道有三揖百拜之儀焉酒清而不飲肉乾而不食有非可徑情直行者矣將爲孩提襁褓之時真乎抑有知識之時真乎必將曰孩提襁褓之時雖真然苦其無知識矣是則無知識之時真而有知識之時僞也吾以爲聖人設禮雖不導人之僞實亦禁人之率真何則上古之時臥倨倨興眈眈一自以爲馬一自以爲牛其行踳踳其視瞶瞶可謂真矣而聖人必制爲尊卑上下寢興坐作委曲煩重之禮以苦之則是真亦有所不可行必參之以僞而後可也且士相見之禮當見矣而必一請再請至固以請乃克見士昏之禮當醴從者矣亦必一請再請至固以請乃克就席鄉射禮知不能

射矣而必託辭以疾以至聘禮不辱命而自以爲辱朝會之禮無死罪而必自稱死罪非皆禁人之率真乎戰國策衛人迎新婦婦上車問驂馬誰馬也御曰借之新婦謂僕曰拊驂無咎服車至門扶教送母曰滅竈將失火入室見白曰徙之牖下妨往來者主人笑之使當日者新婦見以爲如此而不言則僞矣新婦之言新婦之率真也以真者爲可笑無怪乎人之日趨于僞矣總之上古之時真聖人不欲過于率真而必制爲委曲煩重之禮以苦之孩提襁褓之時真聖人又以爲真不可以徑行而必多方誘掖獎勵以挽之則是禮教既興之後知識漸啓之時固已真僞參半矣而必鯁鯁焉以真僞律人是又有所不可行也

形質篇

今之人嗜欲益開形質益脆知巧益出性情益漓何以言嗜欲益開也古之時膳用六牲珍用八物至矣今則析燕之窠以爲餐剝魚之翅以作食蟬黃之醬來自南中熊白之羹調于北地非六牲八物之所可比也古之時冬則飲湯夏則飲水足矣今茶薺則新安武林高下百圍備涼燠之用菸艸則香山浦城閩粵二種門水火之奇非飲湯飲水之可比也古之時中人之家冬則羊裘夏則麻葛足矣今則吉貝之暖十倍于麻也紗縠之輕十倍于葛也至于裘則異種百出種文羊于田搜海馬于水不特古人所不及見亦古人所不及聞矣何以言形質日脆也古者疾醫

所掌春時有瘡首疾夏時有痒疥疾秋時有癘寒疾冬時有嗽上氣疾四時皆有癘疾之類止矣今則小兒增痧豆之科中年添肝肺之疾衰老加沈痼之疴此卽吳普仲景不能定其方岐伯榆柎不能知其症者也何以言知巧益出也今之時天文地理之學以迄百工技藝之巧皆遠勝昔時吳越之綾錦出手而已若化工西洋之鐘表自鳴而不差絜黍手談則枯碁三百捷過于秋儲心計則白撰千萬算微于桑僅運斤者咸有倖之一指角技者罔非遲之八投是也何以言性情日漓也古之時飲羊飾脯以爲僞矣今則粉石屑爲鹹削木梯作米鴨由絮假調五味而出售靴以紙充雜六街而出市有人意計所必不及者矣然

則其形質益脆者非嗜欲益開之故乎其性情益漓者非
知巧益出所致乎

卷施閣文甲集卷第二

陽湖洪亮吉學

釋歲

歲首謂之上日

尚書正月上日受終于文祖正義稱鄭康成注帝王易代莫不改正堯正建丑舜正建子此時未改堯正故曰正月上日卽正乃改堯正故云月正元日

又謂之元日

尚書月正元日舜格于文祖張衡東京賦孟春元日

又謂之元辰

藝文類聚稱晉荀勗正會上壽酒歌云踐元辰又庾闡

揚都賦歲惟元辰

又謂之正旦

孔叢子邯鄲之民以正月旦獻壽于趙王 後漢書明
帝紀永平四年詔曰比來歲旱饑饉加有軍旅正旦無
陳朝賀之儀 東觀漢紀戴憑爲侍中正旦朝

又謂之正日

續漢書禮儀志歲正日爲大射朝賀其儀夜漏未盡七
刻受賀及擊 初學記稱崔寔四民月令曰正月一日
是謂正日

又謂之正朝

晉書禮志正朝元會 太平御覽稱元中記曰今人正

朝作兩桃人立門旁

又謂之正會

晉書禮志漢建安中將正會而太史上言正旦當日蝕
又引漢儀有正會禮 藝文類聚稱晉咸康起居注咸
康七年十二月尚書樂謨奏八年正會儀注 世說晉
元帝正會引王丞相升御牀

又謂之元正

晉書王導傳自後元正導入帝猶爲之興焉 藝文類
聚稱傳元朝會賦定元正之嘉會

又謂之元會

藝文類聚稱鄧德明南康記盧耽仕州爲治中嘗赴元

會 魏曹植有元會詩

又謂之歲首

漢書武帝紀太初元年夏五月正歷以正月爲歲首

續漢書禮儀志每月朔歲首爲大朝受賀

又謂之歲朔

宋書禮志歲朔常設葦英桃梗磔雞于宮及百司之門
以禳惡氣 李善文選注元日歲朔也

又謂之歲旦又謂之歲朝

晉書禮志歲旦常設葦菱桃梗磔雞于宮 按歲旦一

本作歲朝通典引晉書亦同

又謂之元祚又謂之首祚

曹植元會詩云初歲元祚 北堂書鈔稱王羲之月儀
書云元正首祚

又謂之三朝

漢書谷永傳今年正月朔日有蝕之於三朝之會 班

固東都賦春王三朝李善注三朝歲首朔日也 初學

記稱玉燭寶典正月爲端其一日爲元日亦云上日亦

云三朝亦云三元亦云三朔注歲之元時之元月之元

又謂之三元

南齊書蕭穎胄傳朝廷盛禮莫過三元 晉小懷荆楚

歲時記正月一日是三元之日也

又謂之三朔又謂之三始

尚書大傳夏以平明爲朔殷以鷄鳴爲朔周以夜半爲朔
漢書鮑宣傳今日蝕于三始

七日謂之人日

荆楚歲時記正月七日爲人日以七種菜爲羹剪綵爲
人或鏤金薄爲人以貼屏風亦戴之頭鬢又造華勝以
相貽登高賦詩注董勛問禮俗曰正月一日爲鷄二日
爲狗三日爲豬四日爲羊五日爲牛六日爲馬七日爲
人又一說云天地初闢以一日作鷄七日作人也北
齊書魏收傳魏帝宴百僚問何故名人日皆莫能知收
對曰晉議郎董勛荅問禮俗云云時邢劭亦在側甚怒

馬

上辛日謂之郊日

禮記郊特牲郊之用辛也周之始郊日以至鄭康成注
三王之郊一用夏正用辛日者凡爲人君當齋戒自新
耳 月令乃以元日祈穀于上帝鄭康成注謂以上辛
郊祭天也 春秋成公十七年九月辛丑郊公羊傳郊
曷用郊用正月上辛 春秋哀公元年四月辛巳郊穀
梁傳郊自正月至于三月郊之時也我以十二月下辛
下正月上辛如不從則以正月下辛下二月上辛如不
從則以二月下辛下三月上辛如不從則不郊矣按宋
書禮志云魏世南郊日值雨高堂隆謂應更用後辛蓋
卽本穀梁說 左傳啓蟄而郊 宋書禮志晉武之世

郊日或用丙或用巳或用庚皆有別議又云晉武捨鄭而從諸儒是以郊用冬至日既以至日理無常辛按自晉以後宋齊梁陳郊日仍皆用上辛北郊用通典引王儉啓云宋景平元年正月三日辛丑南郊其十一日立春元嘉十六年正月六日辛未郊其月八日立春齊書高帝受禪明年正月上辛有事南郊梁書武帝卽位南郊爲壇在國之南常與北郊間歲正月皇帝致齊于萬壽殿上辛行事陳書武帝永定元年受禪修圓丘柴燎告天明年因以正月上辛有事南郊北齊書每三年一祭以正月上辛後周憲章多依周制正月上辛祀昊天上帝于圓丘是也自隋唐始定令以冬至日祀昊天

帝于圓丘不復用正月上辛祀地祇亦定迄今因之

又按晉書禮志稱漢儀常以乙日祀先農乃耕于乙地

以丙戌日祠風伯于戌地以己丑日祠雨師于丑地亦

皆在正月行事與月令立春後丑日祭風師立夏後申

日祀雨師不同

月亥日謂之耕日

禮記月令孟春之月乃擇元辰天子親載耒耜措之于

參保介之御間鄭康成注元辰蓋郊後吉辰也孔穎達

正義耕用亥日故云元辰知用亥者以陰陽式法正月

亥為天倉以其耕事故用天倉也 晉書武帝紀泰始

四年正月丁亥帝耕于籍田 文選潘岳籍田賦伊晉

之四年正月丁亥皇帝親帥羣后藉于千畝之甸禮也
按今本丁亥作丁未誤

月午日漢謂之祖日月酉日魏謂之祖日

通典稱魏博士秦靖議古無正月祖祭之禮漢氏用午
祖戌臘午者南方之象故以午祖 風俗通漢家盛于
午故以午祖也 北堂書鈔稱稽含祖賦序曰有漢日
用丙午魏氏擇用孟月之酉 晉潘尼皇太子祀祖詩
曰孟月涉初旬吉日惟上酉 按此則魏以後祖或皆
用酉日

十五日謂之望日

荆楚歲時記正月十五日作豆糜加油膏其上以桐門

戶先以楊枝插門隨楊枝所指仍以酒脯飲食及豆粥
插箸而祭之其夕迎紫姑以下將來蠶桑并占衆事按
藝文類聚稱荆楚歲時記今州里風俗望日祭門初學
記引亦同攷今本荆楚歲時記作正月十五日不云望
日疑歐陽詢等或以意改也又詢堅等引史記樂書漢
家祀太一以昏時祠到明徐堅注云今人正月望日夜
遊觀鐙是其遺事今攷樂書漢家常以正月上辛祠太
乙甘泉是祠太一定用辛日不必皆正月十五至注今
夜遊觀鐙云云詢堅並同未知何本今所傳類書之最
古者藝文類聚北堂書鈔初學記等而所稱引不足據
如此餘可類推 初學記稱玉燭寶典正月十五日作

膏粥以祠門戶 北齊書魏氏舊俗以正月十五日爲
打竹鏃之戲有能中者卽時賞帛

又謂之上元

白六帖正月十五日爲上元 按上元中元下元本道
家之語始見于白六帖稱唐明皇實錄云三元日宐令
崇元學士講道德南華等經然唐時類書尚無有列及
十月朔日者猶近古也今故削之而附記于此又類書
引歲時記上元夜貴戚例以黃柑相遺謂之傳柑此當
屬宋陳元靚歲時廣記非宗標也

又謂之正月半

世說禰衡被魏武謫爲鼓吏正月半試鼓 荆楚歲時

記稱續齊諧記曰吳縣張成夜起忽見一婦人立於宅東南角謂成曰此地是君家蠶室我卽此地之神明年正月半宐作白粥泛膏其上以祭我當令君蠶桑百倍三十日謂之晦日又謂之月晦

荆楚歲時記元日至于月晦並爲酺聚飲食注每月皆有弦望晦朔以正月初年時俗重以爲節也玉燭寶典曰元日至月晦今並酺食渡水士女悉湔裳酌酒於水澹以爲度厄今世人惟晦日臨河解除婦人或湔裙按初學記引公羊傳曰提月六鷁退飛過宋都提月者何僅建夏晦日也何休注提月邊也魯人語也在正月之幾盡白六帖亦同今攷公羊本及注提皆作是未知

堅所據何本至云僅建夏晦日也亦與今本不同然堅
係另摘二字標目必非無據爾雅太歲在寅爲攝提格
楚辭攝提貞于孟陬兮正月建寅之月則攝正月爲提
月或古有是語

二月戊日謂之社日

周書召誥戊午乃社于新邑 詩以社以方 周禮社

之日涖卜來歲之稼 禮記月令擇元日命民社 郊

特牲日用甲用日之始也 宋書禮志以歲二月八月

二社日祀之 荆楚歲時記社日四鄰並結綜會社牲

醪爲屋于樹下先祭神然後饗其胙 太平御覽稱崔

寔四民月令二月祀大社之日薦韭卵于祖禰 按社

祭土戊日屬土故古之社日皆用戊名誥戊午乃社白
六帖引鄭康成禮記注元日謂近春分前後戊日元吉
也杜祐亦云周初未制禮之時社日猶用戊後乃定用
甲日郊特牲及月令鄭注是矣漢社日用午蔡邕祝社
文曰元正令午是也魏社日用未魏臺訪議曰帝問何
用未社丑臘王肅對曰魏土也土畏木丑之明日便寅
寅木也故以丑臘土成于未故于歲始未社也晉社用
丑晉書武帝紀泰始元年冬十二月詔臘以酉社以丑
此蓋五行生剋各有趨避非古制也王廡春可樂云吉
辰兮土戊明靈兮惟社宋時方書亦以立春後第五戊
日爲社日近代禮又以秋分後戊日祭社是民間社日

皆承用戊日可知 又按晉又兼用酉日社潘尼皇太子社詩曰日惟上酉應禎祝社文曰吉酉辰良是矣今吳俗社日則率以二月二日又未知始于何時是月祭飲食謂之臠

說文楚俗以二月祭飲食也一曰祈穀食新曰臠臠玉篇臠飲食器也冀州八月楚俗二月按風俗通作楚俗以十二月祭飲食當衍一十字

去冬節一百五日謂之寒食

荆楚歲時記云冬節一百五日卽有疾風甚雨謂之寒食注據厯合在清明前二日亦有去冬至一百六日者藝文類聚稱陸翽鄴中記寒食三日作醴酪煮粳米

及麥爲酪擣杏仁作粥 白六帖稱玉燭寶典云寒食
節城市尤多鬥雞卵之戲或雕鏤相遺餉 藝文類聚
稱藝術圖曰北方山戎寒食日用鞦韆爲戲以習輕躡
者 按俗謂寒食始于介子推非也今攷太平御覽引
劉向別錄寒食蹋黃帝所作兵勢也或云起于戰國
與鞠毬同是三代前已有寒食之名周禮司烜氏仲春
以木鐸修火禁於國中鄭康成注曰謂季春將出火也
太平御覽稱古今藝術圖曰今寒食準節氣是仲春之
末清明是三月之節然則禁火蓋周之舊制其以爲子
推者始于桓譚新論及後漢書周舉傳新論太原郡民
以隆冬不火食五日爲介子推故也周舉傳舉移書于

介子推廟云盛冬去火殘損民命非賢者之意自是衆
惑稍解魏武帝明罰令亦云聞太原上黨西河雁門冬
至後皆沍寒之地令人不得食寒云云周斐汝南先賢
傳陸翽鄴中記等並同無論并州一方之俗不足以概
天下且子推死有定月故周舉傳言其月神靈不樂舉
火今寒食節或在二月或在三月不一則明非因子推
而始可知又初學記引琴操云晉文公與介子綏俱亡
子綏割腕股以啖文公文公復國子綏獨無所得子綏
作龍蛇之歌而隱文公求之不肯出乃燔左右木子綏
抱木而死文公哀之令人五月五日不得舉火綏推古
字通北堂書鈔稱石虎鄴中記亦同據琴操鄴中記則

子推亡在五月五日據新論周舉傳等則子推亡又在
盛冬皆與清明節前之寒食無預惟歲時記引晉孫楚
祭子推文用今寒食節醴酪事則以清明前寒食爲因
子推而設者誤或自西晉始而陸翽等又承其誤也

三月巳日謂之上巳

詩溱與洧方渙渙兮士與女方秉蘭兮太平御覽稱韓
詩章句詩人言溱與洧方盛流渙渙然謂三月桃花水
下之時士與女方秉蘭兮秉執也當此盛流之時衆士
與衆女方執蘭而祓除後漢書注稱韓詩辟君章句又
云鄭國之俗三月上巳之溱洧兩水之上招魂續魄秉
蘭草祓除不祥故詩人願與所悅者共往也 漢書孝

武衛皇后傳帝祓灞上還注應劭曰祓除也今月上巳
祓禊是也 風俗通云禊者潔也春者蠢也蠢蠢搖動
也尚書以殷仲春厥民析言人解療生疾之時故于水
上釁潔之也 續漢書禮儀志三月上巳日宮人並禊
飲于東流水上 沈約宋書禮志案周禮女巫掌歲時
祓除釁浴如今三月上巳如水上之類也 荆楚歲時
記三月三日士民並出江渚池沼問爲流杯曲水之飲
是日取昆麴汁蜜和粉謂之龍舌糝以厭時氣注論語
云暮春浴乎沂則水濱祓禊由來遠矣 太平御覽稱
崔寔四民月令三月三日及上除采艾及柳絮 文選
注稱梁蕭子顯云舊言陽氣布暢萬物訖出始洗絜之

也已者社也言祈介社也一說三月三日清明之節將
修事于水側禱祀以祈豐年按沈約云自魏以後但
用三日不用上巳今攷魏以前亦有用三日者束皙云
秦昭王三日置酒河曲是也魏以後亦有用上巳者元
和郡縣志潤州上元縣鍾山江表上巳常遊于此又張
華集有上巳篇潘尼上巳日帝會天淵池作詩阮瞻上
巳日作賦等是也

四月謂之雩月

左傳龍見而雩劉昭續漢書禮儀志注稱服虔云大雩
夏祭天名雩遠也遠爲百穀求膏雨也龍角亢也謂四
月昏龍星體見萬物始盛待雨而大故雩祭以求雨也

夏小正四月越有大旱穀梁傳雩月雩之正也秋大雩非正也冬大雩非正也禮記月令仲夏之月大雩帝鄭康成注雩之正當以四月凡周之秋三月之中而旱亦修雩禮以求雨因著正雩此月失之矣正義凡正雩在周之六月通典周制月令建巳月大雩五方上帝按周制雩皆在四月故穀梁傳曰雩月雩之正也秋大雩非正也若月令仲夏之雩在周已屬秋矣疑秦時雩始用五月月令係秦制非周制故鄭康成等均譏其失也自秦以後雩祭亦類皆用四月續漢書禮儀志自立春至立夏盡立秋郡國上雨澤若少府郡縣各掃除社稷其旱也公卿官長以次行雩禮求雨劉昭注四

月立夏早乃求雨禱雨後旱復重禱而已訖立秋雖旱不得禱求雨也後魏書文成帝和平元年四月雩北齊亦以孟夏龍見而雩隋制若京師孟夏後旱則祈雨行七事通典引唐貞觀禮孟夏雩祀五方上帝五人帝五官于南郊是矣

五月十五日謂之五日前十日謂之端午

大戴禮記饗之興五日翕望乃伏其不言生而稱興何也不知其生之時故曰興以其興也故言之興五日翕也望也者月之望也而伏云者不知其死也故謂之伏五日也者十五日也翕也者合也伏也者入而不見也又云蓄蘭爲沐浴也 文子上德篇蟾蜍辟兵愁在

五月之望按古人五日皆當是十五日今楚俗亦以十五日爲大端陽初五日爲小端陽 續漢書禮儀志五月五日朱索五色桃印爲門戶飾以難止惡氣 藝文類聚稱周處風土記曰仲夏端午烹鷺角黍端始也謂五月初五日也又以菰葉裹黏米煮熟謂之角黍按此則魏晉以來已用初五日爲五日 荆楚歲時記五月五日四民並蹋百草又有鬥百草之戲採艾以爲人懸門戶上以禳毒氣以五采絲繫臂名曰辟兵令人不病瘟又有條達等織組雜物以相贈遺取鳩鴿教之語 北堂書鈔稱提要錄云五月五日午時爲天中節 按俗謂五日始于屈原非也今攷五日之名見於經者一

夏小正是也見于諸子者一文子上德篇是也見于傳
記者二田文母嬖五月五日生文父勅令勿舉之後母
私舉文長成童以實告之又鄴中記及琴操皆云介子
推以五月五日死世人謂之忌日此數事皆在屈原之
前又屈原之事始見于續齊諧記既不足憑又云楚人
哀之每至此日竹筒貯米投水祭之漢建武年長沙歐
回見人自稱三閭大夫謂回曰日嘗見祭甚善但常患
蛟龍所竊今若有惠可以楝樹葉塞其上以五采絲縛
之此二物蛟龍所憚也回依言後乃復見稱感今人五
日作糉子帶五色絲及楝葉皆是汨羅之遺風也按風
土記菰葉裹黏米本取陰內陽外包裹之象所以贊時

也若云爲原而作則五日煮肥龜又何說焉又荆楚歲時記五月五日競渡俗爲屈原投汨羅日傷其死故命舟楫以拯之而下復引越地傳云競渡起于越王句踐是日競渡采雜藥夏小正此月蓄藥以蠲除毒氣一競渡也旣以爲采藥而設又以爲弔屈原而設一書記載已復不同何能傳信竊謂五日競渡古人風俗如此非因采藥亦非爲屈原藝文類聚稱會稽典錄女子曹娥者會稽上虞人父能絃歌爲巫漢安帝二年五月五日于縣江泝濤迎婆婆神溺死而歲時記稱邯鄲淳曹娥碑又云五月五日時迎伍君逆濤而上爲水所淹則東吳之俗五月五日又似爲伍君及婆婆神與屈原復無

所涉是又可不必置論矣

夏至後第三庚謂之伏日

史記秦本紀德公二年初伏集解孟康曰六月伏日初也周時無至此乃有之正義曰六月三伏之節起秦德公爲之故云初伏伏者隱伏避暑也歷忌釋曰伏者何以金氣伏藏之日也四時代謝皆以相生立春木代水水生火立夏火代木木生火立冬水代金金生水立秋以金代火故至庚日必伏庚者金故曰伏也 初學記稱陰陽書云從夏至後第三庚爲初伏四庚爲中伏立秋後初庚爲後伏謂之三伏曹植謂之三旬 後漢書和帝紀永元六年六月己酉初令伏閉盡曰注漢官

儀曰伏日萬鬼行故盡日閉不干他事 風俗通曰戶
律漢中巴蜀廣漢自擇伏日 荆楚歲時記六月伏日
竝作湯餅名爲辟惡注魏氏春秋何宴以伏日食湯餅
取巾拭汗面色皎然乃知非傅粉則伏日湯餅自魏已
來有之 初學記稱崔寔四民月令初伏日薦麥瓜于
祖禰 按夏小正六月煮桃傳煮以爲豆實也蓋卽後
世薦麥瓜食湯餅之朔始

孟秋第七日謂之七日又謂之良日亦謂之七夕

初學記稱崔寔四民月令曰七月七日作麴合藍丸及
蜀漆丸暴經書及衣裳 歲華紀麗稱風俗通織女七
夕當渡河使鵲爲橋 北堂書鈔稱周處風土記俗重

七月初七是夜灑掃于庭露施几筵設酒脯時果散香粉于筵上以祈河鼓織女言此二星辰當會守夜者咸懷私願或云見天漢中有奕奕白氣有光耀五色以此爲徵應見者便拜而願乞富乞壽無子乞子惟得乞一不得兼求三年乃得言之頗有受其祚者又云魏時人或問董勛云七月七日爲良日飲食不同于古何也勛曰七月黍熟七日爲陽數故以糜爲珍今此日惟設湯餅無復有糜矣 荆楚歲時記七月七日爲牽牛織女聚會之夜注戴德夏小正云是月織女東向蓋言星也春秋斗運樞云牽牛神名畧石氏星經云牽牛名天關佐助期云織女神名收陰史記天官書曰是天帝外孫

傳元擬天問曰七月七日牽牛織女會天河此則其事也河鼓黃姑牽牛也皆語之轉又云是夕人家婦女結采縷穿七孔鍼或以金銀鍤石爲鍼陳瓜果于庭中以乞巧有喜子網于瓜上則以爲符應按俗謂七月七夕爲牽牛織女而設非也今攷七日之名見于淮南子及萬畢術漢武帝故事列仙傳等書皆不言及牽牛織女之事其以爲二星辰當會于此夕者始見于風俗通傳元擬天問及周處風土記吳均齊諧記等書而宋南平王鑠及謝惠連遂有七夕詠牛女詩此後七夕遂專屬之于牛女矣無論風土記等所錄皆荒誕不經卽謂神仙迂怪之言可信則事在魏晉以前者已不止一事

請畢述之北堂書鈔稱漢武故事七月七日上于承華殿齋其日或有鳥從西方來集殿前上問東方朔曰此西王母欲來也有頃王母至有二青鳥如鳥夾侍王母旁也又云王母遣青衣女語帝曰七月七日王母暫來帝于其日修除宮掖燔百和之香然九光之燈則謂七日從王母起可藝文類聚稱列仙傳陶安公者六安冶鑄師也以七月七日乘赤龍仙去又云王子喬周靈王太子晉也好吹笙作鳳鳴遊伊洛之間浮邱公接以上嵩高山二十餘年後于山中謂桓良曰告我家七月七日待我緱氏山頭是日果乘白鶴駐山嶺望之不得到舉手謝時人數日而去則謂七日屬陶公王子喬亦可

初學記稱神仙傳云吳蔡經去家時已老還更少壯頭
髮皆黑爲家中言七月七日王君當來至期日王方平
果來一又云七月七日麻姑當來可取數百斛酒飲之
至期王方平偕來乘羽車駕五龍聞金鼓簫管人馬之
聲是七日屬之麻姑王方平亦可太平御覽稱漢武帝
故事景帝王美人以乙酉年七月七日生武帝于倚蘭
殿西京雜記戚夫人侍兒賈佩蘭云在宮時見戚夫人
侍高祖至七月七日臨百子池作于滇樂畢以五色縷
相羈謂爲連愛一云漢采女常以七月七日穿鍼于開
襟樓云云皆不及牽牛織女之事明七月七日日月皆
屬陽古人以之爲良會後遂附會爲牽牛織女事也夏

小正七月初昏織女正東鄉後人因此附會矣

七月望前一日亦謂之禊日

宋書禮志今三月上巳祓于水濱又或用秋漢書八月祓于霸上劉禎魯都賦素秋二七天漢指隅人胥祓除國子水嬉又是用七月十四日也

八月十五日謂之中秋

周禮籥章掌土鼓豳籥中春晝擊土鼓歛豳詩以逆暑中秋夜迎寒亦如之 枚乘七發客曰將以八月之望與諸侯遠方交遊兄弟並往觀濤于廣陵之曲江 李善注稱孔安國尚書傳曰十五日日月相望 荆楚歲時記八月十四日民並以朱水點兒頭額名爲天灸以

厭疾又以錦綵爲眼明囊遞相贈遺按中秋節唐初尚未盛行故虞世南歐陽詢徐堅等作類書歲時部皆未列入若唐以前八月十五日見于史傳者惟隨書新羅國傳八月十五日設樂令官人射各賞以馬布及武夷山記八月十五日武夷君與魏真人等會山頂宴集數事而已

季秋第九日謂之重陽又謂之重九又謂之九日

北堂書鈔稱魏文帝與鍾繇書曰歲往月來忽復九日九爲陽數而日月並應俗嘉其名以爲宜于長久故享燕高會白六帖稱魏文帝書又云日月並應故曰重陽晉書禮志九月九日馬射或說曰秋金之節講武習

射象立秋之禮也 西京雜記漢武帝宮人賈佩蘭九月九日佩茱萸食蓬餌飲菊花酒云令人長壽相傳自古莫知其由 荆楚歲時記九月九日四民並籍野飲宴注杜公瞻云九月九日宴會未知起于何代然自漢至宋未改今北人亦重此節佩茱萸食餌飲菊花酒云令人長壽 按北堂書鈔稱孫瑞奏事云興平二年秋朝廷以九月九日賜公卿近臣飲宴今攷孫瑞當作士孫瑞脫一士字後漢書獻帝紀興平二年十一月王師敗績衛尉士孫瑞等始爲李傕郭汜所殺則九月中瑞尚在也杜公瞻云九日宴會自漢至宋未改所云漢蓋卽指此而言則九日節始盛于漢末可知 又按古人

每以隻月爲盛會除正月一日爲歲首不計外如三月三日五月五日七月七日九月九日其日月皆應陽數故古人于此日讌集出遊其制蓋仿于三代自漢以後遂各附會其說並非也 又核今人以五月五日爲競渡節九月九日爲登高節不知古人每值佳日無不可泛舟無不可登高荆楚歲時記人日登高賦詩隋陽休之亦有人日登高詩石虎鄴中記正月十五日有登高之會隋書文帝嘗于正月十五日與近臣登高玉燭寶典元日至晦日今並酺食度水荆楚歲時記元日至月晦士女泛舟或臨水宴樂蔡邕月令章句暮春陽氣和暖鮪魚時至將以薦寢廟因是乘舟禊于名川也輿地

記齊武帝起層城觀七月七日宮人多登之稽含有七月七夕登高詩又月令仲夏可以居高明可以遠眺望可以升山陵可以處臺榭是五日不特可以泛舟并可以登高矣

冬至後第三戌謂之臘日其夕謂之臘夕亦謂之臘夜

說文冬至後三戌臘祭百神 廣雅臘索也 左傳虞

不臘矣杜預注臘歲終祭衆神之名 禮記月令孟冬

之月大割祠于公社及門閭臘先祖五祀鄭康成注臘

謂以田獵所得禽祭也 史記秦本紀惠文王十二年

初臘正義惠文王始效中國爲之始皇三十一年十二

月更名臘曰嘉平索隱云蓋從歌謠之詞而改從殷號

也 風俗通曰夏曰清祀殷曰嘉平周曰大蜡漢曰臘
臘者獵也因獵取獸以祭又云太史丞鄧平說臘者所
以迎刑送德也大寒至常恐陰勝故以戌日臘戌者溫
氣也 初學記稱高堂隆魏臺訪議曰詔問何以用未
祖丑臘臣隆對曰按月令孟冬十月臘先祖五祀謂薦
田獵所得禽獸謂之臘又師說王者各以行之盛祖以
其終臘水行之君以子祖辰臘火行之君以午祖戌臘
木行之君以卯祖未臘金行之君以酉祖丑臘土行之
君以戌祖辰臘今魏據土德官以戌祖辰臘也 又云
漢火德火衰于戌故以戌日爲臘魏土德土衰于辰故
以辰爲臘晉金德金衰于丑故以丑爲臘按此則魏

先用丑日臘至隆議後始改用辰耳晉宋舊事引魏名臣大司農董遇議又云土行之君故宜以未祖以丑臘爲得盛終之節不可以戌祖辰臘云江表傳吳以爲土行用未祖辰臘通典宋水德王祖以子臘以辰晉書隱逸范喬傳初喬邑人臘夕盜斫其樹喬往喻曰卿節日取柴欲與父母相歡娛耳藝文類聚稱養生要術十二月臘夜令人持椒卧井旁無與人言內椒井中可除溫病荆楚歲時記十二月八日爲臘日諺語臘鼓鳴春草生村人並擊細腰鼓戴胡頭及作金剛力士以逐疫其日並以豚酒祀竈神按據月令則臘本在孟冬之月疑始皇三十一年改臘曰嘉平始後至十二

月也高誘注呂不韋書今人臘前一日擊鼓驅疫謂之逐除蔡邕獨斷臘者歲終大祭縱役人燕飲也續漢書禮儀志季冬之月星回歲終陰陽以交勞農大享臘四分律音義臘歲終祭神之名或曰臘者接也新故交接也蓋自秦以後臘皆在十二月矣惟後周遵古制以建亥之月臘通典隋初因之亦以孟冬下亥禘百神開皇四年詔曰前周歲首今之仲冬建亥之月大禘可也後周以夏后之時行姬氏之禘考之前代于義有違其十月行禘者止可以十二月爲臘是反以建亥之月臘爲非可云不考古矣至以十二月八日爲臘日則又自荆楚歲時記始迄今皆因之故俗皆云臘八亦若今人定

以二月二日爲社日也又今人祀竈又率以月之二十四日

臘明日謂之初歲又謂之小歲

史記天官書臘之明日人衆卒歲一會飲酒發陽氣故曰初歲 藝文類聚稱晉博士張亮議曰臘接也臘明日爲初歲秦漢以來有賀此皆古之遺語也 太平御覽稱崔寔四民月令臘明日更新謂之小歲敬酒尊長修賀君師 又稱徐爰家儀曰蜡本施祭故不賀其明爲小歲賀稱初歲福始慶無不宜又云小歲之賀旣非大慶禮止門內

歲盡日謂之除日又謂之歲夕又謂之除夜

禮記月令日窮于次月窮于紀星回于天數將幾終歲
將更始 張衡東京賦曰卒歲大儺 晉書循吏曹攄
傳歲夕攄行獄 荆楚歲時記歲暮家家具肴菽詣宿
歲之位以迎新年相聚酣飲留宿歲飯至新年十二日
則棄之街衢以爲去故納新也 事文類聚稱風土記
云除夜祭先竣事男女聚飲祝頌而散謂之分歲 北
齊書季冬晦日選人子弟赤幘皁禱衣執鼗鼓百二十
人逐惡鬼于禁中其日戌夜三唱開諸里門
冬至後四十六日而立春

周書時訓解立春日東風解凍又五日蟄蟲始振又五
日魚上冰 校諸書所引易通卦驗說與時訓解時有

不同今以月令呂不韋等書攷之當以時訓解爲準
淮南王書大寒加十五日指報德之維則越陰在地故
曰距日冬至四十六日而立春陽氣凍解音比南呂按
天文訓所言皆本孝經緯又按太平御覽稱皇覽逸禮
距冬至四十五日天子迎春于東堂 初學記稱孝經
緯周天七衡六間曰立春 又稱易通卦驗曰立春條
風至宋均注條風者條達萬物之風 孝經鉤命決曰
立春勅門闌無關鑰以迎春之精 續漢書禮儀志立
春之日下寬大書制詔三公方春東作敬始慎微動作
從之罪非殊死且勿按驗皆須麥秋退貪殘進柔良下
當用者如故事注月令命相布德和令蔡邕曰卽此詔

之謂也 荆楚歲時記立春之日悉剪綵爲燕戴之帖
宜春二字

後十五日爲驚蟄漢曰雨水

周書時訓解驚蟄之日獮祭魚又五日鴻雁來又五日
艸木萌動 淮南王書加十五日指寅則雨水音比夷
則 按漢始以雨水爲正月節漢書律歷志營室十四
度驚蟄注今曰雨水降莫初奎五度雨水注今曰驚蟄
是也

又十五日爲雨水漢曰驚蟄

周書時訓解雨水之日桃始華又五日倉庚鳴又五日
鷹化爲鳩 淮南王書加十五日指甲則雷驚蟄音比

林鐘

又十五日爲春分

周書時訓解春分之日元鳥至又五日雷乃發聲又五日始電淮南王書加十五日指卯中繩故曰春分則雷行音比蕤賓周禮春分之日祭馬祖按說文龍春分而登天秋分而入淵馬龍之屬故以始登天之日祭之也晉書禮志武帝泰始二年正月有司奏春分祠厲殃及禳祠詔曰不在祀典除之太平御覽稱齊民月令曰春分不殺

又十五日爲穀雨漢曰清明

周書時訓解穀雨之日桐始華又五日田鼠化爲鴛又

五日虹始見 淮南王書加十五日指乙則清明風至
音比仲呂按劉歆三統歷穀雨三月節清明中與時訓
解同而淮南王書等清明在穀雨之前故漢書歷律志
大梁初胃七度穀雨注今日清明昴八度清明注今日
穀雨是也

又十五日爲清明漢曰穀雨

周書時訓解清明之日萍始生又五日鳴鳩拂其羽又
五日戴勝降于桑 淮南王書加十五日指辰則穀雨
音比姑洗 周書周月解春三月中氣驚蟄春分清
孔晁注舊作雨水春分穀雨非古法也 史記律書云
清明風居東南維 楚辭九懷季春兮陽陽王逸章句

三月溫和氣清明也

又十五日爲立夏

周書時訓解立夏之日螻蛄鳴又五日蚯蚓出又五日
王瓜生 淮南王書加十五日指常羊之維則春分盡
故曰有四十五日而立夏大風濟音比夾鐘

又十五日爲小滿

周書時訓解小滿之日苦菜秀又五日靡草死又五日
小暑至 淮南王書加十五日指巳則小滿音比太蔟
三禮義宗小滿爲中者物之生長小得並滿故以小
滿爲名也

又十五日爲芒種

周書時訓解芒種之日螳螂生又五日鳩始鳴又五日
反舌無聲 淮南王書加十五日指丙則芒種音比大
呂 三禮義宗五月芒種爲節者言時可以種有芒之
穀故以芒種爲名 宋書循吏阮長之傳時郡縣田祿
芒種爲斷此前去官者則一年秩祿皆入前人此後去
官者則一年秩祿皆入後人始以元嘉末改此科計月
分祿長之去武昌郡代人未至以芒種後一日解印綬
又十五日爲夏至

周書時訓解夏至之日鹿角解又五日蜩始鳴又五日
半夏生 淮南王書加十五日指午則陽氣極故曰有
四十六日而夏至音比黃鐘 北堂書鈔稱孝經緯曰

周天有七衡夏至日在內衡 又稱春秋感精符曰冬
至口成天文夏至日成地理 續漢書禮儀志曰夏至
是日浚井改水按春秋考異郵曰夏至井水躍故于是
日改水 三禮義宗夏至爲宗者至有三義一以明陽
氣之至極二以助陰氣之始至三以明日行之兆故謂
之至也 荆楚歲時記夏至節日食糗是日取菊爲灰
以止小麥蠹

又十五日爲小暑

周書時訓解小暑之日溫風至又五日蟋蟀居辟又五
日鷹乃學習 淮南王書加十五日指丁則小暑音比
大呂 三禮義宗六月小暑爲節者此以相形爲名形

大暑故謂之小暑六月之初暑氣熱未極故以小爲名
大暑爲中者自十一月一陽爻上從地而出至此之時
方始上徹陽氣併出以上大暑旣極故暑爲中

又十五日爲大暑

周書時訓解大暑之日腐草化爲螢又五日土潤溽暑
又五日大雨時行 淮南王書加十五日指未則大暑
音比大蔌 通典後漢制太史每歲上其年歷先立春
立夏大暑立秋立冬常讀五時月令 周書周月解夏
三月中氣小滿夏至大暑

又十五日爲立秋

周書時訓解立秋之日涼風至又五日白露降又五日

寒蟬鳴 淮南王書加十五日指背陽之維則夏分盡
故曰有匹十六日而立秋涼風至音比夾鐘 二禮義
宗七月立秋之言湫縮之意

又十五日爲處暑

周書時訓解處暑之日鷹乃祭鳥又五日天地始肅又
五日禾乃登按月令呂氏春秋並作農乃登穀 淮南
王書加十五日指申則處暑音比姑洗 國語處暑之
既至蟲蟻之既多

又十五日爲白露

周書時訓解白露之日鴻雁來又五日元鳥歸又五日
羣鳥養羞 淮南王書加十五日指庚則白露降音比

仲呂

又十五日爲秋分

周書時訓解秋分之日雷始收聲又五日蟄蟲培戶又五日水始涸淮南王書加十五日指酉中繩故曰秋分雷戒蟄蟲北鄉音比絀賓文子曰老子爲天地之氣莫大于和者陰陽調日夜分故萬物春分而生秋分而成

又十五日爲寒露

周書時訓解寒露之日鴻雁來賓又五日爵入大水爲蛤又五日菊有黃華淮南王書加十五日指辛則寒露音比林鐘

又十五日爲霜降

周書時訓解霜降之日豺乃祭獸又五日草木黃落又五日蟄蟲咸俯淮南王書加十五日指戌則霜降音比夷則周禮正義稱韓詩古者霜降逆女冰泮而止

周書周月解秋三月中氣處暑秋分霜降

又十五日爲立冬

周書時訓解立冬之日水始冰又五日地始凍又五日雉入大水爲蜃淮南王書加十五日指躔通之維則秋分盡故曰有四十六日而立冬草木畢死音比南呂按易通卦驗立冬不周風至水始冰而符瑞圖云立冬北方廣莫風至今攷淮南王書廣莫風後不周風四十

五日乃至符瑞圖說誤也

又十五日爲小雪

周書時訓解小雪之日虹藏不見又五日天氣上騰地氣下降又五日閉塞而成冬 淮南王書加十五日指亥則小雪音比無射 三禮義宗十月小雪爲中者氣序轉寒雨變成雪故以小雪爲中

又十五日爲大雪

周書時訓解大雪之日鳴鳥不鳴又五日虎始交又五日荔挺生 淮南王書加十五日指壬則大雪音比應鐘 歷義疏大雪十一月節月之初氣也言大陰之氣以大水凝爲雪故曰大雪

又十五日爲冬至又謂之亞歲

周書時訓解冬至之日蚯蚓結又五日麋角解又五日

水泉動 淮南王書斗指子則冬至音比黃鐘 續漢

書禮儀志冬至鑽燧改火 北堂書鈔稱孝經緯冬至

日在外衡牽牛之初 說文冬至斗指子夜半時加午

者也 宋書禮志冬至朝賀享祀皆如元旦之儀又云

其儀亞于歲朝按魏晉時則有大小之別元旦稱大會

冬至稱小會亦見晉宋二書禮志 歷義疏冬至十一

月之中氣也言冬至者極也太陰之氣上于于陽太陰

之氣下極于地寒氣已極故曰冬至 北堂書鈔稱西

域諸國志云天竺十一月十六日爲冬至則麥秀十二

月十六日爲臘則麥熟

又十五日爲小寒


周書時訓解小寒之日雁北鄉又五日鵲始巢又五日雉始鳴按淮南天文訓冬至鵲始巢與時訓解稍異

淮南王書加十五日指祭則小寒音比應鐘 三禮義宗十二月小寒爲節者亦形于大寒故謂之小言時寒氣亦未是極也

又十五日爲大寒

周書時訓解大寒之日雞始乳又五日鷺鳥厲疾又五日水澤腹堅 淮南王書加十五日指丑則大寒音比無射 三禮義宗大寒爲中者上形于小故謂之大十

一月一陽爻初起至此始徹陰氣出地方盡寒氣併在
上寒氣之逆極故謂大寒也 周書周月解冬三月中
氣小雪冬至大寒



卷施閣文甲集卷第三

陽湖洪亮吉學

釋舟

兪謂之舟

說文舟船也毛傳兪空木爲舟也从人从舟从川从水

也按或作𦨇俗字方言自關而東或謂之舟釋名

舟言周流也按淮南王書汜論訓乃爲窾木方板以

爲舟航高誘注窾空也兪窾二字音義並通故徐錯說

文繫傳云人者𠄎二合之義音兪猶窾穿之義會意是

也

通名謂之椽

說文梭船總名王篇同徐鉉等曰今俗別作艘非是
漢書溝洫志發河南以東漕船五百梭按吳越春秋句
踐歸國外傳晉竹十廢注廢當作梭漢書溝洫志漕船
五百梭是梭又通作梭兼作廢說文廢水槽倉也義亦
通 藝文類聚稱太公六韜武王伐殷先出於河呂尙
爲後將以四十七梭船濟于河

又謂之船

說文船舟也按此卽轉注字 方言舟自關而西謂之
船 釋名船循也循水而行也 藝文類聚稱韻集曰
船舩也按舩卽船之重文字書或分爲二非

又謂之舩又謂之舩

爾雅舩我也說文同義闕 廣雅舩舟也 玉篇舩天

子稱 按淮南王書欲與物接而未成舩兆者也文選

注稱許慎注舩兆也舩兆當屬轉注字故名舟爲舩又

謂之舩又廣韻云舩古文作舩則或从剡木爲楫之義

制字故从舟也易剡木爲楫剡本亦作揆

又謂之舩

廣雅舩舟也按舩字說文玉篇並無當作桺古字通也

又謂之舩

廣雅舩舟也 華嚴經音義稱通俗文吳船曰舩廣韻

同 玉篇舩船小也 按荊州記湘州七郡大舩所出

皆受萬斛又水經注贛水又逕谷鹿洲舊作大舩處宋

臧質石城樂亦云大編載三千漸水丈五餘是編亦不
僅小舟也

又謂之舩

廣雅舩舟也 王篇吳船也又舩艘按當從說文作舩

又謂之舩

漢書古今人表晉舩人固來 廣雅舩舟也王篇同

又謂之艘

廣雅王篇並舟名 瓊州圖經文昌縣有焚艘山近大
海漢樓船將軍楊僕征黎至此焚船登岸故名按故書
無艘字疑土人合樓船二字爲一後人遂制此字矣吳
越春秋越有樓船卒漢武帝秋風辭泛樓船兮濟汾河

則樓船之制自昔有之通典又云樓船船上建樓三重
又謂之艘又謂之麒鯉

廣雅玉篇並舟名

又謂之餘皇

左傳昭公十七年楚大敗吳師獲其乘舟餘皇 廣雅

玉篇餘皇並舟名又云艘吳舟 郭璞江賦漂飛雲運

餘皇 抱朴子餘皇鷁首涉川之良器也 按說文無

餘皇二字始見新附今仍從左傳作餘皇艘又別作艘

又謂之船艘

方言艇謂之船艘小船艘謂之艇按艇爲小舟則船艘
之制當在大小之間 廣雅船艘舟也玉篇同 未書

吳喜傳從西還大舩小舩爰及草舩錢米布絹無船不

滿

通異類篇舩舩大舟按舩當卽舩字

又謂之舩又謂之舩又謂之舩又謂之舩又謂之舩

王篇有 廣韻舩小船上安蓋者 按淮南王書修務

訓水斷龍舟高誘注龍舟大舟也此舩字疑合二字爲

一隋書亦以戰舩爲水龍王篇又有舩字云以竹葉舩

船也疑亦舩字重出或又云舩卽舩今附記于此

又謂之舩

按疑亦合吳舟二字爲一

又謂之舩又謂之舩又謂之舩又謂之舩

王篇又別出舩字非

又謂之艤又謂之舳又謂之舫又謂之舩又謂之舫又謂之舫

梁江淹詩方水理金舫 以上並見王篇

又謂之柁

王篇柁船名

舫謂之舫

見廣雅 五戒相經音義稱埤蒼舫舫也亦名舫 王

篇舫舫也又船舫廣韻同 王逸楚詞章句舫舫也洪

興祖補注舫船邊也 北堂書鈔稱會稽典錄楊橋上

諫曰臣聞之魯子扣舫易水魚聞入淵鳥驚參天 郭

璞江賦詠采菱以叩舫按此皆興祖所據

輪謂之桡

見廣雅 玉篇輪船也按今以船旁木爲桡亦作牘

長而薄者謂之舩

見方言 廣雅舩舟也 玉篇舩艇船

短而深者謂之舩

見方言郭璞今江東呼舩舩者玉篇同 廣雅舩舟也

小爾雅艇之小者曰舩 梁書羊侃傳初赴衡州于

兩舩舩起三間通梁水齋

又謂之舩

集韻舩船短而深也 陳書侯景傳景乃以舩舩貯石

沈塞淮口 資治通鑑侯景召石頭津主張賓使引淮

中般舩及海舩

小而深者謂之舩

方言小而深者謂之楸郭璞卽長舩也按舩舩舩本一字蓋正作舩通作舩今王篇又別出楸楸二字益非疑方言本亦後人依王篇追改也今姑隨其義兩列

大舟謂之楸

說文楸海中大船徐鉉曰今俗別作筏非是 廣雅舩舟也 王篇舩大船也 華嚴經音義稱通俗文筏作舩韻集筏作楸同扶月反按舩筏皆俗字並當作楸又別見

又謂之楸

說文檣江中大船名 廣雅鱣舟也 玉篇鱣大舟也

按鱣俗字當作檣 方言東南丹陽會稽之間謂鱣爲
檣按方言鱣爲小舸檣與鱣同則檣亦不盡是大舟矣
又別見

又謂之般

方言般大也 玉篇般大船餘別見

又謂之舸

方言南楚江湘凡船大者謂之舸 玉篇舸船也 左

思蜀都賦宏舸連舸李善注大船曰舸 按三國吳志

董襲傳襲乘大舸船突入蒙衝南齊書王敬則傳高道

慶乘舸解于江中迎戰此舸爲大船之證然裴松之注

引江表傳劉備乘單舸往見周瑜風土記船舸單乘是單船亦謂之舸也說文無舸字見徐鉉新附

又謂之艫

廣雅艫舟也 王篇艫大船也

又謂之舩

華嚴經音義稱呂忱字林舩大船也今江南泛海船謂之舩昆侖及高麗皆乘之大者受萬斛也 又稱埤蒼舩大船也王篇同 又稱通俗文晉船曰舩初學記引無舩字 大者長二十丈載六七百人 按水經注孫權裴大船名之曰長安亦曰大舩是矣俗別作舩非

又謂之舩 又謂之舩

考方集卷之三

王篇舩舩並大船 集韵舩兩槽大船 梁元帝吳趨

行何時乘舩歸按別作舩非是 陳書侯安都傳坐舩

內墜于櫓井時以為不祥又王子晉等乃偽以小船依

舩而釣

又謂之舩舩

廣雅舩舩舟也王篇同 集韵舩舩大編也 北堂書

鈔豫章城西有舩舩洲水經注即吕蒙作舩舩大編處

按吳志吕蒙襲闕羽至尋陽盡伏其精兵于舩舩中是

舩舩又通作舩舩 又稱楊泉物理論夫工匠經涉河

海為舩舩以浮大川 通異 太平御覽稱雜字解詁三

舩舩雜船也

小舟謂之刀

毛詩河廣云曾不容刀鄭康成箋云小船曰刀按詩正義及釋文並云說文作舸今攷說文無舸字疑陸德明等誤記釋名玉篇諸書爲說文也餘類此尚多姑附記于此 釋名三百斛曰舸舸貂也貂短也江南所名短而廣安不傾危者也按近人校釋名誤以說文之舸合舸不知說文之舸从剛省讀若元音既不同且此云安不傾危而說文云舸船行不安也義亦相反今別見又詩正義引說文云舸小船未知何本 廣雅舸舟也 初學記稱埤蒼舸吳船也音雕 集韻或作舸通作刀或作船廣韻舸吳船 按一切經音義引方言小舸舸

謂之艇郭璞曰艇舸也音刀與今本方言異或別有所

據但刀係正字舸船舸皆刀之別字耳北堂書鈔初學記太平御覽引

釋名舸皆作舸玉篇舸小舸也

又謂之艇

方言小舸謂之艇郭璞今江東呼艇小底者也 玉篇

艇小舟也按別作舸非是

又謂之艇

方言艇謂之舸縮小舸縮謂之艇郭璞舸也 釋名二

百斛以上曰艇其形徑挺一人二人所行者也按說文

無艇字應作挺為是 廣雅艇舟也 北堂書鈔稱說

文云艇小舟也形狹而長按艇字見說文新附然北堂

書鈔引說文如此則鉉或別有所本 小爾雅小船謂之艇艇之小者謂之舩 高誘淮南王書注蜀艇一板之舩若今之豫章是也

又謂之舩

方言小而深者謂之楸郭璞卽長舩也 廣雅舩舟也

玉篇舩小船也 舩同 馬融廣成頌連舩舟李賢注

舩小舟也 傅元正都賦越舩泛吳榜浮

又謂之舩

玉篇舩小船也 按宋書武帝紀盧循有八舩艦九枚

起四層高十二丈又垣護之隨王元謨入河虜悉已牽

元謨水軍大舩連以鐵鎖三重欲以絕護之還路是舩

亦大小兼有不盡屬小船也宋書恩倖傳論又云南金百毳來悉方艚 按說文無艚字疑即漕字之別說文漕水轉穀也一曰人之所乘及船也宋書云水軍大艚與王篇廣韵水運為漕之說亦合後人或去水加舟耳又謂之麗

王篇麗小船也 莊子秋水篇梁麗不可以衝城司馬

彪注梁麗小船也 按裴松之三國志王朗傳注稱獻

帝春秋孫策率軍如闕越討朗朗泛舟浮海欲走交州

至朗對策使者云獨與老母共乘一麗流矢始交便棄

麗就俘云云亦麗為小舟之證麗麗古字通佛本行讚

經音義亦云麗小船也麗當屬麗字之別

又謂之舠

玉篇舠小船也 梁書王僧辯傳侯子鑒等率步騎萬

餘人于岸挑戰又以舠千艘並載土兩邊悉八十棹
梭王篇無舠字當作鳥了鳥蓋言其小也

又謂之幹舟

高誘淮南王書注幹舟小舟也 通異一曰大舟

又謂之舠舠

廣雅舠舠舟也 玉篇舠舠小舟也 梭南齊書張敬

兒傳敬兒乘舠舠過江遇風船覆又云上與豫章王疑

三日曲水內宴舠舠流至御坐前覆沒此可證舠舠皆

小舟

戰船謂之蒙衝

釋名外狹而長曰鱗衝以衝突敵船也 廣雅鱗鱗舟

也 玉篇鱗鱗戰船按字當作蒙衝 吳志董襲討黃

祖祖橫兩蒙衝夾守沔口又周瑜逆曹公于赤壁部將

黃蓋取蒙衝門艦數十梭實以薪草 陳書侯瑱傳以

牛皮冒蒙衝小船以觸賊艦 通異名 廣韵鱗短船名

又謂之舩艦

廣韵稱字林舩艦水戰船 玉篇舩艦戰船也 按廣

雅作舩艦或以字近而誤

又謂之斥候

釋名五百斛以上還有小屋曰斥候以視敵進退也

軍行在前謂之先登

釋名軍行在前曰先登登之向敵陳也 初學記稱晉

令水戰有飛雲舸蒼隼舸先登舸飛鳥舸劉逵云飛雲
蓋海吳樓船名核此類異名尚多不能悉錄附記于此
置戈船下謂之戈船

張晏漢書注越人于水中負人船又有蛟龍之害故置
戈于船下因以爲名也按臣瓚引伍子胥書有戈船以
載干戈吳越春秋句踐伐吳外傳戈船三百艘則戈船
之制不始于漢

輕舟謂之舸

玉篇舸東船廣韵同

又謂之鰈

宋書鄧琬傳劉胡遣陳紹宗陳慶率輕鰈二百大艦五十出鵠尾外挑戰南齊書柳世隆傳輕鰈一萬隋書來護兒傳楊素令護兒率數百輕鰈徑登江岸戴嵩釣竿篇藻花褰小鰈按此篇所收字至玉篇而止唯鰈舩等字以已見宋齊梁陳等書故亦錄入疑屬鰈字之別也又今本類書引方言南楚呼鰈曰標今方言無此語

輕疾者謂之赤馬

釋名輕疾者曰赤馬用其體正赤疾如馬也崔豹古今注孫權時名舩爲赤馬言如馬之走陸也又小舩名

馳馬 北堂書鈔稱江表傳孫權名舸爲馬言飛馳如馬之走陸地也又稱杜預表長史劉循治洛陽以東運渠嘗用赤馬 按劉熙亦漢末三國時人所云赤馬舟當卽指孫權所造而言抱朴子水馬飛鳧義亦同

子船謂之舸

玉篇舸子船

通異名集韻覆船具亦曰舸

合木船謂之舸又謂之艫

廣雅艫舸舟也

初學記稱周遷輿服雜事其人欲輕

行則乘海舸合木船也 廣韻舸合木船

編竹船謂之箒

玉篇箒竹長千丈爲大船也生海畔

運舟謂之舩

王篇舩運船也廣韵同又廣韵云舩釣船也附錄于此
海中舟謂之機

見上 王篇機海中大船也汙也亦作機棧王篇分機
機爲二字非下機機亦同

又謂之梭

見上 藝文類聚稱韵集艘海大船也

又謂之舶

見上 廣韵海中大船 集韵蠻夷泛海舟曰舶

又謂之霽

王篇霽海船也

又謂之艫又謂之舩

初學記稱稗蒼云海中大船曰舩 王篇舩海船也

舩船也 廣韻舩海中大船舩海船名

江中舟謂之櫂

見上 按初學記稱說文曰江中舟曰櫂音禮蓋即蠡

字之誤 王篇櫂江中大船也又作舩

又謂之舩

見上 廣韻對舩江中大船按舩又舩字之別禮部韻

略舩字下引廣雅舩舩舟今考廣雅亦無舩字惟舩字

曹憲音滔韻略蓋因此誤也廣韻亦無此字

舟飾謂之舩又謂之舩

王篇艦舩舟飾也按廣韻無艦舩二字

載多謂之艦

玉篇艦音富 類篇船載多也按此蓋望文生義因王

篇有此字故錄入之

編木渡謂之泔

詩周南不可方思毛傳方泔也釋文泔本亦作滌又作
桴或作桴又作坳按廣雅玉篇又作解皆俗字 說文

泔編木以渡也玉篇同 楚辭九章乘汜泔以下流王

逸章句編竹木爲泔楚人曰泔秦人曰撥也 三國吳

志徐夫人傳伐蘆葦以爲泔佐船渡軍裴松之注音敷

泔謂之箏

見方言 廣雅籊筏也王篇作箄又作籊詩釋文稱郭璞云木曰籊竹曰筏小筏曰泝 華嚴經音義今編竹木以水運爲籊秦人名筏江東名籊又云北人名筏南土名籊義同 北堂書鈔又稱東觀漢記張堪爲蜀郡太守公孫述擊之三百人斬竹爲棹渡水遂免是字又作棹 後漢書岑彭傳乘枋箄下江關鄧訓傳縫草爲船置于箄上以渡河李賢注箄木筏也 按說文無籊字今從後漢書作箄

箄謂之筏

方言籊謂之筏筏秦晉之通語也 馬融論語注桴編竹木大者曰棹小者曰桴 王篇筏箄也按撥筏二字

廣雅玉篇已皆兩收今故隨其義分列之又大般涅槃經筏又作棧元應注經文从木作棧非體也韻集又作撥義亦通通典軍行渡水又有蒲棧葦棧

箒中謂之薦

方言江淮家居箒中謂之薦音荐疏證荐各本誤作符今訂正

泆之小者謂之桴

馬融論語注小者曰桴韋昭國語注同長阿含經音義小泆曰桴也

水中浮木謂之查

王篇查水中浮木也王嘉拾遺記堯時有巨查浮于

西海 棹又作楂又作槎並非又廣雅玉篇槎字當卽
槎字之別今姑從其義兩列

併船謂之方

爾雅舫舟也郭璞注併兩船釋文引樊光本舫作坊

說文方併船也象兩舟省總頭形又作沝云方或从水
按太平御覽稱說文又作舫云併兩船也北堂書鈔同
是方亦通作舫 戰國策方船積粟循江而下 史記

酈食其傳蜀漢之粟方船而下司馬貞索隱云方船爲
並舟也按此知舫古皆作方然張儀列傳舫船載卒小
司馬又云舫音方是二字又可互通 大般涅槃經音
義稱通俗文連舟曰舫併兩船也玉篇亦同 後漢書

岑彭傳乘枋單下江關李賢注枋卽舫字古通用北
堂書鈔稱王隱晉書顧榮紀瞻被徵行至彭城見王路
塞絕遂解舫爲潭舸而歸王濬傳濬乃作大船連舫方
百二十步 宋書臧質傳明日賊更方舫爲柁 柁
書戴淵傳陸機在舫屋上遙謂淵王廙傳倚舫樓長嘯
是則舫制亦如艦上有屋并有樓也

方舟又謂之航

說文航方舟也徐鉉曰今俗別作航非是 方言舟自
關而東或謂之舟或謂之航戴震疏證後漢書文苑傳
北航涇流注航舟度也方言自關而東或謂舟爲航說
文航在方部今流俗不解與杭字相亂誤也 淮南王

書主術訓大者以爲舟航高誘注方兩小船並濟爲航
杭同又汜論訓云乃爲窳木方板以爲舟航注舟相連
爲航也又說林訓釣魚者泛杭注杭航通 按集韻舩
方舟也羣書無此字惟釋文首序云吳興大舩頭蓋又
屬航字之別今考旂杭雖各部然古人率皆通用如漢
書地理志餘杭縣吳興記云秦始皇舍舟杭于此因以
爲名以迄淮南王書等是矣航旣旂之別字若作舩則
又別之別耳 又按晉書五行志海西公太和六年六
月京師大水朱雀大航纜斷三艘流入大江據此則航
卽今之浮橋不止並兩船也水經注浙江水下刻縣西
度通臨海併二十五船爲橋航故蔡謨傳云蔡公過浮

航脫帶腰舟長也宋書臧質傳賊更方航爲桁水經注
成固縣城北水舊有桁是也然又有單船謂之航者水
經注浙江水下云刻縣東南二度通臨海並泛單船爲
浮杭

又謂之瀡

說文瀡小津也一曰以船渡也 方言方舟謂之瀡王

篇同郭璞揚州人呼渡津舫爲杭荊州人呼瀡 廣雅

瀡筏也 太平御覽稱太公六韜天船一名天橫以濟

大水橫瀡古字通按成實論音義杭古文橫牘二形今

作杭同古黃反廣雅舩謂之杭杭當卽瀡字集韻舩船

前杭也韻會舩俞舟名義亦兩通今仍從說文廣雅爲

列而附記于此

船有屋謂之檻

釋名上下重版曰檻四方施版以禦矢石其內如牢檻也 晉書音義稱字林云艦屋船也音檻 玉篇艦板屋舟按說文無艦字今從釋名作檻 陸機辨亾論前驅不過百艦 晉書陶侃傳侃乃以運船爲戰艦又云賊鈎侃所乘艦侃窘急走入小船何無忌傳盧循遣別帥徐道覆順流而下舟艦皆重樓 北堂書鈔稱義熙起居注盧循新作八艘艦九枚起四層高十餘丈按宋書循吏杜慧度傳慧度自登高艦與循合戰放火箭雉尾炬循衆艦俱然一時散潰是也 宋書王鎮惡傳所

乘皆蒙衝小艦行船者悉在艦內羌見艦沂渭而進艦外不見有乘行船人咸謂爲神張興世傅司徒建妻王休仁命沈攸之等以皮艦二十攻賊濃湖 通典鬥艦船上設女牆可高三尺牆下開掣棹孔船內五尺又建

通與女牆齊此戰船也

通異藝文類聚稱廣雅云艦

大船也按與今本廣雅不同當別有所據

又謂之艦

廣雅艦舟也 玉篇舠小船屋也艦同 太平御覽稱

字書船上有屋者曰艦 類篇舟也一曰舟有窗者

楚辭九章乘舠船余上沅兮王逸章句舠船船有窗牖者也 淮南王書倣真訓越舠蜀艇不能無水而浮高

誘注舠小船也按舠本一字廣韻于舠字下云舟上有窗舠字下云舠艦有屋舟名蓋誤

其上板謂之覆

釋名其上板曰覆言所覆慮也 按今本作言所覆衆

枕也誤太平御覽引此作覆衆慮又衍衆字今攷首篇

釋天云露慮也覆慮物也知此亦當作覆慮

其上屋謂之廬

釋名其上屋曰廬象廬舍也按別作簾非是

上重屋謂之飛廬

釋名其上重屋曰飛廬在上故曰飛也

又其上謂之爵室

釋名又在其上曰爵室於中候望之如鳥爵之驚視也
按視今本作示北堂書鈔藝文類聚太平御覽等書
引此又作若鳥雀之驚視也

船頭謂之艫

說文艫舳舻也一曰船頭

通異小爾雅船尾謂之舳

玉篇舳在船後按左思吳都賦巨艦接舳庾闡揚都
賦青雀飛舳是舳又通作舳名

又謂之閤間

方言首謂之閤間郭璞今江東呼船頭屋謂之飛間是
也 玉篇五比爲閤又船首之間

又謂之鵠首

方言或謂之艦艚郭璞鷓鳥名也今江東貴人船前作青雀是其象也 廣雅艦艚舟也 玉篇舟頭爲鷓首又作檻 司馬相如子虛賦浮文鷓張揖曰鷓水鳥也畫其象于船首 淮南王書龍舟鷓首天子之乘也 按此則字當作鷓首後乃紘加舟旁耳又晉書武帝謀伐吳詔王濬修舟艦畫鷓首怪獸于船首以懼江神是船頭之名鷓首又專以繪鷓于首得名

船尾謂之舳

說文舳艦也漢律名船方長爲舳艦一曰舟尾 方言後曰舳郭璞今江東呼柂爲舳又云舳制水也 漢書武帝自潯陽浮江而下舳艦千里注李斐曰舳後持舵

處艫前頭刺權處也

通異小爾雅船頭謂之舳按小

爾雅所言正與說文等相反劉達吳都賦注亦同

又謂之杖

釋名其尾曰柁柁也在後見柁曳也且弼正船使順

流不使他戾也 玉篇杖船尾小梢也木部有柁舟部

有舩並云正船木按杖即柁字今別作柁又作舩並非

物原云帝嚳作柁檣夏禹作舩又妄分為二非也 淮

南王書說林訓毀舟為杖高誘注杖舟尾按與柁同俗

作柁亦作舩皆非 襄松之吳志注江表傳孫權于武

昌新製大船試泛之釣臺時風大盛谷利令柁工取樊

口權曰當取羅洲利技方向柁工曰不取樊口者斬王

卽轉柁入樊口 北堂書鈔稱孫放別傳不見船柁乎
在後所以正船也 按漢書淮南王安諫擊閩越云柁
舟而入水說文柁曳也則柁當作柁爲是十誦律音義
亦云柁字从手

船前立柱謂之桅

釋名其前立柱曰桅桅巍也巍巍高貌也按桅本又作
檝其前太平御覽引此作船前 玉篇桅船上檣竿
通異淮南王書說林訓遷契其舟桅高誘注桅船弦板
也

船後木謂之舳

玉篇舳舳舟又木部舳云船後舳木廣韵同 按舳與

老於月三月卷三
駐同王篇于車部載此字云鞋車也今湖湘間小舟無
柁者于梢上作孔欲停舟即從孔中植一木船即不行
鞋舟之義當取此 徇異王篇又云排筏名也

舟中牀以薦物者謂之苓

釋名舟中牀以薦物者曰苓言但有簣如苓牀也南方
人謂之苓突言溼漏之水突然下過也盧學士文昭校
本今船底上有襯板水或浸滯而入其窠低者曰水倉
常時去之名曰刮潮與此說合 王篇苓舟中牀也校
說文苓車苓也與篋通訓是舟車中可以薦物者通得
謂之苓

張幔謂之颿

說文颿馬疾步也从馬風聲徐鉉曰舟船之颿本用此
字今別作帆非是核舟之使颿亦如馬之疾步故假借
用之 釋名隨風張幔曰帆帆泛也使舟疾泛泛然也
核今本帆泛也在隨風之上非又一切經音義兩引此
一作隨風張幔曰颿一作隨風張幔曰帆蓋一據說文
改也 佛本行集經音義稱聲類云颿船上幔也一云
船上帳也又稱三蒼颿船上張布吧也 王篇颿風吹
船進也亦作颿帆船帆也與艇同核據此則帆颿艇
皆颿之別字今廣雅別出艇字王篇舟部風部並別出
颿字皆非 廣韻帆船船上幔也亦作颿 風土記帆從
風之幔也施于船前各隨宜大小爲制大者用布一百

二十幅高九丈 太平御覽稱韻集云飄船張也

又謂之雙又謂之篷

說文柂雙也王篇別作舩艘又作柂雙 廣韻柂雙帆

未張又云雙帆也今從說文作雙 王篇篷連船帳也

飄柱謂之檣

太平御覽稱埤蒼檣飄柱也俗作檣王篇同檣王篇舩

部又別出舩字非 北堂書鈔稱王祭浮淮賦建衆檣

以成林 郭璞江賦舩艦相接萬里連檣

船旁板謂之柂

王逸楚辭章句柂舩旁板也柂一作棧 王篇柂楫也

與棧同柂楫柂本一物王篇合而為二後人皆因之似

誤

又謂之舩又謂之桅

並見上

所以進船謂之櫓

釋名在旁曰櫓櫓齊也用齊力然後舟行也 王篇舩

所以進船也 吳志呂蒙傳使白衣搖櫓作商賈人服

晉書夏統傳乃操柁正櫓 南史梁呂僧珍見武帝

頗招武猛命多伐材竹未用僧珍獨悟其指因私具櫓

數百張 通異名四分律音義櫓船上樓櫓也

又謂之濯

說文楫舟濯也 漢書百官表水衡都尉屬官有鞞濯

令丞如淳曰輯濯船官也師古曰輯濯皆所以行船

釋名在旁撥水曰櫂濯濯也濯手水中也且言使舟濯

進也 方言或謂之櫂郭璞今之櫂歌依此名也 楚

辭桂櫂兮蘭漿王逸章句櫂楫也 後漢書岑彭傳委

輸棹卒凡六萬餘人李賢注棹卒持棹行船也東觀記

作濯前漢書鄧通濯船爲黃頭郎 大方廣佛華嚴經

音義稱通俗文濯謂之舩 玉篇濯楫也棹同 棹說

文無濯字始見新附當係濯字之別玉篇又別出棹舩

字益非

又謂之札

釋名又謂之札形似札也

又謂之楫

易剡木爲楫 詩檜楫松舟毛傳楫所以濯舟也 說

文楫舟濯也按漢書百官表有輯濯令丞師古曰輯讀

與楫同是楫亦可作輯與檝皆古字通 方言楫謂之

撓 釋名又謂之楫楫捷也撥水使舟捷疾也 淮南

王書七尺之楫而制大舟者因水爲資也 王篇楫行

舟具也 按楫亦通作杖水經注馮舟自運無杖楫之

勞是也說文攸行水也徐鍇曰攸入水所杖義亦同

又謂之楳

王篇楳艣別名

小楫謂之撓又謂之拏

方言楫謂之橈小爾雅同楚辭蓀橈兮蘭槳王逸章

句橈船小楫也玉篇同吳越春秋得一橈而行歌道

中注橈小楫也淮南王書七尺之橈而制船之左右

者以水為資高誘注橈刺船棹也一作橈後漢書吳

漢傳裴露橈船李賢注橈短楫也按俗作橈非佛本

行經音義江南櫂大于橈而楫殊小作橈者面向船頭

立撥之作櫂者面向船尾坐撥楫櫂筭也按此則唐楫

橈之制又與古小異司馬彪莊子注挈橈也

所以隱澀謂之槳

見方言今本作籩郭璞搖船小槳也江東又名為胡人

玉篇槳楫屬按字當作槳物原云顛頊作篙槳者

是也

所以縣濯謂之緝

見方言郭璞繫船頭索也

所以斥旁岸謂之交

方言所以刺船謂之橈

釋名所用斥旁岸曰交一人

前一人還相交錯也

王篇篙竹刺船行也僧祇經音

義亦云篙刺船竹一云刺船竹杖按此蓋望文生義王

篇本部又別出橈字益非方言疑亦後人追改

越絕

書闔閭問子胥曰船軍之備何如子胥荅曰篙工船師

可當君之輕足驟騎也

淮南說林訓以篙測江高誘

注摘船以篙僧祇經音義稱許慎注篙謂刺船竹長二

丈以鐵爲鏃者也 左思吳都賦篙工楫師選自閩禺

按本取相交錯之義故字當作交俗作篙說文新附

云篙所以進船也然此乃玉篇艣字義訓不可移訓篙

濯船羽謂之櫂

玉篇櫂棹船羽

以板遏水謂之牒牒

玉篇牒牒所以遏水也

又謂之業

爾雅大版謂之業說文業大版也 廣韻業橫水大板

按玉篇無業字此蓋隨文生義以大版在水中故加

水旁今仍作業字而存其義今人呼水中橫板曰淌水

以竹塞舟謂之筴

玉篇竹筴以塞舟又作柶云所以塞舟漏也 按今舟人塞漏尚謂之茹船出曜論杼船音義杼漏也又廣雅杼泄出也義並通

維舟謂之鼎

方言維之謂之鼎郭璞繫船爲維

又謂之紼又謂之緯

爾雅紼縹維之紼緯也郭璞注緯索 說文紼亂絲也

緯縶屬 玉篇緯舉船索也或作緯 詩正義稱孫炎

曰緯大索也又云舟止繫之于樹木戾竹爲大索李巡曰緯竹爲索所以維持舟者

又謂之纜漢書注曰纜音供音

王篇纜維舟也吳志甘寧傳勅船人更增舸纜

引舟謂之箝王餘箝音箝音也延箝音

釋名引舟者曰箝箝作也作起也起舟使動行也按太

平御覽引作箝箝作也起舟使動作也今攷箝字義別當

作箝為是水經注吳國音蘇里有昨嶺山俗說此

山本在太湖中禹治水移進近湖又東及西南有兩小

山皆有石如卷箝俗云禹所用牽山也太湖中有淺地

長老云是箝嶺山音自音趾音陳音漢音云是箝山之音

太平御覽音纂音技音箝音之音箝音蒙音謂音之音箝音按音亦音箝音應

以音箝音漢音鼓音岐音曲音曰音桂音樹音為音君音船音青音絲音為音君音箝音漢書

武帝紀注西南夷尋筰以渡水因號印筰按此則漢越
嶺郡定在大嶺等縣蓋皆以是得名也魏文帝詩負筰
引船行玉篇筰竹索也引舟竹筰也又作筰按說文
筰竹索也是筰筰筰三字並通

又謂之縹又謂之縹

釋文稱韓詩曰縹筰也又謂之縹輔雅縹綖也郭璞注縹繫卻
倚讀音注此義筰與綖義同可以起舟使動行

又謂之牽

說文牽引舟也又謂之牽集韻類篇稱字林云縹絞挽舟繩

玉篇牽挽也速也連也又謂之牽按維舟之索今俗統謂之縹
引舟之繩今俗統謂之縹縹即牽之別字今挽舟兼有

牽引之義故借假用之水經注禹所用牽山齊書張融
權牽船于岸上住北堂書鈔稱語林劉道真于河側自
牽船是也唐人名之爲百丈

又謂之綈

廣韵集韵稱字林綈挽船筏也 按說文玉篇並無此
字疑屬紵字之別說文紵轉也轉亦有挽之義矣

繫舟木謂之楸又謂之杙

爾雅楸謂之杙郭璞注檠也 說文檠弋也弋檠也

詩正義稱李巡曰杙謂檠也 北堂書鈔今繫舟木曰

楸俗加舟作楸 漢書注牂柯繫船杙也 通典軍行

渡水又用挾絙以善游者繫小繩先浮渡水次引大絙

于兩岸立大檣定絙使人扶絙浮渡大軍可爲數十道
又謂之戩

王篇戈部收戩云船板木弋部又收戩云船左右大木
也 廣韵戩船纜所繫 按戩戩本一字王篇分爲二
誤今姑从廣韵作戩又戩疑亦戩字之別柯一作戩也
又謂之牂柯

常璩華陽國志楚頃襄王時遣莊蹻伐夜郎軍至且蘭
楸船于岸而步戰既滅夜郎以且蘭有楸船牂柯處乃
改其名爲牂柯 襄松之常林傳注稱魏略諸葛瑾攻
圍樊城遣船兵于峴山東斫材牂柯 太平御覽稱異
物志牂柯繫船木也按王篇別作戩戩非是

候風謂之統

淮南子書有統之候風高誘注候風之羽也楚人謂之

五兩文選注稱許慎不統候風也

武備編統候風五兩也

又謂之規

淮南子書譬若規之見風也無須臾之間定矣高誘注

規候風者也世所謂五兩

屬一

武備編統候風五兩也

郭璞注賦規五兩之動靜

按候風之法蓋起于軍中

故本于御覽稱其蓋

置旗取羽繫其顛立軍營中此卽候風之制船上候風

制亦當同蘇氏今注制論人言水音此

泝斗謂之樞命風謂外姓漢氣人言令其合機而風人

廣雅泝斗謂之樞曹憲音願 王篇樞船厚斗

又謂之枵蘇氏今注

太平御覽稱纂文安枵斗也蘇氏今注

整舟約緯謂之穢蘇氏今注

史記項羽本紀烏江亭長檣船待集解稱應劭曰穢正

也孟康曰穢附也附船著舫也如淳曰南方人謂整船

向岸曰穢 劉逵蜀都賦注南方俗謂正船曰濟處曰

木穢 王篇穢整舟向岸按穢當作穢

水渡謂之舠

說文舠津字古文水渡也古文津从舟 王篇舠古津

字按王篇又云一作舠蓋又津字之別今削之

船師謂之舠

說文舠船師也明堂月令云舠人習水者 通異 爾雅

舠泐也郭璞注水中簿符 一切經音義稱通俗文連

舟曰舠按餘已見上

又謂之榜

禮記月令命漁師伐蛟鄭康成注今月令漁師為榜人

北堂書鈔稱月令云榜船人習水者也 漢書司馬相

如傳榜人歌聲流唱張揖曰榜船也月令云命榜人榜

人船長也。按舫榜古字通。今俗尚呼刺船者謂榜人。又謂之長年。王篇榜人船人也。通異名廣雅舟舫榜船也。按或作舫非。楚辭齊吳榜以擊汰。王逸章句吳榜船櫂也。北堂書鈔稱傅元正都賦越船沉吳榜浮。

舟旋謂之舠

說文用也。一曰車右騎所以舟旋。古文舠舠人。王篇舠舠二同音伏。廣韻舠古文舠字。按皆取可以周旋之義。

舟辟謂之般

爾雅釋言般旋也。還也。說文辟也。象舟之旋。从舟从攴。攴所以旋也。古文般从攴。廣雅般桓不進也。又般。

還也 按禮記投壺篇主人般旋國辭同意

舟動謂之船

王篇船船動貌

按集韻又出般字云船動貌與船同

舟播謂之帆

匪篇帆播舟

廣韻帆古文船字林音煩舟也

舟行謂之舩

日車音德也其或古文舩人 王篇

說文舩船行也 王篇舟行也廣韻同按王篇又云舩

爾雅云祭也全攷舩舩寔三字唯舟御者說又舟飾也

亦借作祭名書高宗彤日爾雅高日彤是也音徒終切

一在舟部說文舩行也音丑林切王篇舩為舩誤

又謂之舩又謂之舩又謂之舩

王篇船艇彗並舟行

舟進謂之艦

舟進謂之艦 舟進謂之艦 舟進謂之艦

至篇艦進也

舟未行而進謂之彗

舟未行而進謂之彗 舟未行而進謂之彗

說文不行而進謂之彗 彗 彗 彗 彗 彗 彗 彗 彗 彗 彗

舟不安謂之舠

舟不安謂之舠 舟不安謂之舠 舟不安謂之舠

說文舠船行不安也 讀若兀 王篇同

方言僞謂之侏

侏不安也 稜舠侏 蓋一字主篇 别出舠 廣韻又别作舠

並非廣韻 又有舠字 云船不安也

船 舠 行 謂 之 舠 舠 舠 舠 舠 舠 舠 舠 舠 舠

爾雅 舠 字 也 孫炎 舠 古 舠 字 方 言 周 禮 說 文 舠 船 著 不

行也讀若葦王篇同又音屈 廣韵艘船著沙不行也

音珂 按不行即至矣故孫炎以爲古屈字

舟危謂之艫

王篇有 按今本字書引王篇有舟危也三字

舟沒謂之淦

王篇陘船沒也 善見律音義稱字體云陘船沒也亦

作淦 廣韵陘船沒 按字當作淦說文淦水入船中

也方言淦沈也義亦同淦陘陘皆俗字以音同而別

吳謂之艫

王篇艘吳舟 按左傳餘皇吳所造故名之爲吳舟也

又謂之艫

見上 初學記稱廣雅曰吳曰舩廣韵同 華嚴經音

義稱通俗文吳船曰舩

又謂之舩

見上 初學記稱埤蒼舩吳船也

又謂之舩

見上 王篇舩吳船也 轉注古音吳人目舟曰舩舩

越謂之須慮

越絕書吳內傳越人謂船為須慮

晉謂之舩

見上 初學記稱李虔通俗文曰晉曰舩 華嚴經音

義稱通俗文晉船曰舩

蜀謂之船

廣韻船蜀人呼船

外域人謂之舩

見上北堂書鈔稱南州異物志外域人名船曰舩大

者二十餘丈高去水三四丈載六七百人物萬斛

天子舟謂之船

說文船古文造从舟至篇天子船曰船按周制惟

天子得用造舟船蓋合造舟三字為一釋文稱郭氏

圖云天子並七船韓綜東京賦注造舟以舟相比次

為橋也

又謂之鵠鵠與船音同

見上 藝文類聚稱韵集鷁首天子船也

船又謂之浮梁

方言船舟謂之浮梁郭璞即今浮橋廣雅同 公羊疏稱舊說云以舟爲橋詣其上而行過故曰造舟棧東晉朱雀桁亦其遺制但自天子而下並得渡耳

諸侯連四舟謂之維

爾雅諸侯維舟郭璞注維連四舟 詩正義稱李巡曰

中央前後相維持曰維舟

大夫併兩船謂之方

爾雅大夫方舟郭璞注併兩船義已見上

士單舫謂之特

爾雅士特舟郭璞注單舩 公羊疏稱李巡曰一舟曰

特舟

庶人併木渡謂之泚

爾雅庶人乘泚郭璞注併木以渡義已見上 公羊疏
稱李巡曰編木以渡別尊卑也

卷施閣文甲集卷第四

陽湖洪亮吉學

貴州水道攷上

貴州十三府爲楚蜀粵上游其間巨川數十皆見于班固漢書司馬彪續漢志郭璞山經鄕道元水經等注而唐宋以後則無聞焉蓋地浸于苗蠻名乖于土俗一水則隨地易名有至十數名不止者何怪乎撰方志詢土俗者之轉轉承訛無一可依據乎其間卽有思矯其弊如郭子章之黔記田雯之黔書而橫據胸臆不尋源流則其失亦與方志之俚鄙者等夫貴州諸巨川其旁皆高山峻嶺非若東南之水可隨時易其故道者也余以

壬子冬奉

命視學此方輅車所至類皆沿源溯流證以昔聞加之目驗既不信今亦不泥古兩年于茲撰成貴州水道攷三卷凡經流七皆水之直達江海者大水八皆水之絡數十小水至貴州境以外合經流者中水百八十一皆水之能絡小水在貴州境以內合經流及大水者小水一百五十二皆合中水以入大水者而水之無名及不知所歸者尚不與焉書成晰爲三卷以由湖南入江者爲卷首由四川入江者次之由廣西至廣東入海者又次之各冠以表條分縷晰庶後爲方志者有所考鏡云乾隆五十九年歲在甲寅八月一日序

自湖南入江諸水

沅水至湖南由洞庭湖入江經流一

豐寧司水入沅

九股河入沅

烏堯河入沅

龍潭河入沅

麥冲河入沅 平洲河藤茶河附

諸梁江入沅 魚梁江蘆坪江附

卡龍河入諸梁江

麻哈江入沅 擺邏河附

馬場江 羊場江 地松河楊老河武勝河等附

冷水河 樂平溪 勇勝溪 凱旋溪 舟溪

山江河並入麻哈江

高溪入沅

秀水入高溪

小江入沅水

丹江入小江 防里河又入丹江

鑑水江入沅

西江 分水凹水入鑑江

潭溪水入沅

洪舟江入沅

平茶江入洪舟江

邛水入沅

長忌河入邛水

城東溪入沅

龍溪入沅

凹溪入龍溪

左溪入沅

冶水溪入沅

直銀水入沅

幞頭堡水入直銀水

木耳溪入沅九江附

無水至湖南黔陽縣入沅大水一

飛雲洞水入無

興隆大河興隆小河入無

苗裏水入無

處洞河入無

北門河入處洞河

施秉小江入無 秉溪別溪等附

杉木河入無

瓦窰水入無

江凱溪入無

鎮遠城西河入無

宛溪入無

焦溪入無

梅溪入無

秋溪入無

松溪入無

牙溪入無

小由溪入無

勇溪入無

白水溪入無

鐵溪入無

異溪入無

鐵廠水入異溪竹坪河苗龍河附

馬口溪入無

注溪 架溪入馬口溪施溪海龍溪等附

文水河入無

易家河入無

野雞河入無

西溪 梭溪入野雞河

黃道溪入無

銅鼓塘水入黃道溪

辰水至湖南辰谿縣入沅大水二

獨母水入辰水

省溪入辰水

也江入辰水

烏羅溪 羊溪入也江

前溪入辰水

提溪入辰水

印江入提溪

沅水攷

沅水至湖南黔陽縣始有沅江之名固矣然其發源之處自班固酈道元以後即無能分析之者唐杜佑通典列沅溪于五溪之內李吉甫元和郡縣志於沅水又屢易其名

辰州沅陵縣曰沅江辰溪縣下曰沅水叙州朗溪縣下又曰沅溪水則是水道之混自唐

賢始也攷漢書地理志武陵郡臨沅縣下引應劭曰沅水

出牂柯入于江無陽縣下班固原注云無水首受故且蘭

南入沅行八百里牂柯郡故且蘭縣下班固原注云沅水

東北至益陽入江過郡二行二千五百三十里水經沅水

出牂柯故且蘭縣說文及劉昭郡國志注為彥溝水太平

記水旁又東至罽成縣為沅水唐朗溪縣漢罽成縣地杜

東過無陽縣道元注云無水出故且蘭南流至無陽故縣

又東南入沅謂之無口合此數說明無水雖入沅然沅水

自有正源不僅資無水也按今黃平州屬重安長官司北

有金鳳山山南即重安江古沅水也貴州紀事清江上通

黔陽以會朗水舟楫山北即鎮陽江之源古無水也自重

安江以上在清平縣境者名凱里河在麻哈州境者俗名

平定河在八寨同知境者俗名雞賈河在都勻縣境者俗名長河又名劍河亦曰馬尾河蓋自源出都勻府城內之東山至黃平州界已流三百餘里矣又下此至平名寨北入生苗界又東南百餘里至黎平府西北鎮遠府東南之清江廳界始名清江又東北至天柱縣之繞東始入湖南黔陽縣界鎮遠江自東北來會蓋自源至此已千一百餘里矣統計經古郡二牂柯武陵今府廳州縣十五都勻平越黎平鎮遠沅州五府八寨清江二廳都勻麻哈清平黃平施秉開泰天柱黔陽八州縣二水旣合又歷辰州常德長沙三府辰谿淑浦瀘溪沅陵桃源武陵龍陽益陽八縣由洞庭湖入大江共千二百里合前實二千三百餘里古

里數較短故班固云行二千五百三十里也蓋沅水舊名

三其始出故且蘭為旁溝水一曰旁流水統名沅水唐時

之曰沅江又俗名九曰長河曰劍河曰馬尾河曰雞賈河

曰平定河曰凱里河曰重安江曰前江通志前江在施秉城南上為重安江

水即清曰清水江今且可由沅無二水攷故且蘭之所在

水經沅水出牂柯故且蘭縣班固云無水首受故且蘭南

入沅今無水實出黃平州南金鳳山山南又即沅水所經

之地則故且蘭縣即在黃平州以西都勻府以北左近界

中無疑矣檢諸地志貴筑貴定清平皆注云故且蘭縣地

圖經則云且蘭在湄甕黃施之交明漢時縣大自黃平州

西南貴筑縣東北皆故且蘭縣地也前人以遵義為且蘭其說蓋非又因

故且蘭可知牂柯郡治所在何則兩漢牂柯郡皆治故且
蘭則牂柯郡治亦在今黃平州西南貴筑縣東北左近界
內可知並可因此證漢晉諸地志之誤字班固注沅水東
南至益陽入江許慎說文云沅水出牂柯故且蘭東北入
江今驗此水自黔陽縣以下至入江皆東北流惟經辰州
府城外稍東南流數里即折向北則許慎之言已確漢志
東南流南字蓋傳寫之誤也劉昭郡國志注故且蘭下引
晉書地道記曰有沈水按水經注沅水出廣漢縣下入滄
水與此迥不相涉舊本後漢書世
祖本紀臧宮與延岑戰于沅水
沅又誤作沅蓋皆以字近而誤亦沅字傳寫之誤又攷沅
水至重安驛東南南平越府諸梁江合麻哈江諸水來會其
餘州境諸水如高溪等皆會重安江明沅水自故且蘭以

上僅名旁溝水白此以下至罈成今開泰天柱等縣山海經沅水出象郡罈城西

此始有沅水之名今在開泰清江廳境者始名清水江是

也齊侍郎名南水道提綱亦知清水江為沅水上源而不

能確指其出都勻府之東山而又混入平越府西北諸梁

江以為亦沅水上源不知此特支流入沅水者耳黃宗羲

今水經又混沅無二水為一皆失不細考

豐寧司水圖經自都勻府界流入長河

九股河通志在丹江通判城南發源九擺寨山中東北

逕鳳臺諸寨入于清江

烏堯河通志在丹江通判城北發源城東烏堯寨山中

流經烏耶關入于清江

龍潭河圖經在都勻府西北山東南流至府北十餘里
有一水自北山來一水自東北來一水自東南來並會
南流逕府城西折東南流入馬尾河

麥冲河明史地理志平浪長官司東南有麥冲河通志
在都勻府城西南圖經馬尾河經都勻府西南境折東
南流有一水自西南經大河鋪來會按當即麥冲河水
又考地理志平洲六洞長官司南有平洲河通志丹行
司西南又有藤茶河二水當亦流合清江也

諸梁江圖經出平越府西北大山東南曲曲流百餘里
至府南境有一水西南自貴定縣東南山東北流經黃
絲驛合數小水來會稍北府城水自西來會正當城南

東北流府城東水又來會又東北卡龍河西北自牛場
來會又東麻哈江西南自州來會通志諸梁江在平越
府城南三里俗又訛猪梁江按平越縣東又有魚梁江
蘆坪江當亦合諸梁等江入清江者

卡龍河圖經合諸梁江

麻哈江明史地理志麻哈州本麻哈長官司洪武十六
年置州南有麻哈江

按州當以水得名

圖經麻哈州西水有三

源一西出貴定縣東南之樂平司兩溪至司東合而東
流至州西南一出州西南者東北流一出州南者西北
流俱會北流迺州西又北合東來一水又北而東北至
楊老驛北又北至林老驛西北入諸梁江通志江在麻

哈城南五里其上源爲兩全江明史地理志兩全江以兩源合流而名又

爲算水下流入于清江梭麻哈州南又有擺遞河當亦

合麻哈江

馬場江明史地理志平越府南有馬場江通志在府

城南四里與羊場江通

羊場江明史地理志平越府南又有羊場河俱東入

于麻哈江貴州紀事明景泰元年冉璉分兵七盤坡

羊腸河楊老堡解清平園通志在府城南二十五里

二水並流合麻哈江

地松河通志在平越府城東北十五里其地名松屯

南流入麻哈江梭縣境又有楊老武勝等河當亦合

麻哈江

冷水河明史地理志黃平州東有冷水河通志在黃平州城東三里流入兩全江明史石邦憲傳招降冷水溪諸洞苗二十八砦卽此

樂平溪明史地理志樂平長官司南有樂平溪通志在麻哈州樂平司南下流合于麻哈江

勇勝溪

凱旋溪圖經並在麻哈州境入麻哈江按相近爛土司境又有灣溪明史四川土司傳都御史張瓚及楊輝攻敗灣溪及灣溪既立爛土諸蠻惡其逼是也今不知何水可以當之或今昔異名姑附記于此清平

縣冊又云勇勝溪合山江河始入麻哈江

舟溪明史地理志清平縣有舟溪江貴州紀事作丹溪通志在平定司東入麻哈江

山江河明史地理志平定長官司東有山江河源出香爐山圖經亦在麻哈州境入麻哈江

高溪通志在黃平州城西北旁有高溪屯下流合秀水入重安江

秀水溪通志在黃平州城東三十里合高溪

小江通志在台拱同知城南之牛皮箐北流逕城南繞城西北入于清江

丹江通志在丹江通判城西合諸山之水以成江下

流入小江 防里河通志亦在丹江城東下入丹江

按沿江苗又有大丹江小丹江之別寔止一江也

鑑水江通志在天柱縣城北又名北門江發源新溪繞城而下與清江合

西江通志在天柱縣城西北下入鑑水江

分水凹水圖經在天柱縣城北七十里沅州界水自

凹分一歸沅州一歸鑑江

潭溪水一名三十里江又名八舟江又名新化江明史

地理志潭溪蠻夷長官司下有潭溪按元置潭溪長官即以此水得名

八舟蠻夷長官司下有八舟江源自府城西為三十里

江北流經此又東北為新化江新化長官司下東南有

新化江又西北合于清水江圖經潭溪有二源一出黎平府西山曰少寨河一源出府西南東北流逕府城西北與八舟河會又東逕老潭司北又東北逕新化所西曰新化江又北逕銅鼓衛西又北至明耳司之西北入清水江水口正與邛水對黎平府志新化江源出城西其上流爲八舟江下流合于清水江

洪舟江明史地理志洪舟長官司下有洪舟江

按元置洪舟長

官司即以水得名

下流合于湖廣靖州之渠河按靖州通道縣

有渠水方志源出縣西南北流逕靖州界至會同縣西北入郎江郎江至辰州府黔陽縣注沅水黎平府洪舟江在洪舟司一名洪州江攷此水合兩水後始注沅水

今水經反以渠陽江爲入于洪舟江誤矣

平茶江黎平府志在府城東南源出太平山流合洪

舟江

邛水元一統志宋邛水故城在今鎮遠縣東南八十里
按宋立邛水縣即以是水得名卽今邛水縣丞所轄圖
經邛水亦曰德明河出鎮遠縣東南二溪合東南流有
長忌河自西南來會又東逕邛水司南又東南有一水
自東北合二溪來會折南流數十里又東南流受北一
小水又東南逕南澗西又東南百里至毛坪之南入清
水江通志在邛水司南源出苗寨下流入沅江是也

長忌河圖經長忌河西南會邛水

城東溪圖經在錦屏縣城東二里發源于苗山經府屬之湖耳司迺迤達于湖廣之黔陽縣按此水蓋至黔陽縣入沅江

龍溪通志在思州府城西下流合凹溪入清江

凹溪通志府境又有凹溪合龍溪

左溪通志在都素司南下流入清江

冶水溪通志在左溪西南亦流入清江

直眼水圖經出天柱縣西界之東大山東流曰等溪折東北流經直眼村西北又東北折南流至縣北分流夾城左右有一水西自幞頭堡至縣西來會又東稍南流至透口北入清江

幞頭堡水圖經合直銀水

木耳溪明史地理志烏羅洞南有九江又有木耳溪亦曰九十九谿下流亦入沅江通志其流紆曲東抵平南寨有九十九折

無水攷

無水之名隨時代而改漢無陽縣以無水得名班固無陽縣下注無水首受故且蘭南入沅行八百九十里是也云首受故且蘭者蓋首受故且蘭縣諸水即今俗名苗裏水處洞河等是矣按水經注云無水出故且蘭而班氏云首受故且蘭明其發源之處又兼受諸小水矣合觀明史地理志鎮陽江亦曰溱水上受興晉書地理志宋書州郡志則名舞陽蓋口音輕重字亦隨音而改沈

約云前漢作無陽後漢無晉太康地志有蓋三國吳時所
立縣名灑陽則水亦名灑水可知元和郡縣志稱荊州記
舞溪獠潁之類是也唐又名爲武谿李賢後漢書注土俗
灑作武在今辰州界又名巫溪杜佑通典唐置巫州以在
巫水之間又龍標縣下云漢巫陽縣是也又名雄溪圖經
鎮洋江卽古雄溪五溪之一明史地理志湖廣會同縣下
云東有雄溪一名洪江是也按水經注雄無各爲一溪自
唐以後乃混而爲一故無溪
亦兼雄溪之名也雄又作熊後漢書注雄土俗作熊元和郡縣志
辰州下次東南熊溪叙州潭陽縣下云溪水在縣南二里
按潭陽本漢無陽縣地
則此溪水當卽指熊溪是也宋名灑陽水亦名灑水太平
寰宇記沅溪縣有灑陽水元豐九域志沅州黔陽縣有灑

水是矣明世名爲鎮陽江亦曰鎮南江亦曰澠水明史地理志鎮遠府鎮遠縣南有鎮陽江一名鎮南江亦曰澠水是矣至名之隨地而改者在黃平州者曰黃平河又曰西門河在施秉曰洪江亦曰大江明史地理志施秉縣有洪江即鎮陽江舊志大江在施秉城北下流即鎮陽江也在鎮遠者曰鎮陽江又曰鎮洋江在思州府者曰澠陽江在

青溪縣曰青溪江在玉屏縣曰平江亦曰平溪貴州紀事宋寶祐四

年詔京湖帥臣黃平清浪平溪分駐屯戌明置平溪驛亦以此水名又統名之曰洪江明史

地理志湖廣黔陽縣北有沅水又東有洪江是也至發源之山班斲及唐宋諸地志皆不詳今水經云其源自黃平所爲黃平河水道提綱云源出平越府東北之黃平州南

金鳳山舊志又云源出黃平州西北三十里之都凹山今

驗金鳳山都凹山下通志北攸河在黃平州城北三皆有

細水流入西門河或皆無水發源之所唐宋以前地志詳

慎故第云出故且蘭耳至無水入沅班氏云行八百九十

里今計黃平州至黔陽縣寔八百里而近益爲不爽矣又

水北爲陽水南爲陰今沅州府治漢無陽縣地正在水北

而樂史引荊州記曰牂柯在舞水之陰今黃平清平等州

縣均在水南又可知漢時牂柯郡即在今黃平州左近矣

或云今黃平州舊城即漢牂郡治
雖亦約畧之詞然相去常亦不遠

飛雲洞水圖經無水經飛雲洞東有一水自西北來會

興隆大河

興隆小河今水經二水皆入鎮洋江

苗裏水通志在黃平州城東南下流入鎮洋江

處洞河通志在黃平城西十里源出苗境東流合北門河入鎮洋江

北門河圖經在城北下流合處洞河流入施秉縣境俗亦名小江

施秉小江通志在施秉城南源出黃平北門河至城東合大江按圖經言黃平北門河下合處洞河今復言此江源出北門河豈北門河水又分二派以入小江處洞耶又考縣境更有秉溪別溪等水當亦合灘江

杉木水通志在施秉城北合大江

瓦窰水通志在施秉縣境合大江

江凱溪通志在施秉城東合大江

鎮遠城西河圖經鎮陽江又東北流一水自北來注之
卽鎮遠府城西河也

宛溪通志在鎮遠城東十五里

焦谿明史地理志鎮遠縣有焦溪關梅溪關通志在鎮
遠城西四十里

梅溪通志在鎮遠城東五十里

秋溪通志在梅溪東六十里

松溪通志在鎮遠城西南三里

牙溪通志在鎮遠城西五里

小由溪通志在鎮遠城西十里

勇溪通志與小由溪相近

白水溪通志在鎮遠城西三十里

鐵溪明史地理志鎮遠縣東北有鐵溪通志在鎮遠城東北三十里自宛溪以下所謂鎮遠九溪也按鎮遠九溪內無秋溪以上十溪皆入鎮陽江宋咸平中以田承寶爲九溪十洞撫諭都監卽此

異溪通志在思州府城東五十里圖經上源出鎮遠府西北界大山曰路瀨河東流數十里合南北二水經鐵廠南山之南東北曲曲百里至思州府西北境有鐵廠東北水東南流來會此水以西水卽入白巖河經石阡

府北注烏江者也

鐵廠水圖經合異溪通志鐵廠河在青溪縣城南按縣境又有竹坪苗龍等河疑亦合異溪者

馬口溪通志在都素司即灑溪之上源也下流至城南一里爲灑溪又曾注溪繞城而東合架溪出兩河口入漚江

注溪通志在思州府城西南三十里按明史地理志施溪長官司東有施溪思州府志又有海龍等溪當亦合諸水入漚江也又考水經注沅水過沅陵縣後又東施水注之此施水卽今沅陵縣之施黔水與此施溪迥別

架溪圖經灑溪在思州府城南一里會注溪遶城而

東合架溪

文水河通志在王屏城東會諸澗水入平江

易家河通志在王屏城東流入平江

野雞河通志在王屏城西源自西溪梭溪諸水會合經
飛鳳山野雞坪象鼻山入于平江

西溪

梭溪圖經並入野雞河

黃道溪明史地理志黃道溪長官司下有黃道溪按元
置黃道溪長官司即以水得名圖經一名戶溪江源出
思州府北境山東流九十里折東南五十里至司西南

折東流有一水東北自銅鼓塘西南流合一水來會至大魚塘北合洪江按以下至湖南境入無水者皆不錄他皆倣此

銅鼓塘水圖經入黃道溪

辰水攷

銅仁府圖經銅仁江在府城西南發源四川酉陽司會府境諸水流至湖廣麻陽縣入沅江今水經辰水源出辰州府境南二百四十里三崕山崕三崕山蓋卽三山谷水道提綱謂之麻陽河云西自銅仁府合諸水來注之又云麻陽河數源最遠者出銅仁府西北界曰順溪其山北卽朗溪司水西入烏江者也此水東入麻陽縣界又北至辰溪縣城西南

入沅江今以漢志及水經注攷之即辰水也班固辰陽縣下注云三山谷辰水所出南入沅行七百五十里水經注云沅水又東逕辰陽縣南東合辰水水出縣三山谷今攷銅仁縣有九龍山在縣西烏羅司西南六十里當即古三山谷元和郡縣志三山谷一名辰山今俗又名梵淨山銅仁大小江並出于此圖經謂此水發源于四川酉陽司今酉陽司實古辰陽縣地是圖經與班固諸說並合且發源處又名順溪辰順音同流俗聲轉耳酈道元又云辰水東南流獨母水注之水源南出龍門山酈名龍門溪歷獨母溪北入辰水今銅仁府城西北有小江圖經云源出甕濟洞至城東合于大江水道提綱麻陽河又東北折東流而東南

有小江自北山東南流百餘里合東一水經府城西北而南來會焉與道元辰水東南流獨母水注之及獨母溪北入辰水之文無不脗合則今之銅仁小江卽獨母水也所云甕濟洞及北山當卽古之龍門山也又辰水流逕古錦州故亦名之爲錦水又名長水今沅陵縣亦有辰水南流入沅與此水名同實異

獨母水今名小江明史地理志銅仁縣西南有銅仁大江西北有小江通志在銅仁府城西北至城東合于大江

省溪一名宙羅江明史地理志省溪長官司西有迤羅江卽省溪石邦憲傳賊欲攻石阡不克還過省溪卽此

通志在省溪司北源出江頭山下合大江

也江通志在烏羅司南納烏羅溪羊溪二水下合銅仁江

烏羅溪

羊溪通志並合也江

前溪通志在城南舊大萬山司西源出大萬山東北流入銅仁大江按明史貴州土司傳銅仁長官司五其三

曰大萬山

提溪明史地理志提溪長官司東有印江西有提溪通志在提溪司源出濫泥山流入銅仁江

印江通志在銅仁府東又流合提溪

卷施閣文甲集卷第五

陽湖洪亮吉學

貴州水道攷中

由四川入江諸水

延江水至四川涪州入江經流一

黑章水入延

落折河入延喇雍河杉木河開

猓獠河入落折河

以則河入延

烏西河入延

總已河入延

木空河入總已河

楊柳河入延

豬場水入楊柳河

簸朶河入延

武著河 墮極河 織金河並入簸朶河

西溪河入延

楠木溪水 雷澗等溪附 猓隴河 高家河並入

西溪河

以濟水入延

打鼓寨水 渭河 烏慶河並入以濟水 西門

河 安樂河 隴溪河又入渭河

洛陽河入延 東溪車頭河附

九溪河入延

三岔河入延 思臘河碧波橋河寧穀橋河附

牛場河入三岔河

谷龍河入延

池水入延

跳蹬河入延

三潮水入延

雞公河入延

修文南水 那奢河入雞公河

白花箐水入延

羅傅大河入延

息蒙所水入延

刀靶水入延

養馬水入延

源溪水入延

朗水入延

達溪水入朗水

織水入延

黑澤水入織水

厚水入延

三江水入延

窄溪渡水

上關水

花水溪

澹溪

馬渡谿

角路溪

欠溪並入三江水

大洞溪入澹溪

渡口水入延

石梁河

浦浙水並入渡口水

灤水黃魚溪等附

洗泥河入延

南明河水入延

上馬橋水

濟番河

一宿河

四方河

黔靈

山諸泉水

貫城河水

富水

龍洞河水

黃

泥哨水並入南明河

尤愛溪入濟番河

擇溪

入貫城河

江界河入延

甕水 甬坪水 袁家渡水 白泥司水 佛山

河水並入江界河 白厓河水 紅頭鋪河 草

塘司河又入甕水 城西河蛇子河等附 新村河

新街河又入白泥司水

小江入延

牛場河入小江

鼇溪入延

小溪入鼇溪 杉溪船溪附

落花屯水入延

清水河入延

八字河 簸箕河 三水江 甕首河 甕城河

並入清水河 麥新溪入八字河 原谿入簸箕

河 加牙河入甕首河 翁黃河 羅鴨溪 乾

溪 三岔河 甲港溪並入甕城河 翁樹河十萬

溪等附

巖頭河入延

龍底江入延

大溪入龍底江

樂回江入延

深溪入延

各容溪入延

凱科江入延

義陽江入延

泥水河入義陽江

桶口河入延

洋溪 石貫塘河 清江溪並入桶口河 犵木

溪 松溪河 板坪河又入清江谿

沙溪河入延 龍坪河會川河等附

芙蓉江入延

三江入延

虎溪 思溪入三江

河由江入延

亭子溪 後溪並入河由江 猛溪河麻海溪等附

石馬江入延

昔樂溪入延

憲溪入延

鸚武溪入延 仁溪掌溪等附

思邛江入延 楠溪網陀溪等附

鼈水由遵義縣境入延 大水一

温水入鼈水

鳳皇溪入温水

黥水入鼈水

桃溪水入鼈水

樂閩河入鼈水

金鼓潭水入樂閩河

樂安河入盞水

費水正流至四川黔江縣合延水入江支流又至湖北
宜都縣入江大水二

更始水至四川彭水縣界合延水入江別支又至湖南
永順縣界合酉水入江大水三

倒羊溪水入更始水

煎茶溪水入更始水

登龍河水入更始水

洪渡河水入更始水

羅多水入更始水

老淵閣之序集卷五

五

何只水入更始水

大涉水至四川合江縣入江經流二

小河入大涉水

孫家河 板橋河入小河

齋郎河入大涉水

龍巖山水入齋郎河

九溪河入大涉水

乘龍山水入九溪河

古蘭河入大涉水

水思河入大涉水

儒溪 泥溪 盤橋溪 猿猴溪並入水思河

金沙溪入大涉水

胡盧溪入大涉水 官堂趙洋等水附

漆溪 南溪水入胡盧水

堯霸溪入大涉水

沙霸溪入大涉水

後溪入大涉水

風溪入大涉水

永壽橋水入大涉水

澧溪入大涉水 至溪河附

棘溪至四川江津縣界入江 經流三

坡頭河入棘溪

三溪河入夔溪

安徽水至四川南川縣界入江

延江水考

漢書地理志牂柯郡潞縣下班固注云不狼山潞水所出東入延過郡二行七百三十里水經注延江水出犍爲南廣縣東至牂柯潞縣又東屈北流至巴郡涪陵注更始水酈道元注温水黠水並出符縣俱南入潞水潞水于其縣而東注延江班氏所云潞水過郡二者蓋牂柯犍爲水經雖云延江水東至牂柯潞縣然潞水入延江水處寔如道元所云在犍爲郡符縣地蓋延江水自潞縣東屈北流之後潞水始注之耳今考烏江一名黔江源出威寧州東北

山東南流逕畢節縣南又東逕大定府南又東逕黔西州
 南又北折而東逕清鎮縣鴨池汛北又東北逕修文縣西
 北又東北逕開州西又東北逕烏江城南又東南逕遵義
 府南境又東南逕餘慶縣西北境又東北逕石阡府西境
 龍泉縣南境又東北至思南府西南境又東北至府城東
 南又北稍東逕印江縣西北境又北稍東至婺川縣東北
 境折西北流入四川西陽州西南境又北稍西至彭水縣
 南境又西逕武隆慶縣南又北曲曲至涪州城東北銅柱
 灘入大江亦曰涪陵江也統而計之其在安順府普定縣
 者曰三岔河按三岔河合以且海等入烏江故名清鎮縣
 境者曰的澄河明史地理志的澄河上流大定府境者曰六歸河

畢節縣境者曰七星水黔西州境曰羅革河鴨池河

界陸廣河黃沙渡河王三善傳別將都司線補衮出黃沙渡至烏江城以下

始名烏江至餘慶縣界名巖門江貴州上河傳與兵馬愈懋寺與賊戰于江門而

死疑即巖門江也過思南府城曰思南河又名德江至彭水縣以

下曰黔江河又總名曰涪陵水亦謂之內江水太平寰宇記涪陵水

一名內江蓋逕二省受貴州湖南兩省水入四川八府二十餘州縣凡十

數易其名而始入大江攷威寧州東北大山已入四川屏

山縣境距夔道縣不遠元豐九域志戎州南溪郡治夔道

其地界東南至南廣蠻一百八十里知威寧州東北境在

漢為南廣縣地至宋時已為苗蠻所占故云南廣蠻也至

大定黔西修文開州甕安餘慶石阡皆漢牂柯郡地畢節

遵義又漢牂柯郡營縣地水經所云延江水至牂柯營縣

又東屈北流是也按此水自西而東而北一一不爽至思南印江婺川彭

水等縣又漢武陵郡酉陽縣地華陽國志枳縣在江州巴

郡治涪陵水會道元于江水下引庾仲雍所謂有別江出

武陵者也水乃延江之支津分水北注逕涪陵入江故亦

曰涪陵水也延江水下名之曰小別江矣此又烏江為古

延水之一顯證也至云至涪州城東北銅柱灘入大江攷

今涪州實蜀漢漢平縣地江水下道元注云江水又東逕

漢平縣二百餘里左自涪陵東出百餘里而屈于黃石東

為桐柱灘桐柱灘即銅柱灘古今字異耳通江此注即之

下于是而烏江之為延江益確然不可易獨怪延江大水

源流二千餘里而自唐以後

元和郡縣志黔州西有延江水一名涪陵江自牂牁北歷

播費思黔州北注岷江今攷唐廢播州在今遵義府界廢費州在今思南府界唐思州即今思南思州二府境唐

黔州即今四川酉陽州及彭水縣等地與今烏江所過州縣歷歷不爽足證唐以前尚無有以延江水爲烏江者又

攷宋時名此江爲巴江太平寰宇記嶺東有沅江水嶺爲西有巴江水一名涪陵水是也武隆縣務川縣下亦同爲

諸土俗名所混竟無有能剖析之者豈非以道路絕遠又

大半爲苗蠻所居鏡古者所不能入今我

國家承平百餘年上下游生苗奉化惟謹而余適以其時

持節得徧列十二府惟銅仁州縣即水道之迂入苗寨中

不獲親履其地者皆細詢土人得其曲折證之水經地志

等書無不脗合寧非一快事哉水道提綱既不知烏江即

延江而黃宗羲今水經田雯黔書又皆以烏江爲即牂牁

江不知詳柯江乃南流至廣西泗城府合爲左右江者望
隔數千源流迥別則又不足置辯矣

黑章水通志七星水過七星橋有黑章水注之或曰卽
黑特川元大德五年劉國傑破蛇節宋隆濟于墨特川
當卽此地

落折河一名落腳河通志七星河至大定府西南有落
折河自府城西北二十里當兩山間破地吼出南流注
之畢節縣册亦名響水河下流名永清河又名東門河
卽落折河之上源按府境又有喇雍河杉木河等

猓獠河圖經落腳河又東合北來之猓獠河

以則河通志七星河過大定府治南東流右得以則河

按此當卽圖經之以麥河

烏西河通志在大定府城東二十里源出仲麥龍潭入

六歸河

總已河通志在大定城東南源自七星關過天生橋合
木空河同入六歸河

木空河圖經入總已河貴州紀事明萬歷中都御史
蔡文等親詣木空河讞安智等獄不決

楊柳河圖經出平遠州西南境山曰卜牛河至州南境
合豬場水下流入烏江

豬場水圖經自南來合楊柳河

簸朶河通志在平遠州城東一百里源出安順下流入

六歸河

武著河通志在平遠州城西北六十里

墮極河通志在平遠州城西北三十里

織金河通志在平遠城東三十里並入簞朶河明史

貴州土司傳安邦彥奔織金卽此

西溪河通志六歸河又東北有西溪河合楠木溪水猓

隴河高家河等水東南流來注之

楠木溪水通志入西溪河按州境又有雷澗等溪當

亦入烏江

猓隴河

高家河圖經西溪河至黔西州南境有猓隴河高家

河俱自西南來注之

以濟水圖經出黔西州西北山合打鼓寨水及渭河烏慶河三水東流百五十里會烏江

打鼓寨水圖經以濟河合西南來經打鼓寨之水

渭河圖經又曰以馬河明史貴州土司傅播州平分其地爲遵義平越二府以渭河中心爲界王三善傳三善討安邦彥渡渭降者相繼四川土司傅安邦彥等遁入青山諸將逼渭河西門河通志下流卽沙湫河合上洪下洪二水入渭河安樂河隴溪河通志在大定城東北百五十里會安樂河出三重堰合渭河

烏慶河圖經烏慶河西自黔西州西北境合三水東流百五十里來會以濟河

洛陽河通志在安平城東二里又東北至清鎮縣城西入陸廣河按明史地理志平垣衛東有東溪及安平縣冊城南有車頭河當皆流入鴨池河者

九溪河明史地理志安順軍民府東南有九溪河通志在安順府城東南四十里九溪匯而成河

三岔河通志在安順府城北三十里舊稱水內水外者此也圖經三岔河西南自安順府西合以且海諸水合注烏江以且海在威寧州東南二百里此水自源至此流七百里實黔江之南一源也圖經水城汎河以固汎

前河古北河並合以且海明史魯欽傳陸夢龍等分駐
三岔河貴州土司傳朱燮元分遣別將林兆鼎從三分
入梭明史土司傳又云黔兵由普定渡思臘河地理志
安順府有思臘河接水西界今方志不載此河疑卽谷
龍河等之別名也通志又有碧波橋寧毅橋等河

牛場河圖經三岔河經清鎮縣西北境折西北流合
西南來之牛場河

谷龍河明史地理志西堡長官司北有谷龍河下流合
烏江通志在安順城西五十里以上三水皆合流注烏
江

池水圖經六歸河經鴨池汛北有池水自南來注之

跳躑河圖經自鎮西衛來注六歸河

潮水通志在修文縣城北五里水曰盈縮者三北流

注烏江

鷄公河通志上流曰麻線河圖經南合廣順州及安平

清鎮二縣水注烏江

修文南水圖經鷄公河至修文縣西境有縣南水經

城南東折西北流來注之

那奢河圖經雞公河又北那奢河自東來注之

白花箐水通志烏江又東左合白花箐水

羅傳大河道志自永寧縣東南過遵義府西南流來注

烏江

息蒙所水圖經水自烏江城南注烏江

刀靶水通志烏江又東得刀靶水

養馬水通志烏江又東得養馬水

源溪水通志在綏陽縣城北十里

朗水通志在綏陽縣城西又名螺水源出朗山

達溪通志在綏陽城東南源出楊柳水經達摩山西

流與朗水合

繖水通志在綏陽城東南合達溪朗水諸流出遵義入

烏江

黑澤水通志一名清水河流入繖水

厚水通志在綏陽城東南源出趙家里經長灘入遵義

以上四水皆流烏江

三江水明史地理志涪潭縣西有三江水下流入於烏江通志在涪潭縣城西南容山司有三源俱出苗界東流入烏江

窄溪渡水

上關水

花水溪通志在涪潭縣城北二十里

涪溪明史地理志涪潭縣南有涪潭水下流入烏江通志在涪潭城南 大洞溪通志又入涪溪

馬渡溪

角路溪

大溪圖經以上諸水並合三江水

渡口水通志在綏陽城北卽合口河下流圖經烏江又南有渡口落汪渡口右合渡口水

石梁河通志在城北源出桶關與渡頭河合

浦淞水通志在城北一名大灘源出湄潭山箐中與渡頭河合按縣境又有灤水及黃魚等溪

洗泥河圖經烏江又南有洗泥河水注之通志在開州城東南四十里

南明河水通志烏江東南至巖門有南明河水來注之圖經南明河在貴陽府城南門外源出廣順州界東北流逕府城至下流爲牛渡河至巴香北流合烏江

上馬橋水通志在上馬橋司東北下流入南明河

濟番河通志在貴陽城西南三十里 尤變溪通志

在廣順州從仁里下注濟番河

一宿河通志在廣順州從仁里

四方河通志在貴陽城西南五里源出廣順州合南

明河

黔靈山諸泉水通志下注南明河

貫城河通志自壘龍山發源貫入城中流會南明河

擇溪明史地理志作宅溪通志在貴陽城北源出

鬪髀山流合貫城河明史李標傳賊退保澤溪王三

善傳破賊澤溪卽此

富水通志在貴陽城南源出八里屯

龍洞河水通志在貴陽城南十里下流入于南明河
王三善傳賊退屯龍洞官軍遂奪七里冲據此則七
里冲亦當在龍洞左右

黃泥哨水通志注南明河通志府城西北有墨特川
元大德五年宋隆濟蛇節作亂攻貴州元將劉國傑
討之大破隆濟等于此今考貴州紀事大德七年四
月劉國傑師出播州境大破蛇節于墨特川按此則
墨特川自應在水西左近不得在貴陽也晏斯道引
或說以爲卽墨章水尙近之

江界河圖經烏江又東至龍泉縣西南有渡曰葛閃渡

又東南有甕水鬲坪水袁家渡水白厓河水滙爲江界河合餘慶縣之白泥司水佛山河水北流來注之通志江界河在甕安縣城北五十里入烏江

甕水一名甕安江通志在甕安城南水自高坪司由乾溪里亦曰乾溪河至縣流入江界河按甕安縣以甕水得名 白厓河水通志在甕安城南二十里滙衆溪經劉家堡入甕安江按縣境又有城西河蛇子河等疑亦合甕安江 紅頭鋪河 草塘司河圖經並合甕安河

鬲坪水按當卽水道提綱所謂坪橋河

袁家渡水明史陳璘傳追奔至龍溪又追及于袁家

渡卽此

白泥司水一名白泥江明史地理志餘慶縣東南有
白泥河下流合于思南河通志在餘慶縣城南發源
甕安流合烏江 新村河通志在城東下流入白泥
江 新街河通志在城東源出官山下至餘慶縣治
前入白泥江

佛山河水通志合江界河

小江亦曰小烏江明史地理志餘慶縣南有小烏江下
流入于烏江通志在餘慶縣城西三十里入烏江

牛場河圖經出餘慶縣西南境山合小江

鰲溪通志在餘慶城西九十里發源漁鼓洞流入巖門

江

小溪通志在餘慶城西發源立鐘山流入鼇溪按縣境又有杉溪船溪疑亦合他水入巖門江者

落花屯水圖經烏江東北受落花屯水水出湄潭縣南境山

清水河亦名清水江明史地理志楊義長官司下又有清水江上流自新添衛流入經城西又名皮隴江北經乖西巴香諸苗界入烏江通志在貴定城西北三十里與貴筑縣分界皮隴江在平越縣城西二十里又東北逕開州界至巖門入烏江

八字河通志在貴定城東二里 麥新溪圖經入八

字河

簸箕河通志在龍里縣城北流入貴定縣合清水河
原溪圖經入簸箕河

三水江通志在貴陽府城北三十里府西境之水派
流而下至此合流爲一又東入于清水河

甕首河明史地理志太平伐長官司東南有甕首河
下流合清水江通志同 加牙河明史地理志龍里
衛有加牙河下流入甕首河通志在城東源出縣東
南之谷者巖流入太平伐司之甕首河

甕城河明史地理志新添長官司有甕城河李樑傳
參將范仲仁赴援遇賊甕城河卽此通志在貴定城

西二十里自平伐發源視諸水差大有橋爲黔楚大道下流合清水河 翁黃河通志在把平司翁黃山下入甕城河 羅鴨谿又合翁黃河入甕城河 乾溪通志在貴定城西十里流合甕城河 三岔河通志在小平伐司三水匯流合于甕城河 甲港谿圖經亦入甕城河按縣境又有翁樹河十萬溪等當亦合他水入清水河者

巖頭河圖經烏江又東北逕石阡府西境龍泉縣南境有巖頭河自南來注之

龍底江一名白巖河通志在石阡府城西南三里其上源爲包溪流逕城東黃茅園合大溪繞府前入思南界

注于烏江按此蓋卽明史地理志所云石阡江

大溪通志在石阡府城南流合龍底江

樂回江通志在舊葛彰司南其源有三至方竹箐合爲一流注深溪而入烏江

深溪通志在石阡府城西北二十里

各容溪通志在深溪西八十里皆西流注于烏江

凱科江通志在石阡府境亦合烏江

義陽江通志在龍泉縣城東北五十里環繞縣治通思南大江

泥水河通志在龍泉縣城東發源東山合義陽江

桶口河通志在龍泉城東一百三十里縣境諸水匯流

于此合成大河下流直抵思南入大江

洋溪通志在石阡府城北十里又西經龍泉縣界合
桶口河

石貫塘河通志在龍泉縣城北三里上流由老木橋
三跳石二水合成大河下流過清江谿至泥水山羊
等處合桶口河

清江溪通志在龍泉城北五里許下流入桶口河

犵木溪 松溪河 板坪河圖經並入清江溪

沙溪河通志在遵義城西一百里源出巖孔山流入烏
江明史貴州土司傳楊應龍反安疆臣兵從沙溪入即
此按縣境又有龍坪會川等河

芙蓉江明史地理志正安州南仁懷縣東南並有芙蓉江自烏江分流東北入于黔江通志在正安城南一百里源出婺川按今遵義城北亦有芙蓉江與此自別又攷漢書地理志犍爲郡漢陽縣下班固原注山關谷漢水所出東至鼈入延水經注亦同今以輿圖核之四川叙州府慶符長寧二縣皆漢犍爲郡漢陽縣地在今仁懷縣西斜北則昔之漢水當卽今清溪石門江等水以在貴州境外故附記于此

三江明史地理志正安州有三江東南流合于虎溪亦注黔江按通志又言虎溪流入三江今核從通志

虎溪通志在正安州城西南七十里流逕州南入三

思溪通志在正安州城西七十里源出南川縣牛角寨流入三江

河由江通志在沿河司源出銅仁之烏羅司流入德江亭子溪通志亦在沿河司水自龍岡中流出入河由江

後溪通志亭子溪又北七里有後溪自馬鬃嶺流出入河由江按通典費州扶陽縣以扶水名今廢縣在思南府城西北八十里則扶水亦當在府境但未知今易何名耳水道提綱烏江至思南府境又有猛溪河麻海溪二水注之今攷思南府境諸水皆會德江

此二水或即扶水昔樂溪等之異名也

石馬江通志在沿河司下流合于德江

昔樂溪通志在思南府城東十里流入德江

憲溪通志在思南府城南五里滙于德江

鸚武溪通志在思南城北三十里按就近有仁溪掌溪

思印江太平寰宇記思印水本出錦州洛浦縣界經本

縣四十步至思王縣下流入內江水通志在印江縣南

源出朗溪司北流入德江後訛印爲印遂以名縣按縣

境又有桶溪網陀溪等當亦合思印等水入德江

盞水攷溫黼二水附

今以延江水攷盞水則今之湘江其即漢之盞水乎漢書

地理志牂柯郡警縣班固注不狼山警水所出

晉書地道志亦同

東入延過郡二行七百三十里水經注警縣有警水出警

邑西不狼山東與温水合今考遵義府志及圖經湘江水

出遵義府治遵義縣北境桐梓縣南境之龍巖山流逕湘

山南與桃溪水合迂回五百餘里入烏江道元云警水于

符縣而東注延江水符縣今仁懷廳及仁懷縣以北地漢

警縣屬牂柯符縣屬犍爲是班固所云過郡二者牂柯犍

爲圖經云迂回五百餘里又南入烏江與班固七百三十

里之數亦合則龍巖山當即古之不狼山也又以警水即

今湘江攷之則古犍爲符縣之温水黠水即今合湘江之

洪江仁江乎

水道提綱不載仁江今水經則并洪江不錄
晏斯盛黠中水道攷亦然不知二水源流視

桃溪鹿塘河等較漢書地理志符縣溫水南至鼈入黠水

黠水亦南至鼈入江此江即延江水也水經注鼈水東與

溫水合溫水一曰煥水出犍爲符縣而南入黠水黠水亦

出符縣南與溫水會闕駟謂之闕水俱南入鼈水鼈水于

其縣而東注延江水今遵義縣實在仁懷等縣之南知二

水雖出符縣皆南至鼈縣注鼈水耳若以班氏所云入江

之文謂即大江則皆應云北注不得云南入矣知班氏所

云入江即指延江與道元所言無二古人文字簡略否則

或從其究言之也圖經洪江出婁山閔南山東南流至遵

義東境之清乘橋北有鳳皇溪東北自綏陽西山西南流

來會又東南入湘江通志仁江在遵義城東南五十里源

出永安驛山澗下流合湘江是二水皆合湘江與道元俱
南入鼈水文相合又攷班氏云溫水南入黠水道元亦同
又云黠水亦出符縣南與溫水會明二水同出一縣亦互
受相注之稱今土人或云洪江注仁江又或云仁江注洪
江是也又洪江在唐宋時爲邠水太平寰宇記邠水在某
蓉縣東三十里南流仁江在唐宋時爲仁水太平寰宇記
仁水在某容縣西南一里南注邠水是矣且可因此證漢
志及水經注之誤今本漢書鼈縣下鼈水東入延延字誤
作沅譚暢嗣當屬傳寫之誤道元延江水下注云鼈縣故
犍爲郡治也攷鼈縣自漢迄晉宋皆未嘗屬犍爲又以知
道元是誤記耳

溫水今名洪江通志在遵義城東四十里源出大樓山合仁江入烏江

鳳皇溪通志在遵義城東四十里亦名長灘下流合
洪江

黠水今名仁江通志在遵義城東南五十里下流合湘江入烏江

桃溪水通志在遵義府城南十里源出城北六十里上莊山溪水匯流爲羅家河至霸竹水羅會水又數里與湘江合按此水源流亦遠但源出遵義府城北至六十里之遠以是知非溫黠二水耳明史貴州土司傳安疆臣焚桃溪莊當卽此

樂闡河明史地理志作落闡水通志亦在城西南四十里原出雷變山東流八十里合湘江

金鼓潭水通志在遵義府城西南四十里流合樂闡

河

樂安河圖經出綏陽金竹里南流爲綠塘河又作鹿塘河明史地理志作樂安水通志鹿塘河二源一出綏陽縣西北山一出東北山流至城南合而南數十里有一水自東北來會又南八十里合湘江入烏江按元和郡縣志太平寰宇記及唐宋地志又有夷牢水帶水胡刀水胡江水等此四水未知今係何水未敢臆決姑附記于此俟再攷

費水攷

費水今名上費溪流至四川夔州府以下名夷水亦曰清江杜佑通典太平寰宇記並云後周置費州因水爲名通志在思南府城東北百里舊費州以此名北流入四川黔江東北入湖廣施南府界曰清江明史地理志四川黔江縣南有黔江源出貴州思州府應離界正流自涪江合大江支流經此下流爲湖廣施州衛之清江施州衛下云清江合衛境諸水下流至宜都縣入于大江按漢書地理志南郡巫縣下原注夷水東至夷道入江過郡二行五百四十里夷道縣下引應劭曰夷水出巫東入江攷巫夷道並屬南郡而云過郡二者蓋水又從巫縣東逕武陵郡佷山

等縣始入夷道界耳水經夷水出巴東魚復縣江漢魚復

縣為今四川夔州府奉節大寧二縣地四川黔江縣在思

南府東北夔州府又在黔江縣東北蓋費水正流自黔江

縣合大江後其支流又東北至夔州府境或名魚復江夷

水又源于此耳總之班固志地理不能于巫縣以上更詳

夷水之源水經又不克于魚復以西著彼分流之始皆緣

漢時思南等府尚陷武陵蠻中是以不能從流溯源梳剔

幽隱故各從其所見言之亦其慎也按延江水實漢牂柯

書地理志僅以營水所入附見其名于營縣下亦此故唐杜佑李吉甫亦似不知費

水即夷水故于施州清江縣下並云清江一名夷水杜佑

又云清江縣西有都亭夷水所出清江即漢巫縣地以為

夷水出于此亦與水經爲夷水出魚復江同今考與復江

都亭當在今巫山縣相去僅百里若明代迄今圖冊皆係土人記本境山

水非舟楫所經即耳目所及以視昔賢爲較密矣今此水

支流至荊州府宜都縣入大江與漢地理志水經適合元

和郡縣志費州涪川縣下云內江水經縣北一百五十步

疑即指此按下多田縣云涪陵江水經縣南五十步則知內江水非即涪陵水也至若諸水

之合費水入江者皆已在四川境此故不錄水道提綱等

發源施南府西北境不知實出貴州

更始水攷

更始水今名豐樂河亦名水德江明史地理志安化縣東

南有水德江即烏江之分流至四川彭水縣流入涪陵江

通志在婺川城東五十里其水由龍泉溜潭折入縣境至洪渡入龔灘北會烏江水道提綱烏江入四川酉陽州西

南界又北稍西百餘里東為四川界西為貴州界有南溪河東北自湖

廣施南府合諸水西南流自龔灘來會南溪河上源即北

河也于沅江下又云沅江至辰州府城西南有北河即酉

水西北自酉陽州合諸水南經府城西來會據此則南溪

河與北河本通一支合涪陵水又一支合沅江矣今攷水

經延江水至巴郡涪陵縣注更始水云注更始水者乃駁流通注互得其稱耳

酈道元注更始水即延江支分之始也更始水東入巴東

之南浦縣又謂之西鄉水亦謂之西鄉溪溪水間關二百

許里方得出山又通波注遠復二百餘里東南入遷陵縣

道元于沅水下云酉水導源益州巴郡臨江縣故武陵之
充縣酉源山東南流逕無陽故縣南又東逕遷陵故縣界
與西鄉溪合卽延江之支津更始之下流謂之西鄉溪口
今考無陽故縣在今沅州府芷陽縣東南遷陵故縣在今
永順府保靖縣東道元言酉水合西鄉溪水始東逕酉陽
故縣南今更始水至永順縣界入酉水正在漢酉陽故城
南與道元言亦合一統志更始水今俗名北河水道提綱
云北河卽酉水蓋自其合酉水後言之不知本別一水也
合此數條則知今水德江卽古之更始水道元言延江之
支津明志言烏江之分流其說若一道元又云更始水卽
延江支分之始言支分則知水有二支故得一入延江一

入沅水也又云延江之支津更始之下流明自延江分出
下流乃合酉水入沅故北河亦兼酉水之稱矣庾仲雍所
謂有別江出武陵者益足證也道元江水下云其水南導
武陵郡今思南府酉陽州及辰州永順等府皆漢武陵郡
地是矣水道提綱言南溪河西南流至龔灘合烏江而通
志亦言豐樂河至龔灘合烏江是豐樂河即南溪河之證
其名豐樂河者河左側有豐樂埧蓋因以名河耳太平寰
宇記更始水又名涪陵水今名內江水蓋更始水係延江
分支下又入涪陵江故通得涪陵江內江之名也

倒羊溪通志在婺川縣城北五里一名曉洋江至隘溪
渡合豐樂河按此則隘溪即倒羊溪下流通志別列隘

溪誤

煎茶溪水圖經豐樂溪得煎茶溪水登龍河水合洪渡河倒羊溪水東流注烏江

登龍河水水道提綱作龍登河

洪渡河水水道提綱源出婺川縣西南境龍泉縣北境山東流經綏陽場南折而東北流有大水河自西北合一水來會又東北有小水河自西來會按太平寰宇記黔州洪杜縣唐武德二年置以縣東洪杜山得名貞觀三年又北移于洪杜溪今攷洪杜廢縣距此不遠則此河當即昔之洪杜溪以音同而轉耳舊唐書亦云洪杜縣治洪杜溪麟德二年治龔湍即龔灘也

羅多水太平寰宇記在務川縣東八十里羅多何只皆獠之姓名明史地理志務川縣有何只水又有羅多水下流俱注于水德江

何只水太平寰宇記在務川縣東二十里又云思唐山在思州東四里南連何只水北枕內江水按寰宇記縣境又有河渝水都濡水丹陽水波濤水今未知已易何名姑附記于此

大涉水攷

大涉水自晉以後名安樂水唐亦名赤虺河唐書武后征雲南檄文有赤虺河是也後轉爲赤水河貴州圖經赤水河源出雲南鎮雄州由赤水衛東流經仁懷縣至四川合

江縣入岷江攷今仁懷合江二縣皆漢犍爲郡符縣地漢書地理志犍爲郡南廣縣下原注云又有大涉水北至符入江是也水經名之爲鯿部水而道元注則名爲安樂水按晉穆帝分符縣置安樂縣水又因縣而改名矣常璩華陽國志夷縣有安樂水漢平夷縣故城在今仁懷縣西南又符縣下云縣治安樂水會東接巴蜀樂城南水通平羌氈邑是也水經注江水下符縣治安樂水會水源南通寧州平夷郡氈縣北逕安樂縣界之東又逕符縣下北入江今正安州在仁懷縣之北唐于今州西七里立樂源縣今故城尙在則樂源亦當以水得名由此而推晉安樂縣亦必在今正安州界故道元云源南通氈邑流逕符縣治又北逕安樂縣界

之東又逕符縣入江也。又可知晉時分符縣斜東北地立安樂縣，而安樂縣之南境北境仍屬符縣。以道理核之，歷不爽矣。元和郡縣志：安樂水逕簡州平泉縣南七十步，平泉縣本漢牛鞞及符兩縣地也。

小河圖經：西南自畢節縣北境合孫家河、板橋河諸水，東北流會赤水河。

孫家河

板橋河圖經並流合小河

齋郎河通志：在桐梓縣城西六十里。圖經合龍巖山水西流逕縣城南西行百七十里，又北合一水西南流會赤水河。

龍巖山水圖經入齋郎河

九溪河圖經自南合西南來之乘龍山水北流注赤水河

乘龍山水圖經又入九溪河

古蘭河圖經赤水河西逕脉困塘北有古蘭河自西南來注之按古蘭疑古蘭之譌以古蘭州得名也

水思河圖經赤水河至土城西有水思河自東來儒溪泥溪自西來並注之又西北有盤橋溪自東猿猴溪自西南先後注之

儒溪

泥溪

盤橋溪

猿猴溪圖經並合水思河入赤水河

金沙溪圖經自東來注赤水河

胡盧溪通志在桐梓縣城西五里與溱南二溪水會按縣境又有官堂趙洋等水

溱溪通志在桐梓縣城東二里

南溪通志在桐梓縣城南二十里並入胡盧水

堯霸溪

沙霸溪

後溪圖經赤水河又北受堯霸溪沙霸溪二水後溪一

水

風溪圖經赤水河至仁懷縣西南境有風溪自西南來
注之

永壽橋水圖經仁懷縣境永壽橋水自西來注赤水河
灋溪通志在仁懷縣城東數十步自東注西與赤水河
合按縣境又有玉溪河

灋溪攷

灋溪今名南江即綦江之上流圖經源出桐梓縣北境山
阿源合北流百數十里曰松坎河受西南來一小水又北
數十里有坡頭河自東北山來注之又北流西受一水又
北九十里有三溪河自東來會又北七十里經綦江縣東
而北有龍角溪自東合三小水來會又折西流經城北又

西北流有沙溪溝自東北來有清溪河自西南合三岔溝及魚子溪水東北流三百餘里來會又西北百里北受一水又北有孫溪河西南合棋盤山水來會又北至江津東境又北入江圖經江水經江津縣城西北又東北流數十里入綦江自南合諸水來注之曰夔溪口攷元和郡縣志夔溪水在南州南川縣南四十步在三溪縣西太平寰宇記夔溪水南自廢丹邱縣流入南川縣又流經縣南四十里又北入渝州江津縣界明史地理志桐梓縣北有夔溪源出山箐綦江之上流今按夔溪之名唐以前無攷惟通典言唐武德三年平南蠻置夔州四年始改南州唐夔州之置倘以水得名耶通志桐梓縣下不載夔溪惟云有蒙

渡河在桐梓縣北七十里俗傳漢唐蒙渡此因名以方向攷之或即是耳按漢書西南夷傳發巴蜀卒治道自夔道指牂柯江疑卽此

坡頭河通志在桐梓縣北一百四十里

三溪河元和郡縣志貞觀五年置三溪縣以縣南有棘溪東溪葛溪合流故名其縣按此則東溪葛溪皆合棘溪也今東溪葛溪通志亦不載又此下龍角溪等合棘溪已在四川界茲不錄他皆倣此貴州紀事楊應龍反以綦江之三溪五渡南川之東鄉填立石爲播界

安徽水攷

安徽水今名小烏江通志源出椒溪在綏陽縣城東北六

十五里流入正安州經南川界入涪江攷太平寰宇記安
微水一名孤微水西自綏養故縣來東流經綏陽縣南八
里又東入都上縣西十四里又名涪水一名泝野水又折
西南流入廢雞翁縣南三里又南入費州城樂縣界雞翁
廢縣在今綏陽縣東按舊志以德江小烏江合而爲一似
未清晰寰宇記又云涪江水南流注安微水亦誤

卷施閣文甲集卷第六

陽湖洪亮吉學

貴州水道攷下

由廣西至廣東入海諸水

豚水至廣東南海縣入海經流一

羊角寨水入豚水

馬場水入豚水

木魚河入豚水

巴開河入豚水

風柳溝小谿入豚水

勞村江入豚水

青雲溪水入豚水

三寶山水入青雲溪

高坡河入豚水

紅盆水入豚水

苗溪 浪溪三水入紅盆水

嘯山水入豚水

帶溪入豚水

溶江水入豚水

車江水 崩坡塘水 從龍溪並入溶江

子女江入豚水

存覽江入豚水

曹平江入豚水

温水由廣西合鬱水至廣東南海縣入海經流二

馬別河入温大橋河附

深溪河 阿希河 木郎河 都威河並入馬別

河阿棒河附

羅炎河入温

搏獐河入温

克渡索獐河入搏獐河

龍渣河入温

冗渡河入龍渣河

樂繁河入温

卷之四 甲 有 卷之

二

盤水由廣西合溫水至廣東南海縣入海 經流三

結里汎南山水入盤水

花魚洞水入盤水

桃花溪水入盤水

九十九渡水入盤水

落白河入盤水

拖長江入盤水

海子鋪北水 猪場河 西安河入拖長江

軟橋河水入盤水

南板橋河水入盤水

者卜河水入盤水

阿黑河入盤水

馬京河入阿黑河 大章河附

馬畢河入盤水

都城河 江西坡水入馬畢河

寧谷河入盤水

白水河 王二河 霸陵河 打罕河 公具河何

破河附

關嶺驛水並入寧谷河 楊吉河 菜

子河 石溪河又入白水河

北口河入盤水

巖下河入盤水 郎公河落葉河附

魯溝河入盤水

大坡哨水入盤水

潭水至廣西來賓縣合溫水 大水一

彩江入潭水

大巖江入潭水

樂民溪入潭水

利濟溪入潭水

容江入潭水

剛水至廣西武宣縣入潭水 大水二

漣江入剛水

冷水河入漣江

環帶江入剛水

回龍江 羅番河 小水河並入環帶江

九曲江入剛水

奔龍江入剛水

大龍河入奔龍江

遶翠江入剛水

大韋河入剛水

底方河入剛水

小番河 雲溪水入底方河

王帶河入剛水

擺遊河入剛水

腰帶河入擺遊河

洗馬河入剛水

小溪水入剛水

雙峽水入剛水

豚水攷

貴州通志都江在獨山州城東其上源爲獨山江又其上
爲都勻之邦水河本名板河發源于都勻府西二十里之
邦水司是也按邦水河爲都江之上源而舊圖經水一名
志又云邦水河通麻哈江殊誤圖經水一名
龍江有二源一出西南豐寧土司之北山北流折而東北
數十里至州南里蜡寨北有西源羊角寨水自西山東流
經州城西南折而南流十餘里來會今攷都江自發源六
十里至獨山州屬之三角屯江流漸廣可容大舟又百餘

里過都江通判城西又南逕來牛定旦諸寨至古州城東
 會溶江車江南流入廣西懷遠雒容二縣界按漢書地理
 志牂柯郡夜郎縣下班固注云豚水東至廣鬱鬱林郡廣
 鬱縣下又注云鬱水首受夜郎豚水至四會入海經
 隲西南夷傳夜郎者臨牂柯江江廣百餘步足以行船水
 經注鬱水即豚水也按道元此注不及班氏明蓋豚水
 實別一水亦為鬱水上源至廣鬱下
始統名為鬱水耳豚水東北流按此水自三角屯
 以上皆東北流逕談藁
 縣東逕牂柯郡且蘭縣謂之牂柯水水廣數里縣臨江上
 故且蘭侯國也一名頭蘭牂柯郡治元鼎五年武帝伐南
 越發夜郎精兵下牂柯同會番禺是也後漢書西南夷傳
 公孫述時夜郎大姓為漢保境後漢初從番禺江奉貢即

此今水道提綱名是江爲龍江反以爲福祿江之支流不
知此江之源較福祿江遠六七百里余以甲寅二月自都
勻按試黎平由三角屯舟行至古州凡三日夜及試黎平
畢將赴鎮遠沿道驗福祿江之廣狹曾不及都江十分之
六且發源又近而反以爲經流知提綱之舛矣道元云豚
水又逕中澗縣南與溫水合今廣西象州來賓武宣皆漢
中澗縣地南盤江都江二水至來賓縣始合流逕武宣縣
西南蓋今南盤江即古溫水也今都江即古豚水也益覺
道元之言絲豪不爽又龍江之名蓋起于唐唐初置龍水
郡及龍水縣皆以此水名龍水縣即今慶遠府宜山縣也
豚龍聲相近蓋音之轉耳推此言之漢牂柯郡及且蘭縣

治當在今清平都江之間正臨都江之上武帝元鼎五年
伐南越發夜郎兵下牂柯江其下江之處亦當在今獨山
州三角屯左近也惟道元言豚水東北流逕談藁縣東逕
牂柯郡且蘭縣謂之牂柯水攷談藁亦漢牂柯郡屬縣則
談藁縣亦當在今都勻府境左近獨山州西南可知蓋豚
水古名二曰豚水亦曰牂柯江近名九發源處曰板河曰
邦水河亦曰黑神河在都勻者曰都江亦曰都勻河在獨
山州者曰獨山江入廣西境爲龍江明史地理志獨山州
南有獨山江即都勻
河下流南入廣西
天河縣界爲龍江又名桺江又名潯江至田雯黔書以烏
江爲牂柯江則一言以折之曰今烏江不能通番禺明鄭
旻又以北盤江爲牂柯江則又可即漢書水經折之道元

云脉水東逕牂柯郡且蘭縣謂之牂柯水水廣數里縣臨江上按今北盤江在永寧安南之間非漢牂柯郡及且蘭縣治所其誤一也今北盤江廣數十步兩岸皆高山峻嶺無從展拓與水經注水廣數里及縣臨江上之說又相背謬其誤二也北盤江今尚不通舟楫圖經至廣西泗城界如畧通船而漢書武帝時伐南越發夜郎兵下牂柯江同會番禺必非此水其誤三也至北盤江今尚有瘴氣而都江則無亦與道元劉昭之說相合然此或古今异宜又不直據以折鄭旻矣我

朝雍正八年雲貴總督鄂爾泰奏上江河道不特現通爛土司與粵之荔波縣接壤而爛土司地方有溪河一道進

至交然寨登陸五十里即係清水江實天地自然之形勢
但有三大灘及數小灘應行修鑿已檄飭獨山州知州孫
紹武查勘五十里陸路若可一併開成河道則都江清水
江呼應通而聲援接云云是沅水與豚水相隔又不過五
十里並有可通之勢也後不果開

羊角寨水圖經都江之西源

馬場水圖經邦水河左合馬場水右合爛土司西南溪
水東流爲都江

木魚河圖經都江又東北數十里有木魚河南自唐懷
寨來會

巴開河圖經都江至爛土司北折東流有巴開河自南

來會

風柳溝小溪通志都江過來牛營有風柳溝小溪北來注之

勞村江明史地理志河池州荔波縣東南有勞村江源出貴州陳蒙爛土長官司流入州界爲金城江河池州下云東有金城江下流合于都泥江通志在荔波縣城東南其源二一自黑猫一自爛土司合流而入縣境圖經都江又西南而勞村江北自荔波縣城來會接勞村江凡合四小水入都江

青雲溪圖經自廣西南丹州合三寶山水來注都江

三寶山水圖經合青雲溪

高坡河通志在丹江通判城南發源城西南囊路寨山中經喬港趙坡諸寨南入都江

紅盆水圖經出南丹州西南經河池州城南又受東南來之浪溪三水北入都江

苗溪通志合紅盆江

浪溪三水圖經注紅盆水

嘯山水圖經都江又東南流受北來嘯山水

帶溪圖經出古州八萬嵯山東北與生苗界山流至廣西思恩州白沙村西南合龍江

溶江通志在古州城西北合衆小溪以成江至城北與車江會至城東合于都江圖經都江至古州城西有溶

江自城西北合衆水又至城東來會

車江通志在古州城西北因繞車寨得名圖經至古州城北合溶江

崩坡塘水圖經合溶江

從龍溪通志在永從縣城西南源出老荒山流入溶江

孖女江通志在古州城南苗人謂山之高者曰岑水之分者曰孖下流合都江

孖覽江圖經自永從縣寨正寨平流出北合都江

曹平江圖經自黎平府曹滴司流出注都江

溫水攷

按水經注溫水出牂柯夜郎縣逕談藁昆澤味滇池母單
 毋撥律高罈封來唯等縣始東至鬱林廣鬱縣爲鬱水今
 攷南盤江至雲南曲靖府城外合白石瀟湘等江始有南
 盤江之名明史地理志南盤江下流環雲南澂江廣西三
 府之境至羅平州入貴州界按今曲靖府治南寧實漢味
 縣地圖經南盤江上流爲八達河出霑益州花山洞攷霑
 益州爲漢宛溫縣地縣名宛溫當以溫水得名按水經注
止作溫縣
又按宛溫與夜郎同屬牂柯所云
花山洞者在漢時或屬夜郎縣境至下云逕雲南府宜良
 縣東北則漢滇池縣地也又逕路南州西境則蜀漢建寧
 郡地也道元云諸葛亮討平南中劉禪建興三年分益州
 郡置建寧郡于此水側此水承上文而
即溫水也又逕澂江府治河

水經注卷之四十五

陽縣東境則漢俞元縣地也又南逕彌勒州西境寧州東
北境則皆蜀漢興古郡地逕阿迷州北境則又漢益州郡
地又逕廣西州之南境廣南府之西北境則亦蜀漢興古
郡地明史地理志澂江府治河陽縣東有鐵池河源出陸
涼州流至此會撫仙湖復引流爲鐵赤河入于盤江攷鐵
赤河卽古橋水班固益州郡俞元縣下注云池在南橋水
所出東至毋單入温行千九百里道元水經注云橋水上
承俞元之南池一名河水按南池鐵赤聲之轉是今之河陽縣卽漢
牂柯郡毋單縣左近地益可證今南盤江之爲温水矣道
元又云温水又東南逕梁水郡南温水上合梁水故自下
通得梁水之稱梁水當卽今九龍馬別等河是梁水郡或

亦即以南盤江得名也按班固牂柯郡罽封縣下注云温
水東至廣鬱入鬱過郡二行五百八十里常璩華陽國志
罽封縣有温水蜀漢時罽封分屬興古晉成帝分置梁水
郡縣又屬之今攷自彌勒州以下南籠府以上在蜀漢爲
興古郡在晉爲梁水郡來唯縣前漢屬益州後漢省今臨
安府阿迷州則又漢益州郡地也道元所云温水東南逕
罽封縣北又逕來唯縣東當即此矣南盤江下至廣西南
寧府境合鬱江與班固東至廣鬱入鬱之文亦合

鬱爲鬱水與班注小异

南盤江俗又名紅水江在冊亨者俗又名八

水經則言至廣

渡江

馬別河通志在普安縣城南八十里圖經南盤江至廣

西隆州界又東北流有馬別河西北自貴州合深溪木郎諸水南流逕南籠府境東合都威河而東南來會按縣境又有大橋河當亦入南盤江

深溪河通志在普安州城東一百二十里水道提綱又云深溪河即馬別河之上源

阿希河圖經馬別河又東南流有阿希河東北自普安縣東南山西南流百里來會

木郎河圖經出普安州南界山

都威河通志在南籠府城西三十八里三水並注馬別河又府城北五十里有阿棒河下流入永豐州

羅炎河通志在永豐州城東一百二十里即永寧州盤

江河下流入廣西紅江按明史地理志安隆長官司西南有同舍河疑卽羅炎等河之異名也

搏獵河通志在羅斛又西北有克渡索獵河自定番而下二水交流會合入紅江

克渡索獵河圖經入搏獵河

龍渣河通志冗渡河在冊亨流入龍渣河至者埕迤邐入紅江

冗渡河圖經入龍渣河

樂繁河通志在冊亨東北南流爲達嶺河又南爲百樂河入于紅江

盤水攷

盤水今名北盤江圖經源出今威寧州西一百五十里亂

山中南流入雲南霑益州界

按北盤江實出威寧州境自州境南流方至霑益州而今

水經及水道提綱並諸方志均以爲兩

盤江皆出雲南霑益州蓋失未深攷又曲折東北流二

百里仍入貴州界曰可渡河又折東流至大山而伏又東

南二十餘里出山東南流曰天生橋又東南逕安南縣境

始曰盤江又東南逕永寧州西境

通志永寧州毛口河亦盤江上流

今有

鐵索橋與安南縣夾江爲界者是也又南入生苗界又自

生苗界東南流入廣西泗城府界北境又南與南盤江會

流入粵江注海今攷三國志諸葛亮入南戰于盤中即此

水經注葉榆水又逕賁古縣北東與盤江合盤水出律高

縣東南盤町山東逕梁水郡賁古縣南水廣百餘步深處

十丈甚有瘴氣朱褒之反李恢追至盤江者也又云劉禪分興古之盤南置郡于梁水縣所云盤南卽盤水之南矣劉昭郡國志注牂柯郡宛温縣下引南中志縣北三百里有盤江廣數百步深十餘丈此江有毒氣按今雲南霑益州卽漢宛温縣地云縣北三百里核之卽今威寧州知水源出今威寧州無疑矣又攷今普安安南皆元普安縣地于唐爲盤州附唐平夷盤水三縣地于晉爲梁水郡地于蜀漢爲興古郡于兩漢爲牂柯郡地今方志皆言南籠府境爲牂柯郡地者蓋從其朔言之也晉書地理志賁古縣雖屬興古郡然依水經注所言梁水郡賁古縣則成帝置梁水郡此縣卽移屬可知且唐置盤州及盤水縣皆以今

北盤江得名推此言之則今普安安南即漢賁古縣地且

以水勢驗之今盤江營鐵索橋所在水漲處僅可百餘步

深十餘丈春夜之交即有瘴氣又其明證矣按葉榆水即今西洱河檢

諸方志皆不言與北盤江通然細核水經及注經云葉榆水入牂柯郡西隨縣北為西隨水又東出進桑開過交趾

里劉昭郡國志注云自西隨至交趾崇山接險水路三千

徵外東至藤冷入尚龍溪又馬援言從羗冷水道出進桑

王國至益州賁古縣轉輸通利蓋兵車資運所由矣此則

葉榆河逕賁古縣北與盤江合之一明證今葉榆水自永昌以下為諸地志所淆二水遂若風馬牛不相及矣然賴

有後漢書及水經注諸證俱在異日如圖經又云拖長江履其地尚可尋源湖流一細考之耳

自普安州平夷所來會者平夷所即舊時平夷縣可知漢

唐皆有平夷縣此當屬唐平夷縣故址又唐盤州在今普安州東三十里盤水廢縣亦在普安州西皆今北盤江所經是又一證至所

云盤水出律高縣東南盤町山者當指伏流復出之所而言今攷方志言天生橋爲盤江伏流復出之所在威寧府東南百六十餘里其處亂山重叠左側卽華蓋洞當卽道元注所云盤町山也盤江或卽以盤町山得名矣又云盤水又東逕漢興縣山谿之中漢興縣晉宋志皆屬興古郡以道里推之卽在今南籠府以東與泗城府交界處可知結里迅南山水圖經卽威寧州東南水西南流會可渡河

花魚洞水圖經可渡河至木東汎有花魚洞水西來注之

桃花溪通志在威寧州城南八十里兩岸皆植桃花故

名

九十九渡水通志在威寧州城西南百里並合可渡河
落白河圖經可渡河至安南縣東北有落白河自曲靖
府界東流來注之

拖長江貴州紀事明宏治中普安苗米魯等築三寨于
拖長江諸處通志在普安州城東七十里源出沙陀石
巖中下通盤江

海子鋪北水

猪場河

西安河圖經並注拖長江

軟橋河通志在普安州城東三十五里

南板橋河通志在普安州城東八十里上接城南三十餘里之大水塘俱流入盤江

者卜河明史地理志普安州東南有者卜河下流入于盤江通志在普安州城東南一百八十里流至永寧州亦名者馬河

阿黑河通志在安南縣城東南十餘里圖經阿黑河合馬京河西北自安南縣東境來注盤江

馬京河通志又合阿黑河按安南縣境又有大章河馬畢河通志出南籠府新城汎西北山東流經城北又東數十里折東北而北經高伍塘及安姑之東又北流注盤江水道提綱作馬軍河誤

都城河晏斯盛黔中水道攷南籠府有都城河自安南縣界得江西坡水至高武漢西合馬畢河

江西坡水圖經合馬畢河

寧谷河圖經河自東北安順府會西南鎮寧永寧二州諸水西南流入盤江水道提綱寧谷河有二源一出普定縣東北境山一出西王山東北麓其西北麓卽三岔河源北流入烏江者是西玉山亦黔中分水嶺也

白水河通志在永寧州城東北四十餘里路旁楊

吉河通志在鎮寧州西南十五里下注白水河菜

子河水圖經合白水河石溪通志在鎮寧州城南

四十里亦注白水河

王二河水道提綱寧谷河折東南流三十里合東來
之王二河

霸陵河通志在永寧州城東三十五里

打罕河通志在永豐州西北梭明史地理志元以打
罕夷地置永寧州則此河亦當以打罕夷得名又梭
地理志十二營長官司下東北有公具河北有阿破
河二水當亦合寧谷等河入盤水

關嶺驛水圖經並合寧谷河

北口河通志在永寧州城東二十里下合盤江

巖下河通志在永寧州境圖經河東北自巖頂山西南
流百餘里合東來一水南注盤江梭州境又有郎公河

落葉河等當亦入盤江

魯溝河圖經盤江既入生苗界有魯溝河自西安籠鎮之西北木舌寨山東流來注之

大坡哨水通志盤江過普市又合大坡哨水

潭水攷

潭水即今永從縣之福祿江也今水經福祿江源出湖廣靖州西南流入貴州黎平府西境爲古州江東流至永從縣東南流合爲福祿江又東合大厓江爲南江入廣西柳州界經融縣入柳江明史地理志黎平府又有福祿江其上源爲古州江下流入廣西懷遠縣境通志在永從縣城南源出石井山至黎平府西境爲古州江東合彩江爲福

祿江又東合大巖江爲南江流入廣西柳州界攷漢書地理志武陵郡鐔成縣下班固注云玉山鐔水所出過郡二行七百二十里水經注溫水又東入阿林縣潭水注之水出武陵郡鐔成縣玉山東流逕鬱林郡潭中縣周水自西南來注之潭水又東南流與剛水合又逕中溜縣東阿林縣西右入鬱水許慎說文亦云水出武陵鐔成玉山東入鬱林今考靖州本漢武陵郡鐔成縣地黎平府亦漢武陵郡地以是知福祿江卽潭水自黎平永從至柳州界皆東流又與班灑二注合惟水道提綱及諸方志以福祿江卽柳江則誤元和郡縣志柳州馬平縣潭水東去縣二百步柳江在縣前三十步是潭柳係二水明甚今按在柳州府

城南者是發源都勻府之豚水而福祿江則經柳州府城之西所謂東去縣二百步者也按唐馬平故城在今縣稍北以此推之則今之都江乃唐之所謂柳江太平寰宇記潯江在柳州南三十步亦名柳江是柳江又名潯江今水經亦名之爲右江明史地理志馬平縣南有柳江亦曰潯水亦曰黔江名雖多而實止一水也元和郡縣志潭水在龍城縣西十里今福祿江亦逕柳城縣西南以合柳江是也蓋唐時潭水之名尚未改至宋亦然太平寰宇記洛容縣有潭水是矣至明史地理志始名之爲福祿江柳州府懷遠縣下云縣西北有九曲山山南謂爲石門山兩山夾峙福祿江自貴州永從縣流逕其中至融縣爲融江至柳城縣爲柳江

云至柳城縣爲柳江者蓋福祿江至柳城縣合于柳江也
潭水入鬱處在今潯州府桂平縣城東桂平縣卽漢布山
阿林二縣地也與道元鬱水東入阿林潭水注之及潭水
逕中潯縣東阿林縣西入鬱之文無一不合按漢阿林廢
縣在今桂平
縣又通志言福祿江源出石井山攷今石井山在黎平府
城南八十里豈卽漢鐔成縣玉山耶然福祿江源實出于
靖州靖州在黎平府東北石井山則在府東南且去靖州
較遠則方志福祿江源出石井山之言非確論也

彩江明史地理志永從縣有彩江通志古州江東合彩
江

大巖江通志在西山司源出大巖山東南流入于永從

縣之福祿江明史地理志同

樂民溪通志在永從縣城東南源出鹿背山流合福祿江按明史地理志永從縣又有永從溪今不見疑即樂民等溪之異名也

利濟溪通志在永從縣城西南流合福祿江

容江明史地理志曹滴洞長官司西南有容江源出苗地北流入福祿江

剛水攷

漢書地理志牂柯郡毋斂縣下班固注云剛水東至潭中入潭水經注溫水下道元注云潭水又東南流與剛水合水西出牂柯毋斂縣王莽之有斂也東至潭中入潭今攷

柳州府屬之馬平雒容柳城懷遠融象來賓等州縣皆漢潭中縣地云剛水西出牂柯東至潭中入潭以地形攷之殆卽今貴州定番州南境之濛江也通志濛江在定番州城南源出州西北三十里亂山中曰濛潭會州境諸水至破鷺入廣西泗城府界亦名牂柯江俗名烏泥江亦曰都泥江又曰紅水江入廣西界之後歷泗城慶遠思恩柳州潯州五府東蘭那地忻城遷江來賓武宣六州縣于武宣縣西北流入潭水皆由西而東一證也鎮寧烏泥江一源出鎮寧州見下定番二州本漢牂柯郡地漢毋斂縣今雖未知所在然以漢宋地志考之縣當并入故且蘭則今定番州地或卽漢毋斂是二證也漢書地理志鬱林郡定周縣下班固注

周水首受無斂東入潭受無斂者當是首受無斂水即剛水也疑剛水至柳城又合周水始東注潭周水即今柳城縣西南之龍溪水是矣元和郡縣志來賓縣在都泥江北來賓水東故名今考濛江正在來賓縣南又東流入潯州府界明史地理志亦曰來賓縣南有大江亦曰都泥江是三證也濛江土人亦曰牂柯江太平寰宇記來賓縣有牂柯水樂史引郡國志巖州州門有長水深十丈從牂柯河下是四證也今水經牂柯江有二源俱出程番府一自金筑司治北為麻線河按今通志鎮寧州南百里有烏泥江明史地理志即都泥江源出山箐中東南流入金筑安撫司境今廣順州又在金筑東南圖經麻線河在廣順州城北二十里即所謂發源金筑司治北之水然則烏泥江一源又寔出鎮寧州也至府城西境為七曲江過廬山東經

洪番方番至爲番司南爲大韋河一自上司馬橋治東北
流經小程番盧番北境南流遶府城過卧龍司西與大韋
河合爲牂柯江水道提綱雖不明著牂柯江之名而云泗
城府水二俱出北境大山一西南流一東南流至府城南
而合又云此水源流三百餘里泗城西山北山諸水畢會
今攷泗城府北境卽緊接定番州非濛江而何此五證也

按水道提綱惟誤以源出雲南寶寧縣之西洋江爲卽古夜郎脈水竅誤道元云鬱水又東入

阿林潭水注之按潭水未至阿林縣之先于潭中縣已合
剛水今水道提綱紅水江西南自來賓縣來會柳江俗曰
都泥江今水經以今都江爲右江云右江南流逕來賓縣
東牂柯江來注之按今水經之右江卽提綱之柳江今明水經之牂柯江卽提綱之紅水江也

濛江先合柳江始注鬱水與道元所言無不恰合是六證也

漣江通志在小程番司南流入濛江

冷水河圖經合漣江

環帶江通志在羅番司南又金石司東南有回龍江俱合流而入濛江

回龍江黔中水道攷環帶江合回龍江羅番河入濛江

羅番河通志在羅番司北

小水河通志在羅番司東亦合環帶江

九曲江通志在定番州西二十里

奔龍江通志在大龍司東下流入于濛江

大龍河通志又合奔龍江

遶翠江通志在卧龍司南流入濛江

大韋河通志在韋番司南上通程番下接卧龍亦入濛

江

底方河通志在方番司合于濛江

小番河

雲溪水通志並合底方河

玉帶河通志在定番州城北下流入于濛江

擺遊河通志在廬山司西流入濛江

腰帶河黔中水道考水自廬山司南合擺遊河入濛

江

洗馬河通志在廬番司東流入濛江
小溪水通志在洪番司南東入濛江
雙峽水通志在小龍司南入濛江

卷施閣文甲集卷第七


陽湖洪亮吉著

上石經館總裁書

亮吉頓首肅啓閣師石經總裁執事昨奉

諭旨辦理石經并

諭以蔣衡所寫進十三經爲底本鴻都門側建立百碑務
本坊南書從一體雲臺辨難之旨定自禁中開元御製之
篇冠于碑首士生今日千載一時又欣值執事以上褒之
尊嚴領羣經之問答總司必籍董率羣賢此則鸞臺鳳閣
別標監領之名虎觀麟洲雅重諸儒之選本日復派亮吉
等四人預司其事老聃之守柱下子政之居閣中自問何



人敢同前哲承命之下歛悚交并伏以

聖朝舉事度越百王況石刻流傳將貽萬古是必博稽羣

籍參以昔賢訂蜀宋之叢殘校漢唐之昔誤其體則括一

字二字三字爰定厥中其字則準大經中經小經俾分其

任子思子之言曰以俟聖人而不惑張伯松之言曰懸諸

日月而不刊迨今日執事及諸君子之任乎若亮吉者與

天祿石渠之選已愧非才掌三皇五帝之書尤慙無任竊

見兩半之限校讎既有程期而旬日之間義例仍難畫一

此則屢承垂詢之餘私心有不能已者也又自計于石經

一事不爲無緣早從江左之使車壯入咸秦之節署于學

上則贊成其事乾隆三十七年安徽學于侍郎則助教其

訛乾隆五十年陝西巡撫畢沅呈恭拓唐開成石經進呈呈貨先儒之庶摩京兆之叢

碑從好古之家識熹平之殘字南仲篆書搜于覈學光堯御筆拓自錢塘每有遺文悉歸瀏覽又況書編隸釋仿自先臣閣建蓬萊不無家學今復忝預掌書之任廁身祕閣之中雖識大識小事有不同而盡美盡善期于無負輒不自量謹撰上二十四條各約舉一二事尚祈執事于機務之暇察其愚昧之誠不棄芻蕘賜之采擇雖義難徧及而餘庶類推倘可施行乞頒本館

一經注參錯宜正也易序卦履者禮也四字既誤以經而作注儀禮下言爲世父母二十一字又誤以注而作經左傳上天降災四十二字又并非注而誤作經之類

一前後倒置宜正也穀梁僖二十年釋宋公三字當在外
釋不志之上尚書武成王若曰十二字又誤移大告武
成之下

一脫文宜補也大易童蒙求我中乃脫來論語賜也賢乎
下應增我

一又有因數字之脫而上下不貫者宜補也左傳桓十三
年淇水二字全脫而亂次以濟之義不明可以證釋文
者酈元之注也論語子貢章樂道二字脫一而富而好
禮之文不配可以證孔傳者皇侃義疏也

一衍文宜去也易傳坤至柔上衍文言曰三字禮雜記君
之母與妻上復衍君之二字之

一又有因一句之衍而文義不續者宜削也易傳衍變則通三字而德明之本尚可並行禮記衍舞斯愠三字而貢父之編遂生異議

一因一字之別而本義全乖者宜改也儀禮司射實解之實誤爲賓而洗升之文難喻左傳旦辟左右之旦誤爲且而厥夢之符不彰

一前後宜畫一也易包字凡十見而苞桑之苞獨从草孟予饑字凡六見而無饑之饑獨作幾句踐之句並从口而間亦作厶盤桓之磐本作般而又或加石

一偏旁宜急削也暮从二日憾有兩心添木爲榭加草于臧卽且之側从虫胡連之旁置玉此類殊多亦難畢數

他若本之爲本暴之作暴磷堯之在魯論飶苻之留孟
子更爲別字之尤又屬全文當改

一字有誤自魏晉以前者儀禮則祧初从濯風詩則祊本
爲繫大易陰凝叔重尚知其俗春秋衿服當陽已改爲
均

一字有誤自唐宋以前者著訛爲葺幸有賈逵之注可證
說文連誤爲漣倘非鴻烈之編誰明古義此上二端並
宜裁宥

一字雖非俗而亦當定从本字者如論語後彫之當作凋
左傳絺綌之當作紵是也

一同一俗字當酌去其已甚者拖地皆論語袍紳之別字

與其从拖不若从陸氏之地爲得濱濱皆類之或文與其作濱不若从廣雅之濱爲是

一經不可改从注也禮記大學篇此之謂自謙鄭康成謙讀作慊而近刻卽改爲慊周禮九嬪贊王杜子春王讀爲玉而各本依改爲玉

一此經有可以彼經改者同一引書則大學篇一个臣之類移从公羊傳作一介爲是

一此經有必不可以彼經改者各存古字則公羊傳鄭伯改之字今改从左傳本作伯堅爲非

一有因上下文而誤者亦當改正也左傳僖廿八年齊侯二字以上文而誤重論語子路章輕裘二字因下章而

竄改

一前代之制宜改也秦并天下臯乃从非漢戒羣臣對初
離口著火德之符改从水之洛爲雒表金刀之讖易處
者之留爲劉以迄新莽疊文之誤開元顛字之訛字苑
出而影始从彡草書行而修訛从羽繼之作緇城之作
圻匡之侖匡桓之作栢之類旣事隔于數朝悉當从乎

釐正

一漢石經有急宜从者子游之爲子旂石碣之爲石蹠大
易先心之文尚書微言之字此類亦多畧標一二

一唐石經有宜酌从者尚書視乃烈祖之烈作厥左傳其
氣燄以取之之燄作炎風詩襪矣不誤从禾論語德衰

下仍加也至其失者則于干不辨專專不明此類殊多亦難枚舉

一兩宋石經有可從有不可從者南仲號工篆籀之文乃以豐而配禮光堯始準宣和之詔復易陂而作顛

一唐宋石經外刊本宜搜羅也夫毛居正之正誤藉讎監本之訛晁公武之遺書足校石經之失吳興沈氏之刻相臺岳氏之編本留淳化與閩本以兼行堂號永懷較汲古而稍善此則並可博搜以襄盛舉

一字當以說文爲本而從否亦當斟酌者字書無覲字則覲當从繫傳本作儻舊文無晒字則晒當从淳化本作𣎵以及份份之在論語墳墳之在風詩此急宜从者也

至若文馬之爲媽馬戚施之作醜醜不妨存此異文可不改从古字又況蒍之誤莪麗之从蘧均後所誤加不堪依據

一本當以釋文爲據而錄取亦當鑒別者如論語襁負之作緹負易鞶帶之爲鞶帶以隋唐之大儒反有愧宋元之監本又況尚書一冊宋人之補釋爲多周易二經近刻之脫文不少能無待精識之去留與碩儒之裁決哉此上凡四條未知有當與否幸有以教正之

釋大別山一篇寄邵編修晉涵

今俗以漢水入江左側之山爲大別山始見李吉甫元和郡縣志余每不爲然今細核之益知無據尚書正義稱鄭

康成注云大別在廬江安豐縣西南漢書地理志六安國

安豐縣班固云禹貢大別山在西南

孔穎達尚書正義云地理志無大別唐人

黷膠酈道元稱京相璠春秋土地名云大別漢東山名也

在安豐縣南康成注經如此孟堅著史若彼春秋土地京

相有其明徵禹貢山川漢儒均無別義此一證也水經江

水又東北至江夏沙羨縣西北沔水從北來注之道元注

云江水又東逕魯山南古翼際山也地說曰漢與江合于

衡北翼際山旁者也自道元注經以迄君卿作典祇標魯

翼之名無有別山之號此二證也首疑大別山不在安豐

者自杜預預於地理既非所長然終不敢遽指翼際山爲

大別蓋其時去漢尚近而同時裴秀京相璠等於地理又

屬專家必知翼際大別二山不可混而爲一故止云然則
二別在江夏界姑設疑詞以啟來惑而究不能定指一山
奪茲舊義此三證也必知翼際非大別山又實有據道元
于江水下引地說云漢與江合于翼際山旁于沔水下又
引地說云漢水東行觸大別之坂南與江合夫同云地說
則必出於一人或一書而一則云翼際之山一則云大別
之坂各標一號明係二山此四證也杜預之所疑者不過
因左傳定公四年吳師伐郢楚子常濟漢而陳自小別至
大別以爲二別近漢之名無緣在安豐今細繹傳文吳舍
舟于淮汭自豫章與楚夾漢則吳師在漢北楚在漢南楚
司馬謂子常曰子沿漢而與之上下蓋欲子常在漢南沿

水與之上下以綴吳師而已則往漢北故云我悉方城外以毀其舟還塞大隧直轅冥阨今方城山在南陽府葉縣南大隧直轅冥阨皆在汝南府信陽州界均漢水以北之地也下又云子濟漢而伐之蓋楚都郢在漢南濟水始至漢北及子常濟漢而陳自小別至于大別則已在漢北矣推此則大別小別皆淮南漢北之山大別旣在安豐則小別在今光黃之間豈有吳師自淮而南未及交戰先自退五六百里之地至今之沔口者乎且楚都郢卽至沔口亦不過沿漢而東何得云濟此五證也夫師行三十吉行五十至于轉戰則道里不常若疑距漢稍遠則傳所云大隧直轅冥阨及下云塞城口而入皆距漢在五百里以外又

可以去漢較遠疑之乎此六證也夫欲求大別小別所在
必先求柏舉所在柏舉之地杜預不詳高誘注呂覽京璠
釋春秋雖或云楚鄙或云漢東皆無指實惟墨子非攻篇
云吳闔閭次注林出于冥阨之徑戰于柏舉中楚國而朝
當子常不從司馬之計濟漢轉戰至於柏舉其時吳已出
隘而西楚事不可爲矣夫云出隘而西則已出今信陽州
之隘卽上所云大隧直轅冥阨也據此而推則柏舉當在
今黃隨左右京相璠云柏舉在漢東最諦又按水經注舉
水出龜頭山今山在黃州府麻城縣東相近有黃檠山圖
經亦云舉水出黃檠山也檠柏聲同則柏舉或卽在此吉
甫亦知春秋柏舉爲龜頭山而乃移二別至漢南入江之

處可乎又傳文云自小別至于大別三戰下始云二師陳于柏舉則并當求自大別至柏舉之道今麻城縣東北至汀南商城縣七十里商城縣東至安徽霍邱縣一百十五里而龜頭山又在麻城縣東六十里大別山又在霍邱縣西南九十里則自大別西至柏舉實不出三十餘里可以按圖而索此七證也柏舉下卽云吳從楚師及清發杜預不注所在水經湏水又南過安陸縣西道元注左傳定公四年吳敗楚師于柏舉從之及于清發蓋湏水又兼清水之目矣是清發在安陸縣漢安陸縣兼今德安府安陸雲夢二縣界今考麻城西南至黃陂縣七十里黃陂西至孝感縣六十里孝感西至雲夢縣十里是柏舉至清發又約

百三四十里皆自東北而漸至西南此八證也下又云敗

諸雍澐禹貢云過三澐至于大别鄭注三澐水名在江夏

竟陵之界今澐水在安陸府京山縣西南南流入天門縣

為汧水雍澐或取雍過之義與沔水有死沔之稱同又吉浦

為岳州巴陵縣南十一里之澐湖足下于澐反入下正義

取之無論近舍禹貢遠取唐賢今考巴陵又在荊州府東

南四五百里又隔大江吳欲至郢必不反越郢而遠詣巴

陵司馬自息還敗吳師于此司馬必不台國都而遠趨江

外其種種謬誤殊不足辯又澐湖水名翁湖見道元注其

水實沅湘澐沔之餘波非河水決出而復入者足下欲明

雅訓而反引此以蓋至此漸趨而南距郢都不過一百餘

里故下復統而言之云五戰及郢也

傳又云左司馬戎及息而還敗吳師于雍澐雍澐正在

越郢而反至巴陵之

息及郢之中道里適合蓋禹貢導水由西而東故先言三

澁而後及，別吳師入郢則自東及西故既至大別乃及
雍澁非特釋左傳地名益可證禹貢山水千年疑竇一旦
豁如此九證也次又當求豫章所在而二別益可推杜預
釋地云柏舉之役吳人舍舟于淮汭而自豫章與楚夾漢
此皆當在江北淮南後徙在江南之豫章杜之意蓋以春
秋時柏舉豫章皆當在江北淮南也夫云江北淮南則正
今霍邱縣大別山所在矣杜得之于柏舉豫章而失之于
大別小別則不察也然因此益信漢儒詁經及著史之確
雖疑之者亦無心與之發明叔玠按韞韞而潛師于巢巢人見
今巢縣與霍邱此十證也傳文云左司馬戍及息而還杜
皆在江北預注司馬至息聞楚敗故還息卽今光州息縣而大別山

實在今光州固始縣與安徽霍邱接壤處距息止二百里
 蓋司馬欲與子常夾擊吳師并毀淮汭之舟至此聞敗乃
 反則大別山又近息可知此十一證也又司馬云我自後
 擊之蓋吳師自淮汭舍舟西南趨子常濟漢擊之正出吳
 師之前司馬自息取道至淮汭則出吳師之後一則當其
 軍鋒一或邀其輜重此十二證也又今漢川縣小別山者
 本名甌山隋立甌山縣取名于此強名為小別亦始吉甫
元和郡縣志小別山在漢川縣東南五十里春秋吳夫二
 伐楚令尹子常濟漢而陳自小別至于大別師此
 別之山見于經傳如果有可牽合則京相道元等何並不
 言且杜預正以大別致疑若小別可指實則無難由西驗
 東因一得二而卒無一言可知非實此十三證也且因此

小別之疑并識今內方之妄漢書地理志江夏郡竟陵縣班固云章山在東北古文以爲內方山今山在安陸府鍾祥縣西南接荊門州界而漢川縣之有內方山亦始吉甫至樂史遂據以爲禹貢內方矣尋其初不過泥漢水以強求二別又因二別而僞立內方而極其弊則禹貢一章隨其竄易春秋諸地皆可強名若又信彼虛詞刪諸古義則必宋唐以上絕無地理之書樂李以前并乏淹通之士而後可此十四證也總之後人之流傳因吉甫之附會吉甫之附會成于杜預之致疑然預之咎尚可解釋者預注云二別在江夏界今考晉初江夏郡尚兼今信陽羅山諸州縣界則與京相璠在漢東之說尚不甚遠非若吉甫終曰

釋地而尚不知郢在漢南吳來淮汭百程遙隔忽求縮地
之方二別強名乃有移山之術予故謂小顏注史反汭班
書吉甫繪圖全乖禹蹟者此也足下于經甚深所爲爾雅
正義必傳無疑而乃云殷時荊州以漢水爲界自大別以
東江南之地屬于揚州大別以西漢東之地屬于豫州蒙
竊有疑敢獻其惑夫僕願學于足下者也昔者鄭君一志
有張逸之更端孟空七篇喜屋廬之得間況僕之與足下
乎又漢水以南皆屬荊州云云亦似誤以西漢水爲漢水
今別陳漢水釋一篇正之左右幸皆有以教之

附漢水釋

山海經漢水出鮒魚之山水經沔水出武都沮縣東狼

谷如淳云此方人名漢水為沔水今按漢書地理志武

都郡沮縣沮水出東狼谷南至沙羨南入江與水經所

言出東狼谷同是沮水即漢水又名沔水也今畧陽縣

東南畧陽本漢武都郡沮縣地今有大丙山左思蜀都

賦嘉魚出于丙穴注丙穴在漢中沔陽縣有魚穴二所

嘗以三月取之樂史云大丙山小丙山並在順政縣東

南七十里順政即漢沮縣北有穴有水潛流土人相傳為丙穴

沮水經穴門而過或謂之大丙水又常璩華陽國志沔

陽有魚穴濁水出鮒是今之大丙山即山海經之鮒魚

山也東狼谷當即鮒魚山之別名或谷在山左近總之

漢水出鮒魚山西漢水出蟠冢山按氏道漾水亦出蟠冢山或以兩蟠冢為

疑不知實一山也以班志考之西漢水出番禺之西則漢水當在番禺東故至武都合沮亦有東漢水之目今氏道廢縣雖無可考然與西縣同禹貢及班固鄭康成屬隴西則相去必不甚遠可知

等所言皆各指一水並未嘗相背自魏收始誤以華陽

郡番禺山為漢水所出而後人如杜祐李吉甫等皆承

其誤也又考班志沮水過郡五行四千里今以水經所

過州郡核之五郡為武都漢中南陽南郡江夏若今之

寧羌州為漢廣漢郡葭萌縣地實為西漢水所經東漢

水即沮並不經其地按白水所入之漢為西漢水班固云以道縣白水出徼外東至葭萌

入漢而灑注則云白水于吐費城南東南流注西漢水是也班固西縣下云番禺山在西西漢水所出南入廣

漢水則白水入之非謂西漢水入白水也後人乃以州

北之番禺山附會為東漢水之源益見其誣矣至班志

與水經沮水及西漢水之外又別出氐道之漢名漾水
今考漾水至武都沮縣已合于沮漢禹貢嶓冢導漾東
流爲漢水經今漾水出隴西氐道縣嶓冢山東至武都
沮縣爲漢而班志則云武都道東漢水受氐道水一名
沔今考氐道水卽漾水也東漢水卽沮水也二水合乃
有沔之名矣班志又云過江夏謂之江水入江而水經
云夏水東至江夏雲杜縣入于沔明二水至江夏合爲
一故沔水又蒙夏水之稱矣劉澄之云夏水古文以爲
滄浪水與禹貢又東爲滄浪之水亦合又沮水卽東漢
水之一證也

又與邵編修辨爾雅斥山書

爾雅九府東北之美者有斥山之文皮焉斥山高誘注淮南王書及郭璞均不言所在今足下作正義稱隋書地理志及樂史太平寰宇記以爲斥山在今滎成縣南一百二十里今考隋志雖言文登縣有斥山然偶同其名不能定爲卽爾雅所指惟樂史始言卽爾雅之斥山樂史之于地理其疎誤足下所知也然則足下注殷商古制而僅據北宋單詞僕竊以爲過矣今敢據周禮爾雅爲足下陳之周禮職方氏正東曰青州其山鎮曰沂山東北曰幽州其山鎮曰醫無閭爾雅惟以東方爲東北東北爲東方與職方畧異今考爾雅九州水屬殷制夫殷都河內故以沂山爲東北而以醫無閭爲東周都雍州故又以沂山爲正東而

醫無閭爲東北古圖今雖不存然宋劉豫阜昌七年所刊
 禹蹟圖者尚屬賈耽相傳舊本今核二山所在以正兩代
 之名旣無累黍之差益信立言之審此一證也職方氏九
 州之山除五嶽外餘卽四鎮職方氏舉周制四極之內故
 不及崑崙墟惟此與爾雅異爾雅曰下今西玉珮竹北戸西上
 崑崙若常山卽今恒山爾雅恒山爲北嶽堯典宅朔方曰
 幽都則北岳可名幽都之證故郭注亦曰幽都山名是也
 餘七山則盡與爾雅同此二證也隋開皇十五年詔祠名
 山大川以沂山爲東鎮醫無閭爲北鎮會稽爲南鎮霍山
 爲西鎮是四鎮皆不出周禮職方及爾雅九府此三證也
 四鎮之名周禮大司樂注與新唐書地理志所載不同周

禮注云四鎮揚州會稽青州沂幽州醫無閭冀州霍山而

唐志則云東沂山南會稽西吳山北醫無閭是西鎮有時

變遷而東沂絕無異說此四證也若云東北之美則周書

王會解孤竹距虛不令支元獫狁不屠何青熊東胡黃羆注

云皆東北夷距虛野獸驢騾之屬獫狁黑狐元獫則黑狐又

鹽鐵論燕齊之魚鹽旃裘蓋壤地既連則珍奇易萃此不

特羽畎之貢載自堯時綾絹之徵詳于近代而黃羆墨狐

且與紫草紅藍而并著矣唐書地理志青此五證也今

登州府榮成縣雖有斥山山既辟小隋書地志僅有其名

外此則自漢迄唐皆無著錄必非爾雅九府之山至樂史

故不足據此六證也沂斥字隸書本近或省文作斥隸書

又誤寫增、蓋沂山以沂水所出得名故山字可不从水
 猶之沂山爲沂水所出濰山爲濰水所出後人省文亦止
 作并山鬻山此七證也爾雅旣屬殷制殷之九州爲冀豫
 離荆揚兗徐幽營則九府係一州舉一山冀州霍山豫州
 華山雒州崑崙山崑崙山在今肅州西南禹貢雍州崑崙
 梳支渠搜西戎又云厥貢惟球琅玕
 荊州梁山揚州會稽山兗州岱岳徐州沂山幽州幽都山
晉太康地志幽州營州醫無閭尚書疏云青州之境非止
 本以幽都得名營州醫無閭海畔而已堯時青州越海
 而有遼東舜爲十二州分青州爲營州營州卽遼東也禹
 貢又并營于青爾雅營州之境與禹貢青州同故醫無閭
 得惟若謂今榮成縣南之斥山則與醫無閭同屬營州一
 州舉二山而徐州反闕旣垂任土作貢之義又失辨方正
 位之規聖哲立言不當如此此八証也況足下八山皆據

周禮職方及考工記獨東北斥山乃近據樂史而不信職
方可乎又足下能別梁山之爲衡山而乃失之于此者則
不察也僕近爲乾隆府廳州縣志雖于古人之外時有一
得然卷帙旣廣訛舛實多海內故人多聞直諒如足下者
亦僅見他日亦欲足下引繩披報是正缺失故敢先貢其
愚幸不吝教我也

與孔檢討廣森論中牟書

承詢中牟所在昨客次口陳恐尚未悉敢畧布之闔百詩
徵君著四書釋地于春秋戰國地理發明者甚多獨于中
牟以爲眞不可考余竊爲不然管子云築五鹿中牟鄴者
三城相接也五鹿今直隸大名府元城縣鄴卽今河南彰

德府安陽縣是中牟在當時與五鹿鄴相接矣韓非子外
儲說晉平公問趙武曰中牟三國之股肱邯鄲之有髀邯
鄲卽今直隸廣平府邯鄲縣是中牟在當時又與邯鄲咫
尺矣臣瓚引汲郡古文云齊師伐趙東鄙圍中牟趙時已
都邯鄲是中牟又在趙邯鄲之東矣戰國齊策昔者趙氏
襲衛魏王身披甲底劍挑趙索戰邯鄲之中驚河山之間
亂衛得是籍也亦收餘甲而北面殘剛平墮中牟之郭是
中牟又在衛之北境矣暇日閱太平寰宇記湯水在湯陰
縣治北源出縣西牟山去縣三十五里元豐九域志亦云
湯陰縣有牟山卽疑中牟當在湯陰縣左近或以牟山得
名及見戰國策舊注云中牟在相州湯陰縣史記孔子世

家佛肝為中牟宰司馬貞索隱云此河北之中牟蓋在漢陽西漢陽蓋濮陽之誤今湯陰縣正在濮州西也張守節史記正義亦云湯陰縣西五十八里有牟山蓋中牟邑在此山側益信古今人所見如出一轍則中牟在今湯陰縣境內無疑也今湯陰去安陽不五十里去邯鄲元城五鹿城在今城亦不出一二百里益信管子韓非子所云相接云有城鞞無一字妄設也春秋定九年左傳晉軍千乘在中牟及衛侯過中牟中牟人欲伐之哀五年趙鞅伐衛圍中牟亦同杜預以滎陽中牟為注而疑其回遠裴駟史記直解又以中牟非自衛適晉之次不知春秋傳之中牟即今蕩陰之中牟也淮南子道應訓補簡晉在衛之西北今蕩陰縣子死未葬中牟入齊

正在滑縣等西北二百餘里爲衛入晉必由之道矣蓋河南之中牟漢雖立爲縣而其名實未嘗見于經傳其見于經傳者皆湯陰境之中牟也吾又獨怪班固著漢書地理志最爲精審獨于河南郡中牟縣下原注云趙獻侯自耿徙此則以鄭之中牟爲趙之中牟雖偶有未檢然殊非小失矣唐孔穎達左傳正義以爲中牟在河北不復知其處而又引臣瓚云中牟當在溫水之上史記集解引瓚說溫水又作漯水則又未知何據敢并以質之足下至足下解春秋左傳桓公如夫人六人懿公母氏位次在第六故以甲乙之數名之曰夫已氏其說甚新而未敢遽信容再詳之并白

シカトニイナ

ニ

卷施閣文甲集卷第八

陽湖洪亮吉著

乾隆府廳州縣圖志序

蓋聞方圓有象白阜成書流峙初形緣圖有記黃帝中經之外乃逮于九丘重華益地之餘聿聞夫禹貢周禮職方實係九州之志春秋內傳洵爲百國之書秦圖三六由四極而四荒漢郡百三乃一候而一尉由茲以降可得而言若夫斷代爲書建元表號則太康地記始有成規永初山川實標定目開元十道之記旣開吉甫之前元豐九域之書又繼元和而作若據茲見在以定厥歸則李相所編執衷斯在而其得失又可推焉夫爲地說者右圖左記旣屬

良模舉要撮凡斯歸至當故裴秀舉地官之職惟表川原
蕭何得御府之圖藉知阨塞必有資乎經國非欲助夫遊
觀乃今觀其所采則嚴光江岸莊子濠梁前喆鈞遊有而
必錄此則郭象述征之記延之攬勝之編非地理之要也
昭仁等慈丹臺仙觀二宗創置靡不畢詳此又名僧四域
之經高士老君之傳非地理之要也又有甚者夫挂劍徐
君之壠灑酒喬公之墟同係昔賢均堪憑弔然與其有詳
有畧何妨概屬闕如今則關中諸兆存班固而削馬遷江
左崇封登陶侃而芟卞壺載籍並存無疑可闕而乃如此
者洵莫詳其用意焉又如周禮職方春秋國邑孟堅一志
文命一書洵海宇之權輿肇山川之名號必謂生年已後

無得而徵則疑者不言蓋衷諸聖今則春秋土地視杜預而尤踈禹貢方名較魏收而益誤前者旣不知所本則後者亦莫敢復承且其言曰古今言地理者凡數十家尚古遠者或揆古而畧今採謠俗者多傳疑而失實飾州邦而敘人物因邱墓而徵鬼神旨哉斯言實皆自背夫大別小別各立其名內方外方強標其號以至天興一縣載二事而皆虛襄邑一區設兩言而亦誤此非尚古遠而失者乎五星升渚一聖名山石則陽翟婦人竹則霍山天使此非采謠俗而失者乎至于陵爲蛇骨水繫蛟潭陶侃則一龍作梭跖拔則七魚猶串馬融經學先表讀書之臺謝朓文人乃紀賦詩之所非飾州邦而敘人物乎孝童營冢烏口

先傷力士鑿山牛形遽變舒女化魚水聞歌而赴節思王
埋烏菟在冢而能呼非因邱墓而徵鬼神乎雖然責人斯
易考古良難安知今之所爲是者後之人不又叢責備也
要卽今所見以揆其所安則雷同附會有皆不敢而其間
因革亦微具體裁焉今者每布政司所轄各冠以圖統以
三京爲圖二十昔則赤緊畿望今則衝繁疲難道里之
數一準近圖戶口所憑要于今冊故城舊縣有則必書鑿
嶺開渠遠而必錄此則遵彼良規無谷改作至若金牛聖
渚因水利而登編白鹿神禾以分疆而入錄外此則畸人
逸士昔賢前聖之遺跡概不列焉五岳四瀆圭瑁之尊同
于牧伯故并列其祠外此而浮圖宮觀不與焉帝升王降

弓劍之所比于山陵故各詳其地外此卽聖賢冢墓亦不及焉同知通判分駐必詳則班生記都尉治所之意郵亭鎮堡隨方亦錄則馬彪載郡國鄉聚之遺五金利用標所出之山近監便民記置場之所水道則據今時出入而綴以故名陂塘則記歷代廢興而并詳創始形勢所在非可空言戰爭之區因事附錄又名之可合于禹貢益名班書左傳者疑則或闕徵則必書此又其復古之初心作書之微旨也我

國家膺圖百年闢地三萬東西視日過無雷咸鏡之方南北建斗逾黎母呼孫之外光于唐漢遠過殷周然而大一統之書

內三館所繪祕圖則流傳匪易鴻編則家有爲難非尋櫬括之方懼啓津涯之歎臣遭逢

聖世得預儒流四及計借再膺里選九州歷八親探禹穴之書四部窺全曾寫蘭臺之字粗知湛濁稍別方輿閱以歲年撰成此志卷裁五十慚管見之難周譜及八荒表盛朝之無外云爾

漢魏音序

古之訓詁卽聲音易說卦曰乾健也坤順也論語曰政者正也基之爲始叔向告于周枏之爲耗梓慎言于魯又若王制刑者劓也劓者成也展轉相訓不離初音漢儒言經咸臻斯義以迄劉熙釋名張揖廣雅魏晉以來聲類字詁

諸作靡不皆然聲音之理通而六經之情得矣許君爲說文記字字各著聲覽而易明斯爲至善又通其變爲讀若聲近之言則達嚴詁字之精杜鄭說經之例義或不可同而音皆轉相訓亦其善也蓋有定者文也無定者聲也卽一字一聲而讀又有輕重緩急古今風土之不同如台之爲吾吾之又爲我伊之爲而而之復爲爾也古人音聲清故爲台爲伊中世梢轉則爲吾爲而後人口語重則爲我爲爾以及旄之讀爲繆閔之讀近鴻則急氣緩氣之分秦呼卷爲委齊呼卷爲武則齊人秦人之別若一以孫炎沈約以後之音例之則重讀者不能輕急讀者不容緩台伊遞降旣淆今古之聲委武隨方又擯齊秦之語反語出而

一字拘于一音四聲作而一音又拘于一韻而聲音之道有執而不通者焉是以里師授讀俗士言詩皆執音韻之書以疑天籟越客適秦魯人入蜀又泥聽聞之素以訝方音由聲音之道不明欲合輕重緩急之讀爲一音強東西南朔之聲出一口也夫求漢魏人之訓詁而不先求其聲音是謂舍本事末今漢魏音之作蓋欲爲守漢魏諸儒訓詁之學者設耳止于魏者以反語之作始于孫炎而古音之亡亦由于是故以此爲斷焉又嘗考之漢廷諸儒精研聲訓厥惟許君而康成次之許君之義均見說文外又有注淮南王書今不傳惟道藏中淮南鴻烈篇二十八卷尚題漢南閣祭酒許慎注或當有據然世所盛行之本則皆

題漢涿郡高誘注今考許君之注有淆入誘注中者或本
誘採用許君之說後人遂誤以爲誘也今畧論之淮南王
書輯其肘高誘注輯讀近茸急察言之又霖者扣舟高誘
注今沈州人積柴水中搏魚爲霖皆與說文之說同此類
尚多以是知許君之注有淆入誘者矣康成注易書詩三
禮及易緯乾坤二鑿度等皆有音讀今考漢書音義有鄭
氏薛瓚云是鄭德晉灼云北海人不知其名按漢書高帝
紀盱眙注鄭氏音煦怡武帝紀蛇邱注鄭氏蛇音移郊祀
志推終始傳注鄭氏音亭傳而史記集解皆作鄭元漢書
揚雄傳祛靈蠙注鄭氏祛音怯而文選注亦作鄭元是漢
書音義所稱鄭氏蓋康成居多故晉灼亦曰北海人也其

間有出于鄭德者如高帝紀方輿注音房預之類集解亦別標出之裴駟劉宋時人必非無據是康成又或爲漢書音義世所不及知矣今以許鄭二君之說參校又各有異同許君云豐从豆象形而康成儀禮大射儀注云豐其爲字从豆曲聲今考曲不成字不當爲聲康成蓋誤以象形之字爲諧聲也許君云櫛从木執聲而康成考工記注云櫛讀如涅从木執省聲今考覲本可作聲不必從執省許君云裘古文作求而康成詩箋云裘當作求聲相近故也今考裘求本一不必改字合此數條疑許君之說爲長矣蓋許君生及東漢之初親從賈逵衛宏等問受其于西漢諸儒張敞劉向楊雄鄭興等不啻親承提命其學旣專故

其說獨博而諦又非他儒之所可及也今編次仍從說文舊部而以所無者附見于後或說文所有而後復譌爲他字者則注云某字本某字不移其部若傳譌已久則亦各從其部正附兩列焉其後儒以反語改漢人之音者亦置不錄以非其舊也排比闕失成于六旬演贊前後斷爲四卷書成值乾隆四十九年歲在闕逢執徐長至日爰付之梓庶幾諧聲故讀復厥舊音反語四聲此爲前導云爾

三國疆域志序

陳壽三國志有紀傳而無志然如天文五行之類畧備沈約宋書皆可不補其尤要而不可闕者惟地理一志元郝經所補全錄晉書地理志本文卽見于沈志中者亦近而

不采他可知矣予自戊戌歲校四史畢卽有志於此留心
哀輯者二載然因有數難輒復中輟沈約云三國無志事
出帝紀雖立郡時見而置縣不書此一難也晉司馬彪撰
續漢書郡國志凡郡縣增省在安順以後者卽不置錄是
前無所承唐初修晉書于地理學最不精建置沿革舛錯
過半是後無所據此二難也卽云出帝紀矣而荊州江夏
則南北並立蘄春廣陵又魏吳不常能析其州郡本末尤
不易辨其縣道遷徙又或居巢狄道兩國置壘鍾離遂適
空地不居臨賀郡所屬則荆廣之說不同宜都郡立名則
魏蜀之辭不一此三難也從前諸地志上論沿革每自漢
越晉中闕三國不書彼傳信之體則然今旣欲補志則須

上詳郡縣與東漢異者若干下與西晉異者若干全據金
行旣謂以孫而定祖概徵炎運又嫌有昔而無今此四難
也沈約著宋書去三國不過二百祀當時冊籍輿圖諒存
祕省所引太康元康定戶十餘種最資證左而汝陰建郡
顯背魏書蒙縣著文復乖漢志此五難也今世所存諸地
志可采者如李吉甫元和郡縣圖志樂史太平寰宇記等
不過五六種而邱頭旌武一人而前後不同油口號公三
書而彼此互異此六難也三國土壤旣分輿圖復窄州郡
之號類多遙顧吳有犍爲之守蜀存京兆之名武都一郡
土歸西國而名立扶風房陵一區實隸當塗而虛領益土
近而易混驟每不詳此七難也葭萌改漢壽之名則與屬

武陵者亂上庸建北巫之號則與隸建平者滄東京所無而西魏忽置誰別建始之年南邦所創而太康已廢難識革除之始此八難也陳壽史例最號精嚴而高陵海陵之縣沿著舊名新安新昌之稱復標近號加以松之注史好采殊說始興未建作守者已有羊君東安未立臨郡者先推郭智作者既視睫而不見閤者復貯心而不疑此九難也繼此九難遠閱千載沈約所據十餘種僅存其二而又不能稍參已意增定郡邑此十難也然用力既久終不忍輟作而證左俱絕者則闕疑以待焉蓋地理之難也班生錄本朝之書猶存俟考沈氏徵近世之壤每著存疑從事于此者當若是矣今大類倣宋書州郡志之例而于扼要

之地爭門之區可考者附見諸郡縣下參用郡國志例焉
其郡之未經分割者置縣次第準郡國志爲多或已分割
及廢而復置者則先後類從晉志要在有補原書而不汨
其實此衰輯之意也然天下州邑之志繁如星草安知所
疑而闕者不皆散見于諸郡邑圖志中補是志者旣非爲
已何必皆出一人同好之君子苟能隨所見而足之以成
一史未竟之事則是書亦補三國志疆域者之權輿矣

東晉疆域志序

歷史地志互有得失若求其最舛者則惟晉史地理志乎
其爲志也惟詳太始太康而永嘉以後僅掇數語又不能
據太康地志元康定戶等書以爲準則故其志州也梁州

之建與王隱地道先後不同湘廣之分與沈約宋書多寡互異其志郡也北海則一方全脫濟岷則兩縣無徵其志縣也巴東無漢豐梁國無西華旣異晉初之疆理滎陽有陽武南郡有監利又非江左之輿圖雖分卷至四洵可謂本末倒置後先失據者焉然余以爲且無論其得失也卽其以永嘉爲斷亦止可稱西晉之地志而于江左則尚無預焉此東晉疆域之不可不作也又有甚者僑州郡縣之設始于東晉而僑州郡縣之與實土相混則莫若初唐卽以此書之外論之顏師古注前漢書以京兆南陵爲今寧國府南陵縣李賢注後漢書以九江當塗爲今太平府當塗縣遂使方州之志郡國之書遇荆揚之土著皆疑并冀

之流人譜楚越之名區悉改燕秦之郡望喧客奪主以假亂真此則實土之與僑置不可不分者也然而志東晉實土之難也其時全得者不過荆揚及分建之湘江數州他若梁益則李氏僭于前譙縱王于後交廣則李遜踞其始盧循亂其終青徐則地不全屬兗豫則戶已半淪司州雖時置戍卒而僅服于德宗雍州則纔振兵威而卽亡于夏國其蹙境也始于咸和甚于寧康再甚于隆安其拓疆也肇于永和再振于太元大啓于義熙其朝南募北旋有旋亡者雖巧術不能算也至若志僑置之難也僑州至十數僑郡至百僑縣至數百而皆不出荆揚二州之域東海一郡寄治海虞而又移京口汝南諸縣僑留金水而又說塗

中襄垣寓邑並奪蕪湖之舊稱合肥主名乃改汝陰之客
號其他僑而不知所在者尚多輿地之記既不克並徵州
縣之圖亦殊難盡信此則行迷路者多窮而理亂絲者易
紊也矣將謂沈志可據乎而新昌壽昌之縣合作一區軍
平軍安之名不知兩縣壽春重鎮而存沒不著于篇營陽
新建而懷穆互殊其說其他與紀傳舛錯者又時時而有
也又或謂晉書紀傳可據乎而寧境罷州旣顯殊于宋志
漢嘉改郡又互異于蜀書梁水之建亦傳紀之不同武寧
之分乃後先之各出蓋撰述者旣非一輩搜采者又非一
書無怪其虛實並陳始終不照矣暇日以晉書紀傳爲主
詳求沈約輔以魏取外若太康地志元康定戶王隱虞預

臧榮緒謝靈運孫盛干寶諸人所著僅存于今者參之以
酈元李吉甫樂史祝穆之所撰旁搜乎雜錄間采乎方書
凡兩閱歲而成其紀及于山川邑里鄉堡聚落臺殿宮閣
園林冢墓者非特仿馬彪魏収之例亦以自西晉以來陸
機華延儁等數十輩造述今已悉亡其佚說見他書者懼
其復歸淪沒爰爲采掇之悉著于編庶藉羣賢之簡牘成
一代之掌故焉書成藏之篋笥者又十年乃序而付之梓
云爾

十六國畫域志序

十六國畫域志固與東晉畫域相輔而行者也然志十六
國之難則更難于東晉何則其竊據之久者不過數十年

少則止十數年劉曜續開之州郡既迥異于淵聰石虎晚定之山河又大逾于襄國甚者姚萇以馬牧起事故崇鎮堡之勢以敵方州赫連以統萬建基故芟郡縣之名盡歸城主後先錯出彼此互殊縱欲指陳殊難畫一一也近時崔鴻十六國春秋既係明人所輯不足據憑惟太平御覽中所錄尚屬當日舊書而簡畧特甚十止二三晉書載記又非詳核是依據者少二也當時霸史之見于隋唐經籍志者有常璩漢之書十卷舊唐書作蜀李書九卷田融趙書十卷舊唐書作二十卷王度二石傳二卷舊唐書作二十卷不著名又二石偽事二卷舊唐書作六卷范亨燕書二十卷張詮南燕錄五卷王景暉南燕錄六卷遊覽先生南燕書七卷高閭燕志十卷何

冲熙秦書八卷席惠明秦記十一卷姚和都秦紀十卷張
諮涼記八卷舊唐書十卷劉景涼書十卷史喻歸西河記二卷
舊唐書龍譏段龜龍涼記十卷高道讓涼書十卷沮渠國史
涼書十卷無名氏拓跋涼錄十卷劉景敦煌實錄十卷和
苞漢趙記十卷吐谷渾記二卷翟遼書二卷諸國畧記二
卷永嘉後纂年紀二卷段業傳一卷南宋時已漸次散失
是可搜采者盡亡三也卽有附見于晉宋諸書紀傳中者
與載記又多不合如晉書列女傳王廣仕劉聰爲西揚州
刺史而前趙錄等不載有此州桑虞傳石虎青州刺史劉
徵請虞爲長史帶祝阿郡而後趙錄等又不載有此郡四
也又或名號則彼此分建方隅則叛服不常長子屬建興

之郡名乃肇于西燕赫連築骨律之城土早歸于後魏豫州則石趙東晉共治一城壽春則江左苻秦各分要地五也復有逞其胸臆則務廣虛名核彼輿圖則多非事實如石氏建揚州之號僅得一城前燕標荆土之名惟餘數縣夏宋誓書指恒山爲界旣涉張皇慕容郡册援唐國爲稱亦慙假借六也甚有指南爲北革舊標新赫連也以陝地爲荊州乞伏也以瀕川爲益土琅邪之國強號幽燕朔代之區忽標齊服近而易混驟每不詳七也又王彌曹嶷段匹磾慕容永翟遼段業等皆建有國都跨連郡縣雖不別爲作志亦例得附書若非舉要而削繁又慮喧賓而奪主八也又充豫青徐之境空地常多旣不隸于諸方又不歸

于江左若此者其郡縣之空名每以戰爭而附見列爲實
土已無戶口之可稽目以僑邦則又山川之未改此則去
留不可位置尤難九也卽云魏取酈元李吉甫樂史等諸
人所述可以取材矣而靈昌立渡各異其方梁馬名臺互
殊其號魏該一合之塢與晉傳而先殊石家太武之堂在
襄國而疑誤十也乙巳歲客開封節樓燕居多暇因雜取
諸書輯成之距東晉疆域之成不逾二稔其附書山川宮
閣一如東晉志之例他若田融段龜龍等書之僅存者並
一一錄入之非廣異聞亦所以存故事也時中秋後五日
是爲序

與盧學士文弼論束脩書

前坐次閣下言及吾鄉鄒君釋束脩二字以為當從束身
 修飭解心竊疑之今觀臧君鏞堂輯鄭氏論語注二卷內
 間有疏證于自行束脩以上句用後漢書注李賢之說以
 破古義愚以為不然夫一字有本訓有假借有轉訓說文
 束縛也从口木凡經傳束脩束脯及束牲束矢等皆須束
 縛此本訓也因束縛又通為檢束之束故史傳亦言束身
 束心此通借也說文肉部脩脯也从肉攸聲攸部修飾也
 从彡攸聲皆本訓然音雖同而義實迥別公羊莊二十四
 年服脩云乎何休注服脩者脯也服脩取其斷斷自修正
 古人皆取同聲之字相訓故以斷訓服以修訓脩此轉訓
 也然取修正之義以訓脩則可遠改脩脯之字為修正則

不可何則釋名又云脩縮也乾燥而縮也謂肉乾燥則縮
脩縮又音同故取以相訓若脩脯可改爲修正則素縮亦
當同脩脯之義乎周禮凡肉脩之頒賜皆掌之禮記夫人
之贊脯脩前後司農皆訓脩爲脯正義加薑桂鍛治者謂
之脩不加薑桂以鹽乾之者謂之脯散文言之則通以迄
張揖廣雅等無不皆同是脩之明訓見于經傳者又如此
矣鄭氏論語注謂年十五以上者子曰吾十有五而志于
學皇侃疏十五成童之歲識趣堅明鄭氏蓋言始可以執
束脩之禮見于先生長者耳李賢不通義訓于延篤傳注
云束脩束帶修飾劉敞傳注又云束脩謂謹束修潔也今
考束脩二字見于經傳最古者儀禮穀梁檀弓儀禮其以

乘壺酒束脩一犬賜人若獻人則陳酒執脩以將命脩言
執與酒言陳對舉穀梁隱元年傳曰束脩之肉不行竟中
正義束脩之肉者脩脯也謂束脯之肉也檀弓古之大夫
束脩之問不出竟若依李賢之說又當作束帶修飾之肉
與謹束脩潔之問相訓乎且古人一字不虛設況于聖人
若果作束帶修飾則但當云自束脩者行及以上三字皆
爲剩義今有行者明束脩是禮禮須人行故曰行也孔叢
子亦云子思居貧于衛或獻尊酒束脩是又束脩之見于
子者今臧君等據唐人單詞而卽欲破三禮二傳及先後
鄭諸家之詰訓又使聖人之言語字支離可謂銳于立異
矣又後漢書言束脩者亦不一而足伏湛傳曰自行束脩

訖無毀玷延篤傳曰吾自束脩以來劉般傳言束脩至行
爲諸侯師胡廣傳曰使束脩守善有所勸仰蓋亦如古人
所云束髮立名節及史傳所載吾自束髮受書以來及吾
自委贄以來吾自從師以來義實等耳賢注伏湛傳卽云
自行束脩謂年十五以上蓋意以若訓脩爲修飾則下毀
玷句爲贅且自行束帶修飾亦不成語故不同于篤等傳
注耳前坐次語未悉故敢復及之并以質之臧君

與章進士學誠書

承示拙著乾隆府廳州縣圖志每布政司所轄應改爲總
督巡撫始符體制君詳于史例者也用敢畧陳一二焉按
唐分天下爲十道故賈耽有開元十道述厥後李吉甫因

之所著元和郡縣志亦分爲十道惟移隴右道至第十與開元志畧有不同而已宋初分天下爲十二道故樂史太平寰宇志因之後又分天下爲二十三路故王存元豐九域志因之元分爲十三行省明分爲兩京十三布政使司本朝增爲十九布政使司雖俗尚沿元行省之舊稱而實則同明布政司之成例況地志者志九州之土也志九州之土則每方各著守土之官以統之足矣督撫自明成化以後雖已有定員然其名則欽命也其所握則關防也固非可名之爲守土之官者也且漢以刺史統郡守而班固地理志則大書郡名而下注云屬某州不以州名冠郡之上也唐以節度觀察使轄諸州而開元志元和志新舊唐

書地志皆以十道爲率不以每節度每觀察所轄爲準也
宋亦設節度防禦團練等使以轄諸州而二十三路則專
以轉運使所屬爲定轉運使之職與今布政使司無異也
又

本朝

皇輿表一統志皆各書某布政司而不書督撫是又志府
廳州縣者所當效法耳考之于古則班固賈耽李吉甫王
存樂史如彼證之于今則

皇輿表一統志又如此何必別翻新例以紊舊法乎又今
之制總督或轄兩巡撫或轄三巡撫又有有督而無撫有
撫而無督者如君所言將書總督乎書巡撫乎將一一爲

之分釋乎巡撫又或轄一布政或轄兩布政如君所言將
書巡撫復書布政乎抑或止書巡撫乎若一一書之則題
篇不勝其繁若或書督或書撫則稱名又嫌不一則何如
書各布政司之爲得乎且每府沿革之下必首記總督巡
撫及兩司守道駐劄之所是卽班固于每郡下注屬某州
之例新唐書地理志于每道下書采訪使治某州之例也
又今之應鄉試者皆云應某布政使司鄉試不上及巡撫
亦不上及兼轄之總督亦可知一方之官至布政司而無
不統矣不待言督撫也亮吉非憚于改正實例當如此耳
敢更以質之左右

新修鎮遠府志序

貴州一隅前人視爲荆梁南境外荒裔之地是以志方輿
及山水者皆不及焉然郡曰牂柯縣曰且蘭見漢書及桑
欽水經許慎字惜水曰沅水曰無水見班固志地理及酈
元注水經尚非蒙爨諸蠻地所能比也予好爲地理之學
今年冬奉

命視學黔中自常德以南卽沿無水行抵鎮遠見其山水
回互地形高下以爲當去故且蘭不遠迨檢諸地志悉無
與我合者心竊疑之適太守監利蔡君創修鎮遠府志成
舉以示余其條分縷析星羅棋布以爲獨爲其難旣又讀
其夜郎牂柯且蘭等考辨而嘆蔡君之精于地理實有先
獲我心者焉余亦何以序之亦惟舉余之與蔡君合者還

以質之蔡君而已蓋欲知牂柯郡所在必當以故且蘭爲証漢書地理志及續漢郡國志牂柯郡皆首列故且蘭司馬彪云凡縣名先書者郡所治也前漢雖不言牂柯郡治何所亦當治且蘭可知此一証也欲知故且蘭所在又當以沅水爲証地理志故且蘭下班固原注云沅水東北至益陽入江過郡二行三千五百三十里若沿舊志以遵義爲且蘭而以烏江爲牂柯江今考遵義諸水通流他處者凡四湘江洪江仁江則皆注烏江者也烏江則合三江北流入涪水者也與沅水相距甚遠則不得以遵義爲且蘭明矣此二証也漢書西南夷傳始楚威王時使將軍莊躋將兵循江上師古曰緣江而上也是由江入沅由沅入無

可知後漢書西南夷傳則并云遣將莊豪從沅水伐夜郎則語更明顯可証非從涪水矣此三証也水經云沅水出牂柯故且蘭縣爲旁溝水又東至鐔成縣爲沅水東過無陽縣而酈注則云無水出故且蘭南流至無陽故縣又東南入沅爲之無水今考沅水出都勻府城東無水出黃平州都凹山當卽故且蘭所在此四証也常璩華陽國志云楚頃襄王時遣莊蹻伐夜郎軍至且蘭楸船于岸而步戰旣滅夜郎以且蘭有楸船牂柯處乃改其名爲牂柯夫登岸步戰必水道不能通舟故須楸船于此今無水至鎮遠以上卽劣不容舟川行至此必須登陸此五証也又地理志故且蘭下引應劭曰故且蘭侯邑也而西南夷傳云中

郎將郭昌衛廣引兵還行誅隔滇道者且蘭斬首數萬遂
平南夷爲牂柯郡今鎮遠郡實爲入滇要道則且蘭侯故
邑與鎮遠當不遠必不在遵義矣此六証也凡此諸証皆
可以推廣蔡君之說是以畧述焉他若貴州水道之混余
又擬別爲一書以正其譌失俾後之撰方志者有所取裁
當亦蔡君所樂觀其成者歟

卷施閣文甲集卷九

陽湖洪亮吉著

請禮記改用鄭康成注摺子

奏爲敬陳管見恭請

訓定事查貴州本年歲試五經內輸出禮記

臣

按試諸郡

皆於尋常擬題外出題諸生百人中卽有曾讀全經者亦

茫然莫知其解

臣

推詳其故實緣元儒陳澹所撰禮記集

說自前明永樂以來用以取士澹書本爲科舉起見是以

凡遇可備出題者注解畧爲詳明其餘卽謏陋殊甚是以

士子無所遵循伏查十三經正義現列學宮內禮記及儀

禮周禮皆用漢儒鄭康成注最爲詳備誠如我

皇上欽定禮記義疏所云精奧無如鄭注者也且陳澧集說其詳明者皆采取鄭注其簡畧者卽自以意爲刪改是用鄭注則集說之精華已備用集說則昔賢之訓詁半淪近奉到部咨春秋一經奏

定改用三傳凡士子有志讀書者無不歡欣踴躍爭自濯磨臣愚昧之見可否禮記改用鄭注俾諸生通曉全經兼明五禮似于讀書行已皆有裨益未審有當與否伏乞皇上訓示施行爲此謹

奏

邵學士家傳

君諱晉涵字與桐一字二雲先世系出洛陽宋南渡時有

諱忠者爲從官護蹕南下遂著籍餘姚君以禹貢三江其
南江從餘姚入海遂自號南江會祖炳縣學生祖向榮康
熙壬辰會試中式由內閣中書改知縣復改教諭父佳銳
增廣生兩世皆以君貴累贈中憲大夫左春坊左庶子加
二級妣袁氏累贈恭人君贈君之仲子也生有異稟爲教
諭君所鍾愛攜至鎮海學署親課讀焉年四五卽知六義
四聲十二徧通五經十七補縣學附生屢試優等食餼歲
乙酉舉于鄉辛卯舉會試第一人殿試二甲歸部銓選歲
癸巳

詔特開四庫全書館校勘永樂大典時

上方崇獎實學思得如劉向楊雄者任之于是大學士劉

公統勳以君名首薦遂

特旨改庶吉士充纂修官踰年授職編修歲辛亥

御試翰詹君名列二等擢左春坊左中允遷侍講轉補侍
讀歷左庶子翰林院侍講學士

日講起居注官皆兼文淵閣校理歷充

咸安宮總裁

萬壽盛典八旗通志

國史館三通館纂修官又爲

國史館提調官兼掌進擬文字一爲廣西主考官兩充教
習庶吉士覃恩歷加中議大夫此君之所歷職也君體素
羸又兼諸館晨入暮出復以其暇授徒自給執經者嘗林

立以待前後著錄弟子至數百人由是體益不支今年三月感寒疾醫誤投劑遂劇竟以六月二十五日卒于邸第年僅五十有四卒之日語笑如平時人有乞爲志傳未及成者檢篋中稿付次子秉華遂從容就席而瞑可謂神明不亂者矣生平至性過人居教諭君及贈君暨恭人之喪皆哀毀骨立過時猶思慕不置伯兄履涵早卒前一歲君以其未葬特遣子秉恒歸爲營冢穴以是秉恒不及視君含歛性和易與輩流交皆終始如一談古今事雖坐起數十娓娓不倦卒未嘗以所能驕人惟有以非義干者不待語竟卽拂衣起人以是嚴憚之于學無所不窺而尤能推求本原實事求是蓋自元明以來儒者務爲空疎無益之

學六書訓詁屏斥不談于是儒術日晦而游談全興雖閒
有能讀書如楊慎朱謀瑋者非果于自用卽安于作僞立
論往往不足依據迨我

國家之興而樸學始輩出顧處士炎武閻徵君若璩首爲
之倡然窳窳未盡闕也乾隆之初海宇乂平已百餘年鴻
偉傀特之儒接踵而見惠徵君棟戴編修震其學識始足
方駕古人及四庫館之開君與戴君又首膺其選由徒步
入翰林于是海內之士知向學者于惠君則讀其書于君
與戴君則親聞其緒論向之空談性命及從事帖括者始
駸駸然趨實學矣夫伏而在下則雖以惠君之學識不過
門徒數十人止矣及達而在上其單詞隻義卽足以款動

一世之士則今之經學昌明上之自

聖天子啟之下之卽謂出于君與戴君講明切究之力無不可也君子經深三傳爾雅成進士以後未入館以前以宋邢昺疏義蕪淺遂別爲爾雅正義一書亮吉始識君與同客安徽學使者署見君一字未定必反覆講求不歸于至當不止如以九府之梁山爲卽今衡山釋艸纂菟葵爲卽今欵東皆同客時所訂定而亮吉等急歎以爲絕識者也服官後又爲孟子述義穀梁古注韓詩內傳考並足正趙岐范甯及王應麟之失而補其所遺君又病宋史是非失實且久居山陰四明之閒習聞里中諸老先生緒言遂翔爲南都事畧一編君嘗謂人曰南宋諸傳最無理法其

稿創于袁桷桷與史氏中外故于甬東諸人多鄉曲之私
今讀南宋諸雜史及桷清容集君說信然熟精前明掌故
每語一事輒亟稱劉先生宗周黃處士宗羲蓋君史學所
本而又心儀其人欲取以爲法者也外又有方輿金石編
目

皇朝大臣謚法錄輶軒日紀南江文稿南江詩稿等若奉
命校祕閣書如薛居正五代史等皆君一手勘定分校石
經君職春秋三傳所正字體亦校他經獨多生平爲文操
筆立就有大述作成出君手其沖和淵懿奧衍奇古則又
君之學爲之也君子

國史當有專傳今公子秉恒秉華等以亮吉尙足知君乞

先爲家傳以綴君行事亮吉與君交幾三十年于詞館爲後進凡值校讐之役如

國史石經等亦無不與君偕卽集中唱酬之作亦惟亮吉爲多用是不敢辭而爲之條繫如左俾他日志經籍傳儒林者有所採擇焉

分江水考

漢書地理志丹陽郡石城縣下原注分江水首受江東至

餘姚入海

桑欽水經同

會稽郡吳縣下原注南江在南東入海

常疑分江水與南江截然爲二今細校水經注沔水下道

元稱地理志云江水自石城東入爲貴口東逕石城縣北

東合大溪溪水首受江北逕其縣故城東又北入南江南

江又東逕宣城之臨城縣南考臨城廢縣在今青陽縣南
五里是分江水至石城縣境外已與南江合矣下又云南
江又東逕寧國縣南又東逕故鄣縣南安吉縣北則今之
寧國縣及建平廣德安吉孝豐諸地也下又云南江又東
北爲長瀆歷湖口南江東注于巨區是又分江水與南江
合後並入太湖矣許慎說文云江水東至會稽山陰爲浙
江晉灼亦同道元亦云江水又東逕餘姚縣故城南縣西去會
稽百四十里因句餘山以名縣山在餘姚之南句章之北
也江水又東注于海前人每致疑岷江不能至餘姚入海
者不過以中隔浙江故耳今考水經漸江水下道元云臨
平湖上通浦陽江下注浙江名曰東江行旅所從以出浙

江也又引闕駟十三州記云江水至會稽與浙江合浙江自臨平湖南通浦陽江又于餘暨東合浦陽江自秦望分派東至餘姚縣又爲江也則語更明晰蓋南江實合具區臨平湖浦陽江三大水始入海班固云南江在吳縣南東入海東之一字所該者廣不必泥言在吳縣境入海也韋昭漢末鉅儒其注國語亦以松江浙江浦陽江爲三江蓋此三江實岷江之下流岷江合之方可入海惟班固桑欽皆漢和帝以前人並云江至餘姚入海至許慎晉灼卽止云江至山陰爲浙江不更及餘姚者餘姚在蕭山之正東山陰之東北山陰圖經鑑湖初本通潮汐漢永和五年太守馬臻始環湖築塘瀦水溉田至九千餘頃疑南江水自

築塘後已不能直抵餘姚故許慎等言又與班固異耳宋

葉夢得避暑錄尚知今錢唐江乃北江之下流則亦一顯

証矣惟北宇當改作南總之以今道里計之分江水合南江後由

今貴池古石城青陽古臨城銅陵古春穀寧國宣城皆古宛陵建平廣

德安吉孝豐皆古故鄣烏程武康皆古烏程餘杭漢舊縣仁和古錢唐所分

蕭山古餘暨山陰漢舊縣餘姚漢舊縣諸州縣方入海其所逕之

大水則太湖臨平湖浦陽江也班固云過郡二者丹陽會

稽云行千二百里者今自池州府至紹興餘姚縣約計千

里古里數短故云千二百里也

惠定宇先生後漢書訓纂序

惠定宇先生以經學名東南其所著九經古義易漢學明

堂大道錄等精博有過闕顧諸君余昨著左傳詁一書采
先生之說爲多今又得讀後漢書訓纂而知先生之史學
亦非近時所能及也此書皆先生采綴衆家凡有異同增
損皆摘錄入卷中其門下再傳弟子朱邦衡爲之繕寫補
綴彙爲一編仍有簽識某書某卷未經錄入者吾友桂進
士未谷復爲補成之定本旣出適吳念湖司馬入都爰力
任剞劂之事瀕行復索序于余時司馬刊閻百詩古文尚
書疏證甫竟復能以餘力校刊此書公諸同好是亦今之
汲古主人矣余嘗慨世之讀史者類多耳食每以謝承諸
人所撰後漢書爲過于范史嘗細校之而後知蔚宗去取
之精決擇之慎有非諸家所可同日語者就諸家之中謝

承最有名又最先出而其紕繆已非一端可竟又况華嶠
袁山松謝沉薛瑩諸人年代較遠者乎試舉一二端言之
范史周嘉傳高祖父燕曰我平王之後正公元孫李賢注
引謝承書曰燕字少卿其先出自周平王之後漢興紹嗣
封爲正公食采于女墳今攷武帝紀元鼎四年行幸滎陽
還至洛陽詔曰瞻望河洛巡省豫州觀于周室邈而無祀
詢問諸耆老乃得孽子嘉其封嘉爲周子南君以奉周祀
至元帝初元五年又以周子南君爲周承休侯成帝綏和
中始進爵爲公安得有漢興卽嗣封正公之事如謂漢興
二字卽指綏和以後而言則燕在宣帝時下距此尚遠又
汝陰縣王莽時改名汝墳漢興安得有汝墳縣承蓋因燕

正公之言附會而成不知燕所云正公蓋戰國末東西周皆降稱公燕是其裔故云然耳厥後唐杜牧爲周墀墓志及新唐書宰相世系表皆云漢興周仁封汝墳侯表更言賜號正公皆沿承誤而更爲之說者又三國志陶謙傳廣陵太守琅邪趙昱徐方名士也裴松之注引承書曰昱遷廣陵太守賊笮融從臨淮見討迸入郡界昱將兵拒戰敗績見害今考陶謙傳融走廣陵太守趙昱待以賓禮融利廣陵資貨遂乘酒酣殺昱放兵大掠陳壽吳志劉繇傳及司馬光通鑑等並同則所謂拒戰見害之事非矣承又云謙初辟昱別駕從事辭疾退避謙重令揚州從事會稽吳範宣旨云云考謙傳謙未嘗兼領揚州一也吳志吳範傳

舉有道詣京都世亂不行至孫權起東南範始委身服事是範亦未嘗爲揚州從事二也且謙本以融爲下邳相督廣陵彭城下邳糧運及曹操擊破謙徐土不安融乃將男女萬口走廣陵則融之走廣陵實由下邳東下道不出臨淮三也他如范史隗囂傳更始執金吾鄧曄注引承書曄南陽南鄉人前漢旣無南鄉之名又胡廣傳注引承書李咸以靈帝建寧三年自大鴻臚爲太尉今考靈帝紀咸爲大尉在四年由太僕亦非大鴻臚是承書于邑里官爵皆率意妄書不求其實其他之好爲異說以貽悞後人者又比比也今先生所纂于十六家後漢書皆條采之而不專主其說間爲舉正其誤又可云先獲我心者矣余于後漢

書中又嘗有蓄疑數十事及後校刊他書而忽覺冰釋者亦不妨畧舉一二焉安帝紀永初元年及元初元年皆三月癸酉日食上已有三月己卯日南地折一條與續漢書五行志所紀同逆推至此年正月甲子則己卯日定在三月唯己卯後同月不得更有癸酉日況三月二字又屬複書且是年冬十月戊子朔日有食之自太初定歷後至此一歲亦不容有兩日食及以五行志細勘乃知此條專屬永初元年三月事范史冒昧又複述于此也又王允傳傳言關中人相謂曰丁彥思蔡伯喈但以董公親厚並尚從坐彥思不知何人陳范二史于卓傳亦不錄及後偶閱裴松之注引漢獻帝起居注云尚書丁宮附會卓廢立云云

而始知彥思者當卽丁宮無疑也至唐李賢注後漢書本
集衆手成之往往得失互見卽如第四十九卷張衡傳七
十九卷南匈奴傳最爲鄙謬則以分注之人較劣又卷帙
獨長注後復不加檢勘故耳然則排纂諸書以爲一書折
衷其是如訓纂者又曷可少乎按梁書王規傳規集後漢
書異同注續漢書二百卷劉昭傳昭集後漢同異以注范
書共一百八十卷唐志劉熙注范蔚宗書亦一百二十二
卷竊謂當梁陳時衆家之書俱在故三家所注卷帙繁衍
若此今先生獨能于殘闕之餘網羅散失雖僅得若干卷
而其難有十倍于王劉者當不獨欽先生之學識并可以
鑒先生之苦心矣余近又嘗以水經注校范書及續志增

益二十餘事以前漢書三國志宋書校范書續志舉正亦不下數十事他日當質之吳桂二君或可附先生之書以行也時嘉慶元年歲在丙辰夏至後五日

敕授登仕郎晉贈武德騎尉卹授雲騎尉世職湖北呂堰驛巡檢王君神道表

乾隆六十年十二月余視學貴州還京以小除日抵湖北之呂堰曛黑中有迎拜馬首者余起驚詢則吾友王君芑孫之弟呂堰驛巡檢王翼孫旣抵館揖之入其所言皆民間疾苦與差務絡驛貌憔悴而公服破壞余悚然異之已復出其寄兄芑孫之書與一文檣余愍其宦貧出囊中金持贈以別行數驛作書與湖北大吏言君之賢大吏復書

云君躑直屢忤上官上官及其同官無悅之者余又爲爽
然不懌者久之越五月得芑孫書則君以禦賊不屈死矣
方嘉慶元年正月湖北逆民猝起于是鄖陽荊州宜昌施
南諸府州縣所在如蝟毛襄陽府屬南漳等縣亦相應和
旋起呂堰當南北之衝無城郭可守君日夜焦灼屢啟上
官求擘畫皆不報君不得已自起行村鎮爲畫守禦策時
縣中官吏捕邪教嚴株及里黨一方囂然具擔索欲移徙
君急慰止之揭榜曉示俾耕種如常會賊已起襄陽之黃
龍瑞君預立備賊章程八條一凡鄉勇十名設頭目一人
頭目十人設總頭目各相轄而統于巡檢司一附近小村
口戶單弱悉遷呂堰鎮一鄉勇能自食者聽其無食之人

爲設飯廠立糧餉總頭目司其事他若擅自遷徙及飲酒
賭博皆有厲禁部署甫定賊大至攻呂堰三月廿九日君
出迎擊禽賊目劉方達劉漢德陳起蛟三人縛斬驛前又
自作官文書詣當事告急然賊勢益盛君所部寡弱度不
可守乃作書別父兄付弓兵劉祿持去且便取巡檢司印
上府又令從人徐升開道行而身上大橋罵賊頃之復令
小吏廖之義趨劉祿之義走未數步見賊已過橋有數賊
方環視橋下之義意君已投河死遂跳免比賊退之義還
見橋下沙壓露衣乃君迎擊賊時所著繼襄陽御府跡徐
升至辨認亦如之義言八月某日賊再陷呂堰羅兵者從
賊手獲君巡檢司印賊目俞宗武自言親殺驛官且言驛

官從橋上獨身接戰連刃數人旣中矛創甚自投于水賊衆憤鉤出之并褫其衣刀槩叢集猶罵不絕口乃死君死節事至是乃大白然前此或傳君已死或以爲未死而余則斷斷然必君之死蓋立談數刻而見君之性定也自君死賊過呂堰無不顛敗若有躡之者輒驚曰此巡檢君之靈爲立廟羅拜乃去或曰君遺骸亦賊所營葬則君族弟仲光至呂堰訪問所得也事聞有

旨入昭忠祠依縣丞例議卹又視四品以下世襲雲騎尉襲次完更襲恩騎尉罔替

朝廷所以報死節之臣可云厚矣嗚呼君一巡檢耳慮事之周臨命之定如此然則大吏守

天子封疆而數百驟起烏合未定之賊任其往來豕突化
爲萬千蔓延無已以致傷我實心任事之吏與守死不去
之民及事已過或又以輕敵僨事之咎委之則平日以君
爲戇以君爲忤上官者宜也又吾聞湖北之宜昌四川之
達州逆民起事之始皆因州縣逼迫藉此逃死而君以一
巡檢獨善拊循其民無事則勸之耕桑有事則偕爲守禦
至危苦萬狀而民卒不忍舍去迨君死而一鎮之民死于
賊死于路死于饑寒者亦遂無噍類嗚乎君可謂賢也已
且大吏不能禦賊而巡檢禦賊大吏能遷延避賊而巡檢
獨當賊之衝日夜殺賊奮不顧身乃力竭而爲賊所殺此
苛節也亦僅事也余爲

天子史臣而不能傳奇節志僅事則不稱職是懼故因君
兄芑孫之請而爲直書之以揭諸其墓又幸余之尚及識
君并尚能斷君之必死也若君平日行事以迄世系生卒
歲月詳秦兵備瀛與君兄芑孫所爲行實及狀中不更贅

呂太淑人墓表

太淑人吳氏明太傅大學士謚文端諱宗達五世孫父文
學諱宏母王氏太淑人爲文學君次女性至孝嘗以父疾
侍湯藥不解衣履者累月年二十二歸于奉政君時奉政
君父方司訓泰州舉家隨任太淑人述子婦職惟謹司訓
亟稱之曰名家女能嫻禮法不易得也嗣司訓以老告歸
家僅四壁立太淑人所以奉養之者備至顧自食不厭糠

數族黨賢之奉政君以乾隆壬申舉京兆試甲戌成進士是時太淑人在家延師課子爾昌爾益爾熾饋食豐潔鄰里不知其家之窘也歲丁丑奉政君以前教習期滿揀發山西以知縣用旋補萬全調任安邑太淑人始率諸子之官署自奉一如在家時勸奉政君節廉俸所入饋遺族鄰又爲族鄰之無力者擇地營葬至十數棺有族子幼失父母太淑人攜至署飲食訓誨一如所生長以己姪歸之歲丙戌奉政君擢張蘭同知時長君爾昌已成進士授刑部主事未幾奉政君以事去官偕太淑人就養京邸無何奉政君邁末疾卒太淑人之辛勤醫藥黽勉喪葬與前之奉司訓君者無以異歲丁酉爾昌以刑部郎中出守濟南歷

濟東泰武臨兵備道擢安徽按察使太淑人皆就養官解
雖爾昌之所以奉母者無不至然太淑人時時以盛滿爲
憂遇讞獄必問有所平反有輒色喜先是爾昌之官山左
也巡撫某公曾同官刑部以是知爾昌才相待出諸屬吏
上太淑人獨憂之每密戒爾昌曰某公非廉謹者又情性
不常他日汝必爲所累後爾昌稍欲自遠而大府已怒假
讞案不實奏請鐫秩矣及移官安徽而某公果以賄敗爾
昌亦被累遣戍出關半道遽卒太淑人處之裕如謂家人
曰吾固知有今日久矣嗚乎太淑人處閨閣中而深識遠
見固如此以視此大案中數監司大吏爲所株連至駢首
而不悟者太淑人之識不已出尋常萬萬哉人常謂古今

人不相及若太淑人者與漢之東海嚴母又何以異太淑人歸處家事益井井幼子爾禧以癸卯舉京兆試旋以四庫全書館謄錄議叙知縣發浙江而仲子爾益亦以副貢生歷官雲南廣西直隸州州判太淑人以地近就養浙江所以戒爾禧者益嚴以是爾禧宰桐鄉調署仁和皆有聲由太淑人之教也桐鄉獄囚每爲禁卒所苦多有瘐死者太淑人則命爾禧時時恤視并以私錢給發寒暑衣及病者醫藥全活甚衆無何爾益爾禧相繼卒于官太淑人復歸里第居常對親串雖時爲達觀語然神爲之戚矣時惟第四子爾喆在爾喆幼不良于行以疾故尤愛憐之爾喆復多病太淑人每蹙然曰強壯者盡死吾猶冀孱弱者可

以送老也及太淑人之卒而爾喆已先一月死太淑人之不起亦半由追悼諸子云太淑人體素豐望之如立玉生平所爲皆有士大夫節槩遇事持大體與人言必懇誠有過亦必盡言規之無少回護待下嚴而有恩撻婢妾數未嘗過四五有士族女淪于臧獲太淑人聞之急出貲贖歸爲擇良耦婢女年及笄父母或不能輸直輒挾券聽令遣嫁其厚德又如此太淑人以嘉慶三年十月初八日卒臨時無甚疾苦若解脫者距生康熙五十四年壽八十四屢受

覃恩累封至太淑人子五人爾昌爾益爾熾爾喆爾熿皆前卒女二人均適仕族孫六人子瑗子璵子琴子環子珪

子班子瑗以副貢生官山西平定直隸州州判子班以太
淑人歿後舉京兆試餘皆讀書有聲子瑗將以今年四月
杲日合葬太淑人于奉政君之阡求所以傳太淑人者屬
之亮吉亮吉幼及見奉政君及中歲客西安爾昌之出關
也送之于渭橋繼又識爾疇于杭州爾益爾喆又皆與亮
吉有連以是知太淑人詳爰不辭而爲墓道之表云

伯益考上

此係幼時所作適從故麓中檢出因附刊于此

余讀劉向列女傳翠子生五歲而佐禹曹大家注云皋陶
之子伯益也益信皋陶沒禹封其次子仲甄於蓼以奉先
祀蓋長卽伯益次仲甄也伯不封仲封者明伯時佐禹不
外封也伯非益則禹越次而立仲舛也或曰伯益寶帝高

考方居三巨集考ノ

十五

陽第二子水經注偃師九山有百蟲將軍顯靈碑云將軍姓伊氏諱益字隤帝高陽第二子曰既

帝高陽第二子則齒帝嚳弟也皇甫謐曰帝嚳生三十五

年立立七十年嚳死而摯代之又九年禪堯堯立亦七十

年合舜攝為九十八年舜立三十九年禪禹禹距啟又十

七年啟之立益無恙也則益之歲二百三十餘也況春秋

緯命歷序顯頊傳九世帝嚳傳八世則世數益不可攷矣

而曰帝高陽子者非也或曰益既非出高陽出皋陶矣聞

益之後為秦則皋陶宜有後于秦也臧文仲聞六蓼滅曰

皋陶庭堅不祀何也曰秦之祖伯翳非伯益也伯翳大業

子使翳即伯益則皋陶名庭堅又名大業矣列子曰夷堅

聞而誌之服虔注夷堅即庭堅則又名夷堅矣一人四名

非古也史記陳杞世家云伯翳之後封爲秦垂益夔龍後
不知所封劉歆進山海表亦云伯翳與益主驅禽獸崔靈
恩云秦虞夏商時已爲諸侯則秦之出爲伯翳非伯益明
矣益之後旣不見而六蓼又滅故重歎不祀也曰唐祖皋
陶祖伯益是乎曰祖皋陶是也祖伯益非也英舒李六四
姓仲甄之後也祖皋陶不得祖伯益也然則列女傳亦盡
可信乎曰亦非也曰五歲贊禹者亦鬻子帝顓頊年十五
佐黃帝帝嚳年十五佐顓頊之論也且五歲贊禹則舜舉
益之日益尚無歲也虞廷之臣稷不先益若稷爲帝嚳子
則放勳殂落之日稷齒亦近百矣而益以五歲出其上背
也曰列女傳亦不信乎曰其以伯益爲皋陶子信也曰五

歲贊禹者誣也其他書可引若高誘注呂氏春秋及鄭氏詩譜陸德明音義等本朝閻璩百詩已言之不贅

伯益考下

余既辯伯益爲皋陶子矣聞取新唐書讀之其在宗室世系表者曰李氏出自嬴姓帝顓頊生大業大業生女華女華生皋陶皋陶生伯益其在宰相世系表者曰顓頊裔孫大業大業生女華女華生大費大費生皋陶皋陶生伯益曰余得以新唐書之誤而證經史志三書之誤矣按秦本紀大業娶少典之子曰女華則女華者大業妻也今誤以爲子且于皋陶土增減世代則新唐書之誤不必言矣孔穎達詩正義曰皋陶大業一人也若據宗室表則皋陶去

大業二世矣據宰相表則皋陶去大業又三世矣而曰一人者則孔穎達誤也秦本紀云大費佐舜調馴鳥獸是爲栢翳則栢翳名大費唐書謂大費生皋陶者也而索隱曰卽尚書伯益以三名屬一人以三世爲一世者則索隱誤也地理志云嬴伯益之後鄭語云秦栢翳之後因鄭語而誤者則地理志亦非也夫五帝之世次原不可考矣若必就諸家之說而以年代世數斷之則顓頊之下大業之上當以史記爲斷而唐書宗室表宰相表其說盡非大業以下皋陶以上當以唐書爲斷而史記及孔穎達諸說盡非皋陶以下以及伯益之所出則當以呂氏春秋及劉向列女傳爲斷而史記索隱以及地理志水經注諸說盡非如

此而古人或可不受誣于後世乎

免友情三正集卷ノ

受業呂譚正培校字

卷施閣文甲集卷第十

陽湖洪亮吉著

征邪教疏

戊午二月廿七大考題

今者楚蜀之民聚徒劫衆陸梁一隅逃死晷刻始則惑于
白蓮天主八卦等教欲以祈福繼因受地方官挾制萬端
又以黔省苗氛不靖派及數省賦外加賦橫求無藝忿不
思患欲借起事以避禍邪教起事之由如此然臣以爲邪
教實不足平也何則伊古以來焚香聚徒歛米入教如漢
之張魯張角晉之孫恩盧循六朝及唐川蜀之米賊宋之
儂知高明之劉六劉七趙風子徐鴻儒唐賽兒等類皆起
于中葉以後政治畧弛之時然尚皆不旋踵卽撲滅若我

朝

聖聖相承振綱飭紀每有賑卹皆不屑百萬帑金視民如傷愛衆若子此不特中外知之陷人邪教者知之卽爲邪教之首者亦知之故臨陣撐拒必言受地方官重害以致背

皇上大德試思此等皆身罹叛逆萬死不足贖之人而天良不昧尚如此臣故云邪教不足平也臣今敢有請者以

爲脅從宜貸也邪教入一村則燒一村入一鎮則燒一鎮以脅良民爲賊耳邪教旣退州縣官又利其燒燼所餘屏民使不得歸于是良民始不得不從賊邪教滋擾數省首尾三年燒村鎮愈多則無身家衣食之民附麗之者愈衆

邪教又不甚愛惜每行必驅之使前或抑之在後以抵官兵故諸臣所入告云殺數千人數百人者卽此無業之流民非真邪教也非真賊也且此曹每州縣動輒以萬計可盡殺乎卽可盡殺亦非

皇上如天之仁所忍出此也故臣以爲脅從宜貸一則開

愚民之自新一則離邪教之黨羽黨羽一散真賊乃出從此官兵刀箭鎗砲之所傷乃真邪教也乃真賊也一則吏治宜肅也今日州縣之惡百倍于十年二十年以前上敢

噫

天子之法下敢竭百姓之資以臣所聞湖北之宜昌四川之達州雖稍有邪教然民皆保身家戀妻子不敢犯法也

州縣官既不能消靡化導于前及事有萌蘖卽借邪教之名把持之誅求之不逼至于爲賊不止臣請凡邪教所起之地必究其激變與否與起釁之由而分別懲治之或以爲事當從緩然此輩實不可一日姑容明示創懲旣可舒萬姓之冤亦可塞邪民之口蓋今日州縣其罪有三凡朝廷捐賑撫卹之項中飽于有司皆聲言填補虧空是上恩不下逮一也無事則蝕糧冒餉有事則避罪就功州縣以蒙其府道府道以蒙其督撫甚至督撫卽以蒙皇上是使下情不上達二也有功則長隨幕友皆得冒之失事則掩取遷流顛踣于道之良民以塞責然此實不止州縣封疆之大吏統率之將弁皆公然行之安怪州縣之

效尤乎三也一則責成宜專也楚撫守楚豫撫守豫陝撫守陝戰雖不足守必有餘卽以陝西言之武關潼關蒲關東面之三門也大震關大散關駱谷關西面之三門也其地皆重巖極險使預爲之備先使百人守之賊何以能入武關何以能進劍閣又何以能復入鷄頭趨褒斜東西蹂躪數千里如入無人之境此非封疆大吏不知地利不知形勢不先事預防之失乎夫

朝廷之馭天下不過賞罰二端前者平金川平緬甸所以能卽日告功者賞罰嚴明賞必待有功罰不避勳貴故也今行軍數年花翎之

錫至千百而賊勢愈熾蹂躪之地方愈多則功果安在乎

將弁之棄營汎棄鎮堡常與賊鋒相避者大吏又務爲掩飾則咎果誰任乎況不功而使無功者受其賞則有功者解體有罪而使無罪者代其罰則有罪者益恣故臣以爲今日之事

朝廷則賞必當罰必行親民之吏則各矢天良封疆之臣則各守地界削上下欺蒙之弊除彼此推諉之情如是而邪教不平臣不信也臣謹疏

與錢少詹論地理書一

秦分天下爲三十六郡其目見裴駟史記集解而晉書地理志因之嘗以爲不然今考之愈知其妄漢書地理志本秦京師爲內史分天下作三十六郡小顏注云京畿所統

特號內史言其在內以別于諸郡守也是三十六郡內本無內史而以數不足強牽合之此則裴駙之妄矣宋劉攽又謂秦三十六郡無鄣郡今考地理志丹陽郡下班注云故鄣郡而劉顯注司馬彪郡國志則明言丹陽郡卽秦鄣郡且于故鄣縣下注秦鄣郡所治以迄圖經吳地志等無不然而以爲秦無鄣郡則劉攽之妄矣至閣下以爲楚漢之際所置此約畧之詞亦嫌無明據也亮吉以爲秦三十六郡當以史記漢書地理志爲證蓋與其信裴駙不若信馬遷班固應劭諸人之說爲是也今細校地理志秦郡自河東至長沙共三十四郡皆見於班固原注中

河東太原上黨三川

東郡潁川南郡九江泗水鉅鹿齊郡琅邪會稽鄣郡漢中蜀郡巴郡隴西北地上郡九原雲中雁門代郡上谷漁陽

右北平遼西遼東郡 他若黔中郡見史記楚世家 郟郡見

漢書高祖本紀及地理志 東海郡下應 而魏收地形志亦

云郟郡秦置漢高改為東海郡御覽引十道紀海州東海

郡秦為薛郡地後分薛郡為郟 水經注始皇二十三年置

十六年并天 漢改郟為東海郡 水經注沂水下郟故國也

下之後也 年更從今名 郟郡由薛郡所分故高祖本紀亦薛郡郟郡

連書蓋薛郡入漢為魯國郟郡入漢為東海郡細核地理

志自明是則秦有郟郡之明證而前人考秦三十六郡皆

未言及何也至閣下又以桂林南海象郡為即在三十六

郡內則益不敢為然蓋秦分三十六郡在始皇二十六年

而桂林等三郡之置則在三十二年相距尚八年必不預

爲計及明矣又旣數及桂林等三郡則閩中一郡置又在

三郡之前不宜反漏

史記閩粵王傳秦并天下以其地爲閩中郡按秦并天下在二十六年是

閩中郡之置尚在桂林等三郡之先

若統行數入卽除內史及鄣郟二郡不

計外亦與三十六之數不符恐卽如閣下言亦當慮前後失據耳況秦制天下爲四十郡除內史外其名皆見于史記漢書故唐以前地志皆遵用之又非可意爲增減裴駟之過惟以內史足三十六之數而不知有郟郡閣下則又欲并四十郡爲三十六郡遂不得不引劉攽之邪說旣又知其不安則以爲置在楚漢之際且又并閩中郡削之以附會當日成數亮吉恐皆不足以傳信而啟後人之惑也用敢論及之

與錢少詹論地理書二

來示又云據宋志南梁郡之睢陽縣卽漢晉之壽春縣疑
太元收復以後卽僑立南梁郡不更立淮南郡又避鄭太
后名不立壽春縣卽以睢陽當之云云今考沈志義熙十
三年宋高祖以義慶爲豫州刺史鎮壽陽元熙元年義康
督豫幽司并四州諸軍事亦鎮壽陽劉敬宣傳遣使特節
督馬頭淮西諸郡軍事鎮蠻護軍淮南安豐二郡太守梁
國內史事在義熙五年又劉湛傳高祖以義康爲豫州刺
史留鎮壽陽以湛爲長史梁郡太守劉粹傳亦言以豫州
刺史領梁郡鎮壽陽此梁郡卽南梁郡是晉末淮南南梁
二太守並立兼有壽陽縣之證也近又得一顯據云隋書

州郡志淮南郡壽春縣下云舊有淮南梁郡北譙汝陰等郡則晉末二郡並置益可知杜佑李吉甫等云東晉時以鄭太后諱改壽春爲壽陽倘竟省壽春則又無容改矣又舊圖經云合肥縣古滁陽城東晉于此置南梁郡是南梁郡又在滁陽不在壽春今考滁陽城在合肥縣東北壽州在其西相拒不遠以其近故豫州刺史常兼領梁郡也尋閣下致疑之由當因宋書州郡志孝武大明六年廢南梁郡屬南豫改名淮南睢陽令亦于是年改名壽春以此疑晉無淮南郡及壽春縣耳不知二郡之合實在宋永初以後于晉無預也

與錢少詹論地理書三

史記曹相國世家柱天侯反于衍氏小司馬本作天柱侯
又引廬江潛縣之天柱以實之閣下又信其說而登之于
考異不知非也無論史記漢書皆作柱天小司馬求其地
而不得遂倒轉作天柱已屬曲說一也漢書地理志廬江
潛縣班固原注天柱山在南劉昭注郡國志亦同是天柱
山名而非地名秦漢之世侯國未有以山封者二也又衍
氏魏邑與廬江之潛相去甚遠三也蓋云柱天者不過夸
大其詞言若天之有柱耳實非地名也後漢書齊武王演
傳自稱柱天都尉柱天大將軍賈綜傳交趾兵自稱柱天
將軍卽同此意豈南陽郡及交趾又有天柱山得以曲爲
之說乎小司馬之妄往往有名號侯而必欲求其地以實

之卽如高祖功臣亦有始終名號侯不別封邑者如信武侯靳歙位次最高在第二而封非實邑是矣周緤傳亦爲信武侯小顏注云以其忠信故加此號緤後更封鄴城侯則與歙異矣又考歙爲信武侯食四千六百戶蓋皆以名號侯食實邑制當與後來關內侯等相仿小司馬不知而云地理志無信武縣當是後廢豈非曲說乎至蔡邕傳出補河平長閣下以爲郡國志無河平縣今考兩漢河南郡皆有平縣疑此河字下脫一南字又陳寔傳除太丘長李賢注屬沛國按漢書地理志沛郡無太丘縣惟敬丘下應邵曰春秋遇于犬丘明帝更名犬丘下犬字應作太傳寫、誤在上耳水經注淮水又東逕太丘縣故城北班固地

理志曰故敬丘也然則犬丘卽敬丘而閣下復欲以瑕丘當之似亦微誤也

候選縣丞附監生黃君行狀

祖高淳縣學訓導大樂

父縣學生之揆

乾隆四十八年歲在癸卯黃君景仁以療疾卒於解州臨終以書貽友人洪亮吉于西安俾經紀其喪亮吉發書卽行以五月十六日臨君殯于解州之運城亮吉知君最詳塗次撰君行事狀以乞志傳并使後之傳文苑者有述焉君諱景仁字漢鏞一字仲則系出宋祕書丞庭堅自宋南渡時由鄱陽遷武進遂爲武進人祖大樂以歲貢生官高

淳縣學訓導父之掞禱子學宮神祠而生君故小名高生
君數歲卽孤伯兄又繼卒訓導君撫以成立性不耽讀而
所受業倍常童年八九歲試使爲制舉文援筆立就學使
者歲科二試吾鄉應童子試者至三千人君出卽冠其軍
前常州府知府潘君恂武進縣知縣王君祖肅尤奇賞之
君美風儀立儔人中望之若鶴慕與交者爭趨就君君或
上視不顧于是見者以爲偉器或以爲狂生弗測也君守
訓導君訓未嘗學爲詩歲丙戌亮吉亦就童子試至江陰
遇君于逆旅中亮吉攜母孺人所授漢魏樂府鈔本暇輒
朱墨其上閒有擬作君見而嗜之約共效其體日數篇逾
月君所詣出亮吉上遂訂交焉及常熟邵先生齊燾主常

州書院亮吉及君皆從游君學益大進君爲諸生家甚貧
不願授徒值潘君恂王君祖肅遷官杭歛君遂歷訪之歸
必得詩數百篇後復攜邵先生書客湖南按察使王君太
岳署中是時君已攬九華陟匡廬泛彭蠡歷洞庭每獨遊
名山經日不出值大風雨或瞑坐崖樹下牧豎見者以爲
異人自湖南歸詩益奇肆見者以爲謫仙人復出也後始
稍稍變其體爲王李高岑爲宋元祐諸君子又爲楊誠齋
卒其所詣與青蓮最近歲辛卯大興朱先生筠奉

命督安徽學政延亮吉及君子幕中先生賓客甚盛越歲
三月上巳爲會於采石之太白樓賦詩者十數人君年最
少著白袷立日影中頤刻數百言徧視坐客咸輟筆

時八府士子以詞賦就試當塗聞學使者高會畢集樓下至是咸從奚童乞白袷少年詩競寫一日紙貴焉君日中閱試卷夜爲詩至漏盡不止每得一篇輒就榻呼亮吉起誇視之以是亮吉亦一夕數起或達曉不寐而君不倦居半歲與同事者議不合徑出使院質衣買輕舟訪秀水鄭先生虎文于徽州越日追之已不及矣其標格如此君自知年命不永嘗共赴弔邵先生于常熟夕登虞山遊仲雍祠北望先生墓慨然久之曰知我者死矣脫不幸我先若死若爲我梓遺集如玉芝堂乎玉芝堂者王君太岳爲邵先生所刊詩文集名也亮吉以君語不倫不之應君就便藝神祠香要亮吉必諾乃已故平生于功名不甚置念獨

恨其詩無幽并豪士氣嘗蓄意欲遊京師至歲乙未乃行
亮吉亦以貢入都值母孺人疾中止君自京師貽亮吉書
曰人言長安居不易者誤也若急爲我營畫老母及家累
來俾就近奉養不至累若矣亮吉時奉母孺人憂家居發
其書資無所出君向有田半頃屋三椽因并質之得金三
鎰俾君之戚護君母北行後二年而亮吉遊京師君果以
家室累大困亮吉復爲營歸資俾君婦及子奉君母先回
而君已積勞成疾矣又二年亮吉遊西安君繼至今陝西
巡撫畢公沅奇君才厚資之遂以乾隆四十一年

上東巡召試二等在

武英殿書籤例得主簿入資爲縣丞銓有日矣爲債家所

追復抱病逾太行出雁門將復遊陝次解州病殆遂卒于
今河東鹽運使沈君業富運城官署距生乾隆十四年年
三十有五君性不廣與人交落落難合以是始之慕與交
者後皆稍稍避君君亦不置意獨與亮吉交十八年亮吉
屢以事規君君雖不之善而亦不之絕臨終以老親弱子
拳拳見屬君之意殆以亮吉爲可友乎此或君之明而亮
吉亦有不欲辭者矣君年甫壯歲蹤跡所至九州歷其八
五岳登其一望其三及歿而出篋中詩篇幅完善者至二
千首是可傳矣君之喪沈君經卹之甚至巡撫畢公暨今
陝西按察使王君昶等亦厚賻之皆俾亮吉挾之歸以奉
君之親以撫君之孤以無貽君九泉之戚畢公又將梓君

詩以行蓋數公者於君皆始終禮愛之爲近今所難及亦君之才有以致之也君娶于趙氏生一子二女子年十三女長年十六次年五歲五月二十六日行次宜陽友人洪亮吉謹狀

包文學家傳

先生諱士曾字省三一字心山宋忠義武進縣知縣諱圭十八世孫世居武進之橫山雍正閒割縣東爲陽湖縣今爲陽湖人先生少開敏有大志學務該博不名一家居恒諷誦不輟寒則納履束藁中至夜分不寢歲壬戌補博士弟子員有聲庠序閒顧七試皆報罷遂專力詩古文辭時長洲沈尚書德潛方以詩名吳下從之遊者類皆研摩格

律剽取聲調以求合于唐開元天寶諸鉅公而貌合神離
千首一律其弊至以前人名作竄易數字冒爲已有者先
生雖爲尚書所激賞而意趣不同嘗與同輩論詩曰詩爲
心聲吾之詩必肖吾之心然後可若轉而求肖古人縱極
天下之工亦古人之詩非吾之詩也又嘗作書規尚書選
唐明諸家詩不考檢故籍往往時代統緒地理官裔顛倒
錯雜或以前爲後本東指西并摘其紕繆數十事有類于
明孫鑛茅瓚之校史鍾惺譚元春之說詩者乞急改正毋
爲有識者所笑尚書得其書數日不樂然無以難也此亦
可見先生之質直有過人者矣其在里中過從者不過五
六輩餘則鍵戶默坐或時時著書不妄結一客善飲酒至

斗許不亂醉則談古今義理娓娓不倦然非投分深者則
竟席可無片言喜寫竹石雅得天趣古籍法書名畫縱橫
几席閒旁及岐黃青鳥星卜六壬諸書無所不窺試之亦
未嘗不驗歲乙亥里中大禘先生餽粥不給然族有貧無
以斂者卽質庫錢與之歲甲申修兩縣志當事辟司采訪
先生素留意里中掌故凡溝渠通塞道里遠近及士大夫
之嘉言懿行可以備采擇者先已一一筆之于書至是條
舉付局中人皆推其詳瞻先是常客吳中徐某家徐以事
涉訟有陰事連其鄰富人童某人咸嗾徐許出之以窺利
徐以商先生先生爲陳利害止之事得解已而童知出先
生意詣客次謝先生不任也歲乙酉赴試江寧遭疾遽卒

年甫四十有八越三十年族人將修譜系其子達源前已
舉于鄉官泗州儒學訓導遠致書亮吉乞爲立傳亮吉與
達源同歲生知先生詳且舊史氏也遂爲編次如左云
珥塘荆氏族譜序

風俗之媿惡由于士大夫其端不出乎上也亦不出乎下
也東漢風俗之媿士大夫有以致之西晉風俗之薄亦士
大夫有以致之其由于士大夫何蓋治天下未有無法者
也治天下之有法必自士大夫之各修其家法始故觀一
世之治亂以風俗之媿惡卜之觀風俗之媿惡又以士大
夫之家法修與不修爲斷家法壞則害及于國矣害極于
天下矣士大夫之家法轉移風俗之具也范滂之母以令

名勗其子樂羊之婦以不義惕其姑風俗所以美也迨正始之後有居喪食烝豚者矣有直斥其父之名而謾詈者矣名家則不修叔父之敬宦族則世無渭陽之情陵夷衰微以致爲人心世道之患則風俗之薄爲之也丹陽珥塘荆氏自漢三國以來卽爲名族迄今已二千年而讀書敦行之士代常數十輩其故何耶譜系之修舉家法之嚴明百倍于他族故也其合族之法曰善惡有別貴賤有等夫善惡有別則父日以戒其子兄日以戒其弟而不肖之子弟無所容身矣貴賤有等則富者或寬博卒世貧者反章服耀身父日以勉其子妻日以勉其夫而偷便安喜遊竄之子弟幾無以自立矣其法行之二千年而不壞故荆氏

之門地才望常爲他族冠蓋一家無偷便安喜遊竅及不肖之子弟不過一家之故耳使推其法行之而一州一邑及于天下可無莠民矣一州一邑及天下無莠民而尚有作不靖以干國紀者乎吾故曰家法之詳國法之所以簡也余與荆氏有連又幼嘗受經于華亭教諭荆先生汝翼故知其家法甚詳則今之序雖由于荆氏之請然豈僅爲荆氏一族言之乎推之于他族而可推之于天下而可

釋名疏證序

代

劉熙釋名其自序云二十七篇案後漢書文苑傳劉珍字秋孫一名寶撰釋名三十篇以辯萬物之稱號而韋曜顏之推等皆云劉熙製釋名熙或作熹案三國吳志曜傳曜

在獄中上辭有云見劉熙所作釋名信多佳者然物類衆
多難得詳究故時有得失而爵位之事又有非是云云玩
曜之語則熙之書吳末乃始流布是熙之去曜年代必當
不遠一也舊本題安南太守劉熙撰近時校者以二漢無
安南郡或云當作南安今考劉昭注續漢書稱三秦記曰
中平五年分漢陽置南安郡元和郡縣志亦云漢靈帝立
是郡置已在漢末二也此書釋州國篇有司州案魏志及
晉書地理志魏以漢司隸所部河南河東河內宏農并冀
州之平陽合五郡置司州是建安以前無司州之名三也
又云西海郡海在其西據劉昭注則西海郡亦獻帝建安
末立其時去魏受禪不遠四也釋天等篇於光武列宗之

諱均不避五也。以此而推則熙爲漢末或魏受禪以後之人無疑。又自序云二十七篇而文苑劉珍傳云三十篇篇目亦不甚懸遠。疑此書兆于劉珍踵成于熙至韋曜又補官職之缺也。其書參校方俗考合古今晰名物之殊辨典禮之異洵爲爾雅說文以後不可少之書。今分觀其所釋亦時有與爾雅說文諸書異者。爾雅曰齊曰營州而此云營州齊衛之地。爾雅云石戴土謂之隤。魏土戴石爲岨。而此依毛傳立文曰石載土曰岨。土載石曰隤。魏正與相反是也。說文錦从帛金聲。凡爲聲者皆無義。而此云錦金也。作之用功其價如金。故其制字从帛與金。是以諧聲之字爲會意。又說文平土有叢木曰林。而此云山叢木爲林。

亦皆異義且其字體出說文外十之三益信熙之時去叔重已遠其聲讀輕重名物異同與安順前又迴別也暇日取羣經及史漢書注唐宋類書道釋二藏校之表其異同是正缺失又益以補遺及續釋名二卷凡三閱歲而成復屬吳縣江君聲審正之江君欲以篆書付刻余以此二十七篇內俗字較多故依前隸寫云所以仍昔賢之舊觀示來學以易曉也

西溪漁隱詩序

詩至今日競講宗派至講宗派而詩之真性情真學識不出嘗畧論之康熙中主壇坫者新城王尚書士禎商丘朱尚書犖新城源出嚴滄浪詩品以神韻爲宗所選唐賢三

昧集專主王孟韋柳而已所爲詩亦多近之是學王孟韋柳之派商丘詩主條暢又刻意生新其源出于眉山蘇氏遊其門者如邵山人長蘅等亦皆靡然從風同時海鹽查編修慎行亦有盛名而源又出于劍南陸氏是又學蘇陸之派秀水朱檢討彝尊始則揣摩初唐繼則泛濫北宋是又學初唐北宋之派博山趙宮贊執信復矯王宋之弊持論一準常熟二馮以唐溫李爲極則是又學溫李之派迨乾隆中葉長洲沈尚書德潛以詩名吳下專以唐開元天寶爲宗從之遊者類皆摩取聲調講求格律而真意漸漓是又學開元天寶之派蓋不及百年詩凡數變而皆不出于各持宗派何則才分獨有所到則嗜好各有所偏欲合

之無可合也賓谷先生弱冠通籍自祕閣而機庭又以才
幹結

聖主知總理江淮財賦者十數年官事之暇以詩文爲性
命其天才學識又足以副之所著西溪漁隱詩若干卷是
也先生居西江而不專主西江之派觀集中題湘花女史
詩卷及戲效香奩體諸作則又宛然西崑信乎才力之大
凡有所作期于言各肖事事各肖題而規仿前人之習所
不屑也亮吉廿年前與先生同舉京兆試同出清苑李先
生之門繼入詞館于先生爲後進然宦轍南北未嘗得半
歲合并今先生官維揚與亮吉里居咫尺而亮吉又遠成

乍歸一意杜門感

恩省咎不獲預賓從之末一發其所欲言先生顧不唾棄
獨寄示近作若干卷曰子其爲我閱而序之亮吉何敢序
先生亦惟舉平日所欲與先生言者一質之先生而已若
亮吉所爲詩則意有所至而筆未克達其去先生遠甚倘
他日有所自得與有可自信之處俟十年後亦當乞先生
序之

祝貞女傳

貞女祝氏世居海寧之袁花里父某諸生母朱氏女行四
幼端嚴寡言笑稍長讀書通大義遇古人節烈事必手抄
成帙時諷咏之笄字海鹽徐生杼生勤學得瘵疾纏綿數
年卒訃至父母知女性烈祕不以聞忽一日閉戶飲泣父

母啟扇入女哽咽曰徐郎死矣昨示夢于女以不得入祠爲恨父母能如女願當往成徐郎志否則從此絕粒矣兄弟輩百方勸慰女惟俯首啜泣乃往告徐徐初難之姑蹙然曰有婦如此而使之賫恨以終乎遂訊日成禮于庚子三月歸徐女時年二十七距生歿已三年矣登堂拜姑後奉主入祠布衣蔬食儼然未亡人也女事姑孝姑謂人曰我得此婦二郎若不死姑遭疾女醫禱罔效含殮畢屢欲引決有宗長謂之曰婦之來爲夫計也今兩世未葬嗣子未立遽捐生如死者何始收涕謝之徐家故貧女與伯叔析居受瘠田三十畝多浮糧遇儉歲餽粥恒不給女性勤儉至是爲窳窳計晝夜操作指爲之皴明年冬歸奉母病

不解帶者三月母歿哀毀盡禮女念父老多疾留侍養逢時節及諱日始往家祭祀亦時迎父于家歡奉之初綴浣濯不假手他人越四載以父病歸侍室內無人偷兒穴垣入空所儲去女聞之號曰天乎是十指所積欲爲舅姑與夫營兆者也旋居父喪女以痛父故且念貲盡失葬無所措悲憤成疾疾少閒又念年力尚壯或可後圖力疾強起用益節作益勤雖困頓不恤久之戚黨見女憔悴甚規以攝生且卽欲爲立嗣女曰壽天命也婦職未盡何以子爲作不輟癸丑秋積勞成疾瀕死者數少瘥詢悉醫藥費所耗殆盡懊恨見于辭色初女得生遺像懸諸房日夕焚香病時爲人所碎見蓋悲慟是冬以哭弟歸怔忡大作泣謂

所親曰女不天所隱忍至今者爲兩世遺骸計也門內無人相助者惟兄弟今弟又夭死兄復旅食頻年手口所營一空于盜再耗于病羸體又不任勞作是天不欲我襄大事也但恨辜負此十餘年耳素蓄一婢至是遣去惟孑身焉蓋自裁之計決矣嗣後疾痛無虛日丙辰春女自知力不支欲鬻產營葬衆尼之不果成三月抄絕粒八日不死至夜投繯而絕女生于乾隆十九年八月十五日歿于嘉慶元年四月初四日得年四十三歲嗣子一名鳴珂方三歲女歿後所立叔子也

史氏曰貞女之死可云從容就義矣其不死于夫爲舅姑也不死于舅姑爲葬舅姑及夫也至所積之資一耗于賊

一耗于病內外親又零落殆盡而貞女不得不死矣嘗讀南史孝義傳諸暨東澇里屠氏女孝養父母及父母卒女以無兄弟誓守墳墓不嫁爲山劫所殺貞女之死一何其相類乎卒能感族人爲營葬立嗣則徐氏一宗非貞女幾不血食矣志定于中而嗣延于世所繫豈淺選哉

新刻晏子春秋書後

晏子春秋一書前代入之儒家然觀史記孔子世家所載晏子對景公之言曰夫儒者滑稽而不可軌法倨敖自順不可以爲下崇喪遂哀破產厚塋不可以爲俗遊說乞貸不可以爲國云云是明與儒者爲難矣故其生平行事亦皆與儒者背馳唐柳宗元以爲墨氏之徒未爲無據近吾

友孫君星衍校刊晏子深以宗元之說爲非謂晏子忠君
愛國自當入之儒家然試思墨氏重斲救宋獨非忠君愛
國者乎若必據此以爲儒墨之分則又一偏之見也惟宗
元以晏子爲墨氏之徒微誤考墨在晏子之後當云其學
近墨氏或云開墨氏之先則可耳漢書藝文志墨子在孔
子後

受業

呂培校字

予幼時讀荀卿子修身篇曰其爲人也多暇日者其出人
不遠矣予嘗執此以觀當世聰明才力之士其有所成者
皆勤而不暇者也洪君稚存幼孤得母夫人訓自力於學
年未二十以貧客四方迄今又二十年備書食力之外卽
鍵戶誦述研精覃思過其外者如無人焉于經深春秋所
著有春秋三傳古義左傳詁二書於史精地理所著有三
國東晉十六國疆域三志刊史記以下四史謬誤十二卷
又以宋李繼遷傳國逾百年而事蹟闕略復成西夏國志
十六卷于六書通諧聲所著有漢魏音四卷外爲詩至二
千首文及雜著數百篇而所修府州縣志及爲幕府牋奏
不與焉洪君吾不能諒其所至庶幾可爲無暇日者矣君

善於漢魏六朝之文每一篇出世爭傳之以倦於鈔寫茲友人爲刊其乙集四卷以予素嗜其文因請序于予予前嘗欲錄亡友邵編修荀慈胡徵君稚威暨君數人之作合爲一集忽忽未暇也今玉芝堂集及君此刻並已刊成老念藉以稍慰至其文之淵雅氣質之深厚世皆能知之予不贅述云

乾隆五十一年歲在丙午花朝日錢塘袁枚序

卷施閣文乙集卷一

陽湖洪亮吉著

連珠三十二首

蓋聞十日並出不若陽烏之再中百川疾流不若靈河之東注是以日中見斗燭物之理自存山下出泉朝宗之心已著

蓋聞以近槩遠中無豪釐舉後定前失者什伍是以宋國五石忽憶前身爲星泰山一雲安知異日作雨

蓋聞片壤之安羌蝦逞其智一葉之庇螻蟻仰其陰是以吞巨舟者必思江海爲家戴尺木者乃以風雲爲蔭

蓋聞威劫于外則不非其非智昏于中則非類亦類是以

指鹿作馬者刑餘之臣以驚當鳧者力筆之吏

蓋聞造物之儲或留而不用聖王之制每過于所防是以
一世之衆飲不竭河而供之以江海萬夫之勇超不越丈
而限之以城隍

蓋聞塵揚席上灰然鼎間飛揚雖同涼燠以異是以灌夫
罵坐難止膝席之賓次公酒狂羣驚仰屋之歎

蓋聞力竭智窮則愚者必收拙効識大見遠則感者不嫌
過計是以塵當揚海故冤禽之志不衰杵可倚天則杞國
之憂匪細

蓋聞勢盛復持以奢必無以處時過日午又益以火必無
以禦夜寒是以朱門矜土木之工不能以片瓦覆末世祖

宗僕飲食之譜不能以一飽貽子孫

蓋聞岐塗萬千不當殉之以跬步今古億態不當處之以思議是以立志可以入世故萬物漂動而金石不流無心可以貞運故七曜改色而風雲不壞

蓋聞器適于用貴賤之形泯材值其候小大之勢易是以二曜不可鑑影慙于半規之銅五嶽不可厲刃遜于一尺之錯

蓋聞分有可與則谿壑難盈物非所勝則庸愚念息是以鷹隼卽鷙不求虎豹之腥漁人雖貪非與蛟龍之獲

蓋聞獨心雖智謀事不臧隻拳雖勇遇敵必債是以明堂九仞承之以百柱則安迅流千里障之以一蕢必決

蓋聞邪正殊者必無合志之言得失明者不爲無益之事
是以爲盜之室寧致禱于黔婁習佞之夫不交魂于汲直
蓋聞巧匠制物成毀難定明鑑過影曲直未分是以漢璧
千鎰不能止亞父之碎秦鏡百具無由燭趙高之佞

蓋聞善之與惡氣必相感利之與害勢有各驚是以栽棘
成林鴟鶚樂其安宅平衢似砥狐鼠以爲畏塗

蓋聞思匿其短者以猜疾爲肺腑冀遂其私者求黨類爲
膠漆是以無鹽入室視明燭而必讐瘦者過市見曲瓢而
自慰

蓋聞五簋登筵旨者早盡千葩攢樹豔者先摘是以終童
夙慧不臻厭次之年龔生竟夭乃致彭城之涕

蓋聞普苦而不信者五嫁之妻力勤而不錄者屢逃之僕
是以秦室之行非藉于指天晉文之臣不煩于投玉

蓋聞非神無以燭事而或有所窮非勢無以馭物而或有
所過是以珠玉沒水日月不能垂其照魑魅遁虛雷霆不
能施其烈

蓋聞節有至奇視其所發行有甚烈必貴得宜是以證羊
之直用于子而不慙嚴父枹柱之信移于女而必爲貞姬
蓋聞乾煦坤和矜垂于微末日變月蝕兆起于纖豪是以
一婦至寃東海有赤田之旱匹士銜憤吳門成白馬之濤
蓋聞能有所盡智有所窮安之者聖強之者愚是以六合
之外不知仲尼故聖于鄒衍五經之表不議孟子亦賢于

莊周

蓋聞淒思一入則萬態助悲華心旣揚則百族盡煦是以
朱戶累累明月至而益輝蓬闕蕭蕭寒風來而若怒

蓋聞飛霰于夏時苦救而天灾成舉耒于朝民勞同而主
事廢是以馭一世者以不勞成勞調四氣者以不德爲德
蓋聞秉萬族之秀則物遜乎人成一節之奇則人希乎物
是以充廉士之節必爲蚓而爲魚言君子之化或成後而
成鶴

蓋聞能有獨擅理不得均器有偏饒勢無能共是以田竇
之家以千金而易一賦枚馬之室用萬言而貸半鐘

蓋聞美醜雜陳要于取法剛柔性定貴擇所從是以下士

心競視流水而可平懦夫氣衰見高峯而亦竦

蓋聞嚴霜被澤嘉草同萎野火燎原仁獸亦燼是以君子業業不垂禍福之言小人皇皇乃著灾祥之論

蓋聞理無所宜必求實效用各有適無貴虛名是以琴瑟雖雅非能引之論心鸞雀甚馴不可委之守藏

蓋聞炫寶于門伺者百盜露竒于世忌者萬夫是以尺璧在抱必加再襲之衣積金之家恆著重扃之戶

蓋聞拔木之獸天不能不生而有山以相域或川之蟲地不能不載而有墟以相容是以魚假之足則江海之塗必塞虎傅之翼則城郭之民已空

蓋聞貴不若賤以計得失智不若愚以識趨辟是以萬衆

局縮蹈白刃者烈夫一世震懾犯龍鱗者匹士

淳化縣志敘錄十八首

予自歲辛丑入關撰定此間方志者三同州之澄城邠州
之淳化長武是也關中地大物博又諸紀錄自漢三輔黃
圖以降暨唐韋述關中記宋宋敏求長安志程大昌雍勝
畧等咸可準繩而府州縣志可采者蓋寡蓋明代諸賢事
非師古苟爲簡略卽故城舊蹟皆棄之如遺今所盛傳武
功朝邑二志不知者以爲實過古人非篤論也予爲此志
一準昔賢非苟求立異實欲藉茲成規示諸來禩凡爲記
入爲簿二爲志五爲略三共三十卷凡五閱月而成其敘

曰

古縣今縣新城故城黎園舊鎮流金昔鄉咸攬川陸附之
橋梁倣晉朱育會稽土地記等述土地第一

史言甘泉傳志石門冶谷引涇荆山導汧灌溉之利被于
無邊倣齊劉澄宋初山川古今記等述山川第二

史家遺法首記大事三千餘年如掌可指倣漢司馬遷等
大事記述大事第三

古云吉行日三十里披諸圖經式其遺意倣隋西域道理
記等述道理第四

嬴秦築宮遷五萬家越漢始元徙民三輔良規旣失志丁
畧戶稽其盈虛逮今淳化倣宋元康六年戶口簿記等述
戶口第五

惟民之俗百里不同爰志士女逮農工商倣晉周處風土
記等述風土第六

雍州積高神明之區雲陽甘泉又帝所居下暨小鬼靈而
不誣倣齊祠廟記等述祠廟第七

世遠莫追金天有陵青鳥之冢圖書可徵仿宋李彤聖賢
冢墓記等述冢墓第八

秦皇漢武築宮祈仙洪崖弩陸增城在焉百世飄忽羊牛
下來下士奏賦通天之臺倣晉洛陽宮殿簿等述宮殿第
九

征輸之薄前代所無農桑絲粟以迄市租冊籍可稽職于
胥徒倣宋李常元祐會計錄等述會計第十

泮宮居前叢祠列後英英羣賢光我俎豆倣宋崇寧學校
新法志等述學校第十一

才餘于官不廢嘯歌此如傳舍所閱旣多做宋無名氏衙
署志等述衙署第十二

白公鄭國民歌至今王陽作令亦有遺音采共遺蹟以代
吏箴倣唐杜佑通典職官志等述職官第十三

世需多士士貴通經茂才異等咸貢王庭倣宋崔氏登科
記等述登科第十四

廣陵列士會稽先賢列女後傳撰于顏原邑縱蕞爾無微
不傳倣晉常璩華陽國士女志等述士女第十五

金石之文古稱不朽彙茲豐碑庶傳于後倣宋鄭樵通志

金石畧等述金石第十六

淵雲之作冠于簡端國師峨峨亦賦甘泉後有多士庶幾前賢倣漢劉向七畧詞賦畧等述詞賦第十七

凡志方隅必推今昔稽乎古圖準以今尺惟茲一編咸述舊聞勿淆其次以俟後人倣常璩華陽國志序錄等述序錄第十八

終南山圭峰寺銘

若夫一峰之上支公疏其小池百尺之餘祇園森其列柏高瞻遊鱗頰矚飛鳥南則層峰接天意凌星斗北則青氣屬地靡見寰宇陰厓草枯積雪尙白煦谷氣暖巖花已紅怖鴿一隊枯僧兩三翳綠蘿而居穿白雲而出相與並肩

層巖凝睇初日金碧萬端華心易其素念霞采億狀茅齋
成夫麗矚蓋已響沈音外思舉雲表者焉適有奇石陵乎
坐次爰爲之銘曰

空水易曙白雲知春十步五步花香送人蘿谷尙暗松軒
已辰僧疑入定崔仁棲真鐘踈出寺鐙暗披帷琴牀月落
蝶帳風開草名躑躅花號徘徊虬枝競挽馬首頻回塔看
倚杵峰真秉圭

終南山高觀谷銘

鄂縣東南行三十里有高觀潭谷水出焉五里未及驚霆
按天百步尙懸飛瀑搏頽洵人外之奇觀霞表之靈境也
若其危厓半傾若斜景之入海巨石自轉同高穹之隕星

曾不踰時已抵絕壑雖激電之閃戶飛矢之出林不是過也春兩旣積山空自鳴萬壑競乎一門百丈限之盈尺此則山澤氣阻陰陽與之回皇風雲色變星辰因而匿采者矣余尋幽匪遙好奇斯過遵彼磐石薄焉觀之齋心旣空盈耳有悟遂爲之銘曰

鯨波仁湧龍氣猶腥高欲切漢光疑浴星頰峰作檻劈石成扃出竇始白回瀾乃清流金迄石衝谷注壤海若輪靈坻墮遜響遵巖覓電頰壑尋雷天地黯慘風雲蔽虧無人獨往有月飛來

漢麒麟閣功臣頌

并序

麒麟閣者漢宮閣䟽名云蕭何造張晏曰武帝獲麒麟時

作此因圖畫其象于閣遂以爲名以予推之閣蓋構始于文終錫名于武帝漢書武帝紀元狩元年冬十月行幸雍祠五畤獲白麟至太始二年始下詔更黃金爲麟趾以協瑞應是時漢興已一百十年日月麗于中天文武集于亨衢時博陸侯霍已入禁闈富平侯安世已爲尙書令光祿大夫營平侯充國龍頷侯增均已爲郎丞相博陽侯吉爲廷尉監典屬國武已使匈奴五年按春秋感精符曰德及幽隱不肖斥退賢者在位則麒麟至是知飲泉食露之符爲連茹拔茅之兆矣至宣帝甘露三年始圖畫其人于麒麟閣法其形兒署其官爵姓名惟霍光不名曰大司馬大將軍博陸侯姓霍氏次日衛將軍富平侯張安世次日車

騎將軍龍額侯韓增次日後將軍營平侯趙充國次日丞
相高平侯魏相次日丞相博陽侯丙吉次日御史大夫建
平侯杜延年次日宗正陽城侯劉德次日少府梁上賀次
日太子太傅蕭望之次日典屬國蘇武凡十一人偉矣哉
定策則博陸相業則丙魏名臣則杜張宗賢則陽城儒雅
則梁蕭武功則韓趙使節則子卿親賢並升文武備列昔
陸機爲漢高祖功臣頌袁宏爲三國名臣序贊歌詠功德
至數十人然徵其美備考其績效均若有不及焉蓋世遭
隆平士逢豁達之主得明目殿陛振聲巖廊挾一策入石
渠請長纓度沙幕居禁闈而不遺在窮巷而亦顯中廡之
馬旣擢日磾上林之羊亦升卜式牧豕極于上相馭駿登

乎九列亦可謂立賢無方用人不求備者焉此數人者向使生秦項之世值吳蜀之主上則刀筆趨走自擬于駑駘下則簞門甕牖發聲于蚓窾安能鼓垂天之翼絕塵而逞其驥足哉此門戟所以垂涕而言曰知臣莫若君樂羊所以捧篋而泣曰非臣之力君之功也豈不美哉夫以光武之明德悼歎于龐萌元皇之風烈受譏于張禹則知人則哲從古難之遂使孤臣萬里餘搶地之呼下士百世奏通天之牘自非英斷卓識鴻業大烈曷臻于斯暇日慕其風尙不揣謏陋爰各爲之頌亦以存景風之思爲來禩之式云爾

漢至五世云惟百年德盛化洽麒麟至焉按古圖書識緯

之篇來此上瑞登庸大賢皇皇大賢神明攸贊桓桓博陸
票騎同產旣媿阿衡亦參姬旦負展畢世放桐不反大節
旣植生知不學英辟握手幼君入抱三踐帝席兩握國寶
勲存畫室忠勒高廟矯矯杜陵留侯共族兄罹蠶室父治
鼠獄勤勞旣著肺附是屬身膺上袞世執圭玉國鈞旣秉
民譽四洽雅善魏丙不友田甲英英漢廷口議八法彬彬
儒林腹置三篋侯有龍頷世爲虎臣千戶旣益萬騎出屯
雖有令德亦鑿凶門時惟鷹揚起于巫蠱功參上宰事歷
三主言求偉伐試覽勲簿震震烈烈篤生營平方叔召虎
來于西京有漢中葉西羌不寧黃髮鮐背爰求將兵神爵
之元天子推轂旄頭初出羽騎始肅光光將軍遠夷斯服

將偃五兵講求六穀高平對策進由儒者頗厲威嚴庶資
媿雅建策堂陞馳傳天下觀漢故事講求便宜外戚附奏
列侯詳議號通犧畫乃學計倪征和之間八夤鼎沸隆準
寓獄長楊望氣中使星馳圓扉夜閉婉孌哲人實司郡邸
中興之相陰德以侯旣主禮讓實惟仁柔赫赫公府恢恢
皇猷不解案吏惟知問牛次公簡簡亦明法律才平獄訟
復議鹽鐵持躬以整應機以疾元平正始實惟憂虞職典
方藥功參立儲幾陷許止乃比朱虛隆漢之規親賢並用
城陽濟北厥後誰踵盤盤宗英名德見重甘泉召對未央
列議輶車七乘汗血千里尙冠以興海昏用廢六經至漢
蔚然羣師琅邪受卦兼擅易旗絃服入廟旄頭墮泥儒術

既隆卿階不替宏羊駢駢比茲心計五鹿嶽嶽慙其經義
東海蕭生起于白屋犯主顏色責相吐握吏持甸甸友哂
碌碌終登貳宰入授禮服承明高議聲振殿瓦英英及門
槐里蓋寡既趣飲鳩遂請斬馬賢傅既決佞臣斯忤子卿
少卿並寄絕域一踞胡服一持漢節義重于生寃銜至沒
陵惟霑衿武乃刺血蜀帳奏樂穹廬雨霜飛雁不下牧羣
旁皇掘根鼠穴書帛雁足方困羝乳乃畫麟閣肅矣西京
炳靈羣公前後萬古茲惟日中允文允武立德立功平視
九駿高參五龍昔歲魯郊宣尼所歎今茲隴首匡鼎以贊
傑閣雖朽崇勲尙爛望景中隆流芬灑澗

昌國君樂毅頌

臯兆大澤伊緣空桑猗惟若人厥聲亦英生後十世不直
禹湯舉足欲出九野虎狼虎狼之羣鳴鳳萬仞回翮秦楚
歛翼三晉攬茲德輝擇主以進功殊蓋世恩亦逾分三光
旣赫九鼎亦震時方忻亂天未祚德間騰卽墨功墮騎劫
七十二城悉傳以翼英英鄒彥曾不入燕翩然來斯惟茲
一賢封崇昌國義感沒世身雖居趙引領北視銜恩而息
戴德而歆頌于千年以感國士

萬壽無疆頌

并序

代太常卿倪承寬作

臣某言臣伏讀

皇帝陛下正月元日詔書以乾隆四十五年值七旬

萬壽聖節敬法

皇祖聖祖仁皇帝成典布大澤于天下猗與休哉

詔書所列自祀五嶽四瀆以迄肆赦凡二十條臣竊見

皇上自御宇以來四十有五年

國家承平一百三十七年之久天下戶一千萬口一萬萬
內自羣工卿士師尹百辟外暨億兆臣妾遼遼曠遠殊形
而共慶異聲而同和喁喁焉忭忭焉蓋延頸接跡與德倖
澤自九天之下迄九地之上六合之內以薄于六合之外
然

皇上猶持盈戒成蘊謙育和自乾隆三十五年六旬

慶節至此又越十載始沛然順輿情頒

大詔以安神所以答中外而又繁文縟節槩

敕勿事

面戒有司

訓諭諄諄逮于下者無不隆受于天者靡敢侈至矣哉法祖之烈敬天之心勤民惠下之誠盛德勿德雖休勿休之念靡不繪

丹宸縣

黼坐降玉陛歷金門而被于几有知識者矣夫含生之類靡一物不得其所至聖矣化之所被不心而應不踵而至至神矣禮樂之盛薰地縟天至文矣聲威所被窮舟阻輪跨嶽越海至武矣謨文定武廣聖極神涵億兆之和而受繁祉之錫至壽矣臣不敏侍從數十年自翰林洊登卿貳

親見

皇上展禮嵩高告功岱宗歷太行登會稽

蹕

與京謁闕里循河隄築海防每所

省幸施澤輒數百萬又親見

皇上平回部再平金川西南諸酋稽顙歸化難可畢數拓地三萬里迄乎日月斗所出入又開四庫館自周秦以來經史子集靡不集其大成兢兢業業若彼巍巍蕩蕩若此臣竊見詩之序曰時邁曰般言天子巡守告祭柴望及祀四嶽河海也曰魚麗曰蓼蕭言天子功成治定制禮作樂澤及四遠也曰天保言臣能歸美以報其上也故曰降爾

遐福曰受天百祿言天與天子以廣遠之福而天子克荷之也又曰貽爾多福言神又能巨多福貽天子也故天不答天子以日月之壽則百祿之應不章五嶽四瀆羣祈百神不佑天子以億萬之齡則多福之徵不顯羣工卿士內外百辟不祈天子以覆載之永則歸美之誠不敷琬琰所鑄金石所述五三六經之所遺不可誣矣臣今者又披瑞應之圖集靈寶之記以合今之所見則狺狺踴踴與化低昂笑夸世之主而待乎麟鳳何生不育元氣滲漉何曩葉之君而炫夫嘉穀隆隆者岱爲宗曷爲濯露雨瑞日月而待升中洵洵者河以鴻曷爲束魚鼈恬駭浪而就成功羣蒙首首于以戴斗惟生之厚庶祝

天子之壽橫目顛顛而惟視天何歡而抃云慶

天子之年天人之應協矣神人之理昭矣兆姓之符著矣
凡此數十條臣每見漢唐宋中葉諸盛辟得其一事無不
加尊號膺玉冊鋪張鴻名增益盛算而

皇上獨一切勿事惟民生治術爲兢兢蓋于于焉翼翼焉
又將超其

識于八代之上藐然而繼五位三紀之盛軌也臣不敏素
以文字受

特達之知況親覩

偉烈首沐

至化又恭值敷天之休率土之慶得預百辟之末而奉萬

年之觴且雅頌之蹟彰彰若彼而臣獨不克繼軌前哲導揚

盛美臣實慙焉輒不自諒謹獻萬壽無疆之頌八章頌曰
皇帝御宇四十五年惟天眷

帝惟

帝法天法天伊何敬以率先

德盛化洽持之以謙謙惟召和敬以集肅儻乎天位永此

帝籙 百有一章

五緯旣曜九魁聿張鬱鬱紫府肇乎文章惟茲文章釐以
甲乙苞賢蘊聖昭典鑄則甲觀辰啟乙帳夜陳炳炳麟麟

法天之文 右第二章

惟天有鉞鉞亦南指惟天有弓弓實西矢蠹惟不靖匪西而南

命彼六師撻伐以三爰俘渠率爰拓疆土震震霆霆憲天之式右第三章

敗敗穆清厥兆誰見三百六辰甲子之健淵淵

帝躬八賁是奠四十五載省方亦徧東西既歷南朔聿臻右第四章

惠下以實則天以勤右第四章鴻流之貫揚豫充青視天有漢爲地之經惟湮隄防下土以疾展茲

宸畫繼彼曩烈赫赫

六飛遵海而觀惟

帝東邁象天左旋 右第五章

無云巍巍天亦降威曾不終日雷霆已回惟

皇鑒之以

詔司士捐瑕濯纛一與更始方網既解圓斗益明凡百肆
救助天省刑 右第六章

無云赫赫天實降澤八紘之廣覃州溢域

帝御三殿

詔出九門黎黃蒼赤歸化咏仁司農頒粟內府出帛凡百
綸綍體天施德 右第七章

惟威惟德

帝皆則之允武允文

命以顯思融融穆穆亦若示喜天之視

君蓋惟一體肇啟

壽域肇築慶基億萬斯年天之與齊

右第八章

卷施閣文乙集卷二

陽湖洪亮吉著

七招

昔宋玉賦大招枚乘著七發予讀而善之因合其體做焉

空同主人遊於元冥之鄉寐而失其魂其友愚公憂之招於曠野三日不得踉蹌而歸謀賓朋詢臧獲乃得主人生平所嗜好意志所溺惑十失一二猶得八七爰升墟而招之

曰今子冥焉莫焉忘焉忽焉如遊尾閭而失足登昆侖而隕巔將招蒼童下白雀尋神氣於高下訪音響於寥廓聞

子昔者凌飛濤

主人江行上自大別下抵海門錢唐富春亦類

上削玉

主人以壬寅七

月遊華山

東經長淮北未及於王屋

壬辰癸巳兩歲皆道長淮抵鳳泗辛丑歲

自都門至大梁

欲遊王屋不果 揆竒不已思畢命於嶽瀆計子所未至乃

尚有六今將與子升中天歷太行道密高眺南衡出雷瓊

瞰外洋遵登萊而岸勞成山則岩岩崑崑雲氣四塞泉奔

如江海龍嘯若霹靂驚磨銜不死之草毛女蘊長生之術

黃金之丹可成而靈藥可乞水則茫茫混混色奪絳紫天

若一丸魚長百里當月午而潮定見天中之霞起驚志乍

收醜酒未已南風拂之行千里者不知其幾若此者黃華

失其竒

壬辰戊戌兩遊黃山歷登蓮花天都兩峯回塗皆憩九華經宿

台蕩奪其秀

丙申秋主

人借學使者按浙東

歷遵天台雁蕩諸勝 嘯太白之雪嶺

癸卯夏莊大令炳邀主人遊太白山至新

開嶺懋晒匡廬之雲岫雲夢七澤坳堂而可方癸卯五月

於龍池歸道楚中阻風泊巨區萬頃癸巳十月主人訪趙舍人襄

匡廬下凡五日玉於穹窿山因同之太湖歷

東西兩山又獨入一甌而儼受此亦跨凌古今橫絕宇宙

林屋洞凡數百步魂如歸來急以此請呼聲未絕而百步之外微若有影

曰和闐之玉采之昆侖百馬載一來於西屯行車則疾雷

破地止舍則奔星在門昔所未值世無其珍侑以播川之

犀昌化之石白文衝天赤采照澤廉州翠羽鮮若霞升瓊

山蜜臙黃如栗蒸永昌黃金若鑑合浦明珠代鐙自播川犀以下

皆見今一復有九州奇貨淪於厚土中郎發統志土產以供嗜古

南山之石椁破而東園祕器陳鼎則仲丙公乙兄丁伯申

貞則祖乙父癸婦庚母辛虹燭之錠雌形之尊鏡蒲萄而

馬鬣鐘苻葉而螭紋一寸之珠搏於媚尸之口逾尺之璧

攫之驕王之身漆鐙煙騰而罩地水銀光滿而燭天好事

所未見述古者所不聞古刺之丸古刺水自明永樂中入中國今故家時有之

歐羅之表大西洋人製表極精恒百金直一千鈞則如意百串則多寶乃

有呂宋所產一世瑞草含茹則火入四肢呼吸則煙騰百

竅蒸淫不歇薰炙子鼻菸草一種百年來盛行近復尙鼻煙皆剗玉為瓶精者至穴大珠為

之五官拉雜黑塞竅穴珠胎既凌剗玉孕復剖裂他若士

有女行則冠紳而約闌吳俗男子腕皆喜約金玉闌及佩決弱為武容則樽

俎而佩決若此者皆世之所珍而吾子不能舉其質言尙

未卒魂如豕脫飄風拂之入東壁而沒

曰無已將樂子以靡靡之聲蕩之以淫樂北部則樅陽襄

陽秦聲繼作芟除笙笛聲出於肉棗木內實篳篥中鑿今時

稱椰子腔竹用篳篥木用棗 啄木聲碎官蛙閣閣聲則平調側調蕤則

東郭西郭東郭西郭見孫明經然子吳人也請歌南部曼

綽絃索院本是祖五聲清脆節之以鼓弋陽海鹽之調良

輔伯龍之譜梁伯龍魏良輔明萬歷吳姬婉約是日名娼

髮若燕剪聲如鶯簧年二七而尙穉宵三五而登場於是

繡幄盈坐珠鐙滿廊披玉茗之四部舉粲花之樂章一聲

兩聲若清商之出天半高舞下舞如神女之降高唐風雷

生乎幕外霜氣襲乎衣裳上客厭金疊之易罄主人訝紅

燭之不光送客既出朝曦滿堂復有秣陵清音維揚小部

既美歌喉尤擅姿首二部今時盛行劈梨桃而心醉擲羅巾而目

授秦淮迢迢而晚涼蜀岡盤盤而清晝檀板既微歌韻乍

透微聲動波沈響入岫林鳥識其餘音市兒應之撫手十

番嘈雜喧於里門方響則呂黑白鈺則羅雲擲笛則陸三

調絃則莊昆里中十番一部最盛尤擅場者則羅凌雲莊象昆陸開三呂咸如皆先後入都獲盛名焉

始春置酒天中啟筵魚鑿之光燭地龍鷄之竿拂天萬錢

買吳孃之舟百尺擇臨流之閣圓鉦乍起羯鼓閒作響徹

霄漢聲溢郊郭或神迷於絕伎復破產以酬酢至若櫻桃

紅兮半樹芍樂豔兮雙枝植富春之館栽北海之池淒迷

五夜顛倒百詩西雲擷英之譜嚴侍讀長明有秦雲擷英譜南枝傷逝

之辭南枝集曹學士仁虎著知者所樂道才人所豔思歌至十闕魂

惘惘而不識鄰雞一聲影若冰釋

曰穀則河汴之麥

御廩所需

河南歲貢麩五百廩

秦中之稷九州稱腴

今秦中人呼小米曰稷米則今

之小米即古之稷也

黃兮若真臘之寶皎兮若冰霰之餘三吳之秣

佐以嘉穀餅餌所資雜入羹臠飴周於輪果實其腹倘憎

陳而說新或罷飯而進粥則有北江之稻白者如玉

俗呼為香

稻米歲以入貢

初春未食香已盈屋牲則大荔之羊江山之豕

船飼豬以穀

雲中之熊白灤河之野蔬射雉則句曲徵賦則固

始以上具見方志

蔬則苳紫莧紅芽黃

白菜生江淮以北者佳俗呼為黃芽菜

菘白

華陰石髮數尋吳淞蓴絲百尺瓠兒瓠子露葉霜實莒本

則號莖菜種則名葛

即今俗所呼諸葛菜

酒則會稽之醞珍於達官

京口之釀峩峩百船侑以橘英之觴惠泉之尊

酒味最冽者紹興次

則京口吾鄉惠泉又次之高粱燒春今燒酒唐人呼為燒春味縱劣

而雜陳莫不合歡則永好陶陶則百年又或選珍於山採

腴於湖雍涼有孕香之麝閩廣有食果之狐似帶匪帶暨

江中有魚狀若燕窩一名燕舟非魚是魚膾鮮鱗而或棄巢壘燕而有餘

南則臨平射陽五色之鯉薦之以醋西湖行廚以醋淪生

知子嗜之而未篤也則有牛渚銀鱗魚揚州亦能效之晴江石

花味或華而不清質或清而不華藐江鄉之風味首鱖鮓

之足誇河豚產江陰魚僧成對始沙洲始春海門初日滿

百則江湖已浮捕一則怒昔欲裂入市則一雙十雙炊薪

則永日永夕專諸之刃縱刺西施之乳不釋河豚肪名江

西施乳

瑤則質薄刀鯽則味屈羅陳於前待子食畢芳芬射越魂
若有鼻依於屋楹欲卽不卽

日將與子攬轡燕趙遵乎大同回覽吳越極於閩中明月

旣倦宵投清風

明月清風鎮名在定州

十車載氊裘之帷百船裹綠

油之蓬

緣蓬船見廣州府志

凌越溪抵湘江披班竹之戶扇垂烟波

之釣筒莫不明豔如雪回環若風千金出客裝百金擇冶

容留人則鷓鴣啼樹喚客則鸚哥出籠蕩子因以不歸冶

遊因之謗速吾子閒雅知未敢託足也若夫松陰偃蓋之

巷班竹如椽之亭梨桃之谿不夜金粟之館長晴花交春

而失影月墮秋而有聲園歷十畝樓分數家斗隨廊而北

轉雨飄簾而左斜恍兮若接倏爾莫及曠千春而寡儔藐

遺世而獨立一則氤氳氳氳氣如初春衣飄搖而欲仙佩
委宛而如神忘情三五之夕無夢百花之辰一則光生不
滅影若新月素采匿重帷餘輝想空闕慕不言之桃李倣
無聲於反舌竊料昔者東西望塵君子所不能致惟茲二
人昔扃門而距影今披帷而吐誠願以弱質充茲下陳久
長要乎天地終始誓以星辰髮紛披而雨泣望良人於鬼
門音響未畢魂兮若來隔秋花而不前抱輕煙而徘徊
曰今與子按史氏之編采經生之籍溯周秦而上之逮唐
宋之陳跡行車如雷動止舍若山積則涉子問字之亭訪
子藏書之宅江蘼盈數畝蠹魚長一尺僕縱欲敷蒼摘黃
道白剖黑窮古今之至蘊而不足擴子之高識若夫今

天子文治之昌也弁冕千祀涵濡百載徵竒編於六合挺
祕閣於

大內皇皇焉首首焉隆古所不克津逮繙披萬集甄錄百

輩惟江左之絕學則庶幾乎惠戴戴則生入華省惠則書

登祕帙九經盤盤古義是出漢儒之詁周易是述戴則句

股割園以之經天水經水地以緯地理詰字則楊雄之書

校經則戴德之記主人不及見惠徵君定宇至戴吉士震

家之書惠則九經古義周易述易漢學易例左傳補注諸

種戴則大戴禮校正句股割園水經注水地記及校楊雄

方言數書餘若此者子之所見所不見者尚以百計吳門

之江沈冥蜀莊舍蚪蚪而無字降柯櫨而不詳出則鄰犬
吠影入則飢鳥競糧越六十年尚書著錄吳江布衣聲為

年近始以小篆手寫刊木焉是章子師友存者不敢著錄
恐涉標榜惟布衣年近七十知者甚希故著之以明絕學

成一家之言高二尺之牘汲古之士則踵門求觀徇華之

儔流汗而不卒讀學士金石碑惟五千大興朱學士筠收貯金石至五千種

未及編校而卒奏開石渠厥志偉焉學士官安徽學使時曾奏請刊石經及請校永樂大典

知古則莖浦杭編修世駿知今則茶山錢文敏維城蠶蝨一牀甫沈

酣乎論著戈甲滿側乃敷陳而萬言文敏平古州苗香要奏事至數十蕤

苑則詞林丈人邵常熟邵編鄭善虎文蔣鉛山蔣編程

歛程枝理晉芳詩則元祐以上文則正始之聲莫不著集百卷流

傳萬編錢文敏茶山集杭編修道古堂集邵編修玉芝堂集鄭贊善誠齋集蔣編修清容集程校理勉行堂

及百卷集皆幾不朽之事昭昭可言語畢四視五步之外來如輕

雲雖不即至然若有慕云

曰今賡子伐木之篇徵子平生之識者儒碩彥齒髮近百

多聞在前英俊侍側則有談飛四座采暎一室錢塘則雄

奇萬端袁吉士枚鉛山則鋒鏑百出卽編修談神則氣王語鬼

則志懾隨園則方冬敷花三徑則未秋零葉又復孫郎好

辯汪叟力敵錢塘汪縣丞蒼霖佞佛孫明經明經老萊之

考汪明經中著書千餘言證道德經為老萊子所州倅熊

耳之說錢州倅坵與孫明經同客西女辨熊耳山言未及

吐頸已發赤若夫秋林萬聲清澗五色來錢生之寓齋同

錢大令坐汪子於舫側儀真汪學清談忘倦妙緒絡繹榮

悴不經其懷是非不關於臆趙蔣覃覃樂陳先世主人及

令彪詔暨大令再從孫舍人懷玉凡四世皆善陳先世舊見趙大

事侍御蔣先生和寧暨弟明經蘅皆主人舅氏從受學者

温温邵管善語故事

餘姚邵校理晉涵同里
管給諫幹珍民部世銘

六合之外談

浸淫於八荒大父而上溯淵源及百代項孔則推占星辰

同里項秀才森孔布衣

錢許則剖析姓氏

錢先生人麟即
文敏尊人與許

大令方亨陳鄉里氏
族及著姓均若指掌

寒暑雜出興居不佳進黃生之綺語

雜蔣子之詼諧

黃縣丞景仁
蔣上舍青耀

快意所及不經於懷幽憂可

倏愈沈疴亦立差於是一室之內光入若電魂來有聲咫尺莫辨

尺莫辨

日今當返子中河之橋覓子委巷之居

主人舊居在中
河橋側委巷中

樓則北隳土牆則中虛淫霖奔乎寢榻酷日炙其庭間吾

子則蓬鬆披髮十歲不足六七有餘讀書則善忘識字則

易畢被笞逃塾眼淚沒鼻聲與百舌競蠻字與蚯蚓爭拙

泥人滿前鼗鼓旁列鄰童里女奔入滿側疥蟲盈手色盡
醜黑唇焦口缺足又病蹙相與積東堂之輒以象太山決
北溝之流以狀溟涬裁枯枝爲林剪木葉作筏回皇一室
巴入復出摩挲雞柵薰炙鼠穴母姊溺愛不復呼喝口目
正倦羹熟呼食食竟卽臥顛倒錯失呼聲如虎不知枕母
之左膝詞尙未竟魂已倏合體肉旣動唇吻開闔親朋畢
賀雜踏一室昔飄飄焉如雲之出山今離離焉若膠之黏
漆嬌兒十一粗識典籍陳詞俚鄙願長者壽彭大夫之八

百

傷知已賦 并序

粵以仲秋之月久疾乍痊孟冬之辰二毛甫擢悲哉無金

石不流之質有蒲柳始謝之姿犬馬之齒過齊太尉之生
年羈旅之期逾晉文公之在外接於晝者希逢舊識覲於
夢者懽若平生以是而思伊其戚矣於時窮谷日短闕門
雪深清渭濁涇共滔滔而東逝太白太乙與蒼蒼而齊色
駕言出遊靡問所之松柏合抱云是含元之基藜蒿尺深
言經端禮之闕鳥飛反鄉值弋者而登俎獸窮走壙遭野
虞而褫革戴日而出炳燭以歸萬事迫於窮冬萬憂生於
長夜秦聲揚不能激已阻之氣魯酒薄不能消未來之憂
叢臺有霜殘月無影鄰笛起於東西鄰鷄鳴乎子亥嗟乎
回風美人之曲楚臣殉之以身鐘鳴落葉之操帝子繼之
以泣大地搏搏非以載愁惟天穹穹豈云可問是知掘井

九仞冀可覲夫泉塗載鬼一車必當逢乎素識復沛郡丈
人之魄或尙沈酣起魯國男子之魂猶應慷慨生我者父
母知我者鮑子嗚乎於是綜其梗槩述其終始虞山邵先
生齊燾大興朱先生筠清苑李先生孔陽尚書錢文敏公
博士全椒朱君沛明經高郵賈君田祖縣丞黃君景仁舅
氏大令琦中表定安定熙几十人賦曰

大化推遷人居其裏感乎通塞遂有憂喜非我所生非我
兄弟情均誼共是曰知已是以元伯入夢巨卿哦而悅然
罕生云亡鄭僑呼曰已矣夫跡不出乎四海壽不逾乎百
年忽承顏而握手乃同心而比肩假以羽翼寵之光顏惟
子之故豈曰能賢感茲逝者云有十焉我之降生攝提之

歲靈均是同兆乎憔悴張儉至而全家傾先大父以外姐

父償大同城工核減帑項貲產遂罄令伯生而慈父背予生六年先鬼瞰其

室地荒荒而出流所居卑隘又枕大池五六月間鳥焚其

巢天盤盤兮如蓋子與太孺人同居一樓樓為鄰火延燒

仲寶嬰於數喪先君子沒後不數年營宏依於渭陽子免

貧不能自存從太孺人兩叔父相繼下世感尊親之義顧子最為外王母龔

及三姊一弟依於外家撫卹之者無不至大爰計日而分糧南阮北阮外家之西

令舅氏亦時周給之啟宸先生所居先生妻董安人元方仲方中表十數人定

與太孺人最善善定熙以庚辰年卒於江西德興署中年十文杏碧桃之

善定熙以乙酉年卒年二十三皆未及娶安定熙尤與子

五定安以乙酉年卒年二十三皆未及娶壬申以後四年皆盼歸

館雨龍竹馬之場啟遺經於別塾讀書舅氏塾中太白守

帆於豫章

舅氏官江西德興知縣外王母就養署

太白守

井而霖雨集太歲在亥而喆人亡外王母以丁亥十月晦日下世年八十四是秋

大霖雨宅前白雲鼯鼠一庭歸彥甫之子舍太孺人以外王母沒後貧

歸興隆里宅中雞犬滿柵別公房之壻鄉余為舅氏實君

子因贄焉二十餘年奉親而處草沒衡門霜飛甕戶齟使臨而

興歎先大父自歙遷陽湖始居白雲谿東後徙縣西大宅

復入官時趙賡西先生官浙江巖使為大尚書來而徒步

母伯兄代購興隆里宅十數椽始定居焉尚書錢文敏公見子所製樂府百首及

遊山詩竒賞之適以事歸遂徒步訪焉東里縞帶投之而

訂交西華葛衫泣然而道故文敏公言與先君子有舊團團如月吳紈

題五字之詩公示以所執扇飄飄凌雲蜀錦寫萬言之賦

鄰人塞徑野叟騎危訝孤童之抗禮驚上客之頻來風蘇蘇而振壁星踈踈而點苔被襟而檐日晷語笑而林花開

於是中外之戚高下之才欣於投紵樂與銜杯五經無雙

爰升講堂青門丈人來於新昌

歲丁亥戊子邵先生主龍城書院講席余偕黃君景

仁受業焉先生嘗呼之為二俊

垂二俊之譽共江夏之黃作論盈篋

余時著論

史數十篇先生奇賞之

唵聲滿廊快新篇之手錄播逸格於詞場惟

崇名之起俄頃譬初日之出搏桑昔者不樂薄遊江干

歲辛

卯朱先生視學安徽一時人士會集最盛如張布衣鳳翔

王水部念孫邵編修晉涵章進士學誠吳孝廉蘭庭高孝

廉文照莊大令所瞿上舍華與余及黃君景仁嚴徐枚馬

皆在幕府而戴吉士震兄弟汪明經中亦時至適館授餐談經則大戴著史則仲援雋勃海之博帶杜扶

風之小冠惟戴斗之碩望彙人倫之偉觀方千里而建節

歷八郡而盤桓前灘後灘孤月濯影上嶺下嶺異花成團

壬辰癸巳兩遊黃山外若齊雲九華復飛屐於虎觀喻得
敬亭采石天門龍眠諸山靡不歷焉

士於龍泉先生致錢詹事大昕程編修晉芳書云甫蒞江南晤洪黃二君其才如龍泉太阿皆萬人敵云

云長江天塹淮海惟揚乘長風而往來逐飛隼而翱翔揖

賈生於江館歲癸巳余在姑熟與賈明經訂交明經年六十餘卽席次王元之高齋韻三首見贈後予

遊維揚又與明經爲焦山海門之遊明經以丙申冬下世著述甚多惜不及見然予交海內士流最衆其質直好義

未有如值朱游於建康朱博士官句容訓導年已七十餘風貌甚古愛人如不及予乙未歲

客句容與相處甚久茅山赤湖百川助流秋雨霽而泛海

十日並列華鐙排而涉岡高談則海若遁跡縱飲則山神

畏狂裁報賤而盈案疊吟篇而滿筐天地運而成冬日月

窮而入夜采薪於嚙指之辰謂丙申冬奉太孺人憂散髮於招魂之

舍皋魚免喪列子遠嫁竹箭貢於

皇庭羈禽遊於日下迎門倒上公之屣傾蓋枉名卿之駕

荀秘監四部之目祕而得傳歲已亥入都館於同歲生阮

孝緒七錄之編聞而願借都下借書惟翁詹事方綱程編

閣每為予假惟寂惟寞實惟隴西秉直德於雕鶚相逸羣

館中本勘校於黃驪房師李先生性清介以御史屢與校士出其門者

人皆謂無私以庚子十月下世余與同門生視舍迨夫執贄之日已鄰屬續之期枕孟喜之郝勉之以易

學絕施讎之手易之以審幾嗚呼此知我者歸於九泉不

知我者謂我胡然甲第則紛紛易主丙舍則蕭蕭數椽車

輪經一而腹痛班馬過而鳴酸山巨源七輩之遊人皆有集

錢文敏公茶山集邵先生玉芝堂集朱先生笥河集賈明

經黃縣丞詩集俱前後已刊行李先生清苑集大令舅氏

素園詩集及朱博孟獻子五人半已不傳從表兄定

士詩皆藏於家沒既蚤不及有所著述錄其平生之語邵先生已下並有

感其臨命之談

文敏公常以識余不早為恨臨沒猶為無
公子中銑中銑言之並屬訂交加禮焉

十句之杯酒有百年之松杉心飛過嶺之樹

大令舅氏以
去年秋沒於

廣東嘉應
州書院

目斷臨河之帆

錢公子中銑以已亥四月入都
補官病發卒於淮安舟中公子

中銑亦於
是年下世

鬼燐紅兮沙磧

縣丞黃君以去年夏扶病自京
師逾太行出雁門始抵安邑病

益殆乃卒
於寓舍

神鐙白兮江潭

謂辛巳年迎表弟
定熙江西之喪

思有窮兮萬

古愁無際予終南

過舊居賦

井序

縣南中河橋之側洪子有舊居焉蓋居之者三世矣後主
者以直賤轉質他族乃更徙焉歲癸巳十一月也室有樓
上下各四楹樓後有池寬可十步霖潦既集亦生鼃魚池
側柔桑一株桃實數樹一箔之蠶春足於食三尺之童秋

足於果倨倨焉廣廣焉不自知其室之陋也然而夏水甫盛則萍藻帶於周廬秋霖乍淫則莓苔生於陰牖出戶之棟黽黽與室鼠競馳糞鄰之垣枯株與薜荔交翳室既荒陋器亦敝敗其木之剝而曲者太夫人之織具也其輒之方而折者予童時之唵几也過之者色不怡居之者樂自若蓋始生焉少長焉及授室焉生子焉歷二十八寒暑乃徙前歲復過之則平池積淤半已作道鄰人以桑翳其室斧其東枝餘者隨墮岸而踣周隄而視則枯條朽蔓無有存者而牆之犖北如昔也復窺其室則敗筵折几無有留者而棟之欲落未葺也里媪巷嫗集者數輩則尙述太夫人之德不忘因感而爲之賦曰

惟吾祖之令德兮冀樂土之是盤

吾祖居歙縣洪源康熙戊子己丑間始遷常州

遵過庭之雅訓兮就婚媾於江干遵家屯於癸甲兮乃巢

毀而不完

吾祖始卜居白雲谿東後以其宅歸趙氏始遷居縣西大宅歲癸巳甲午家事中落乃更徙焉

駐征楫而陸處兮爰構造之無端借大地之尺咫兮規周

天以爲垣逮予躬而三世兮尚營葺之未安詢東鄰之所

業兮云曲簿而織筐沸晨吹於西舍兮職吹簫而給喪連

櫨椽於後巷兮聞永晝之鍛聲井泉清而倚戶兮喧朝夕

之百鏘紛吾廬之衆響兮每夜起而傍徨嘯虛明而入月

兮在離披而漏霜鳴蟲集於唵案兮鼯鼠經其頽梁羌吾

居之何陋兮實先世之此藏桃離離而秋實兮藤宛宛而

春垂風盈扉而自闔兮雨積牆而不圍水東西而十步兮

桑南北以數枝每炎暑之蒸酷兮披後戶之涼颺居陶陶
而自適兮雖屢空而不辭昔先人之食力兮乃終歲而在
行也暨慈親之厲節兮勤日昃而不遑也奉甘糗於尊章
兮爰夜紡而曉經也惟鄰左之責言兮淚泑泑而輟響也
鬻聲慚而自化兮薄俗久而益貞訓鄰姬呂婦道兮舍嫗
集而傾聽迫行之於數紀兮消閨室之競聲憶鄒舍之東
遷兮非垂教於三徙念琴書之去此兮亦豈炫乎仁里惟
居廬之易主兮情紛悵而靡喜犬周巡而不輟兮誰悲鳴
而四起非儔類之是戀兮情亦眷於鳴吠遺縑巾於里媪
兮挂別箴於戶裡環車輪而遠送兮盼百步而不已別遙
遙而六載兮乃屢過乎里門池涓涓而已竭兮桑猗猗而

靡存紆蛇出於毀竇兮宿莽抽其故萌伊茲樓之虛敞兮
乃久處而習魂紛一歲之百夢兮每九十而是賁荷鄰柯
之曲蔭兮感檐日之竒溫思吾親之居此兮亦撫子而抱
孫業去此而適彼兮遂違泰而履屯歲月盈虛人生與俱
前負米而養志茲銜戚而晝居雖爰居而爰處孰倚門而
倚閭昔居庫而亦樂今室廣而增歔悟卅年而成世實一
世而此居旣性與境而皆易吾又何樂此一世之餘

卷施閣文乙集卷三

陽湖洪亮吉著

楚相孫叔敖廟碑

隆古以來吾知之矣高卑甫形君與民近天子猶一方之
吏九重有並耕之說沾體塗足日接于巍巍茅茨土階不
隔于壤壤夔哉上乎九紀以降五遷以前惠民之實事歸
于元首乎由周以來亢錡益密閭闔九重黔首不能歷其
一繁露十二圓顛不能瞻其杪又人列十等國及數圻非
夫實心之宰莫就小康之俗而循吏一傳權輿于司馬春
秋五人兆始于南郢則實惟楚相孫叔敖云相君期思之
鄙夫荆楚之下士推其登進之由投分之始則婉孌之一

人膺薦賢之上賞焉。道由于莊王罷朝，樊姬立侍牀第一。語史臣書于廟策，朝宁三歎尸。臣易其常度，人以謂南服之霸。非君王之謂樊姬之力也。吾以謂令尹之進非虞邱之功，掩袖之效也。然相君本幼而神靈長，而秀羸殆庶隣。于亞聖儀表出于齊俗，有多能之稱，稟無欲之性。一日出見岐頭蛇殺而埋之，啜其泣矣。是將死矣，其誰知之母也。聖善庸何傷乎？子有陰德，是知一成而爲敦蛇邱以之著號。兩首謂之枳妖德，因而自戕及其相也。四境咸喜，一人獨弔相君降赤芾之尊，盱白冠之語，位益高而志下，宦益大而心小，同虎乳之三已，凜狐邱之六言，四牡戒其疾，則利牝馬之貞，一狐怯其溫，方縫殺羊之鞫，利前害後，悟主

于蟬翼泉輕幣重利民于蟻鼻迨夫百事具舉精心爲政
衡前于輓三年而不知輪庖于榻半歲而自易百金之珎
無益而可碎三尺之喙不言而奚事又修僕區之法擇鬻
熊之典舉荆尸之政紹封汝之規惟此文德益之武烈詩
曰元戎十乘軍志曰先聲奪人盛矣哉勝則河雍之濱封
武軍之尸敗則敖鄙之間食嬖人之肉霸業之定由勝算
之先與至夫爲于一日利及千祀築芍陂濬陽泉淮南王
書曰決期思之流以灌雩婁之野皇覽云激沮水之波以
作雲夢之澤後有知者楚南大澤之池誰其嗣之廬江萬
戶之邑謹案祀典曰法施于民勞以定國非是之謂乎夫
其三仕三黜勤拳于當國十世二世綢繆于家事固知尺

帛之暖不逮于生前負薪之困將貽于身後而存資相工之益沒餘伶人之助越襪荆鬼避一名于寢邱戾岡妒谷環萬禩于封邑君子之澤非將斬于五世廉吏可爲行有奮于百代焉廟蓋創于西京之初修于延熹之歲棟宇隳壞則感夢示之兆輪奐聿新則遷秩酬其德迄二千年有舉莫廢知縣謝君慕潘國之政紹魏郡之績方校輿地著士女之志遂覽勝蹟涉名賢之庭見夫曠而不修憬焉而懼又以其地逼隘遂移先賢句子之祠祭于別所增其式廓需以時日廟成乞爲文于石時予方助修縣志校勘圖經陵谷未變長掖之碑已迷淮流方漲北隅之基宛在竊以爲旣食其利必報其功連山之竹木相君之所植九罭

之蕃廩小民之所利平田納秸則一畝浮于十鍾方舟下粟則數鄉濟于百縣昔云堯塉下濕今惟沃饒土土惠此中國遺于孫子矣余感夫循良之首美利之廣宣尼未生不及流遺愛之涕蔦賈先隕無由識治民之效而使東南之民日出而尸祝百世之下春祠而歌舞中興主相聞縣名而動色末世嗣續入崇廡而頒胙則奉法舉職守死善道之吏均未得及焉是以班固作史宰相入于良吏范氏紀載司空儕于牧守莫不舉此成法譜彼風愛斯所謂知致治之體得核實之道矣則夫綰黃綬乘墨車至祠下者流連乎堂戶留覽于豆俎遊哉渺焉蓋移風易俗之事孰不由于此焉

八月十五泛舟白雲谿詩序

小爾忽晴秋花轉媚雲谿小閣月來沉沉錢唐郭生南巷
呂子或攜壺觴遠挈簫篴予與孫君買舟溪港徑可十尺
租才百錢王生居屢疊市甘脆菱栗之屬粢已盈艇與二
三子拍浮其中幃袖作帆折柳代檝西經紅橋東阻北郭
兩岸宿鳥一川遊魚隨波沸騰離樹上下啾啾唧唧聲不
得歇沿谿以北梢有竹樹下蔭密藻寬可彌畝黑白萬羽
浮沉千頭波喧葉飛悉萃其裏從洲以南檐瓦可數橋陰
數尺乃界中外孤簫一聲高樹蒼響呂生歌狂不覺離口
樓閣半里鉤簾一時兒童不眠應以拊掌歌韻欲寂盈觴
勸酬欣羅狂譚樂說舊事忽復相覩首已如沐陰肩旣冷

零露可挹離離星辰方訝西暗川東曉華驚見日出相與
登岸因而賦詩里傳其狂朋訝爲逸嗟乎半世之樂成于
奉親百晝之娛奚若選夕奈何中歲各值多故星辰渝乎
昔約風雨破其奇襄顏非朱而潭鯉驚衣皆麻而林鳥訝
此則攬盈尺之照則逃影于閨聆入秋之聲而離樹却走
也以少歲之遊畢于此夕故振筆序之以貽數子亦以志
不忘耳詩凡若干首時乾隆四十一年丙申八月十五日
越三歲己亥十月二十日序同游者爲錢唐郭鎔同縣呂
星垣孫星衍王育璇凡五人

適王氏亡姑權厝志銘

先君子同產七人其五爲適高氏亡姑歸縣學生其泰早

卒者也姑又次之年最幼與諸兄弟齒故行第七家人咸呼七姑云魯國嬌女扶風幼妹生甫數月卽罹家屯時先王父追償大同城工核減帑項臺符屢下折田券以輸官囊金已空鬻鳴琴而僦屋爰自雲谿里舊第遷于中河橋賃舍脩翫予羽業鴟鴞之四章依依降桑均鳩鳩之七子甌生塵而日宴風吹葦以歲寒然而歌詩甫半悟鹿食之相呼魯論未終結鶉衣而不耻以儒風移其闡識者也乾隆十七年歸國子監生王君汝桂琴瑟靜好松柏悅心樂羊廢讀則正容以悟之周郁耽遊則流涕而私諫尊親嘉其有禮所天感其柔誠無何值歲元枵傷夫奇疾文宣見兆知宏微之倏奄蔣侯示神識悅豫之不永截髮夜禱則

光暗北辰割肌晨饋則血溢衷袵靈場之鐙自燼虛牖之
幔驚開雖戟手爲厲尤避貞姬而搏膺之言親聞弱婢臨
終誦詩而逝未知其祥也嗟乎語怪之錄哲人所懲而無
鬼之言阮生已屈同禡三載侍疾七旬摩笄自刺則慈母
驚啼對食不殮則君姑繞泣痛心誓殯掃跡居樓連廡而
語不聞隣限室而影無踰闕蓋雖雅志竟違而已枯魂待
斃者矣先主父憂之俾啟紗幔以授徒飾蒿簪而教讀童
姬繞案便號經師幼姒入門咸稱弟子亮吉每以春秋暇
日參訊起居念揚水而傷心勉遺孤于忠孝蓋一門兄子
雅愛李膺兩世曠僚惟期沈正先是監生君父某三世未
葬七棺在堂平原則哲孫屢殤信都則全家善病姑每以

爲憂微而入諫某未之急也無何姑亦遘疾以卒烏乎哀哉松枝生室華屋廢爲山邱桃符貼窗餐厨減于藥竈鄭宗孝婦雖代尊章之愆潁川持守將受亡靈之責姑生于雍正五年月日卒以乾隆四十四年七月九日守節二十五年年五十有二無子以翁命撫族子及異姓子各一人甥而禰舅不聞昔經子又生孫望之異日以監生君未葬故權厝于某所禮也積陰之氣旣驟損乎生人陳殯之居或不容於列匱重爲之銘曰

繫中閨之弱質兮夙降志于典墳旣怡松而悅柏兮乃出室而字人嗟三年之失儷兮羌廿載以酬身視篋松之前後兮隨七殯而紛陳厝廛之未可久兮亦即以妥夫貞魂

與孫季逵書

季逵足下日來用力何似亮吉三千里外每有造述手未握管心懸此人雖才分素定亦契慕有獨至也吾輩好尙旣符嗜欲又寡幼不隨搔頭弄姿顧影促步之客以求一時之憐長實思研精蓄神忘寢與食以希一得之獲惟吾年差長憂患頻集坐此不逮足下耳然大馬之齒三十有四距強任之日尙復六年上亦冀展尺寸之効竭志力以報先人下庶幾乘竹帛之聲傳姓名以無慙生我每覽子桓之論日月逝于上體貌衰于下忽然與萬物遷化及長沙所述佚遊荒醉生無益于時死無聞于後是自棄也感此數語掩卷而悲并日而學又傭力之暇餘晷尙富踈野

之質本乏知交雞膠膠則隨暗影以披衣燭就跋則攜素
冊以到枕衣上落虱多而不嫌疑塵浮冠日以積寸非門
外入刺巷側過車不知所處在京邑之內所居界公卿之
間也夫人之知力有限今世之所謂名士或縣心于貴勢
或役志于高名在人者未來在己者已失又或放情于博
奕之趣畢命于花鳥之妍勞瘁旣同歲月共盡若此皆巧
者之失也間嘗自思使揚子雲移研經之術以媚世未必
勝漢廷諸人而坐廢深沉之思韋宏嗣舍著史之長以事
棊未必充吳國上選而并亡漸漬之效二子者專其所獨
至而置其所不能爲足妬耳每以自慙亦惟敢告足下也
錢獻之注爾雅釋地四篇序

重光赤奮若元月吾友錢君獻之注爾疋釋地四篇畢時
予方疏國語地名未竟病疋驩之莫定阻彤魚之乏證旁
采金石搜稽或窮高觀周秦披覽亦徧吟遂得于許氏臯
落證以韓生廣都之壠注乃增乎韋昭卑耳之谿名堪通
于劉向以墮高之文識觸山之語誕由田涓之蹟知惠竇
之傳疑國語共工氏墮高理痺知列子淮南觸山折柱所
由附會也又晉語爲惠公從于涓濱涓濱韓非
子書作 惠竇 茫茫一編窺古獨笑焉蓋六合云渺難從豎亥之
步三古甚遠誰詳伯翳所名而儒者好破舊聞矜其臆獲
甚或變易陵阜移徙川澤此則超北溟之說非屬寓言移
太行之語遂成左證也夫創奇者旣信心之已過守故者
又目證而或離以數雜之居諸窮八埏之浩渺知其難矣

又況高下定名肇于文命川藪著錄仿自元公梁卜之所

未言樊李于焉缺注卽云證之別簡而東陵未究先地昧

于金蘭

漢地理志廬江郡金蘭西北有東陵鄉水經注廬江郡有金蘭縣按金蘭無所考二漢亦無此縣水

經注縣字當有誤

橋山屢移遂神迷于劍舄而能采茲衆說成乎

一是高平廣平皆區方之可指朝陽夕陽非向背之虛號

則前哲之所未及視景純而或過者焉時孫君季逵亦注

山海經削諸迂怪之談證以耳目所及揖夷堅于上世諒

厥用心友襄鄺于六朝均茲命意蓋輿地之學至今日而

言者益廣亦訂之益精也若夫日下之所在息慎之爲方

此之闕疑師夫前聖

適汪氏仲姊哀誄

乾隆四十六年七月十二日日在西隅亮吉客西安使院
得舍弟京師報書知仲姊之喪質明爲位而哭烏乎哀哉
天高不聞喪我哲舅伊惟哲昆閨闈之仁烏乎哀哉秋林
隕風嘉實首墮高厓驚雷迅羽早落固知本傷者擇隕巢
崩者卵斃而未墮之翼迷音于霧雨在林之柯甘志于搖
落是可傷矣不有闡微曷云紀實烏乎哀哉姊諱蓀先府
君次女也先是府君舉一女婉變穎惠未期而殤府君哀
銜于心朱識厥臂及姊生前志宛然固知一嚙之肌恩延
乎再世盈掬之淚沉痛乎九地雖在甫生而孝德已種矣
年及毀齒出就女師誦盤中之詩工九九之筭先王父尤
鍾愛焉年十一遭府君喪育于外家外家女兄弟十數人

聯裾爭華簪首耀玉見姊工作爭走憊之姊曰是貧女職也夫奚以恥桃林披華靡追乎遊讌風雨如晦尤勤于夜織一樓不遷十載于此焉一夕女兄弟十數人共坐室中比舍回祿延及寢室闔坐盡走不知其然姊獨却入室中扶外王母龔太孺人以起人以是異之伯姬待姆無下堂之嫌劉姜叩天獲反風之應誠孝之所格也年十五通論語毛詩蘋藻可掇無忘乎飲泉簞瓢亦怡陶陶乎婁空時伯姊已出室母舊多病一室之故姊實總之檐日杲杲曝先人之賜書樓風蕭蕭值嚴親之諱日聞趙女之哭哀感路人聆樂姬之論化及鄰媪從舅氏妻董安人名知人嘗目姊曰端敏之性必宜爾家柔仁之資亦儀其母爲中外

稱首矣年十八歸國子監生同里汪君德潤相夫有禮處
家以勤上承君姑內接同室汪固巨族食指數千每伏臘
有辰或值宴喜堂寢左右列盈盈之百筵居鄰東西陳爨
爨之束帛侍婢林立行僮候門姊指畫裕如應機俄頃伯
妣歎其敏決姐嫗以爲神明于于焉肅肅焉豐約各適其
宜者也姊事母孝一歲迎養常及十旬亮吉以貧故輟讀
姊哀其志俾得卒業梁安定之室樊嫗繫其輕重李伯度
之學穆姜益其神智姊自處尤約曷澣曷否服前時之嫁
衣一餐再餐同守舍之薄餼然而斂之數質則周六親之
貧倉之屢匱以拯四舍之急蓋廓如也晏如也前後凡產
四男四女今惟一男四女在姊嘗謂亮吉曰吳下之俗出

室之女資千金而靡吝授經之男脯一束而殊慊予每病之是以多金延師先日供具所以教者靡不兼至今子已授室幾有成立而姊遽以卒烏乎哀哉歲在丙申遭吾母喪姊及弟五人拊踊一室自是凡出處動靜必咨姊後行姊哀其衷撫視尤摯逮亮吉舉順天鄉試姊貽書及之勉以世德乃昭昭之言方鏤厥膺而冥冥之棺已闔厥視言旋言歸靡復伯姊之問松耶柏耶遂拱女須之里烏乎哀哉姊生乾隆五年十月二十日卒以今年五月二十五日年四十有一遂爲之誄曰

金瓠不存澤蘭永逝惟姊之孝申乎易世祁祁府君訓方惟義亦越慈母柔規靡替有鶯其文有玉其質哦詩習算

儒服是武城之重光云值閔凶予羽飄搖室遷于東婉孌
諸姬耀羽綴玉姊居其間布裳整肅鄰之不戒燼其東南
赫兮沸湯伊誰克揆一女之勇逾乎百男惟茲諸姬自謂
靡及厥聲英英中外咸集歲華方殷事此夫子伊惟德門
克匡厥事慈親之訓民生在勤惟姊承之富而能貧盤盤
一編朝夕靡替云茲衰祚以望予季疇昔蓬居凝沍之辰
持編夜歸憶姊候門入室爨冰束火不溫姊勸我讀達乎
凌晨承師之資惟姊是恃曾三十年靡慰厥志重泉旣反
見母有期云此弱弟行猶棲棲伯遵乎西仲居于北言旋
言歸靡有年載烏乎哀哉暉暉日月人祈其壽我獨異斯
曷云不驟晏晏室家人慶厥居我獨異斯入室而吁曾瞻

昭之昔戒復泐泐之別淚星離離而幾易魂遙遙而莫逮
昔昔之期夢姊于庭若戒塗而南適勅予季其東征朝陳
書而發冊懼宵兆之不禎詎徂春而徂夏慟一死而一生
烏乎哀哉父兮母兮惟姊從兮曾是鮮民不克共兮欲報
之德惟姊申兮曾是鮮民顏之醜兮情憧憧而哭姊志惋
惋而悼姑感衰宗于五載會十輩而九殂維賈遠之永歎
服仲由之不除庶百年之倏忽永嘉覲于淵塗

晉太康三年地志王隱晉書地道記後敘

靈巖山館叢書大類有三小學家一地理家二諸子家三
地理自山海經至宋敏求長安志凡若干種先生以亮吉
麤知湛濁梢別廣輪每成志地之書輒預校讐之役闕逢

執徐歲壯月所校太康志地道志二卷刊成授簡賓筵命書後序謹按太康三年者晉平吳後第二年也日南之地甫入輿圖建業之宮裁爲郡治于是潘岳著關中之記擊虞成畿服之經王範上交廣之書徐氏作都城之錄唐李善注文選稱太康地志曰都盧國其人善緣高是知州郡之外又志八荒風土之餘兼詳異俗拓地萬里成于二紀劉石未興揚益旣滅令甲之所載典午之最盛云厥後賈耽之述四夷樂史之詳百國蓋灌輿于此與王隱以作史之才著承家之美時則五馬渡江纔逾三主羣龍戰野已沒八州而史氏區區欲按伊洛之圖舉秦函之界雖寰中百縣曾隸方輿而海外十洲同夫飄渺撫劍及伊吾之北

而寒裳阻天限之江者焉今觀所述姑臧穀遠辨方語之
譌大夏令支補職方之闕采聲罔實或見誚于酈元縮籍
陳圖庶亟登于劉氏矣以此編摩推其紹述則仲遠一記
旣導美于太康彥季全編殊有功于處叔飲水知源撫柯
求葉亦沈約魏收之祖也

昭代右文坤輿日闢

皇帝復撰靈河之紀著灤水之源輿書歸于乙部盧牟資
夫

宸斷皇皇大哉莫以尙矣先生才爲命世學旣專家每集
一編期乎匝月煥綠字赤文之采補蘭臺石室之藏茫乎
莫測興望若之驚疑者勿言守闕如之義亮吉不敏遂不

辭而序之云爾

翰林院編修記名御史鉛山蔣先生碑文

先生諱士銓字心餘一字蒼生江西鉛山人也先世吳越著姓彭錢世家祖諱承榮年十數齡值明崇禎甲申之變萇楚無室哀錢王之孫宛童寄生作蔣侯之裔父贈君諱堅生有異稟長而奇貧陳萬游俠惟云濟人申韓刑名祇除害馬年四十六始娶鍾太宜人逾年生先生先生含宏深之資稟倚魁之行年四歲母鍾太宜人教之剪桐葉以習書裁竹枝而成字聲滿一室智百常童時清江楊勤恪公以主事假歸過瑞洪見焉藥肆問奇先知遠志衡門訪友卽號通家越三歲鍾太宜人授九經畢贈君攜先生遊

澤州擊楫于洪河停車于霍太鼓接天之浪定異常鱗嘶
向日之聲知非凡驥館于鳳臺王氏者數年王氏樓接百
棟書連十楹先生達晨而觀終歲已竟時耆師宿儒咸在
驚趙禹之無害傲叔向而不能年二十二始隨贈君還鉛
山其年卽補博士弟子員時左都御史錢唐金公德瑛視
學此方見而異之有奇人之目國器之稱焉逾年丁卯舉
于鄉越十年甲戌以試授內閣中書又二年補官充
誥勅撰文中書舍人明年丁丑成進士改庶常自
朝考及散館皆列第一授編修前後充

武英殿國史館

皇清開國方略文獻通考館纂修官一爲順天鄉試同考

官京察一等記名以御史用省中四戶天象應其休徵海
內一人人倫資其模楷中壘之校秘閣是日兼官永明之
策秀才號稱得士偉矣哉仙人入宦東觀比于神山漢官
定儀太史高于上宰此先生之官也回翔館閣云惟廿年
眺覽巖壑中逾十稔武陽之干進若彼成都之守靜若此
然而凌雲一賦

天子幸其同時涉湘逾年

九重歎其不見是以道馭六合前席聆其極言威約百僚
當官容其卧病長揖之下上相以矜名士之呼

禁中所定此先生之遇也至若雷電倚戶恣其發揮雲霞
在天從其剪裂植筆岱宗並日觀而爭秀回瀾滄溟與混

間而競納五字未竟薄海誦述以迄殊邦一篇甫成薦紳
傳鈔暨于女士鉗耳之造象必乞高文駢臂之傳經亦求
定說繡平原而絲貴圖洗馬而縑空此先生之名也丁卯
乙未遭贈君及鍾太宜人憂哀至卽慟哭無常聲又終鮮
兄弟一妹聯其影形我送舅氏外家均其休戚祁黃羊之
薦友鄭罕虎之知人匹士未達夜寢于焉不寧一夫未安
露坐爲之畫策爲上客設饌無改八口之飢與踈宗合居
依然四壁之立此先生之性也執亢鋸之柄以扶倫紀踞
竈觚之識以飭士林王貢在位風俗比于鄒魯賈范入官
節義崇于性命故臺省未入己生列柏之風惠文欲冠先
起避驄之諺有緇衣好賢之雅墨車疾惡之聲焉此又先

生之志也梁木易萎激湍不駐以乾隆四十年二月二十
四日卒于南昌里第春秋六十有一逾年歸葬鉛山禮也
海內人士知與不知異聲而同哀遠奔而近赴烏乎哀哉
蘭芷之芳不得見霜膏明而炳翠羽而殃痛彭城之廉里
悼交州之讓鄉是知三尺之石不足書百年之行盈掬之
土無以掩蓋代之名而松楸甫萌若有待于恒榦華表旣
峙不無望于歸魂此則化人之委蛻入戶贈之三號柏堂
之隕身臨穴增其一慟亮吉先生前主安定書院時肄業
弟子也文舉之來魯國先蒙小友之呼步舒之至江都遂
受專家之學立碑置墓植表景行烏乎隨武子之德我欲
觀于九京郭有道之文均不慚于一字

蔣定安墓碣

君諱寶善字定安從舅企宸先生幼子也澤門之哲長號
多姿江夏之黃生而善悟爰自能言之歲卽標獨異之稱
母董安人尤愛之以善病未令苦讀也所居枕谿樓閣尤
勝成童後出居外舍軒楹敞日雲麗迷花門徑臨波風踈
振柳羣從旣盛執友時來饒茲勝地之吟益以華年之樂
君顧簡靜無所嗜也默然視層城之移陰與飛鳥之過跡
則停觴以思淒淚忽墮故銅臺之遊乏謝莊而寡韻南皮
之會有吳質而損歡一日偕送友人葬夜歸室冷無寐秋
蟲鳴階鑑薄影于星河弔浮光于林露是夕言神鬼之事
甚悉烏乎君蓋有悟夫年命之靡常而修短之合致者矣

君之卒以瘵疾遺命以道士服歛爲詩若干首母不忍覩亦納諸棺中化形之鶴猶愛羽衣識字之蟬偏隨病骨予與君知愛特甚自君卒及歛嘗守君之寢烏乎哀哉生何如死願入夢以諮魂夜已嚮晨尙陳尸而待瞑君以乾隆三十年歲在乙酉七月二十一日卒年二十有三卽日其年九月附葬于先人之壙禮也君聘妻孫氏誓節不嫁奉姑以居雖無子之痛較甚羊舌而嗜義之念有重熊掌可嘉也矣予爲君從表弟少君三歲懼夫江水衝溢高陵或沉爰爲立石于墓而誌其歲月云

靈巖山館詩集序

夫時至則爲者卿相然絳灌在位斯懷慙于賈生間世一

出者達人而郅管不升亦遜能于諸葛若夫承天八柱之
才勲勒于五岳後帝七車之識名徹于三辰仲寶撰述燮
陰陽而乃成元凱注經盟帶礪而創始則不朽者三事兼
之于一人焉巡撫秋颿先生應靈潮而生有列緯之望先
德則歷相唐宋望族則屢遷吳越爰自生初已徵異表練
時日而拜庚子學春秋而知己亥然而大任欲降始遇已
屯蓋公生十二年而先贈公卽見背焉公秉茲祖德飫聞
母訓厲志于初服授經于蕭寺霜凌晨而辨色月映夕而
開緘靈巖山館者公昔讀書之地也山石壁立披松檜之
天風湖波浩然挹魚龍之奇氣命世之學根于此矣濟物
之量兆其端云集之所由名也迨乎釋褐早歲襄職

禁庭鄴侯之稱典客國士無雙茂陵之策平津漢廷第一
以此達才冠茲朝彥允矣遂復百縑市紙旬日而賦三都
十吏侍書一晝而揮百牘樂彥輔之名言劉穆之之幹識
公殆兼之維時官京師者贈太傅錢文端公工部尙書裘
文達公刑部侍郎贈尙書錢文敏公暨大興朱先生筠禮
部侍郎錢君載少詹事錢君大昕編修蔣君士銓按察司
王君和從舅氏蔣先生和寧皆海內偉人士林碩望交滿
一世尤厚于公倡酬之篇于焉以富未幾

帝知茂倩之深人望安石之切出蓬觀而建節過隴坂而
行部迄開府于全陝攝節于甘涼十年之中奇勲數著遂
膺茲

殊寵

錫以崇階涿郡三綬表應物之才會昌一品名等身之集
而公事所屈出玉門者萬里持節所及歷鳥道之百盤秦
州書事之作野老誦其辭太白禱雨之章屬吏傳于口惠
愛形于著述訓誡不斷于文誥自乾隆丙戌以後至是凡
得詩若干篇台前所作編爲靈巖山館詩集若干卷神明
之範非所識矣意度所在微得言與何則雅頌旣遙騷歌
亦古斷于唐代不乏達人曲江感寓之篇元相言情之作
常侍七日之寄中書三楚之唵無不弁冕一朝楷模來禩
然或擷美人之香草殊少壯懷類澤士之行唵亦乖偉望
求其稱斯名寔符于德度者實惟難之若公前後之所作

也魏行人之念母秦康公之送舅陸平原之勗弟鮑東海之寄妹暨于友誼尤富篇章山公致叔夜之牋庾令問深源之牘甚或慰耿恭于絕域書至而涌靈泉弔温序于高原事久而含生氣性情之故有獨摯者焉上若九如所以答君貺五箴所以達下情韋孟愛君辭皆悱惻劉向對上言必懇誠是又求匪躬之節必于曾閔之門陳大雅之音先洗江徐之習者焉若乃際天人之學恢八極之槩沉想極于羲軒大氣包乎垓宇含墨未吐先翻積石之源擲筆而前卽有終隆之勢匪由人力殆降自天固知崇朝而雨天下必屬太山之雲盈寸而燭九幽實惟暘谷之日夫豈蓬蓬焉燭燭焉寸明尺澤之所可擬乎授簡暇時命爲之

序亮吉孤露偏同聞知獨陋宋楮刻而無用鄭璞操而見
知稱孔融之小友事涉抗顏受蕭奮之專經義當北面歷
茲年載備極讌談昔者彥升弁文憲之集云以述恩陳留
序江夏之文藉之垂法今之握管義亦云然至若勲名之
昭著惠政之周流則蟠松生徑將參召伯之棠多士在門
行闢孫宏之閣其紀于

國史著于金石者將與垂山惇物共不朽焉非所及矣

卷施閣文乙集卷四

陽湖洪亮吉著

與孫季逵書

季逵足下僕遠閱千里不覩一士日惟陳書頽仰宇宙夜
或秉燭驅役魂夢昨已冬始寒尤逼人狂風一來吹卷出
戶稍遲未覓已過墻外南鄰朽桑蟲厚逾寸敗葉旣盡時
來嚙人車聲過巷床几皆動土旣不實條陷窟穴離離黃
蒿乃長屋角閒廬積畝反不生草地幸稍遠掩戶避客偶
出酬接皆至失歡一再以思未識何故計念足下顧戀墳
墓思遂南歸寄跡丙舍而田不滿頃松才盈寸溝水未活
谿橋不成以此數事尙遲年載當復移家近冢就姊謀居

對鵲營巢徙魚築宅林花悅魂水鳥養性招邀耆童呵叱
鄰狗一屢之外更築生壙門皆東開易見日月穴必西向
暱就父母松陰一樹承以梅株魚田半頃園此蟹斲更望
足下能來同之當于屋旁爲構數室贍身之具取給園蔬
歸魂之棺仰此林木時直霜露言羅雞豚祀親之餘謀以
醉客如此數歲卽復奄忽良可不恨嗟乎積瘁之士寡至
四十者況開篋而視已有傳書入隧以觀全具骨肉後世
知我不詳何人及身而思惟有足下自非親暱誰能深言
勉謀殮饗幸蓄光彩

重修唐太宗廟碑記

蓋聞天眷有德五運所以疊隆民報惟功百世而有必祀

矧大矣遠矣聿臻上治之休唐哉皇哉爰同中古之號則黃帝之壽三百以畏其神炎宗之廟六十思廣其報者矣醴泉縣唐太宗廟者自宋建隆之歲創自東郊逮明萬歷之年移茲南郭嗣後百有餘歲曠而勿修守土者懼焉請于上官發茲中帑銀凡九千有奇工甫數月而畢乾隆四十五年歲在庚子也天作高山成萬年之寢室漢立原廟藏一帝之衣冠固知魂魄樂遊之地近在武功神明永聚之鄉先瞻谷口祀典所以重與夫閔位不列則嗣漢者首唐大統有開則名宗而實祖必推其始有可言焉爰自黃星旣見天習瓜分黑水羣飛民隨波沸未嘗知九州百縣統于盈寸之圭四海萬夫責成一人之抱金宿則時時入

斗玉璽則頻頻出宮天地之厭亂至矣神人之望治切矣
于是六合再朗成于戊午之朝星辰忽降光茲甲乙之館
允矣哉太平之運兆于開皇十八年乎一治一亂運天地
之生前聖後聖拯斯民之死故上古未奠則八螯開媯氏
之勲中天未平則雙龍建神禹之績近古未靖則六馬昭
唐室之功亦越萬年甫聞三聖則凌晉跨漢越秦軼周者
焉尤可異者禮樂征伐並曜一時文德武勲兼隆俄頃定
龍鯨之駭浪握管而賦小池戢兕虎之雄威擘箋而唵艷
體何其盛也美矣君哉是以廿三年之政紀在史官十八
士之文壓于御製梁魏二武對金甲而顏慙高光兩朝見
華詞而色沮者也至于自家及國則畧跡論心陳混一之

策奮袂而起王師挈九五之尊拱手而歸嚴父此則漢尊
太上終非有位之稱周得武王方有無憂之實卽或闕伯
搆釁元武貽譏此之播稱或云慙德不知西京歌尺布斗
粟廟亦稱宗東征賦取子毀巢名無嫌聖恢恢乎包舉天
人之槩非一端可議者乎知縣蔣君宰斯三載禮祀歷時
護青蒼之冢樹繚以紅墻法太紫之星垣建茲黃屋三過
昭陵之作世遜其工式瞻畫象之文人推其博當惟新之
落成乃徵詞而授簡亮吉再辭不獲三歎以興昔者龍鳳
挺質表偉度于書生今茲爨癩負文紀殊勲于下士則通
天峩峩曾嘉沈炯之表漳水浩浩永鑒陸機之文英爽邁
昔者諒鑒觀在今也遂使兒童父老嬉遊忘天日之尊榘

棟几筵環拱聚川原之勢他日者過驗穹碑來觀典禮庶
幾衝山之風忽起西接上郡之祠如龍之雲怒飛東連豐
水之廟云爾

錄楊起文白雲樓詩序

白雲樓詩上下二卷今錄作一卷予觀其下筆不凡寄思
無朕回視聽于內而運徑寸于外一世之事不入于戶域
而千載之念時輟其餐寢茫昧于衣履之近而振悟于丘
索之表徹卷而視以鷄犬爲麟鳳枕軸而卧疑妻子若聖
賢故其言多古裏意寡近韻若曙色未啟天有昭回之星
秋飈乍興原多凌歷之響林木幽蒨欲晤言于山鬼宮徵
離合非有心于作者推其志亦欲混哀樂于一致然辭愈

達而思幽平古今于俄頃然心雖長而旨短此則達人促
朝露之期而撫編饒駒隙之感者矣吾鄉論詩者以同時
若干人合君爲六逸然觀其筆墨所至寄意所極憚格南
田集尙不能獲其彷彿則不欲更論也茂挺抒華于唐代
應德發藻于有明啟文振秀于

本朝蓋吾鄉詩人之冠也君曾孫毓舒與余善亦學君之
爲詩而意識限之上章因敦歲余月錄君詩竟因序數語
于篇首亦以明吾鄉詩之足傳者止此數人俾步趨者知
所嚮往也

祭保母王氏文

并引

保母王氏父本土族歸于某某無賴儻外家臨谿屋二間

貧不能出直母因歷乳兄及姊以償之亮吉生時母年五十餘司保抱者又數歲後母老且寡轉徙寄食逮亮吉補學官弟子母來賀因流涕語曰吾有五女而無子以後事累郎君矣及母卒亮吉適客外竟負前諾歸詢其女又不告母葬所因設薄醮招其魂以祭之曰

五女之門盜所不過母而遭此亦云家禍嗟嗟五女乃嗇一餐七十之年渺焉寡歡惟母之亡實惟我愆重泉之恨曩昔之言母難復生我述母德惟母之德人所不克烏呼藐孤而敢忘昔零丁孤露育于舅室兒之告飢母曾減食負而過塾聞讀以思母分傭錢兒迺就師皤皤黃髮助我親喜聞師有言兒讀善記兒童而冠厥聲英英猶未若母

仍呼以名如何有家不母之顧非我之尤實母之故周廚
歷室慨我之貧粟絲所入言當奉親維時我思母庶耆耄
我之報母非止一日囊錢攜贈于河之干母兮含悽送我
出門昔母之居廛荒茂草秋桃倚井其實惟好疇昔之辰
升樹而嬉攀枝撫實棘猶在衣今茲之來桃顛母死踟躕
半畝頽仰一世母亡誰知母葬未識負母何言呼天以擗
敢陳薄醪招此遺魂告子若孫無忘母恩

孫季述述倉頡篇序

倉頡篇者吾友孫季述之所述也粵若龜浮效象兔泣垂
文視狗知畫犬之形伏禾制禿人之字子夏釋物辨丁乎
魚枕秦醫說疾測蠱于蟲皿徵之竹素靡不粲然泉乎左

隸之分遂失前人之誼安國不以篆文存經而易之隸古
康成頗以便讀傳教而厯存故書是以白羊之印乖謬乎
六書鳥馬之文微茫于三寫必窮其失可得言焉漢世諸
儒深研象數漸忽蟲文言星者日下從生說地者土力合
乙箸衣于求而古文味增竹于匪而物象離以曲爲聲失
豐形之字悒加食爲餼違稍氣之本訓習甲乙之文誰分
鈎識作乙信弅金之識孰辨處者爲留自茲以降益難更
僕參首以亼能足爲三犯从夂己之形般有丹青之義書
狃狃而字改傳汎汎而文增爾雅變夫鼃醜玉篇益其鼃
屬旬改爲圍音或符乎漢碣薛譌爲薩字始缺于儒書楞
以四方切從十數此則呂顧偶亂于前陸孔復乖于後者

矣求其合者則八么子系一士弓長草肅謠齊木豆讖晉
委妥可通非姜鼎而始見近芹本一證周彝而益明此則
謠詠合于經文假借通乎字例者也至若作旅車敦古義
莫釋帝儻之裔姓篡亡徵榿榘不登于昔編箇箇互殊于
傳注寧非闕如之義當同于聖者乎夫篆之降隸增減見
于斯篇文以括音精博昭于許說今召陵之書廣傳于學
者而上蔡之論半墮于梵編此季逵所急爲搜輯也亮吉
年逾數雜學歷五稊別石鼓之舍志在盍簪訪倉史之臺
快觀此冊云爾

南樓贈書圖記

南樓者外王母龔太孺人怡老之室也予以髫年過承識

愛別異諸孫之列策其凌絕之程先是外王父嵎峨君喜貯書有田十雙歲以半所入購積軸歷數十年而倉粟未滿書簽已盈又赴洛之後增蓄異書校閣之餘兼存別本每當朱明入序赫日縣庭陳萬卷于軒楹散羣函于室牖仲達之簡雨急自收高鳳之居麥漂不顧蓋自嵎峨君卒後輒遇伏日舉而行之一日暴書之暇外王母抽數冊以授曰吾家代衰矣能讀是者其惟甥乎予時十歲再拜受之迄今又二十寒暑追維往昔遽興九地之嗟時慟深恩頻展兩楹之殯蠹窺人而漸老螢入簡而不光陳留丈人之語王粲念之而覺悲扶風大家之書馬嚴續之而未竟又況校閒庭之月旦已乏人知授外氏之遺聞先無母問

淚浮于卷痛寄斯圖時乾隆四十四年十月八日是爲記
嘉禾序

兵部侍郎兼都察院右副都御史巡撫陝西等處地方兼
理糧餉軍務加一品服畢公再蒞陝西之二年今

上四十六年也燕康公之分陝棠表其年魏成侯之治秦
釜銘其德來歌去思于于乎原考六郡百縣循循乎成法
蓋下車未幾而四月登麥先慶有年三時勉農不遺厥力
皇皇乎新政之首效也未幾涼州一隅番回肆逆公靡分
畛域首運機宜元甲雕戈具軍于一旦白鹽赤黍籌餉于
千里

天子嘉焉叔子緩帶不張鈴閣之威元長黑頭早

錫上公之服偉畫所至蠡爾藉寧和風旣蒸應者日至于
是十日一雨天瑞實惟醴泉雙岐合莖地寶名曰嘉穀則
長安縣某鄉之某鄙一本兩穗之禾實生焉原露未晞旬
人以告猗與美哉于傳有之嘉禾因而名冊其效遠矣美
稷以之立縣公方抑然不敢自居欲附捷書因茲入
告此則江夏獻冊字美乎方書陽翟陳圖名貞于瑞志者
矣且禾名同本異類革心之應也種曰銜滋同生樂化之
效也匪惟政祥抑亦

國瑞亮吉以爲當立茲樂石貽諸後政遂原而序之云爾
蔣青容先生冬青樹樂府序

蓋聲何哀怨杜鵑爲望帝之魂變亦蒼皇援雀盡從軍之

侶遇金人于灞上能言茂陵值銅駝于棘中誰知典午又
況南遷烽火北狩軒輿言乎締造則東南置尉拓疆無劉
凖之雄及此淪胥則五百從亡歸骨少田橫之島嗟乎江
山半壁非僊人劫外之碁金粉六朝盡才子傷心之賦今
之作者意在斯乎昔者申徒下士赴清冷而不辭精衛冤
禽投滄溟而不返此之挺質本視鴻毛未有九重端穆辭
黃屋而乘桴萬乘輝皇褰龍裳而蹈海此卽鱗臣効順不
能使東海之波不揚而孱主奚堪更非若南征之舟不復
者矣夫赤眚構禍隆準之窳斯開臨洮肆凶銅馬之帝遭
酷不過行同竊鈇號等摸金雖下竭于三泉尙不讐于枯
骨而此之慘虐更所難言斷首剝膚毀裳裂冕烏呼吞炭

雖忠智伯之頭已漆納肝較晚懿公之體先殘至于掩骼
之仁出自采薇之士問中興之顯運荒土數坏慨六葉之
承華冬青一樹卽遺黎之感槩何補于在天之沈痛也哉
雖然萋宏化碧激衰周義士之心比干剖心作洛邑頑民
之氣焚山之節旣顯之推匪石之誠亦逾生畝若夫廬陵
信陽之大節其效龍逢夷叔而分塗者乎迨至風雷一警
遂歸先軫之元陵谷已遷尙識王琳之首哀矣怨矣求仁
得仁蓋士感知已伯牙碎琴義激友生漸離擊筑效包胥
之慟哭慷慨登臺賦宋玉之大招旁皇生祭三百年之運
已盡庚申一二士之心猶回天地覆亡之慘從古無斯而
忠義之忱亦于今爲烈者焉他若生而玉食長自天家山

陽哀痛之語命在何時樂陵永訣之言兒乎奚罪柴車而
辭鳳闕破夢而入龍沙烏乎富貴已空神仙何在徒使玉
輦金輿禮化人于西域黃冠繡舄望紫氣于東來此則靈
妃入道固無心不死之方而室主移宮獨甚此未亡之痛
者也况夫微子朝周猶存禮樂項伯入漢僅事功名韓王
孫之晚節漂母見而益哀劉宗室之陳符列宗聞而大恥
他若運屬當塗華子魚尚稱名士言歸石趙王夷甫更侈
清談彼人是哉何足笑也嗟乎蘭臺著史婦豎不能識其
辭隴西隳聲搢紳或爲諱其語何似取陳留之軼行抵掌
而說中郎借赤壁之遺聞快意而談諸葛則人驚伯有或
能廣閭巷之傳而鬼有董狐殊堪增竹素之色先生于是

屬爲之序遂著于編若夫聲音之道文字之工則讀臧洪
之傳髮自衝冠登廣武之原皆先裂血抑至此乎非可詳
矣

長儷閣遺象贊

長儷閣者吾友孫君季述妻王孺人之棲止孫君悼亡時
所署者也桃枝亘幔松陰灑窗歸魂之房入銀燭而不輝
同心之帳棲流塵而易故墮釵在握遺粉懸容爰成永逝
之文迺有傷心之賦然而草本忘憂禽原並命窗深共坐
紅圍四面之花韻險偕吟墨染崇朝之頰春寒而手握微
温酒冷而衣香互覆又況華星被野晨露迷原翩爾來斯
温其如玉爪痕在竹畫自何年衫影驚魚窺來靜夜比肩

而尋幽墅擁背而候江湖境難淹于百年魂遂斷于五稔
夫三辰離離初無停鏡之影四海浩浩曾塵駐波之萍葉
離枝而咎風禽頽巢而怨雨達士之識已悟無生騷人之
吟方悲未艾于是遵茲往屬寫彼遺形唇朱不塗帟碧猶
摺誓長帷而不娶留空室以自娛可爲情逾于分哀過其
禮者矣象成屬爲之贊僕固未之許也繼思散其哀以達
其志爰爲之書其首云

朝暉嫌明春色賤冶零愁淒川積想傾野魂兮雖斷猶手
一編韶華幾時落葉積前悟浮生之易盡兮亦何必希乎
大年

送汪劍潭南歸序

夏序忽來獨居已覺絺裘更雜以風雨晝長宵短興寐
不定置鷄于窗將以警旦乃復鳴夜籠鐙于牖所藉燭暗
不覺妨月意緒乖違跬步錯失貽譏儕輩匿笑臧獲蓋自
子欲歸已不憚累日幽憂不已將成疾疾繼而念之吾與
子食桐江之魚棄子悉已成鯉擘山院之果遺核又復抽
林蓋山川悠悠言笑宴宴不自知元思之減華色易醜也
且吾與子得曜影數紀振響十步中下之士樂與齒序瓜
桃之戚識其嗜好閉戶以處雄長婢僕出室而遊亦有處
所無昧于明以視日星不跛于履以羞厚地握管徑寸上
溯結繩申紙逾尺下窮倚杵自謂鬥毛角而俊視植物而
靈者矣何必移原隰之草萃于一丘招高下之鳥同棲一

樹始欣欣合色喈喈均響哉吾子行矣奔轂戒疾涉川鑿
沈凡百榮利以爲子箴憂無傷性喜無蕩心百歲相保有
此骨肉怡怡飲食跂跂動作從此及老脫復偶遭髮白面
皺起而相嘲勞于聲于蚓窾假一寐于蟻垤冥冥于萬古
憤憤于七尺無彙于覆載無害于動植蓋同形而化者不
無聖賢代我而生者又有孫子也子行矣子不能飲勸子
以食子食而咽歌以蕩魄歌曰

風起匝地雨落晦天念子不見卽如百年百年亦勞有生
有死其間握手乃在吾子此無彼厭子不我嗔飽食嬉遊
以說性真各知其短愛契所長閱于歲時殊忘否臧誰驅
而出誰挺而走念子之歸倏如驚獸投林覓柯不擇其音

愧我之留得不怪禽獸則有穴禽無故枝歌曰贈子孰知
我思

與崔禮卿書

禮卿足下霖雨南北泥塗接天驚禽不飛巢樹越月東渡
清濟西抵河洛麻麥千里川原百重披林知晨映水識夕
登陟勞頓宿患轉失犇車乎滎陽覆轍乎成皋暑疾破腹
言停偃師炎風裂衣乃徑函谷時值深夜危連十車土囊
陰陰千丈落月離樹冠斗鷓巢冒星車聲崩雷雜以谷響
特復卧起不識昕夕沈沈燭光映曉青紫驚沙濛濛當午
黃赤如此三日始抵平陸更復馬首斷雲千里隨夢雁足
飛雨崇朝灑襟雲山恢奇殊涉遐想念切吾弟南行涉江

帆驚蛟龍棹壓魚鼈茫茫混混始復觀海殊足增長氣識
濬鑿心智海日上樹披蓬而觀江豚逐舟瞠目而視者矣
歲華不居游讌已極往者都下羣從如龍連輿接茵尤在
吾弟齋居盤盤言笑宴宴晨樹撼鵲于以極興夜寢列燭
求其悅魂始知美酒一石增劉伶之狂嘉言三復損臧仲
之疾非昆季之愛不及此矣近聞楊生夢符遽遭此厄僕
亦遠病重有姊喪秋堂流螢不夕已卧東陽帶圍減此盈
握潘岳病髮時元一莖追亡悼存撫近念遠以此慘戚遂
減跳盪時復咄咄如何如何吾弟方在盛年尤復嗜學六
經收其視聽羣史供其口實暇則縱棹幽遠振袂原野壺
觴旣列遠憶狂客松徑落落肖我直致則亦西望不樂北

遊方遙丁生丁生履端共此寥寂哲晷既別亦寡音耗遠

聞太公循績斯茂所得如此并報吾弟東鴻若西有以荅

我

四哀詩并序

秋日苦雨南山多陰校理程君晉芳忽焉溘逝悲盈于中

十旬輟業又頻得友人書知贊善鄭先生虎文文學唐先

生為垣暨司務楊君仁基相繼物故傷哉傷哉命也命也

予穉齒未毀執經豫章之門元髮乍束交友宏農之館耽

吟握管則贊善播其英聲研經著書則校理長其浮譽歲

月既往中心藏之師友之間人倫盡矣于是擇窮陰沍寒

之日招秦吳燕越之魂陳觴而言為位以哭哀哉原夫贊

善之志古人是期梁傳太息之衰步兵痛哭之槩操一于此卽能損年兼而有之斯多戚緒然而談縱八極戢黃髮以入棺交滿海寓御布衾而辭世雖云悲也可無恨焉文學自少至老爲詩五千窮年累時質券數百授經之席移市門而便沽問奇之酒呼里魁而對飲推其梗槩實不可一世焉校理生有積貲沒逢奇窘將居北山之北訪友南山之南四馬駱駝載傳書而來雙旌蕭蕭斂體魄以去是可哀矣司務累葉清華一門要劇而焚研之後旣歎數奇毀巢之餘又窘陰雨命之不永憂殆傷人者焉嗟乎統而言之贊善之達不勝其憂文學之窮未改其樂是知沈魄逝矣招雍門而鼓琴天懷廓然逢劉伶而市飲校理則魂

無避債之所司務則死餘對獄之驚朝露之痛不越乎兼
旬秋霜之威遂凌乎萬物日之夕矣鑒素月而不輝天何
言哉隨大化而俱去百年之壽不能與麋鹿爭十步之外
或當與松柏處所以各述其衷抱繫之以詩者亦以通存
沒之情均哀樂之致也詩曰

猗惟贊善身沒道存下視百世心縈古人積憂炎炎寢室

以焚

室前毀于火

逝川東來高岸亦崩沈痾作書告我以誠魂

如可招越之東門烏呼文學以酒自晦闔地軒天沉旬緬
載誰云閉門默坐而慨草元未就西日歸海質券雖積囊
錢猶在欲奠先生吳之里市校理覃覃士流之冠湛彼經
術足于文瀾著書何多云以待刪說士之甘一世所難宦

既不達西行入關驪歌召哀往而不還神氣所聚歸于南山司務英英弱年嗜古玉立旣振金聲徐吐挹茲襟抱孰云步武方秋之朔如月之午頻傷疾遽委蒿土縣棺有待殯此江澗

方
冊
三
十
五
冊

一
四

卷施閣文乙集卷五

陽湖洪亮吉著

南華九老會倡和詩序

乾隆十四年吾鄉莊氏之致仕居里中者凡九人曰禮部
郎中清度年九十曰福建按察使令翼年八十四曰臨洮
府知府祖詒年八十二曰黃梅縣知縣贈文選司主事樵
年六十九曰密縣知縣封福建臺灣兵備道歆年六十六
曰開州知州學愈年六十三曰湖南石門縣知縣封甘肅
寧州知州柏承年六十三曰射洪縣知縣贈順天府南路
同知大椿年六十二曰溫處兵備道封禮部右侍郎柱年
六十因爲南華九老會各繫以詩其宗之年及六十而未

預斯會者復二十一人各依韻和焉盛矣哉非特宗族里
鄙之榮蓋昇平之僅事矣且數公者旣無巧宦之目仕有
廉吏之聲彈琴之治甫成抽簪之情已切其在官也種秫
之田無五十畝其謝事也成都之桑少八百株貴而能貧
知止不殆此其高致一也居鄉與人子言孝與人弟言弟
有公綽之不欲法嚴平之自然風貌樸誠肖其披服卜商
不假之蓋酷暑而詎張晏嬰已敝之裘奇寒而始御其高
致又一也東西之第匪遙釣遊之所不乏葭莊之魚涉春
而已種蘆墅之菱經秋而可采方伯別業實曰青山尙書
廢園亦名來鶴永日永夕斯陶斯遊觀邦國之蜡曳杖而
必偕賽里社之神聯裾而早集其高致又一也維時風俗

既淳里居最樂盈門頽白之叟占野屢豐之年然而刻魚
入饌行于鼎食之家束脯爲禮饋彼歲時之會從大夫之
後亦竟徒行避長吏之庭有同由徑薦紳之讌市僧不列
於筵士夫之尊吏胥罕識其面均得遂彼恬適享其大年
其高致又一也家世傳學則有夏侯代不曠僚實惟沈氏
是以隨會旣老變句嗣而登朝望之未休育咸皆成膺仕
門閥之盛里鄙榮之而數公者處貴寵而不矜與寒素而
鈞禮羣從之謹飭者賜嘉果而必捧子弟之通脫者逢乘
馬而亦數此則十室之邑忠信所存百年之宗家法斯在
其高致又一也予少以孤童逮承顏色高山仰止不去於
懷乃文考欲賦靈光之殿已頽孔融成童老成之人先謝

是可戚矣石門君孫宇遠世其家學早有令聞懼良會之
就湮遺翰之放失遂各係以小傳並索序于余余惟九世
卿族首數乎甯俞萬石素風或衰于石慶花樹之法不及
于百載棠棣之碑僅傳于數紀皆名宗之所宜鑒也故原
其本末序之所以紀人瑞之符亦以垂後來之則云爾

復錢少詹書

亮吉頓首少詹先生閣下比惟道履勝常義蘊益遂禮堂
暇日惟寫六經中壘算年漸成七略幸甚幸甚亮吉雖未
及閣下之門然每得閣下一書輒憫其嗜古之誠爲析諸
疑義所在則亮吉之師閣下已久矣承爲刊定三國疆域
數條除淵泉漢葭前已自悟其失隨卽更定餘謹一一如

來教也又承示唐開成石經左傳與今本異同處甚為精

審然如旦辟左右之旦誤為且少齊有寵之齊誤為姜石

經之外北宋塹本及淳化本尚皆不譌益知亭林顧氏之

言為不足據比來以諸書釐正左氏經傳本文至數十處

如鄆郟二邑缺其一方文公六年淇水兩言全成脫簡桓公十三年

增子于適宣公二年脫侯為齊桓公六年均係本文非為小失此之

增損或尚不至戾于古也又有杜氏時經傳本已誤者如

酺車之為輔衿服之為均亦惟求杜氏已前諸儒之說實

可據依者間為釐定稍疑即闕之俟彙本粗定尚當質之

閣下耳兩年以來左傳詁以外復成乾隆府聽州縣志五

十卷大類亦同元和郡縣而于兩漢故城歷朝舊縣河渠

之興廢水道之遷徙頗加詳焉又五金利用詳所出之山
近監便民記置場之所其有爲吉甫所載而今則略者如
莊子觀魚之臺滕王宴賓之閣並登佛寺兼采道家以爲
無裨于輿地之實勿收也惟水道有十數條不敢仍古人
之失而又不能遽定者謹略述數事就正焉許君云河南
有滎灃二水同出密縣淮南王書及酈道元注讀均如急
敕之敕今以目驗及口音斷之疑非二水也水經云漢水
有沮沔數名同出狼谷而山海經及常璩國志又別標鮒
魚之源今以昔名及今地核之又知實一水也他若爾雅
東方之斥山疑卽今青州之沂山以字近而誤漢志廬江
之決水疑卽爲說文之漚水以音近而淆凡此未知有當

與否幸閣下有以教之也近時樸學之士皆從閣下問受閣下猶子獻之及李君生甫均亮吉所心折然獻之注爾雅而必書雅爲疋遂致西安書手驟爲亦匹之呼李君字許齋而必書許爲饜乃令近時齒錄分鐫無邑之字好古似微過也附近所見聞以博夫子之莞爾亮吉再頓首不宣

湖廣道監察御史蔣先生別傳

先生諱和寧字畊叔世爲武進人雍正二年分縣又爲陽湖人其生卒歲月行事官闕具於家狀甚詳其從甥洪亮吉以爲古之顯於當時名於後世者皆有別傳見於載記自東方朔至夏統已一百十人所以襄志乘之闕遺備史

家之搜采焉爰甄其遺事以爲之傳曰先生以強仕之日策名杖鄉之年去職其在朝也官不越五品其家居也遊不出千里而許與氣類導迎善氣以是抱人倫之鑒負海內之望者三十年迨卒之日多士之在朝在家者皆爲位而哭相向失聲蓋自東漢許郭有唐韓李以來至今日僅見云而又內行醇備友誼諄篤李元禮之仕宦不異神仙衛叔寶之風華無傷道範若綜其高致可爲神往者焉夫世之獎許爲襄者或因片言之善或錄一技之長皆本素知由于歷試而先生則聞聲已識望氣先知王猛鬻畚之歲卽推公輔之才孝侯射虎之前已卜非常之器每當羣賢高會達士盈門推白屋之童牙詡後門之寒峻致之高

坐無異賓師望彼成名有逾子弟非夫性情之擊能若已
有之如此乎又以士之曠遠歷落者類不護細行好爲大
言史魚爲盜荀況以之叢譏顏回復生禰衡因而隕首而
先生則百喙以辯萬端曲全憤此囂凌形于辭色以巷伯
之疾惡成緇衣之好賢保全者實多云家無一頃之田百
金之產而九族之親來而共食一面之識貧而解衣重門
洞開雖疎逖而可入城府坦白卽鄙吝而必言不移牀遠
客故人樂其寬或破產酬酢故世稱其達多能本乎天性
思理成于自然自夫家居或營小築平泉一石亦徵磊落
之襄龍門半池乃有回環之勢聆寒谷之竹早識陰陽移
遠圃之花先明向背將毋以濟物之量寓之于泉石者乎

若夫朗月入抱莫喻其高。裹白雲在天。思成其春服。守馬
卿之四壁。食何曾之萬錢。有柳下之阨窮。御孟嘗之狐白。
此則不可無一學步。而卽非誰其嗣之望塵。而不及者矣。
先生于學。或有不窺而識。無乎不貫。雄博如劉子駿。授太
元而亦觀逸才。如陸士雲。見都賦而驚歎。至于商榷一字。
如星位之妥于天。領悟半言。若時雨之零于物。則微言之
未絕視古人。而莫愧者。歟。亮吉少以孤童育于外氏。執畚
挈。榼偶影于僮奴。食淡衣麤。視同于傭保。先生識之于糞
壤之內。拔之于羣從之中。同舍改觀。里閭致敬。憫康伯之
陋。則輦書以貽之。傷羊曇之貧。則賭墅以乞之。嗟乎士感
知己。無時可忘我。送舅氏嘔焉而泣。秦人之思鉞虎。欲隕

百身晉客之念范公將通九地尚何言哉他日信陵之客張耳有推賢之名潁川之門景顧成行義之實是則後死者之責而先生之所望矣

文學呂先生墓表

先生諱祖輝字杏標始祖泰然南宋時知吉州始自婺州之金華遷宜興十七傳而諱仲始者復遷武進遂世爲武進人太末三徙不越會稽西蠡一宗別于丞相祖諱佺齡父諱官山學官弟子員行誼文學爲里鄙推重稱靜軒先生先生其次子也自其幼時已有成人之度其事親也本樸誠其交友也崇節槩里中父老悚然異焉不有君子斯焉取斯刑于寡妻孝乎惟孝靜軒君及母許孺人皆鍾愛

之未幾學業頓進聲譽赫然項橐七歲先稱闕里之師施
讎幼童已擅專家之學自是教授里中者垂數十年蹤跡
所至北不越乎大江東不及乎滄海西登于牛首南極于
蛟渚一歲之中閉戶者常及十月六經之師著錄者乃至
百輩操朱墨之管而目以之眇書甲乙之籤而指爲之繭
默思而坐則屢銳繩床問字而前則幾穿戶限而先生之
教人也則又以德行爲先文藝爲末尹公之弟子咸號端
人東海之學徒並矜奇節士林遵其月旦鄉里以爲祭酒
焉室屢空而晏如德無鄰而不愠方先生之少也與同里
大學士劉文定公侍郎劉圃三先生輩結爲文社先生以
年常爲社首無何見寬上第嚴助入官馬安則四入九卿

望之則一歲三徙而先生以丞相之故人作諸生之都講
仲舉則經時拂榻平陽則無客掃門蓋文定公時適奉諱
家居亟遣社友招之謝而不往有詢其故者曰使劉公有
不赴招之老友顧不重耶此則濮陽之爲揖客見重公卿
槐里之斥小生居然口實世論兩高之然造物嗇先生于
前而豐之以暮境窮先生以遇而酬之以大年是以禽慶
遊嶽之歲嗣續乃生辭宣罷政之年茂才始舉六極則疾
居次首而先生又益以貧五女則盜不過門而先生復增
其一以平子之四愁不改啟期之三樂于是齒以老而強
遇以塞而泰高密舉小同之載尚克傳經子堅察高第之
時猶能健飯優遊里閭快叙平生迨至楚國之舊友盡號

先賢陸氏之門人亦先廟食

謂先生學徒湯知縣
大奎時殉節鳳山

而先生

始息影衡門休神家術則天之報施善人者實多云亮吉
與先生有連且近同里巷閒庭撲棗則王吉之東鄰闢徑
聽松則泉明之北牖王微枕上聞捫蝨之談經伯陽竈觚
視望羊之讀易知先生者實最深矣以乾隆五十二年月
日孤子榮將葬先生于城東新河鄉之高三畝原乞所以
傳先生者亮吉遂不辭而爲墓道之表先生生于康熙四
十五年七月二十一日卒以乾隆五十一年五月二十五
日年八十有一配蔣氏繼配巢氏子榮丁酉科舉人揀選
知縣將贈先生如其官女六人皆適士族孫二人貽安抱
安楊亭則藁艸尚元蒿里則衣冠盡白烏乎一邱之土三

尺之碑此日隻雞之奠稱有道而不名他年下馬之陵號
通儒而莫愧是爲表

刑部福建司郎中趙宜人葉氏神誥

宜人姓葉氏諱貞世爲蘇州太湖廳人浙江分巡寧紹台
兵備副使士寬之長女刑部福建司郎中趙君繩男之淑
配也生而淑慎動合儀則又聰朗善鑒柔嘉有文自夫結
褵逮于屬纊無疾言無遽色門內化之姻郇宗之蓋夫人
生自鼎族歸于德門葉氏自少保公以來趙宗由宋魏王
以後均代有達人世著清德庭誥二首擬于顏門女誡七
篇方諸曹氏而是時勾吳於越之俗吹羅綺則障天排管
絃則沸日婆羅曼衍之戲與節序並陳踏青上巳之游與

冠蓋爭勝以市媪佐談讌以廟現代醫療是以沉沉畫閣
祀青溪之小姑宛宛紅閨雜黃冠之女士謝夫人之整肅
尙接濟尼竇太君之嚴明亦通巫媪習尙所在賢知交譏
者焉乃宜人之爲女也則秉副使君之懿訓其爲婦也則
守恭毅公之家法曲江從宦伍相之濤詎觀太末侍親刺
史之屏不識迨夫里居益嚴矩矱僮僕受範內外秩如安
志枕溪之宅馬戶之禁斯嚴平仲近市之居魚里之優不
入溢衢社火婢不窺門隔院鐘魚尼難闖戶以閨閣之從
風肖臣門之似水焉宜人則更繪列女于寢頌其格言祀
先姑于庭以爲師保語笑不達于鄰跬步不踰于闔早焚
博具蠶織之婦難休嚴絕禱祠高明而鬼不瞰若其貴而

能貧儉以率下也翟莠之服與澣濯而並陳堯蒲之筵而粗糲之是饋諸父諸舅之至乃具牲牢二分二至之期斯修魚菽亮吉大母爲恭毅公女孫幼時頻隨至里第起居宜人視若猶子憫其孤童闔門之教以宣亢宗之期斯切凡宜人之以身爲範遇物盡誠之道亮吉又多得之目見焉天性孝友篤于弟昆德公罹禍文姬則流涕以言羯奴廢學道蘊則正容而悟以先臣服官之訓勗茲夫子以大賢行己之法望其所生故長君襄玉次君球玉皆早有令聞鬱爲時器時刑部君供職于朝蓋宜人教居多云疾病遽嬰不臻耆耄以乾隆四十九年十月十日卒于里舍春秋六十有三越三年葬于城東黃塘鄉之黃塘原方宜

人之卒長君襄玉服官京師不及視含歛故高柴之反里
雨泣者三年獻子之服喪加人者一等亮吉呼天之痛早
歷歲時見星之犇同茲莫逮鑿寒泉而弔影聞風樹以傷
心敬于几筵是爲神誥并申以頌曰

化之覃敷門內斯起如何世族鮮克由禮閨風之振繫惟
哲人神明不惑矩矱是崇家人師師惠而不怨熒熒孤童
誨我無倦搯臂之痛椎心亦遲庶幾無忝夙夜以思

與錢季木論友書

昨復枉書極言友道昔觀吾子之面今知故人之心輒貢
鄙誠要于永好蓋僕縞紵之道有二端焉學問之友必先
器識拘于一隅難與高論談性命則爲周孔言訓詁則稱

鄙儒特牲所祠糾其違而卽同非聖方冊旣載舉其失而便爲違經此一蔽也言無智愚時有今昔渾敦窮竒以古而足貴垂棘和氏以近而不珍此則宛邱旣平必當高于秦岱惇物尚峙亦可等于蟻封此一蔽也據近定遠屈前就後苟聊儒術見黜于後賢蒙縣著書致譏于里塾視犬之字斥爲委談猶龍之言疑非確議此爲仲尼之識不及于里師新安之經反尊于闕里此一蔽也復有神明本昏胸臆是任讀易半卦已疑軒羲哦詩一章便嗤鄭衛張頰植髭持不根之論窮老盡年爲無益之學謂日月可廢矜其一鐙謂菽粟多事恃其夙飽此又一蔽也又或遂厥初非矜彼私學愚公移山智士亦同其識陋儒談天經師引

之爲證此雖賢者之過亦一蔽也若夫事必究其原論必求其是解帶一室鄒魯不能欺其半言馳輪九垓嵩華不能搖其一瞬研幾極神深識殆聖求之吾鄙亦有人焉性情之友要于至誠非我有咎疑詩人之不真豈不爾思爲宣尼所深歎而近世之士或以爵秩叙鴈行拘年輩爲鱗次何云締交乃左雄限年之格何云結友成正始服官之簿此一蔽也聲譽起落引爲重輕蹤跡顯晦據爲高下郭李盛名必難言其紕繆毛僻賤士或至掩其琳瑜此一蔽也執彼此之見以致參商因趨向之殊忽離膠漆孟公鴟夷形張竦之短伏波畫虎顯季良之失此一蔽也又或以志意而合以門戶而離仲宣賦筆乃不嫌于司農叔然學

徒必先讐夫聖證此一蔽也又性有喧寂質有華樸子雲
沈思強中壘而亦默向生好遊戒王邑以疾走究之失其
一長或至兩敗則亦一蔽也若夫脫略繩檢求其性真白
雲在天望之而可見風雨如晦思之而不已半面之雅鬼
神無以間其隱片言之誠金石亦將輸其烈求之吾儔又
有人焉足下卽其一也僕又恨吾儔之士幼而定分長遽
踈節或智竭于一官或識昏于妻子耳目所及不能離夫
簿書形骸若遺未嘗踰乎寢榻而足下則師琅邪之不娶
學平陽之若寄落落如玉處于朱門明明如月成其素履
淮南之雞犬雅于群公之賓客河間之簡冊親于中山之
家室染翰終日至忘寒暄披圖一朝或遺冠履此僕之所

深悉也乃或操筆萬語貢于所知求人作箋以答顯達頻
云采薪逃簪笏之席或乞急假憩名山之廬覩白鷺之羽
穢其塵容攀青松之枝寄此幽挹此又僕之所深悉也僕
舍足下又將何與交哉蠡水之側聞管艸堂距僕先人之
閭半里而近東海再舉卽焚麻衣吳興一朝或解華組相
與商略疑義宴談晷日招莊生于濠梁致蔣濟于側舍樂
何如哉相去千里氣候頓殊僕客汴水日餐黃沙君官四
明乃飲碧海倘因翔鴻時有覆我

孫太孺人八十節壽徵詩啓

夫萬物競流不移金石之性百卉謝氣始聞椒蘭之馨貞
于運者久則享其報者烈焉是以物性至雜而冬生之木

必貞有生不恆而夜半之禽獨壽理可言焉見於是矣孫
母許太孺人陽羨之名宗也父知縣君南閣祭酒旌陽仙
令鵝籠一具飄爾攜家鮫浦十年傷哉遠宦孺人終鮮兄
弟獨奉庭闈唵雪豔其高才飲冰同其清德年二十贅贈
君子家而延陵善愁扶風易病集樓之鳳已罷吹簫過隙
之駒猶勤學易逾年舉一子而贈君遽卒知縣君旣因玉
樹之摧欲奪柏舟之志孺人叩心出誓瀝血自明所生憮
然不能強也無柯知縣君亦卒嗟乎父兮母兮逝者已矣
天只人只生者奚辜勢耳叫天則清霜凌于平旦截髮搶
地則白日冥于中庭遂乃兩櫟克前雙旌並舉昔叔先雄
之殉孝白貞姬之矢節具一于此已詫至畸兼而有之斯

爲大感于是惟車萬里則馬助哀鳴過峽百重則爰隨墮
淚崩城之慟行路咸傷者與窀穸旣成蒿麻不釋英臺請
書之地隻影無依臨沂感孝之瀆半塵爰闢先是知縣君
有家財臨沒析其半以畀孺人孺人雖身挾積貲室無長
物古屋則神鐙時出壞牆則燐火羣飛懷璧是憂瘞金無
所至乃緘以素縑藏之斗拱前上寡婦之僕涕一尺而偷
窺南陽不義之奴縫兩囊而默運孺人不及知也無何乳
媪之居喧傳金穴里卒之舍赫建重樓僚僕以告孺人乃
疑發棟視之空篋在焉孺人旣冤結莫伸詣神自訴爾乃
傭奴鬼縛里媪神驅叩首投情詣官自告鼠穴按其剩貲
牛車載其餘貨十僅獲一稍以自存人以爲至誠之感焉

一日以貧困坐古室中長歎甫伸一嫗歎至謂孺人曰爾無憂矣顧視之閒形神頓失翌日趨影堂視之則某代某妣之象似焉宜都之覲聖善無假冥求潁川之覲先靈非煩左顧貞孝之獲佑一至此乎于是有若焯掌報母氏之幼顏生餐煤共歉年之食歲丙子令子舉順天鄉試第十三人祀膳甫歸計偕適值時孺人方當扶杖已荷旌闈三江浩然峙襄清之百尺萬瓦香若表行義之一椽更復桓氏之婺推本帝師之規夏侯之孫呼從外家之姓義興房之號與定遠支和配云

孫故定遠分支及孺人以節顯里中又呼爲宜興三房舉母氏

也

越十年孝廉筮仕得句容儒學教諭百里就官六旬迎

養孺人有田一頃遂命入于大宗以奉時祭樹墓櫬焉夫

長樂讓產獨表于儒林平輿贍宗不聞于閨閣而孺人顧以仁讓之德克紹孝弟之宗有識偉之宗邨欽之者矣御板輿而入官隔紗帷而助課過庭學禮則移訓文孫遷舍斷機則親督婢媪雍雍焉肅肅焉蓋敬姜之告文伯大家之誨子成無以易此未幾而平原文學遠著賢聲洛陽秀才亦垂妙譽句容固當孔道時集勝流于是過令伯之居先瞻大母詣士行之室必拜尊親而孺人亦視聽不衰禮儀可範餌華岡之木肌體愈輕讀老氏之書神明頓徹歲丙午登荷 覃恩介茲眉壽遂卽官舍爲孺人稱八十之觴禮也大年之兆非假乎學仙餘慶之徵必推于積善亮吉等與孺人子若孫交欽禮宗之在望過 門而先式

咸以爲琬琰可以鐫德竹帛可以著聲不有鉅篇曷彰節于是采其本末跡其操行以貽世之君子云

崔君妻莊孺人墳志

孺人姓莊氏諱素馨濟南府知府敦坡先生之季女今杭州府水利通判曼亭先生之子婦也濟南伏氏經學傳于女孫江東謝宗閨望逾于男子自其幼時最得大父未夫公歡稍長隨其父濟南君歷官數州五行俱下視不停眸十紙齊揮墨常盈口迨乎始筭積詩已至百首訪汝墳之俗過南陽之墟登高覽古有士大夫之風槩焉年十八歸于通判君次子景儼載玉萬隻一珥至而輸華有鳥十雙比翼鳴而戢影通判君妻崔恭人故尚書錢文敏公之女

也馬芝之行附見辭宗左芬之篇光于藝苑自孺人之歸而扶風子婦作讚大家河東孝娥續編閨範几視日親文筆益進是時通判君左遷涖郡全舫移家訪孤山之雪則娣姒偕吟觀廣陵之濤則婦姑並賦吳江楓落有吾宗之逸篇陌上花開尋外家之故事仕宦之地有神仙之望焉松方悅柏中道而彫月不舒華上弦遽隕以乾隆五十二年八月遘疾卒于鄔鎮官署年二十有三子二曾述懷荆女一均幼景儼感逝旣殷傷心屢賦十二時之內欲廢黃昏三百篇之簡竟刪蒙楚其年歸葬于武進某鄉之某原嗚呼明星七夕天上誰期秋水一渠人閒何世墓門鴟萃時開怨女之花華表鶴來卽作望夫之石

署河南直隸汝州同知徐君妻楊安人墓表

歲乙未丙申以來里中之友悼亾者三人錢君維喬趙君
襄玉孫君星衍三人皆婦賢而才又皆乞志銘于余余羈
旅歲時未暇畢應今年春客開封同歲生徐君書受適爲
州倅此方以妻楊安人墓道之文請州倅悼亾之戚視三
君而尤過焉因不敢辭而爲第其本末曰安人諱銀盤及
長字孟貞某官某之女也與州倅爲中外親自其少時卽
姻禮度州倅母楊太安人奇愛之遂聘定焉稍長其家益
貧兼不戒于火安人倉猝之間掖所生以免伯姬旣出靈
光乃頽非叔先雄之孝則宋無忌之灾不免乎年十二隨
父服官鹽山逾八年州倅就婚遂于署成禮州倅幼有令

名所爲詩篇已滿人口迨安人之歸而益勤勸學于是江
總詞筆借奉常之說文李權儉腹資大農之國策締交通
儒是正文字始則中論旣成列建安之七子繼則義訓益
究受扶風之六經阿客入世不諳空踈子雲閉門益勤撰
述則安人之助也又二年隨州倅旋里邁閔旣多數喪踵
至太常齋室尚不入夫內言巨孝堊廬益相違于中闔然
而曉日三號則蒿簪陪列春秋殷祭則麻衣助勞喪幾不
勝屢瀕于殆合而計之十年之中共牛衣者不過三載四
方之游偕鹿車者亦止數旬而已未幾州倅舉明經之科
有奉檄之志安人所親在遠顧戀莫勝州倅嘉其意不忍
違也遂乃風雪載塗寧車自送嚴君一官沈淪九品之末

老弱數口困頓萬里之餘安人則侍母氏之痼疾悲夫子之遠行離觴旣傾情若終訣每當鋒車入谷塞雁內飛未嘗不纏絲徐淑之篇沈痛呂姜之翰其族兄倫見之以爲卽衛女之賦載馳黎莊夫人之詠中露不是過也嗟夫蔽蔓之誓皎日而莫逾卷施之條抽心而遽死乃至入室之女殉母不辭望夫之誠闔棺未暝可哀也矣安人產一男二女今惟次女阿男在又幼卽嗜書每有造述所著若干首今藏于家州倅將以某年某月葬安人于某鄉之某原念夫高岸爲谷深谷爲陵元堂旣扃懿行莫列乃爲之表如左云

大方廣三楞伽經

三

卷施閣文乙集卷六

陽湖洪亮吉著

錢獻之九經通借字考敘

昭代尚文百爲具舉六書之學近乃益昌王工部訂楚金之譌孫文學校德明之闕皆有成書附于小學然尚未及讎校九經正其文字如高密定禮堂之本傳可無疑江式就太常之編聞而競寫則演贊次列猶有待焉錢君獻之夙操記事之觚早究結繩之學研六經從文字入故時析精微研文字又從聲音入故尤明通假以丙申之春爲九經通借字考十四卷若其所得有可言焉夫經爲宣尼所訂之書字皆在叔重所編之部惟簡經屢易師或殊承聲

轉未求偏旁轉誤然因仍識乃知六經無不正之文用武

求無悟衆說有能通之義周禮司凡筵仍凡故書為乃齊

俗字禮器注詔備也舉一隅而不反推六籍而可該者馬

至若近世學人亦研竹素顧或好標異說致忽恒經修誤

為翛而轉議開成之失邁轉為妬而或致熹平之疑不狂

為狂之論識者病之若錢君是書集衆師之言以名陵為

斷下則證以百家校之金石凡聚書若干種而始成言標

其要則義可翼經事涉夫疑則吾猶及史非僅徐邈張參

之能事矣亮古亦以壬辰之夏著漢魏音一編舉昔人讀

如讀若之端聲近聲訛之故自杜鄭說經如蘇注史以迄

涿郡之牋陽翟涑長之疏淮南靡不畢收以存故讀善實

據叔言反語之先爲衆經通轉之助矣證之君子或有同心貽於後人實非小裨因序君書籍及之云爾

歸求草堂壽言詩序

夫舟航可以濟遠而戒心于江海松筠可以樂素而謝質于巖廊是以富春之蹈履高節而動星文會稽之蹤振瑰辭而扣天闕彼各有所暗故甘進者不謀于乍退養志者靡樂乎梯榮也若夫達身以襄一世之務居閒以研邃古之業臨菑讜議屢奏乎九重長樂專經並行乎六籍則出處之際物我之事庶交盡焉內閣侍讀嚴道甫先生當代偉材幼生異稟方今

上御極之初時內閣學士李公牧堂禮部侍郎方公望谿

以耆德重望號稱知人其見先生均降彼達尊接茲幼德
常山都水之學濬厥靈源亥唐子夏之對矜其奇智逮夫
列士籍服儒衣讀委宛之祕編識靈光之餘老積逋償于
一日隆名起于寸晷則前兵部侍郎長白夢公之力也自
乾隆十六年以後

上省茲河海屢幸東南是時九服承平羣才輩出奏枚生
馬卿之賦貴比制科別明經進士之條升茲碩學蓋

召試得人爲盛焉以亮吉所見今少詹事錢君辛楣副都
御史王君蘭泉編修程君魚門皆後先以獻賦頌入列清
華海內號爲宗工儒流尊其著述而先生則其一也入官
內閣中書直漢票籤處前大學士諸城劉文正公武進劉

文定公皆奇賞之前後領諸館纂修凡五以彼達才承茲
異數宜矣逾年以文正公薦入直軍機處夫世之履經綸
之地居禁近之中不過居常恂恂溫室有不言之樹自守
凜凜東海無可通之賄而已清素可風寵靈足荷若先生
則應機成務濟物爲襄總數館之機宜清累年之陳讞滕
公一言生人于伏質孫卿千鎰免客于奇禍而又國體旣
立非朱浮之賣恩朋交亦全異蘇章之用法方辛卯春雲
南督糧道羅君源浩以賄項逾期獄事甚急時文正公兼
刑部當主稿先十日已奉

命入主禮部試人傳先生袖疏草排棘闈于上相之顏動
列卿之色事卒得解仁者有勇庶幾見之陰德活人於斯

信矣于是叔堅之形或繪圖于南楚賓石之德亦俎豆于長陵聞有屈將率之尊就子弟之列目申報德者先生固不自言也其年擢內閣侍讀凡直

禁近七年拜

上賜者數四人方謂當宏此設施成其博濟納言常伯之任監牧連率之司夫固已識在

禁屏屢

勤清問而先生當未衰之歲遭二親之憂遽遂初衣憺茲榮路有識所深惜也達人其有見乎歸築歸求草堂貯金石文字三千卷圖書三萬卷法書名畫復三百卷谷永疏達冠絕夫西京敬通詞翰昭回于建武君山說經之粹臣

瓚析史之精以迄厭次之述十洲涿郡之名博物莫不抉
宇宙之未露廣古今所欲傳規石爲硯窰于三易之餘裁
縑作牋價逾十倍之上凡著述共三十二種副旣藏于家
塾字可縣之國門兼之讀道旁之碑則棗前能疏其誤出
枕中之祕則嬌女亦諷其辭一門有集祕監別于大顏內
外皆文道韞參夫諸謝者矣配葉宜人柔嘉有則婉變善
文自歸先生卽勤家政時先生尊人以事避居舒城宜人
積紡績之資爲舟楫之費歲之春秋聿云定省寢門旣謁
攜冰鯉以稱觴良人未歸潔黃羝而祀竈傳先姑之言訓
于冢婦以夫子之戒勸其佳兒儉然惻然其有定識者也
歲在辛丑先生及宜人皆屆五十甲子海內知識爲詩以

壽者凡若干令子峻等彙錄以寄先生亮吉與先生同客
陝西巡撫畢公之署辱先生之知命爲之序昔彥升弁文
憲之集陳劉美伯始之文類皆綜核生平詳求隱行蓋太
中之勲或韜于文學右軍之德反掩于書翰自非采薦紳
之口述錄名流所心許則潛美或不章焉又況列真五緯
配厥修齡高山大原徵其積累儔類所能頌述也若夫表
知微之識著濟時之要則子雲鄉里或有當于君平彥黃
周旋庶不誣于衛尉云爾

芍藥本事詩序

芍藥本事詩者吾友蔣大令玉予及孫君季述憶舊之所
作也探春北墅言歌鄭國之風修禊曲江遂值郭虞之祓

鶯嬌待至馬細馱來蓋整屋郭郎名喜者二君所眷也看
花客倦回面而引襟裾聽鳥歌闌抗喉而申宮羽于是蔣
君舉靈飛經有仙人郭芍藥者告坐客曰是亦一芍藥也
固知多年入道難忘綺麗之名一日同舟雅有神僊之望
然而新藻之生下澤已厭淤泥靈鶴之出空庭不工頰仰
矯矯乎有拔俗之心焉故振其孤花方移姿夫露檻而挺
茲弱植忽高舉乎風埃春讌正濃玉人告去蔣君舉觴而
思良會寫影而紹餘歡此則陽春屢詠初移齊右之風而
夏五遂書已應郭亡之讖者矣無何遠遞魚牋寄定情之
金釧誤傳鵲語迎別館之瓊枝蓋桃思代李雖憐根葉之
同而燕不逢鴻如學尹邢之避時值河東曲部籍甚關中

新聲園羊侃之筵妙舞亂周郎之顧翩有麗人忽焉傾坐
名而問焉尤可異者東郭西郭隔河水而同源南枝北枝
待春風而欲合拈珠紀歲旣已齊齡映玉爭妍尤堪並蒂
孫君于是撰將離之譜昔夢方殷欣如願之逢亞枝更續
蒲州郭郎名雙者並枝芍藥圖所復作也預斯集者咸美
而賦詩窮窈窕含睇之情極旖旎從風之致予授簡之下
又有感焉昔春卿開徑羊仲頻來子荆賦詩馬公首和款
淳于之讌燭幸高燒贈小史之篇牋曾屢易筵長未接先
知越客之心袖冷思溫已進襄成之手未嘗不歎其同饒
慧業共厥僊源一則泠泠善語墊巾餘名士之風一則宛
宛依人揮塵有清流之習雖子元之注蒙叟篇終而竟竊

馬蹄文舉之依茂宏會始而猶披鹿褐標舉所在有不同
矣離合之致洵可言與夫今夕何夕星明照邂逅之期新
人故人道遠致殷勤之間可知賞真者不嫌乎兼美情摯
者靡遺乎自昔也爰不辭而爲之序

十二月十九日終南仙館同人祀蘇文忠公詩序

歲序乍閒豐年告慶山隅千尺積雪與齊官齋東偏舊有
山館與二三子觴詠于茲月惟嘉平日值十九宋故端明
殿學士禮部尚書蘇文忠公嶽降之辰也覽乎遺文嗟不
並世求其宦歷又近在茲相與薦茲清羞列彼嘉豆几筵
旣陳畫象斯肅則高冠峩峩從乎支遁長袖落落綴以踈
梅瞻拜之餘遐想有寄惟時簪筆之上旣紹南皮笙歌之

聲亦逾鄴下當夫旅揖再拜三歎一彈寒禽蹲樹而不飛
凍鯉破冰而出聽南山白雲圍乎坐右增采軒棟助潤襟
裾青松在庭列柏蔭戶崇儀則迎神降神清聲則滿室滿
堂者嗚嗟乎尚友之志誦詩讀書仰止之誠大星列嶽七
百餘歲思公而不忘十有三人握管而競賦至于斜月沒
樹音猶繞梁寒威襲衣飲始投轄中心好之驪駒之歌且
止歲云暮矣蟋蟀之音無忘預斯集者詩無不成昔孝若
作贊言圖歲星陳留聚賓致徵緯象今序而傳之者亦以
紀嘉會著良日且使後之祀公者有所述也

與孫季仇書

亮吉白季仇足下別後五旬亮吉亦渡風陵徑條谷襄人

蒲坂之寺哭友巫咸之山鹽池旣屆馳蔣生之寓書熊耳
回經憶錢君之昔辯道路饑渴存忘在念兼以獨遊時涉
遐想非復曩時共載之興矣然而沿乎洛汭遵彼汝墳七
聖皆迷之野獨爾驅車耦耕不輟之鄉猶承指道幽憂之
思亦間以篇什寄之閉置二旬始達樊城臨池而舉觴尋
碑而墮淚越日乃舍騎登舟白鷺出樹回翔可觀潛鱗上
竿尺寸皆市惜沿漢入江之樂不及與足下共也暑月正
滿當抵武昌行攜濁醪上揖黃雀彭蠡旣泛卽指北江回
日再當詳書與足下耳長安人海之地尚望稍節語言謹
慎嗜欲相見尚遠我勞如何亮吉白

鄧尉山人徐友竹詩序

夫知山莫如樵而無與巖壑之勝知水莫若釣而莫窮浩
渺之概知簡冊莫如儒而不克極夷曠之致是以升林麓
而能賦謂勝于樵臨川上而能言謂勝于釣積經籍而能
化謂勝于儒若其兼此者則身世之樂亦幾盡焉復有知
而不獲踐者嵇生曠矣而鸞鳳之翻不鍛公理遠矣而參
佐之職不辭故著樂志之論而跡局于冠纓成養生之篇
而遇極于幽憤達者之過古人類然友竹先生脫塵網以
遊抱白雲而逸一畝之宅山花環而欬笑五湖之田魚蛤
頰而可拾杖策所至崖傾谷懸則能賦矣縱棹旣遠潮靈
帆峭則能言矣積軸萬卷心超語逸則能化矣若夫極一
世之工而猶窮于自然之致涉于祀之想而不能忘在身

之累此今之作者所以傳而不遠也觀先生之詩可以自悟于山水間乎

出關與畢侍郎賡

自渡風陵易車而騎朝發蒲坂夕宿鹽池陰雲蔽虧時雨
凌厲自河以東與關內稍異土逼若街塗危入棧原林黯
慘疑披谷口之霧衢歌哀怨恍聆山陽之笛日在西隅始
展黃君仲則殯于運城西寺見其遺棺七尺枕書滿篋撫
其吟案則阿孌之遺牋尚存披其總帷則城東之小史旣
去蓋相如病肺經月而難痊昌谷嘔心臨終而始悔者也
猶復丹鉛狼藉几案紛披手不能書畫之以指此則杜鵑
欲化猶振哀音鷲鳥將亡冀留勁羽遺弃一世之務留連

身後之名者焉伏念明公生則爲營薄宦死則爲卹衰親
復發德音欲梓遺集一士之身玉成終始聞之者動容受
之者淪髓冀其遊岱之蒐感恩而西顧返洛之旆銜酸而
東指又況龔生竟天尚有故人元伯雖亡不無死友他日
傳公風義勉其遺孤風茲來禩亦盛事也今謹上其詩及
樂府共四大冊此君平生與亮吉雅故惟持論不同嘗戲
謂亮吉曰予不幸早死集經君訂定必乖余之指趣矣省
其遺言爲之墮淚今不敢輒加朱墨皆封送閣下暨與述
菴廉使東有侍讀共刪定之卽其所就已有足傳方乎古
人無愧作者惟藁草皆其手寫別無副本梓後尚望付其
遺孤以爲手澤耳亮吉十九日已抵潼關馬上率啟不宣

特羽賦之貢載自堯時綾絹之徵詳于近代而黃羅墨狐

且與紫艸紅藍而并著矣

新唐書地理志青州貢紅藍紫草

此五證也今

登州府榮成縣雖有斤山山既僻小隋書地志僅有其名

外此則自漢迄唐皆無著錄必非爾雅九府之山

至樂史之言又

最不足據故不辯

此六證也沂斤字本相近或省文作斤而隸書

又誤寫增、蓋沂山以沂水所出得名故山字可不从水

猶之沂山為沂水所出瀟山為瀟水所出後人省文亦止

作开山鬻山此七證也爾雅既屬殷制殷之九州為冀豫

雝荆揚兗徐幽營則九府係一州舉一山冀州霍山豫州

華山雝州昆侖山

昆侖山在今肅州西南禹貢雍州昆侖析支渠搜西戎又云厥貢雝球琳琅玕

荊州梁山揚州會稽山兗州岱岳徐州沂山幽州幽都山

晉太康地志幽州營州醫無閭尚書疏云青州之境非止

本以幽都得名而有遼東舜為十二州分青州為營州營州即遼東也禹

貢又并營于青爾雅營州之境與禹貢青州同故醫無閭

得在若謂今榮成縣南之斥山則與醫無閭同屬營州一

州舉二山而徐州反闕既乖任土作貢之義又失辨方正

位之規聖哲立言不當如此此八證也况足下八山皆據

周禮職方及考工記獨東北斥山乃近據樂史而不信職

方可乎又足下能別梁山之為衡山而乃失之于此者則

不察也僕近為乾隆府廳州縣志雖于古人之外時有一

得然卷帙既廣訛外實多海內故人多聞直諒如足下者

亦僅見他日亦欲足下引繩披根是正缺失故敢先貢其

愚幸不吝教我

蒼雪山房詩序

蒼雪山房詩者元和張君琦之所作也其人也飲酒泉之酒擘瓜州之瓜下床而接邗連闕牖而窺龍勒昆侖萬仞之雪烹之爲茶吐谷一川之羊指而欲食盍歸乎來西王母之石室其樂已極牢蘭國之瓊廬祭酒投筆反勒緝熙之銘終童弃繻緣偕鑿空之使落落自喜超超不羣此則天傾西北子乃來遊地缺東南家乎斯在可謂極壯夫之槩者焉然而搜其故篋時歌陌上之花念彼同心頻折岸頭之柳行乎日沒之處方思日出之鄉夫洲連橘柚則黃紺之光燭山花雜雲霞則青紅之氣成海橋如缺月四面波通巷若長虹百門洞啟層樓千尺勢欲居天圓牖雙扉

人疑入月遊無晨夕出斜日而歸啟明產乏上中茹青山
以飲碧海照吳興之鏡發采過乎春葩酌虎阜之泉轉喉
工于百舌宜其巢枝是戀首禾致思夢一夕而百回意一
篇而三致者矣雖然言乎居處則西極之客視蘇杭爲上
天采其風謠則南音之靡聆秦聲而却步冰霰之質桃李
因而菱容琵琶之聲箏簫以之徹響漁謳棹詠何如瀚海
之篇玉樹瓊花壓以天山之曲歌傳勅勒俗士比于闐霆
調入伊涼媚夫隨而墮魄今僕之交君非一日矣乃輾轅
之屬愈遠則杼柚之機益新百篇授我絕管轄之常談三
日不來見阿蒙而刮目其獨傳西夏之音斯永冠句獎之
士者乎夫絲竹未罷哀樂之心已紛觴罍旣陳鬱紆之氣

尚涵善乎昔士之言處境有其極難聖人亦當情怨者矣
僕聞其遊蹟先已醉心抽彼新詩尤驚絕調又念自十年
以來僕亦東棹乎歐江西車乎汭國州有九未臻乎梁益
岳有五尚缺乎岱宗亦可謂東西南北之人燕齊楚趙之
客矣我所思兮乃九州外之大九州子好遊乎無百步而
笑五十步

杭董浦先生三國志補注序

近時之爲史學者有二端焉一則塾師之論史拘于善善
惡惡之經雖古今未通而褒貶自與加子雲以新莽削鄭
衆于寺人一義偶抒自爲予聖究之而大者如漢景歷年
不知日食北齊建國終昧方隅其源出于宋之趙師淵至

其後如明之賀祥張大齡或并以爲聖人不足法矣一則詞人之讀史求于一字一句之間隨衆口而譽龍門讀一通而啗虎觀于是爲文士作傳必倣屈原爲隊長立碑亦摩項籍逞其抑揚之致忘其質直之方此則讀史記數首而廿史可刪得馬遷一隅而餘子無論其源出于宋歐陽氏之作五代史至其後如明張之象熊尚文而直以制藝之法行之矣夫惟通訓詁則可救塾師之失服虔等二十一家之注漢書是也亦惟隸故事則可救詞人之失裴松之注三國志之類是也余少讀道古堂集卽歎先生之學于史最深今合觀之先生之史學亦卒莫外乎訓詁及隸事二者若三國志補注之作則又繼裴松之而起者也雖

然補注陳志矣又兼注裴注以事在晉宋以前不厭其詳也采諸家矣兼采及方志以事闕故老之傳或轉得其實也亦間有仍古人之失而未及更正者如魏文帝紀墓首陽陵補注引通典云富平縣西有魏文帝陵今考文帝陵在偃師縣首陽山南其在富平者西魏孝文帝長陵也且因此可以證樂史及今通志之誤何則富平之西爲今耀州圖經云耀州東至富平縣界十里則杜祐云長陵在富平縣西者是也寰宇記云在富平縣東南二十五里者樂史誤也若大唐山又在耀州西北七十里而通志云長陵在耀州西北大唐山者則又因樂史之言而誤也楚王彪傳黃初七年徙封白馬城補注云志稱七年徙封白馬而

陳思王詩稱四年白馬王朝京師則當時未有此封宜稱
吳王今考陳思王集云黃初四年五月白馬王任城王與
余朝京師魏氏春秋亦載植是年還國贈白馬王彪詩植
傳黃初四年徙封雍邱王則彪徙白馬亦當在此時傳言
七年或誤也他如魏受禪碑之可以補魏紀之缺魏王基
碑之可以糾本傳之疎而注不及者先生或未暇錄及金
石乎夫小顏之注班史得失並陳二劉之于漢書瑕瑜不
掩而重其書者尚一目之爲功臣一稱之爲諍友又况先
生此注足以救前二端之失而又兼有此三子之長者乎
令子賓仁于先生身後能一一刊先生之遺書俾之流布
則其能承家學又不待問余故不敢辭而序之

與莊進士書

今月二十四日方奉到去臘十日手牋圍鑪發書逃暑始獲乃歎千里之隔寸心之誠天道變矣人事間之爲可念也承示校小徐說文繫傳時有心得足下以凌虛之才而用之于實有信古之美而闕其所疑求之于昔則張杜有其規準之于後則徐李失其步僕嘗聞之實事求是河間獻王之學也演贊其志召陵公乘之言也足下近之乎夫近世六書幾成習尚甚至江總詞客亦諷說文郭公畫史并研字學實則明三隅而昧一知二五而忘十必推其故亦可言焉其下者則芟除音聲惟講意義中心爲忠如心爲恕得其一端欲杜千口其次者則不明假借不辨聲轉

說要之義則久假不歸舉背之形則古文未悟草修成羽
叶紂爲鯛此則書登梵篋口必加旁字入道書雨常建首
曾儒衣冠而膜拜禹步之同量矣又或本非義類強爲牽
合稽省旨而加山貢合章而成水小言破道似是實非若
不嚴兩觀之條恐無救六書之失者乎手示云說文無覲
字小徐本儻字下注云見也最是雍熙本注作賣也恐非
僕何欲爲弇山尚書篆石經儀禮論語藁本私覲字本皆
改从儻得足下書知有同心也然竊疑雍熙本賣字亦未
爲失說文賣銜也从貝畜聲賣古文睦字讀若育凡儻及
讀續等字皆从賣得聲則儻注爲賣尚从本訓也且銜字
之訓亦有賣義或後人以字近又傳寫以賣爲賣耳總之

小徐說文視鼎臣稍善然時有意爲增損貽誤來學者不暇詳述姑舉經史各一條質之足下焉左傳昭公七年蘧啟疆曰齊與晉越欲此久矣寡君無適與也而傳諸君唐石經及宋槧本欲字皆無異文今小徐于賊字下引傳云齊與晉賊此久矣寡君無適與也說文賊移與也玉篇賊益也無訓欲之說而小徐言如此若云賈服舊經旣無明證而云齊晉移與又不成文執此單詞準其素行不過好爲新說以亂舊經而已漢書地理志山陽郡平樂侯國泡水東北至沛入泗而說文云泡水出山陽平樂東北入泗今考泡水自睢州東北流過商邱始至單縣相距二百餘里而漢平樂故城又在單縣東四十里則泡水不出平樂

明甚乃小徐欲申許而遽改班志本文泡出平樂縣東北
至沛入泗夫云至沛則沿俗本之譌也而云出平樂則承
許君之失而又爲之辭也足下能表其長而又不諱其短
則善矣炎暑攝衛何似僕學非王陽遣子受梁邱之易才
謝睦孟甥復習羸公之經殊以爲幸未識兒輩能受教否
他日守其師說積彼近聞問難于釋屨之時更端于過庭
之日恐僕終當爲足下屈也白雲在溪修竹環舍相見有
日不復多云

中州金石記後序

尚書弇山先生成闕中金石記之後二年奉

命調撫河南又三年而復有中州金石之著自是而秦涼

之寶墨荆豫之貞珉按采靡遺殆稱觀止亮吉于金石之學素寡究心而輿地之嗜幾于成癖暇日嘗假先生碑數百通校史傳闕遺其間得史文之誤者十之三以史文正碑石之失者亦十之一繼又周覽大河縱觀崇嶽南遊乎汝潁北極乎殷魏又悟乎金石之失有卽可以金石正之者如大坯之山尚書有洛汭之文爾雅標一成之目而唐天寶中河北黜陟使碑以坯爲岓遂舉黎陽縣南山當之雖說由臣瓚而義無左證何則昔日一成今乃巖巖之石嶺昔曰洛汭今乃湯湯之淇水必謂臣瓚之言足據則周公文命之言未可憑也惟晉灼漢書音義黎陽縣下云黎山在其南河水經其東其山上碑云縣取山之名取水之

陽以爲名固知魏晉以前無有以黎陽南山爲大坏者矣
又汲縣近代比干墓碑稱酈道元水經注北魏時墓前石
銘云殷太師比干之墓夫未蒙其寵而先有是稱此則厚
誣古人取譏來哲惟唐李翰碑云貞觀十九年太宗東征
師次殷墟下詔追贈殷少師比干爲太師謚曰忠烈固知
飾終之典遠逮夫貞觀崇號之加無闕于拓跋必炫其該
博信此魯魚是謂生被實禍沒蒙虛稱非後儒之無學卽
前賢之不幸也若夫滇陽之爲慎正以永平四年之印成
臯之爲臯見于建武中葉之章雖始存終軼而此是彼非
是知前之樂石足以訂來刻之譌昔之吉金亦可糾近鑄
之失有裨于實學不少也近者圓石出洛陽而知王伯輿

爲祔葬殘本藏太室而知堂谿典字伯并昨馮戶部敏昌
遊王屋之山于懷縣得司馬昇墓誌銘武進士億行輩洛
之野于董家邨得姜纂造象記求之昔人皆未著錄盖好
古之至川嶽鑿其誠購竒之地球琳逾其價固不必投文
清泗搜羸秦已失之金移檄陽侯訪太學久沈之石而所
得旣如此矣亮吉按魏司馬昇碑曾祖彭城王祖荊州云
云而知晉史列王之傳缺畧實多又校齊姜纂記云天統
元年太歲乙酉九月庚辰朔而知北齊後主之編干支亦
誤未嘗不鋪紙百回求其墮義面壁竟日取悟一隅儔類
以此而疎寒暑因之而變也昔者戴淵之涖州兼司兗豫
近則田公之作督亦統山東先生倚畀之隆倘同茲例庶

幾絃歌有暇，讐闕里之碑，旌麾所賁，訪郎臺之刻。自是而
天下之大觀，庶畢萃于一室矣。

卷施閣文乙集卷七

陽湖洪亮吉著

福建鳳山縣知縣贈雲騎尉世襲死節湯君墓表

夫仁義豈有常蹈之者君子股肱旣已竭加以忠貞是以苟息再死永符白圭之言臧洪復生無踰酸棗之節士君子有一世出萬死之地義重于生乃如此乎若吾友湯君者迨其人焉君諱大奎字曾輅一字緯堂世爲武進人自本世祖某至君父監生君自銘皆有隱德監生君又以學行顯于時祖父兩世皆贈如君官監生君夢明太常都穆入室而生君以是奇愛之君生而廣穎大目明慧夙解八年而通尉律十五而明六經時君與亮吉並居中河橋

側委巷中亮吉六七歲時君年已逾弱冠補博士弟子員
締交名流是正文字陋巷專室之中有魁士畸人之跡自
君始也未幾秉二親之命爲四方之遊南眺禹穴北覲闕
里傭書乎吳會佐幕乎鄒魯飛蓬嘆于微子負米同于仲
由蓋十五年于此云歲壬午年三十五始以國子監生舉
順天鄉試明年成進士殿試二甲因請急假歸又二年卽
奉

命往河南以知縣用時二親在堂板輿迎養案牘之暇極
色養之致焉補柘城縣知縣遭內憂歸服闋補浙江德清
縣知縣又奉監生君憂君頻遭大喪有逾常禮廉吏薄俸
靡給乎饗殮先人敝廬或搖乎風雨始自中河橋側遷于

昇仙里右卽今之居第也服闋補福建連江縣知縣四年
調任鳳山鳳山懸于海中民番雜居風俗不一又餽餼屢
蛤之產利徧天下筐篚簞篋之資富堪數世用是前政率
以賄敗君選于上官特膺此任檄調之日攜一子兩僕赴
焉至則掃除積習徐儆刁風三年于茲俗安其治侯代未
歸值臺灣奸民林爽文之變其黨莊大田遙應之君訓練
鄉勇整飭吏民晉陽之內有壘而必增踈勒之旁無城而
亦守未幾聞彰化陷又未幾聞諸羅陷其時也壞雲四落
海水亂飛怪獸突門驚禽布野君結纓禦寇握矢登門又
蟻負之卒防豕突之兵士氣乍揚賊鋒稍挫方復問傷弔
死秣馬厲鋒回聽事之堂行飲至之賞而烏合三百踰毀

垣而登朱旗一軍鑿凶門而遁賊復蜂擁民同獸挺君知
事不可爲率典史史某及愛子所親禦于堂皇前後手又
賊六七人賊斷君三指復中數鎗而隕烏乎楚司馬之背
創之者三晉中軍之指斷而非一至乃元黃被地愛子隕
于衝戈手足異門鄰童甘其白刃死義死孝茲爲烈矣求
仁得仁又何怨乎越四日吏民入殯君于署以史君及君
之子荀業列于左右平原之裔用國殤而在堂秣陵之尉
以鬼雄而列殯無何賊復陷鳳山署燬于火逾月
大兵定臺灣搜牢之舉已行列肆之民復返于是巡撫徐
公懸賞購君之尸不得今年二月君所親有復至鳳山者
掘堂皇下二尺得之史君及君之子遺骸亦在焉恒榦旣

擢而上衝之髮猶植燎原雖熾而欲裂之背不腐遂復複
衾三襲歛溫序之鬚元纁數重藏卜公之爪聆伯奇之哭
霜墮于重林聞杞婦之聲城崩于隔海時有

旨別臺灣死事者平日居官優劣大府獨舉君廉謹以聞
于是有

旨賞給雲騎尉承襲又

恩給祭葬銀一百兩照陣亡例賞卹銀一百兩千秋死節
事白于彌年翁歸潔身賞隆于沒世于是報功之典彰焉
激勸之旨寓焉君之孤范業暨孫貽汾始奉君之喪歸葬
于某鄉之某原復累君行事求爲墓道之表禮也君生于
雍正六年三月十一日死事以乾隆五十一年十二月十

三日年五十有九君生平所著詩若干卷炙研瑣談若干卷又補遺若干卷康樂成童先驚得句孝侯臨命尚復賦詩以至時歌易水感下泣之賓朋不讀河梁恥生降之都尉蓋性情之正如此也若夫炙研瑣談之作又可言焉飛詞南閣則不乏雕龍投分衡門則尚多窮鳥未嘗不矜其片言之善錄其一藝之長雜以舊聞將成信史振筆則仲宣七子悉入編摩餘篇則鄒衍九州將歸著述嗟乎不知者或以爲海外恢奇之著其知者卽以代襄陽耆舊之編乎今則成編數十咸歸溟涬之宮奇字三千欲問豐隆之府嗚呼立論立功不朽者旣如斯矣百篇百卷所存者乃止此歟雖復終軍之亡南粵引重儒林季雅之沒射姑尤

增文譽而傳家積軸未得比于牛腰望海招鳧并欲搜于魚腹天之阨君者不已甚乎此則化東周之血靡待三年殺南海之青惟留數簡摛材之彥不置辯于碧雞樹檟之墳必飛濤于白馬烏乎哀哉

從母莊孺人墓表

莊孺人吾母同產姊也少而開敏爲外王父嶠峨君所愛與吾母皆親課之所讀倍于諸兄年十九歸同里附貢生莊君韡萼莊故方雅之族自孺人之歸卽操家政孝于姑妯睦于啟畝有田一頃市廛十楹孺人明于豐嗇之宜謹于出納之節以故常裕時貢生君從昆弟十餘人皆前後擢高第而貢生君輒不遇孺人每以義命慰之支機于鳴

玉之側衣徹于垂組之旁晏如也未幾君舅黃梅君以疾告歸孺人酒醴必親果飴夙具割肉之正以薦尊嫜棄蒿之邪以存家戒咨點心之方于鄭儉之嫂求曼首之法于盧諶之家蓋所謂不潔不饋無形無方者歟又性至孝時嶧峨君已卒外王母獨居恆晨夕致饌寢門未闢便了至而攜漿夕飡欲陳方成來而饋肉亮吉少孤從吾母居外家常刻日影記之不逾寸黍焉與吾母尤相愛每當歸寧輒周所乏亮吉七歲時孺人常攜至家時孺人五子均在塾中盈尺之壁皆鑿楹而貯書勝衣之童知盤辟而雅拜亮吉見而慕之又一日至孺人家憫其宿饑食之過飽未幾而鞵係解于砌履踵決于庭孺人爲泣而正焉此則淮

母之惠愛有見于拂情慄姬之壺漿不忘乎沒齒孺人以君舅之喪過哀遇疾而卒年四十有五大宗喪其女儀外姻傳其室訓以乾隆二十七年葬于某鄉之某塋越二十一年而子寶瑀官雲南會澤縣知縣寶書以方畧館議敘候銓八品于是

錫類之典頒焉施德之報顯焉寶書因乞亮吉爲墓道之表亮吉惟果羸之愛無能去懷寒泉之思因之益痛對漆梓之字流涕其遺規過花樹之宗私求其餘慶云爾
從母楊孺人墓表

楊孺人吾母同產妹也爲嶠峨君幼女年十七隨宦至雲南未二年從外王母奉嶠峨君喪以歸峻嶺千折洪波萬

重悲淚積于鮫潭哀聲慘于援岫旣歸而毀已見骨喪幾
不勝逾年始適同縣處士楊君安吉時兩家並中落僅克
成禮廉吏之室鬻犬因而市釵積貲之家市脯乃能具饌
孺人處之泊如也所居芳茂山側貧乏僕婢凡抱瓮而汲
量粟而舂皆身親之未幾處士君欲入貲應京兆試未果
卒于都門孺人有一子先卒二女尚幼聞耗之餘屢瀕于
死自後日卧土室中以織紡自給遂得偏枯之疾至老尤
劇云外王母憐之迎車數遣僅乃一來設藜羹而不甘御
麻衣而欲隕外王母以道遠爲賃樓三楹居從舅氏室中
樓舊有狐祟自孺人居之遂爾絕跡人以爲貞孝所感云
孺人積牛衣之痛抱羊舌之悲是以子姓之中撫甥尤厚

亮吉幼時出塾卽過孺人每爲亮吉誦河梁之詩唵朔風
之作俾成誦乃已蓋孺人習于漢魏詩百數十篇暇卽諷
之人有詢其故者則泣曰此先君之所授也濟南之女不
忘列宿之章沛中之姬永襄帝師所訓蓋同此歟居從舅
氏室凡十年迨二女各適人始依外氏及亮吉以居又二
十年而卒年七十有一嗚呼百歲若瞬而沈憂者七旬兩
家多故而齋志者浸世迨至入室之女亦摩笄而誓天承
家之男輒零丁而絕世此則我辰安在周傅以之傷心實
命不猶國風因而隕涕者矣以卒之後十日合葬于處士
君之壙孺人之志也亮吉感林風之不寧悲墳草之易宿
爰爲加土若阜立碑如門庶幾十步之內松栢茂于幽垆

百年之中牛羊遠夫貞壠云爾時乾隆五十四年九月日也

王樓村先生靈豆錄序

靈豆錄者寶應王樓村先生中歲之所輯也昔神農之作本草也凡三百六十五種以配一歲三百六十五日生一草草治一病是知五味六穀之宜百醬八珍之用以迄六根五華九實之選造物非僅養人亦藉以救人乎若夫上古之世至人嘗藥中代以降巨孝知醫其次則有長者拯危之用焉又其次則有通人博物之資焉此先生輯書之旨也若言其已驗者則馬尾夜呼烏頭食禁見羊桃而雨泣縮蘼綬而顏開宋平國狗之噬蕭起河魚之疾臣意

則消石一齊莞華數撮元化則青黏十兩漆葉滿升莫不矜彼剏聞動關神效士不必九能而克名其物醫不必三世而可服其齊者焉今先生則又增以宏景之篇益以慎微之記上稽乎伯益化禹外極乎齊諧洞冥卷首于五行篇終于寓物含咀陰陽包括海陸將使天地之大一物莫能遁其形古今之久一名莫不登于簡此則蕪蕪不知儒流引之爲恥豹鼠旣辯士林舉以爲榮由是對

大廷冠多士上第推夫單父舉首表于菑川何莫非稽古之勤濟人之切所致乎抑亮吉又欲爲先生廣其例者蓋語乎上則天水之碧見秣陵之書求其下則地泉之甘標荆楚之記火則九沸九變伊尹言之乃詳水則一溜一澗

易牙嘗而自別他若言乎卉木則昆崙之蘋具區之菁也
陽華之芸雲夢之芹也言乎飛走則朝穴之丸夜飛之翼
也藿水之鱗青邱之炙也庶用以廣療瘵之用通醫意之
條焉嗟乎牽牛天駟數起于形生搏桑落棠不離乎卉木
是知蒼蒼正色亦垂造物之稱首首羣蒙雅有廣生之目
倘正名乎百物均不逾乎動植者乎先生曾孫嵩高早通
燥濕爲楚國之枝官解治偏枯匪魯邦之胄子官暇又推
先生之例作補遺若干條此則束皙續經特增乎有獺梁
文補雅更廣于明蟲義必務于精按理有資夫泛濫亦名
醫副品之條隱居百一之助也用推其意序焉以貽世之
讀是書者

閣師稽拙修先生八十紀恩序

夫五老同遊必在伊耆之世九旒遵度聿生駘耆之英士大夫之荷隆名享耆福恩承異數事出常倫者非得天之獨厚亦修德之獲報焉閣師錫山相公者蓋其人矣公甫弱冠登朝又十年開府周翔七卿之署遂膺上袞之尊中外著聲後先踵美綜其奇瑞實有八云何則今

皇上道照鴻軒德開壽寓占六日七分值地天之交泰驗八徵五福適君相之齊年坤輿德厚旣尊潤乎大生日月光多乃分輝于列宿是以鸞鶴異表竟可參威鳳之年松栢有心遂得擬大椿之壽鶻冠子云泰上一族算比于成鳩王仲任云分陝二公壽齊于文武以古準今同符合揆

此其奇瑞一也夫二首六身絳縣老人之算三百六十赤鳥遺種之年此不過異糝宿肉爲盛世之耆民采朮餌芝作昇平之庶老而公則禮隆五豆登台輔已十年算閱八旬光卿月者四紀平當未位三府先使行河趙儼纔作九卿卽看持節金堤虹亘早有生祠赤幘風馳爰敷渥澤此其奇瑞二也而且韋平之世及具躋大年鄧李之期願久之未艾此其奇瑞三也言乎前世則龔勝奇節已表栢堂語彼後來則劉歆祕書復讎天祿又復計相多男分厯官于中外春卿闔第已起饗于孫曾一門有集追沈謝之素風七葉珥貂兆金張之溼慶此其奇瑞四也夫薛國上卿

上第旣僅見之名臣漢家元朔元光亦耆齡之天子可謂
旣得其年又逢其主者矣然而東閣首開已值懸車之歲
菑川上計聿臻養國之年求其徧列卿曹再周歲鑰于門
下門生之後預同年同甲之筵覺前哲之抱慙自後來而
居上此其奇瑞五也申公耆壽行有藉乎安車汲黯清羸
政必資夫卧治此卽蹲龍之聖不免嘆乎吾衰盤馬之賢
或設心于諱老而公則氣海旣盈神明益壯上公九命有
天閑上駟之頌耆艾一人無丞相小車之號進止有常過
龍樓而必下委佗可跡舍鳩杖而能趨此其奇瑞六也耆
英表乎

聖代盛事冠乎詞林閱茲周甲之期再值恩榮之宴逮今

百載實有三人黃侍郎之于辛未史文靖之在庚辰是也然文靖則在告而始蒙

御製侍郎則入宴而未奉

恩綸若夫見席上台并承

特旨

詔天潢而主席

命宗伯以視儀紅披一品之花戴三公之冕一百二十

摠衣而上謁同年二十九科折柬而肅稱前輩一周彈指

覺獨峙乎靈光六紀居官總未離于蓬苑此其奇瑞也

最異者宴杏園之正歲移為

萬壽之恩科冠芸閣之三人皆屬同鄉之後進是科一人皆江

南祝嘏之餘謁丹旂而上壽獻琛之暇詣黃閣而呈珍鼉
錯授經于伏勝不虞鄉語之訛賈生執業于張蒼可操土
風而往此其奇瑞八也凡此非忠悃上結乎

主知誠感默符乎天眷則福壽之慶理或難兼齒爵之符
義非能並安能遊大凝之

壽域分百福之餘榮也哉亮吉等忝預後塵仰叨同歲慈
恩入宴首陪行儉之筵永始同朝可撰李充之杖奉酒而
節迎永日躋堂而慶溢敷天獻麥邱之三祝引以萬年分
天保之一言頌茲元老云爾

送同年張問陶乞假歸潼川序

乾隆五十六年歲在辛亥二月朔日張君問陶給假歸蜀

其友洪亮吉烹玉田之蔬挈山陰之樽送之于國西門曰
足下家居遂寧婦留成都鼻子宦粵旣傷親心纍臣贅秦
復悲身計然則足下辭金門而南邁並赤日以西馳勞乎
此行蓋非能已仍復迂道嵩洛戒途雍梁爰謀裹糧並訪
親密西嶽道士留之而不能東方細君隨之而並返百步
之外弱弟出迎一門之中密親咸萃解笏金而貯案被采
服以娛親雖嚴生告歸相如乘傳不是過也又足下宰相
五世孫也葛侯冢畔八百之桑尚存召公祠旁一隅之宅
能割谿茶可摘則病婦攜筐山筍欲抽則衰年補徑秋原
半頃稅給于王官春韭一畦食供于家老而且煮米作糲
春麥爲羹以資餘人或給耕者甫生之犢等愛于孩提頻

來之燕視同于親故則亦物我均。心形兩忘者。烏又況
蠶經禽演不。乏奇書蛤港螺田。別開精舍臘頭。讌客社尾
迎神朝衫。忽著則鄰里詫觀。縣令偶來則牛羊突窟南軒
旣闢北牖。時開果落枕前花生鏡裏。一林百樹招鵲辭鴉
雙澗疊波留魴放鱧。若是者采其吉語娛我。眉梨懲彼殺
機戒茲子弟播三田之種。閣上巡觀。庚七月之章房中屬
和未嘗不集吉門之慶。極幽居之致。焉定省之暇時而出
遊。則峩眉當其前。青城出其後。大江流其左。資水徑其西
解角之鹿可施鞍橋。浮鼻之牛以當舟楫。餐雲欲曙之嶺
采藥斜陽之洲。團蕉數尺。非佞佛而可趺危梯。百層不學
仙而亦往閒防疾厄。時覽方書。偶有篇題緘之。經藏此則

金門大隱不止平原玉笥真人復來宏景若夫僕與足下
之交道又可言焉僕處鳩音之里君居吠日之方蛩蛇之
合無由牛馬之風不及乃闕前一覲忽若素知飲中百篇
愛同前哲顧性憎釋氏不侈前因亦鄙道流詎云緣法靜
言思之或卽吾儒所謂如舊相識乎夫卅年成世足下旣
近之僕則又過半矣頽仰一身離合萬里常恐百年交道
不盡然精氣不散當成神明風車電帷來往不絕則僕與
足下又何慮哉又何慮哉自此之別一日之內僕眺日升
君眺日沒一江之水君飲其源我飲其委則亦何嘗有須
臾之間遠近之殊哉保齋神理時時讀書簡牘不詳悉之
于夢亮吉頽首

遊極樂寺看荷花序

出西直門三里而近有極樂寺焉長河蔭前高阜倚後其東有國花堂西有勺亭皆塵外之幽構也梧門學士以偶日下直徧招同人飯于詩龕接軫以往車行者三里舍車而徒復二里甫抵寺門綠陰當空赤日亭午池荷東西曾不百步間以傑閣繞之回廊水氣升岸結爲輕綃林香入波漾此晴采于是或暝坐巖側或孤行竹中或擘牋庭隅或讀畫塢側堂高于垣者一尋門低于砌者百級重寮洞開直視十里負戴而來者望之如鷗乘軒而過者擬之以艇坡塘高低岡阜回互香氣拉雜雲光降升促織繞砌聲如碎琴風蟬過枝韻疑零鐸遊藤綿延上樹皆紫細草芬

郁杼花必黃乃蔽炎牖爰開北窗松露尚零栢風成陣家
京國者離然有雲表之慕宅南中者又恍然有江鄉之思
馬林陰屢移羽觴乍接果則紅暈徑寸與藏冰而共升瓜
則生黃滿盤汲井華而并薦陶令之榼無時不攜韋公之
莛適心而飲相與商榷今古縱談雅俗據石命句臨流作
圖幽襟旣杼勝賞斯愜又破曙而遊薄暝始返星河滿空
影乍曳乎籠燭雷雨在後勢忽掣乎軒帷此又晴晦出于
一時涼燠交于俄頃者焉同遊者爲許封君兆桂張運判
道渥李刑部鑾宣何工部道生吳明經方南及梧門學士
與余凡七人運判旣爲之圖余因序其顛末云時辛亥年
七月初四日也

南樓憶舊詩序

夫鳥以高爲巢魚以深爲穴居魚鳥之中者人也築基九層而上爲之樓則與鳥爭高矣潛池十仞而中爲之島則與魚競深矣然鳥啁啾而爲巢使無繒繳之患則終歲猶是也魚屏營而爲穴使非芳餌之誤則畢世無易也人則不然飛狐落雁之嶺八埏之險也鳥所不能飛者人或上之矣奔霆浴日之區九州之浸也魚所不能歷者人或過之矣則夫陟險不已將迷東西揚帆倏來杳無津涘當此者其亦有故巢之戀在沼之思乎南樓者外王母龔太孺人所居也余以孤童幼蒙鍾愛年未毀齒從母移居姊越十齡弟才匝歲魯國男子方驚毀巢漢陽孤生未歌窮鳥

由春徂冬衣無單複之製以夜繼日瓶無逮晨之糧爨爨
馬蹶蹶馬蓋十五年于此焉若夫雨龍竹馬瓦狗泥車探
春燕于棟頭捉秋蟲于徑裏岡賭跳而將平井投甄而欲
滿臨溪咒鴨涉渚撈蝦旣兒戲之無方亦童蒙之求我此
一時也隨母梳頭之歲從師識字之辰烏焉混于一篇蚯
蚓登于半紙藏書之篋時匿意錢衣帶之傍私攜面具同
學則謝家阿買送餐則裴氏小溪盼日影之不西怨雞聲
之太早此一時也至乃歲值元枵門隣奇窘仲理則厨難
耗鼠史雲則釜欲生魚井淘麥屑反避知親徑拾墮薪偏
逢長者然而天青入牖水綠周堂秋月塞門春花交砌何
嘗不破啼而四顧擁絮以周遊此一時也又或蘇季上書

全家盡返

謂身生

曙

桓姬索米半舫爰來

謂

隨

中外則

雙丁二到不乏奇童弟兄則羯末封胡并饒道蘊虛堂論

史鵠亦垂頭側徑敲詩蟲來齧踵篙師南巷雅乞書符蠶

妾北頭偏多問字此亦一時也授徒北館作贅東堂卜商

色養之時賈誼秀才之日會稽僚壻動色而見嚴生陽元

尊嫜改顏而親劇子鄰有束緇之饋室無戛釜之聲闢竹

徑而待賓借栢堂而讌客此又一時也詩曰維桑與梓必

恭敬止又況螟蛉果羸之場與松栢蔦蘿之所乎此則明

明如月難忘在闔之辰悠悠我思無踰樹杞之里遺聞傳

于廝養瑣事得于鄰童畦栽赤莧則湔上之蒼頭穴識金

鑲則羊家之故媪失簪楚國墮履徐方燕知春社之人犬

識衰門之客延陵之劍無封樹之堪懸班惠之書有篇題
之可認能無墮傷心之淚鑄思舊之銘乎又況臘頭社尾
上巳元宵餅識春辰饊名令節楊柳半橋之月芙蓉北市
之鐙水增一尺則已嚙閭門樹密三重則隱開樓扇燭龍
之首與鴟尾競高彩鷁之竿與神燈並出販脂鬻粥擊鉢
吹簫莫不紛至沓來風馳雨驟此又晏嬰之宅因近市而
居奇虞氏之樓以臨街而角勝標孝侯之風土記荆楚之
歲時差可連類而書削牋以奏者哉詩四十篇稿成以寄
巡檢二兄上舍三兄文學四弟凡爲此者亦所云寄魚鳥
之思致今昔之感也

卷施閣文乙集卷八

陽湖洪亮吉著

寒林雅集圖序

自寓齋清化寺街至正陽門三里正陽門至厚載門十里
厚載門至詩龕又三里每詩龕主人之見招也必戴啓明
而與聆雞聲而駕飯僕于路飲馬于途而後至馬至則一
巷數曲已遠市聲雙橋半傾僅入車轍五陁之山雲霾而
亦見千頃之澤冰凌而可行明湖瞰其前傑閣峙其後寒
林之雅多于遵渚之雁中廡之馬高于應門之童泉明北
窗殘月甫墮儒仲南牖朝曦已升相與脫暑儀節商榷古
今酪漿旣行圍坐未畢而諸君者亦已接軫而來排闥以

入較霜簡之威乘粉署之暇豐貂乍集則寒鳥依楹高論

甫申則渚雲落檻子公之染指移而作圖張運判道渥莊能以指作畫

辛之握手因而出句而且欲讀之書鑿楹而已貯久別之

友面牆而可親壁中黏友朋酬竹徑乍東舫齋又啓匪安贈作至數百首

石之別墅乃昭明之選樓縹緗塞窗篇什盈棟此則當陽

萬戶難忘身後之名魯國四筵無乏樽中之酒凡茲二者

兼自一人以視昔賢尤為盛事于是析彼雅遊幸茲暇日

遂各授簡為記揮豪作圖或馳騁乎百言或該綜乎數韻

至如僕者官既最閒性尤嗜友茂宏竟席不逃金谷之觴

劉芳半生虛有石經之號又允宜陪尊俎之高會追談讌

之餘歡者也坐中作圖者三人長洲曹指揮銳浮山張運

判道渥甘泉羅山人聘爲記者一人長洲王孝廉卮孫爲
詩者九人蒙古法學士式善上元王給諫友亮汾陽曹侍
御錫齡介休劉舍人錫五靜樂李比部鑾宣汀州伊比部
秉綬靈石何水部道生漢軍玉大令棟泰安吳明經方南
而陽湖洪亮吉序之云爾

楊耕夫先生柳邊紀畧序

夫出重閉之內而行九拂之外不知者以爲遠矣舉萬全
之身而冒百出之險不知者以爲勞矣抑知不然披蒙茸
跋荆棘有身之至苦也蚡冒勃蘇甘之蒙霧露犯霜霰宇
宙之至辛也尹子伯奇行之是二人者又何嘗移呼天之
泣于陟屺之時興我辰之哀在靡盬之候乎若山陰楊耕

夫先生者其有焉先生尊人安城康熙初坐張魏之獄徙
干邊時先生年十三旣壯走京師謀所以救父母者屢易
其期百方不就年已四十甫克出塞省其二親移愛日之
念爲見星之奔轍望雲之思作履霜之操於陵之三日不
食墨子之百舍以趨實一身兼之焉試爲計之自京師至
山海關七百里自山海關至奉天八百里自奉天至尚陽
堡二百四十里自尚陽堡至烏喇約千里則混同江在焉
渡混同江至寧古塔又千里言其廣輪則太章所不能步
也言其幽險則夸父所不能踰也又其間馬蹶而仆者再
石顛而殞者再蓋越十旬出百死而後至焉此柳邊紀畧
之所由作也嗟乎作易者其有憂患乎作詩者其有所不

得已乎而不知者或以此爲延之攬勝之書束皙發蒙之記是又沒作者之心忘有生之痛矣然其條舉大綱包羅纖悉較量山水畧述古今實視南燼紀聞北狩革書諸作倍爲詳核亦何嘗不可補域中志乘之遺備海外恢奇之錄乎夫松漠紀聞之作异書也實臣職也則柳邊紀畧之作奇書也亦子職也是書傳而盛京以西之道里傳土俗傳作者之勞心苦思傳卽作者之父母亦無不傳此則擘牋握管卽無异于田號泣之時申紙發函已如繙我躬不閱之什矣何其流離而不敢告哀沈痛而不能卒讀如此歟先生從曾孫夢符與亮吉交屬爲之序因述其本末云時乾隆五十七年歲在壬子上元後五日陽湖洪亮吉序

誥授懷遠將軍福建建寧中營遊擊張君妻洪恭人墓誌銘

恭人洪氏世居歙縣五世祖某客如臯因家焉高祖某又遷于縣之掘港場阿干之部以族盛而移宛孔之家因貿遷而徙父諱簡臣官廣東高州府通判南郡儒學聿生馬倫望都史才乃傳班惠年十九歸遊擊君大學士文貞公從弟也丞相近族以材官而起家華仲哲孫由武科而入宦時遊擊君父封君某亦以浙江寧波營遊擊年老致仕歸恭人逮奉二親克勤終日撰李沆之鳩杖進宣子之魚殮閭閻焉穆穆焉爛乎禮教者也逾年遊擊君成進士選藍翎侍衛漢世期門比嚴徐于金馬唐家曠騎參陸李之

衣麻待發而鎮帥某以委任方重援我弁有在任守制之
例格不使行金革無避墨衰涖官雖云建牙無改枕亘服
除擢福建建寧中營遊擊值本境賊匪魏繕聚衆剽掠途
次卽奉檄催赴與前官王某勦捕有功蒞任甫九日又檄
往護金門鎮總兵印復渡海巡臺灣七閱月乃歸弭谷口
楊周之釁却城頭子路之兵挈金印以渡重洋率戈船而
巡險隘時則外嚴鐵騎旣抒上將之威內築金城雅有夫
人之號蓋軍政之肅亦內助居多云歸署後遊擊君以中
暑醫誤投劑而卒時乾隆辛未年七月三十日也公孫之
里大樹爰摧貞婦之居嚴城忽圯流移問道沉痛積年蓋
自奉遊擊君櫬歸而恭人亦幾不勝喪矣復乃徹其環瑱

襄此窀穸奉我夫子祔君舅而君姑率是藐孤克盡哀而
盡禮宗族憫之鄉鄰稱之者焉及恭人之教子也合內外
之兩宗爲義方之三徙特開聖室親授禮經董父之勇生
丕茲而事仲尼文彊之勲有高卿而號元德猿臂輟射應
甲乙之科牛心啖炙起伯仲之譽不十年而正倫正藏並
舉秀才元方季方各膺禮碑歲己酉次君秉銳復成進士
特旨以知縣卽用辛亥入都就銓而恭人遽以八月二十
六日膺疾卒于里舍享年七十有七

誥封恭人例封淑人子二秉鈞秉銳女一適

孫

烏乎哀哉方奉毛生之檄已執高柴之喪原流逝暉
林靡靜響將以壬子年月日祔葬于遊擊君之壙禮也世

老有居之步卷八
去不停哀纏無盡屆期乞亮吉爲文銘墓亮吉與恭人同
宗且識長君最早爰不敢辭而爲之銘曰

如臯支歛所分幼煎室訓兮歸哲人相攸以武兮貽厥以
文文武之道兮萃于一門蒜山之原江水之溼我銘吾宗
兮無愧前史

椒花吟舫圖序

椒花吟舫者翰林院侍讀學士大興朱先生邸第南偏棲
息之所而亡友懷寧余君鵬飛所作圖也先生負蓋代之
才具人倫之鑒誘掖後進獎許輩流寢門未闢束修之士
紛來夕漏欲沉問字之車未返而先生又各竟所長不名
一藝苟賈之學與枚馬之賦同登後門之賢與世家之英

錯列有景伯之和易無周朗之偏奇于是海內之士有不
詣先生之居者遂不得爲聞人焉雖夫子之門何雜見晒
叔孫而北斗以南一人庶惟高密今者其室甚邇哲人云
亡高臺多風空室易雨薰林之花轉芬盈升之實空衍武
城之薪木今同分陝之棠公超之故居昔並五都之市此
則山邱華屋獨士以之涕流斗酒炙雞三步因而腹痛者
矣若余君之爲此圖也以賈生弱冠之年預長伯四科之
列望衡而處執業以來每咨經傳之疑時值笑言之宴欣
然命筆遂作此圖昔者鉅野之刻曾閔及望羊之門射陽
之圖宣尼謁猶龍之坐非形之于圖繪不克傳聖賢心跡
乎乃伸紙未竟風泉之聲已悲濡墨欲乾師弟之亡何遽

以視趙岐臨穴方繪延陵劉操感亡乃摩廣戚何以异乎
亮吉以歲辛卯謁先生子當塗學使之署始預賓僚繼焉
問業逮己亥庚子又從先生遊于京師劉向之校祕閣時
假異書朱祐之學成均屢蒙殊獎蓋師友之際存歿之感
均有不能已于言者焉暇日先生子孝廉錫庚出是圖屬
爲之序竊以先生之門著錄弟子不下千人咸負盛名各
官內外而孝廉獨授簡于余者豈非以受先生知最深且
與余君有同堂之雅乎夫過因樹之屋悼歎申屠趨種栢
之堂有懷龔勝以今視昔其理庶符爰序而還之俾世之
觀是圖者亦以知取材落實庶幾于大匠之門攀條撫枝
泣然生並世之感云爾

祭天柱縣學生劉緯等文

乾隆五十九年四月朔日貴州督學使者洪亮吉遣天柱縣學教諭劉以清酒庶羞詣無水之流致祭于天柱縣學生劉緯附生程三桂童生謙忠欽等之靈曰歲惟闕逢孟夏朔日汝黨六人共遭斯厄我聞驚愕詢彼市廛云汝將歸舍陸而船時夜甫半無流忽高一舟飄然乃觸石橋橋門有三劈舟爲兩羣眠方酣語不及響烏呼此水望海過奔直下千里難停子菟汝之始來于何不卜思攀驪尾顛葬魚腹羣瞻其出不見其歸成名之望尚切庭闈爾劉爾程里閨有聞文期無害命乃不辰人亦有言兄友弟敬尤慘三生全家併命

謂程三桂兄弟三人

哀哀謙生哀然舉首千鈞

方試卞玉未剖襜衫一襲兼製儒冠焚之三橋慰彼九泉
尚饗

刑部江蘇司員外郎楊君墓表

乾隆五十八年歲在癸丑十一月二十一日吾友刑部江
蘇司員外郎楊君以疾卒于京邸年甫四十有四烏乎哀
哉越明年二月始奉君之赴爲位哭于官廨又逾月君之
孤紹恭等繕狀來乞爲表墓之文謹按狀君姓楊氏諱夢
符字西躔一字六士漢太尉震其遠祖也宏農之裔卅世
遷于會稽安城之鄉五傳載其隱德紹興府學生贈承德
郎諱國英者君之曾祖也優貢生廣西通判借補平樂縣
知縣諱之琳者君之祖也國子監生候選州判贈奉直大

夫諱大德者君之父也母金太宜人夢長庚星入褰而生君故小名長庚及長而名與字皆取義焉傳說之騎箕尾猶屬後時曼倩之爲歲星乃徵先兆九歲能作詩二十工舉子業二十八以國子監生中式陝西鄉試改歸浙江又十年而成進士歷官刑部提牢廳及湖廣清吏司主事江蘇清吏司員外郎總辦秋審處其間扈

躡山東隨

圍熱河各一又隨侍郎玉德按獄奉天直隸江西淞江諸處時大學士英勇公阿桂管部事及尚書胡公季堂等皆深倚之烏乎處元奉使來歸甫及十旬奉倩積勞遷官未嘗滿歲亦可謂死于其職者矣若君之居室也孝于親友

于兄弟其友于兄弟也使妯娌無間言其孝于親也使鄰里消勃諍益自長樂君之卒君之考以貧故遷徙不常最後寓常州之邗溝因定居焉客籍甫占家糧告匱巢棟之燕伴季女而長饑翔林之鴉感太和而輟響君又念無以爲養也動捧檄之念則投牒者數州習負米之勞則傭書者十載迨乎登巍科官省闈而君之親已不及見矣于是擢第則泣擢官則泣歲時祭祀則泣十餘年如一日焉捧而不輟者盈尺之硯讓而不居者一成之田推乎庭闈以及親故則戚鄰之待以舉火者又十數家也烏乎至竟乍離之日復念周親目未瞑之時望深予季君之至性肫篤一至此乎若君之交友也內自一鄉外逮九拂樹米架羊

之彥飲爰吐鳳之英莫不識面欲先締交恐後朝饗告匱
忽然燭以娛賓冬裘旣罄尚假衣而貸客又或蘇援世事
則咸舉智囊糾排俗紛則敢爲怨府以是自里居以迄服
官坐上之客戶外之車未嘗不滿也余與君交二十年每
見有才奇而不遇守正而遭蹠者君歎憤輒形于色是則
君之交友亦根子性者與若君之服官也以劉穆之之才
居崔祖思之任事理無滯神明不欺蓋自幼時侍君外王
父按察司金君祖靜外姻贈尚書刑部侍郎錢文敏公皆
奇其開敏之資與商訊讞之務君偶發一言輒驚二老以
至身典案牘職司豺扉平疑獄者三馳星輅者四西蜀李
邵識使星之來丹陽馬稜推善風之至人皆以君爲有陰

德焉嗟乎丙博陽之報雖阻于生前于廷尉之門將高于
身後理固有可推者乎若君之爲文也枕籍六藝揣摩八
代儻約遜其精純庭誥無其妍麗美矣乎其將三典午之
世四卯金之代以參于作者乎然而桃李之色承列柏而
不華雲霞之光入殘月而彌慘九州浩渺偏饒幽朔之聲
四序參差乃鬱秋冬之氣才之不羈者至矣年之不永者
亦由此矣記有之曰詩言志若君之詩則斷雲零霞無其
清也奔巖削壑無其峭也幽花叢皇無其韻也馮夷水仙
無其幽也所著有心止居詩文集十二卷三惜齋筆記二
卷君藉以不朽者將是在是乎君配錢宜人克相夫子勤于
丙政子三人紹恭紹文紹垣皆聰穎特達端妍善文女一

人孫一人紹恭等將以某年某月返葬君于武進之某鄉
某原以亮吉交君之久也于是馳札萬里求其一言嗚呼
余又何以傳君乎猶憶丙午之春共艇適越時同里鄞縣
知縣錢君維喬文學蔣君陳尊崔公子景侃咸在坐次君
時喜爲綺麗之文酒半戲余曰君他日銘墓之作當以見
屬矣余齒視君稍小當時以爲友朋親愛之言無不至也
由今憶之月犯星之兆慮戴逵者翻貽會稽之凶膏燒明
之痛哭龔生者顧在彭城之叟梁國戲語念之而心傷鍾
繇啁詞引之以自咎余之交君者不謂其止于此也他日
薄宦粗就歸休里閭訪將軍之巷糴靴離三則大樹猶存
過邗水之橋則溪流半涸亦足以悽愴傷心者矣

少寨洞贊

黎平府西四十里有少寨河河左數里有洞馬門險若劈
崖危欲傾入數十步則左塗右谿徑益深邃陸可乘馬川
能棹舟土人云桃花水時魚則麇至尋源而進勢及百里
惜未獲窮其勝也徒觀其積厓萬丈無一尺之坦懸瀑百
仞靡暫時之停荒寒接天陰翳匝地雖思狂掇不覺瑟縮
又未至少寨以前景亦奇麗石徑百折蟠如怒蛇危橋十
尋覩以鮮羽繞岸居者凡數百家牖接渙艇樓通鳥巢花
紅上牀苔綠入竈人禽俱蠻莫辨啁啾土石盡赭尤凌景
光名花夥于種人鵝鶩繁于沙石則又楚南之秀壤荒外
之奇觀云贊曰

左塗右谿石作郭郭魚長于人陡向厓落黑盡生白光如
爨烟呀洞陰杳疑爲墨天春波如雷千尺逆上樵丁方樵
墮入渙網

師子厓贊

自黎平未至天柱縣百里有師子厓焉予行黔楚中幾徧
矣若茲之奇則未之覩也青氣徃徃迷茲嶺坳元岡纍纍
突出天半其下則表裏洞達東西延袤已枯之松倒挂者
千尺欲落之石相黏者徑寸蹤無能停瞬不及轉如此者
半日方抵平坦則麥隴鋪秀雲光疑錦延回一村異景百
出高會居巢卑幼處穴一榻之外無非雞豚白仞之餘乃
匿牛馬怪魚窺人頭尾五色妖鳥咒客飛鳴百回黃果滿

樹卽兒童之糧紅蕉百尋裁蠻女之袴此則吳越山水遜其靈奇荆江土風減彼殷阜者矣贊曰

石若立榦巖如覆盂穴腹空洞倒生棕櫚奇邪欽寄常有落勢人行其間目輒上視紆行百盤直下千級厓方師蹲馬忽人立

黑神河贊

黑神河者牂柯江之別名也觀其懸流一絲獨下千里石亂若屋魚飛似星雖未遽接天而離地已百仞矣是以終日疾行不覩寸壤一夜數起惟聞怒雷花氣灼日雲光亦紅松濤接天波影俱黑雞犬之柵高于鵲巢魚龍之腥裹此人氣此則思理所不能及實荒外之奇矚焉又攢坂出

其旁豸水流其側紅盆繞其北青浪瀉其南村女睨客則
啼如猩猩花苗下坡則轉若碌礪均足啟豁聞見廣益神
智贊曰

高惟見天俯若無地帆檣切斗下瞰雲氣飛鳥蹠實神魚
骨空來往不礙咸行鏡中分濼擘沅獨下南海我窮其渡
孰竟其委

白水河贊

永寧州城東北四十餘里有白水河其始也自地至天倒
行者百丈其繼也由上迄下橫飛者數里雲日蔽色始輪
其奇光人禽絕聲乃逗此靈響驚雷怒霆不敢過其側飛
叢積雪未能凝其旁一川茫茫雖子夜而如晝百步慄慄

即炎天而亦寒行客木屐欲按乎山坳仙人水簾忽懸于
天外下則洞濶數武巖深百尋飛泉蓋之不見日影穴鼠
大于山鷄苔錢圓于斗拱神怪所窟忘其歲年幽靈往來
恆以月午客曾登雁蕩陟匡廬所為飛瀑懸溜均無此奇
也于是嗜靈異者有觀止之歎居蠻嶠者可無域中之慕
矣贊曰

是聲是色非意所想闡于百尋忽落奇響白雪之白寒冰
之寒飛仙所為靈怪是蟠相傳有水岸伏于洞中滔滔混混凌蹌川
瀆滄溟縱到怒氣猶鬱

使北江先生少孤其克自樹立及學之有成實其
母蔣太夫人之教故其編詩也以及侍太夫人所作者
爲附鮎軒集八卷漢書地理志會稽鄞縣有鮎亭南
越志巢鮎長寸餘大者長二三寸腹中有蟹子如榆莢
合體其生俱爲鮎取食郭璞江賦所謂瓌鮎腹蟹是也
先生十歲始就外傅二十卽出授徒負米所至皆不越
五百里外一歲必兩歸以慰太夫人與菘蟹之早出暮
人相類及奉太夫人諱讀禮於閭門者二年繼又饑驅
四方十年乃獲升上第官禁林逾一歲卽持節視學黔
中人欣先生之遇而不知先生以祿不逮養每與人言
之輒泣下不止爾雅菘詩草拔心不死先生之名集蓋

以此正卷施集自巳亥至癸丑已得十四卷門下之士
乞刊之于黔中遠覽在里門日卽受先生之知今又從
官牂柯先生之所以待遠覽者未嘗以屬吏視之也今
遠覽行以老乞休矣先生門下士以遠覽知先生尚深
乞爲序刊詩歲月因卽遠覽之所以知先生者序之至
詩之工拙世之知先生者甚多非遠覽之所敢及也時
乾隆五十九年歲在甲寅新正十日鎮遠縣知縣署黎
平府下江通判河南張遠覽謹序

卷一

傭書東觀集

古今體詩九十二首

卷二

虎軾西行集 古今體詩五十四首

卷三

仙館聯吟集 古今體詩七十八首

卷四

官閣圍爐集 古今體詩三十三首

卷五

太華凌門集 古今體詩三十八首

卷六

中條太行集 古今體詩八十二首

卷七

緱山少室集 古今體詩一百二十一首

卷八

靈巖天筑集

古今體詩一百三首

卷九

西苑祝釐集

古今體詩七十九首

卷十

祕閣研經集

古今體詩八十二首

卷十一

五陘聯騎集

古今體詩五十三首

卷十二

黔中持節集

古今體詩一百三十六首

卷十三

黔中持節集 古今體詩一百四十六首

卷十四

黔中持節集 古今體詩八十六首

卷十五

關嶺衝寒集 古今體詩九十首

卷十六

蓮臺消暑集 古今體詩八十首

卷十七

回舟百嶠集 古今體詩一百十三首

卷十八

侍學三天集 古今體詩一百四十八首

卷十九

全家南下集

古今體詩一百十八首

卷二十

單車北上集

古今體詩一百四十四首



卷施閣詩卷第一



陽湖洪亮吉著

備書東觀集己亥庚子

句容別朱三潞時朱居憂抱疾幾殆閔而贈之

一心願汝作頑石我歸來兮石不泐

高郵金秀才蘭以戊戌十月與亮吉訂交越月來會母

葬事畢將反同人集味辛齋作詩送之并索亮吉詩

謹賦此首

死生離別杳難支復向城西餞素知窮歲冰霜行未定
高原風木泣多時君因作贅悲身計我愧論交有鬢絲
夢折素梅聊贈遠孤篷才發已相思

清明後一日與孫大攜酒飲王七秀才廷俞南園歸過

縣門憶亡友林嗣基作

晚唸朝咏寄蕭騷王七園前一樹桃接翼水禽窺綠鬢
連枝風蕙墮青袍君從愁裏何妨醉我覺塵中尙可豪
歸路忽驚官閣過又教鉛淚滴城壕

勞勞身計本無涯生儻多愁死亦佳閱世短于欹枕夢
招魂長入酒人懷琴書風捲知誰在花月尊空與願乖
欲把閒蹤比飛絮年年開落縣南街

揚州別汪大端光

木葉暗天地雨聲連曉昏吾行數千里別子舊東門家
在依鄉黨親亡憶弟猶餘尼父歎三至席難溫

渡河寄孫大星衍

春林綿綿雨聲接紅白花飛雜黃葉黃飄一葉忽入樓
樓上獨客生春愁讀書先忘歲終始瞥眼韶光已如此
同經憂患傷年少太息前遊成隔世荒墳三尺少婦棧
謂孫大星吾家墓門雅亦啼頻年禮俗斥凶服只有訪子
還麻衣麻衣不共蟬蛸死失母尤愁對妻子塗窮歌哭
止從君百里遙遙共江水君家大母顏色溫一載撫我
如撫孫華陽席中多友朋屬爾作弟吾爲弟窮冬風雪
記出門遠遣瘦鬼隨饑鬼三條銀燭共校文暇揖沮頡
談巴蔡吾儕作客尤狂放哭母傷妻一堂上丈人知我
自不憎謂劉雲房先生同輩相看訝無狀言狂寧失座上歡性

分屈曲非能堪錢刀生計亦偶爾我輩于分難饑寒層
紅疊翠江南地草草狂歌人亦忌插架奇書送爾歸連
床別夢勞予記鳩今喚侶我別家挂席百里隨風雅平
生性命視知己得一死友殊堪誇此時憶君顏不華醉
裏擾擾人聲譁遙程豈止無一花青草路斷飛黃沙

高郵哭亡友賈田祖

城角參差暮雨昏水程何處弔騷魂吟狂陋巷三間屋
骨冷高原尺五墳遺業尙存通德里舊交真軼古夷門
囊錢斗酒江南路他日相期報愍孫

丙申夏予留滯太
平幾不能行先生

假錢構
酒送歸

握別盟言未敢寒重泉書去杳漫漫承家久已傷羊舌

論史何應食馬肝
公子才名終不達
故人歌哭總無端
霧昏蠹蝕三千字
忍向燈前掩淚看

夜行宿遷道中

荒原真欲馬行遲
不定陰晴四月時
破閭怒雷分雨勢
斷崖高樹表風枝
無家已絕經年夢
有約先懸出世思
他日故巢相憶處
好尋芳草寄卷旒

邳州城外

十里涼雲拂柳絲
野花香破酒醒時
征衫幾日塵沙駮
怕向谿頭看鷺鷥

偶成

荒塗百里夜程輕
破暝重從石磧行
天濶露寒人不見

忽驚郵外雨絲明

過永濟橋

塗長客意勞持火出層壕小市人聲亂危橋馬影高岸
風清薄洒林露滴垂桃晨氣還成雨微寒入紵袍

曉行

郵雞喔喔酒全傾擁被求衣事曉行四野月明迷向背
一山雲出定陰晴春殘苦乏加餐信道遠愁非負米程
醉醒十年前事起馬頭塵夢較淒清

過蕭望之故里

西京獄吏皆丞相東海蕭生偶抱闕讀罷蘇碑無一事
支頤還望馬陵山

經術崇隆位望危元成太傅總奇才彭宣枉自稱方正
不及朱游和藥來

滕文公廟

商鞅立新法大啟陌與阡子居謀王道更欲建井田強
秦以滅秦二世社以遷滕亡祀則存廟食普萬年我來
謁荒祠悼歎小國君遺像一畝宮五十里致虔霸術豈
足矜謀國須大賢

四鼓行嶧縣道中

高原墳樹古人鬼或同經夜氣沉殘月天風動大星未
愁前路暗不斷此山青向曉寒尤勁車前雨脚腥

謁孟廟

落落非無志器器亦有承吾猶距楊墨真不遠齊滕小
邑衣冠肅宗祠俎豆增摩挲讀碑字應愧歷階升
憶賃東西廡曾傳內外篇承師北堂上勤學斷機前勿
賤同尼父親喪愧少連寢筵虔拜謁心折爲三遷

客舍

紙屋繩床擁敗衣鳴雞聲裏慘晨陰星離雨絕書難達
山亂雲荒夢欲沉香覓反蒐勞曼倩草尋益母泣曾參
應憐孤露餘生贅無復髫年入世心

東阿謁西楚霸王墓

松柏曾無半畝宮蒿萊時起憤王風學書我亦慚無就
劔君應恨未窮十載通侯酬項伯千秋大義戮丁公

猶餘一事逃清議賣友誰誅呂馬童

滋陽謁柳下惠墓

斷水粼粼樹色昏行人駐馬揖空邨孤羈我下無家淚
三黜誰招去國魂偶食廟牲齊下邑愁逢海鳥魯東門
傷心死士偏寥落曉日樵蘇上冢屯

五日客感

節物關心淚暗滋斜陽原上泣多時殘鴛驛路聲無緒
瘦馬崑山骨不支五日花開憐客久重泉家在恨歸遲
愁看弱弟同行役相對昏鐙理鬢絲

與黃大景仁話舊

壯志都從憂患移別離如夢見猶疑尋山蹤跡誰還健

戴斗文章爾獨奇，塵海此時容小住。
書官終日坐長饑，朝來欲上燕臺望。
好覓天街瘦馬騎。

十五年前將母身，同攜襆被出城闈。
緣知來日非今日，已覺吾親卽若親。
晚歲互看謀粟米，衰齒密共禱星辰。
登堂此度先垂涕，我已傷心作鮮民。

傭書

傭書生計尙淹留，并疊唸懷事校讎。
獨雀見人殊惘惘，饑鳥得樹亦啾啾。
雲和草色荒三徑，月與花光艷一樓。
却厭軟紅塵裏逐放教，愁坐轉忘愁。

小病

佳時曾少出遊車，側屋三椽此寄居。
失喜遠書來酒後，

舞韶手却憐新病入秋初名花作果香偏異野雀隨人
性亦疎拋得世緣耽學靜鬢絲一月未經梳

得孫大江寧書却寄

櫻桃一樹傍紅墻書到翻憐客異鄉酒癖更沾衣袂溼
花疎時入枕函香刪除好夢緣妨睡檢點閒身未肯狂
我欲悟君先學道攜編三月坐匡牀

憶汪大端光

淮南冀北經千里除却孫郎使憶君小別正當春後雨
封書欲寄隴頭雲人輕詞客張三影天與揚州月二分
珍重綺年題綺句莫教前輩擗清芬

夢入外家南樓覺後有感寄內弟阿魁阿愚四首

樓頭殘燭迥淒清樓下愁人怨曉明千里斷虹隨夢遠
五更零葉打衣輕風鴉巢樹知前後竹馬鄰童識姓名
若把舊時情緒譜杏花樓上是三生

兩家兄弟王成行十五華年逐隊忙作達最憐羣上樹
學趨猶見汝扶牀鏗明樓閣催書急花人闌干獸夢長
說與封奴渾未識却教阿母倍淒涼

梅蕊初飄杏復葩商量春事已如麻拜殘阿姊簾前月
看足鄰姬徑裏花生少學愁愁未慣孤眠遲夢夢還賒
墻頭風細星辰定不識何時轉歲華

鞭絲爲客去匆匆一事如今恨轉同尺五凌波輕燕艇
三層松閣紙鴛風閣中草綠埋歌扇愁裏花紅照殯宮

十九年中衰盛異欲從何處悟初終

哭錢公子中銑

邗上孤篷竟未歸絕憐愁鬼斷斜暉京華迢遞猶傳札
慈母殷勤尙寄衣五日正沉江畔黍一官虛憶省中薇
冤消送我谿南日苦說燕臺伴侶稀

童年經術本無師曾愧尙書國士知死日尙聞憐趙壹
諸郎都解敬袁滋卅年宦達虛身計五葉門衰賴子持
莫愴筵前小兒女更愁堂北鬢如絲

七夕露坐憶孫大

瓜果筵虛薄露零懶看河鼓說精靈思君永夕空濛望
南斗光中第一星

讀長慶集寄孫大

長慶集樂天自序長微之七年今亮吉春秋三十四而季仇年纔二十七與微之小十樂天同二人之交亦不減元白所不逮者或名位耳其他尙可企及也爰作一詩寄季仇并邀同作

偶讀開成少傅詩七年我亦長微之神仙共挂蓬萊籍風月追吟楊柳枝一代才名何必愧九原交誼本堪師江州司馬通州倅料理頭銜似往時

結交行寄孫大

浮雲變滅安足論爾來友者洪與孫九天仙人不嫌訶一代交道殊能敦君不見結交不過通侯門賤客雞狗

無由分結交不入春風場少年鷹犬徒相妨與其長安
城中交俗儒不若咸陽市上留博徒俗儒言貌師中庸
緣飾經術爲三公君無更齒馬東海我尙恥說胡華容
博徒之交亦何有長笑傾心在杯酒一言席上吼雙龍
千古英雄困廣柳我交黃子景仁十七年病鶴雖病形
疑仙妻愁親老不思返白日憔悴長安眠趙生懷玉之
交歲逾十持論英英輩難及洪生狷者不欲狂知我只
有真州汪端光壬冬岐路一握手朗若璧月分輝光驚
濤飄蓬亦思止白問心期只三子江山花月久厭陳乃
貢清氣生茲人非惟文藝擅儕輩亦覺至性流真淳我
交數子止可生不若交子兼幽明我交數子皆許身不

若許子兼心堯三千里路夢飄忽二百十字言溫存

江擘倚書才我廢我蒿篇子悲蒙楚詩中年哀樂亦如

一我若非爾形難支自從五年來會合一一數茲離檢

歷日已過一百五黃金臺下才士多我不見爾遠高歌

癯黃短趙屢相憶要聽秉燭言如河君不見今人交道

皆猷貧不識古有范史雲今人交道皆猷真不識言有

龔君賓誰言勿頸交我弔成安君誰言投漆堅我訪雷

與陳乃知天生爾我為交道不獨文雄詩傑垂千春

華陽憶舊行寄朱博士沛林海州光照汪縣丞蒼霖執

呈孫丈勳及令子星衍

異時我客華陽春一方宰吏無俗人汪丞治績亞林宰

更有博士真天民吾鄉丈人亦軒特鏡裏顏紅鬢斑白
四家僕從屢招人一縣醇醪止供客邑中賢者沈與王
亦設薄具邀嗟狂居留三月九十醉餘者病酒眠匡牀
天然憂樂還相召妖鳥鳴春已驚告碧樹愁聞山鬼啼
縞章夢致谿神弔城東一別事若麻三載復看城中花
宰官擢守縣丞徙博士貧老辭還家當時我識三公子
兩抱妻憂一身死乃知造物最忌狂自悔嗟顛亦應止
孫郎悟早雅興除脫然樓上思著書我來憔悴寡顏色
戒酒怕過山公厨前遊歷歷春時節欲著思量怕愁絕
鳥趨岡南宛轉簫青元館裏昏黃月人生年壽何須耄
三十當令一生畢已分琴書付鄭三

謂霞浦鄭聯華林君受塔受業于余

者未應蹇放同王七

謂縣中秀才王廷俞

春華已過憐秋曉落落

天空寄魚鳥隔世形容照水愁無家笠屐登山好博士

年衰屢致思縣丞無息官聲遲一篇為寄淮南守慰爾

風前哭子詩

代書寄汪大端光八十韻

百慮不失一子才為世需六經甫通三我識愧里儒才

識工拙間出處可不圖子意乃不然勸我入

帝都為言予有親尙欲依菰蘆子親存我亡一語傷勸

孤負米十四年萋空粟與芻子行燕趙歸勤作反哺鳥

我成吳越遊忽為失母雛我生慚世間感子引作徒為

傾囊中金為計道上儲六百里水程十八日旱塗虛歷

夷險郊孰宿孰可鋪英英公卿中孰謁孰則切我足雖
云幼子口亦已瘖感子珍重心臨行野踟躕譬若溪谷
風幽草亦漸蘇存亡心已傷離別淚屢花萼萋四月花
莽莽長河蕪挈弟旣慘悽念友更咽嗚相離第一程夢
子秦郵湖涼月忽抱肩老魚窺汀清東阿縣西門夢子
又在吳俱爲少年遊鐙舫狂呼盧三夢宜武坊斜日殷
銅鋪新知無一人知子應念吾每夢必有淚每淚必有
書書皆千百言紙惡字跡麤豈惟字跡麤兼愧言辭紆
長安識君人謗譽亦復俱每苦立論嚴憎子所服殊我
不置一辯歸室始歎吁欲摘天半星爲子冠上珠欲剪
湘中霞爲子身上襦天河濯五色色異凡紫朱天衢曠

衆文文匪常羅繻春月潤子顏秋露濯子膚日吐瑰麗
辭稱此佩服日陳琳球響稱此顏色姝留侯似婦人
曲逆美丈夫不聞史傳譏但覺流輩無塵冠敝屣中不
必德義孚四首垢面人不必名實符雖然願一言少歲
亦已徂二十顏尙髻三十領有鬢吾徒勤事業弃置常
所須要當惜心神何必營衣裾急從良友箴息此俗論
誣明年登玉堂三館步復趨貽茲老成規莫被輕薄愚
我來人海中戚戚意寡娛因緣識文人千百量以車多
文或爲史小智僅作胥行雖歷方州見乃守坐隅草謹
出詩編朱墨盡貢諛立語苦不工已詔鮑謝逾我時出
直言衆目怒以盱謂我立論高謂我制行迂一心苟無

慙兀兀任毀譽求子素識人又各問一區非無楊生治
亦有黃子彊旬日乃握手餘皆掩蓬廬時時讀子詩
此慨與獻子才信鸚鵡我筆非於菟頗愧紛疊來索詩
若索逋我常思子言氣歛不敢舒逢子乃一發筆禁口
亦呼子白亦易作字錯墨屢塗前聞欲移家急札馳郵
奴煤車米石昂詎可攜妻孥况復堂上哀行坐總欲扶
豈任舟車勞與此食粒糲詩儲及瘦方本言皆悉
錙銖詎不爲子謀使子烏就奴子行試禮闈先利矛與
及亦思賀萬錢不若儲百壺倘或成同官雅足見發紆
拙効我亦收令謨子先敷壯往庶有程少習藉可除被
酒一縱言省札應豁如

九月初二日得家書始奉適王氏姑七月初九日計翼

日于崇南坊寓舍爲位以哭哀定并賦詩一章

吾祖憐嬌女慈闈愛小姑弱年尤痛子

適王氏逾年舉子數日而殤

中歲卽從夫憶嫂顏常瘦思親淚屢枯重泉真健羨骨

肉慶提扶

八月二十日偕黃二暨舍弟飲天橋酒樓

長安百萬人中有賤男子日挾賣賦錢來遊酒家市昨日送君回今日約君來送君約君于此橋長安酒人何寂寥酒人無多聚還喜破帽塵衫挈吾弟攝衣上坐只三人爽語寥寥落檐際君言內熱需冷淘我慣手冷應持螯閒無一事且沉醉不然辜負青天高青天高高復

飛雨二十四樞風欲舉飛蓬卷葉十里間直視城南落
驚羽濃雲欲暗南郭門斜日忽破千林昏陰晴萬態門
秋景醒醉一夢恬吟蒐持千螯揮百尊不覺橫上空無
人君歸雖遙莫先走萬事要須落人後君不見門前豪
騎控雙龍笑我西行馬如狗

重九日陶然亭遇吳四端彝話舊因憶亡友唐肇文并
寄令弟孝廉熊

辭君久已事征鞍猶作壚頭俠少看九日一尊同濩落
十年三見話辛酸唐衢骨冷誰重哭吳質心愁自寡歡
應愧故人狂未死典衣還欲滯長安

送繆公子公儼之江浦兼簡孫大

余四月申入都與繆
遇于逆旅遂訂交焉

相別翻憐相見遲坐中人影壁間詩蒐搖青草東風路
夢立黃河遠片時懶修病馬去來應有恨秋禽蹤跡
本誰知寥寥門閉紅塵裏殘臘都將濁酒支

去去遙山一桁青愁程先已夢中經江南迢遞傷情思
公子知交有性靈久據竈餈看讀易暫探石闕記搜銘
來朝風色東南便我亦商歸大海萍

好因魴鯉答枯魚總覺蛩蛩念鉅虛白日懷人當檻坐
紅雲羨爾對江居身名莫笑中條叟鄉里須乘下澤車
丙舍一椽松數尺未妨他日訪吾廬

僧寺與徐書受話舊卽贈二首

一夕長安雨寥寥話十年蒐驚隨逝水雀病憶空天被

酒還如昔題詩已遜前窗風與庭葉蕭颯枕函邊

爾念無兄弟逾年服姊喪余尤痛風木復此感姑亡骨
肉重泉滿松楸隔歲長相將營內舍頭白住江鄉

東坡生日集翁學士方綱蘇齋卽送羅山人聘出都

廿載我居公舊宅

東坡卒于常州其宅前屬余外家蔣氏歲常以生卒日祀東坡并爲會

一年兩度薦清醑殊鄉作客初逢臘學士開齋尙號蘇
雅有詩名傲西蜀愁聞征棹反東吳買田儻遂中年願
亦擬歸收陽羨租

被酒與吳生麟夜話

遼東道士應成崔陽羨書生莫化鵝尙有十年人海願
却來吹笛共高歌

程編修晉芳齋觀元耶律文正畫象賦

先生好古構兩軒邀我讀畫兼開尊頎然素幅出偉人
云元宰相遼王孫斜陽欲下壁色昏慘慘若動須眉神
眼光下欲視千世限以尺幅猶英麟長身盤頰大獨科
追憶至論如懸河人生歲月百年耳公甫及半動荷多
巍巍一代推上功替人只見劉秉忠文章年壽亦相似
若論志節尤推公異書壑腹奇難剖落落吾徒出公後
詞筆還驅入海濤姓名欲戴垂天斗卽今卷畫空堂走
反復公名難去口焚香閱傳意有餘更耐坊南一杯酒
題僧石濤竹西歌吹圖

浮雲急景安昇留我頃四月離邗溝隄邊歌吹尙沸耳

回視已隔天南頭懷鄉念友殊孤悶我見此圖驚復問
中有春波蕩漾舟七年往事帆檣趁豈惟前事縈方寸
畫裏朱顏亦凝恨紫陌牽愁柳作絲紅窗吹夢風成陣
回流一曲波如剪合隊春人若鴉點三尺寒波一寸萍
游魚尙厭春塘淺誰從門際吹短簫萬朶花落從東飄
尋圖我欲眺江左雲樹一抹橫林梢此詩此畫俱高格
墨粉淒涼年近百今日揚州勝昔時歌臺已徧隄南北
吾徒流滯幾春秋蒐寄東風第一樓爛醉莫嫌狂杜牧
枯僧亦復繪揚州

送趙表弟襄玉南歸卽呈侍御舅氏兼寄孫大

孫郎約我遊燕臺爾者八月無書來趙生約共長安佳

亦復驅車覓歸路堂前白髮各數莖一名驅爾不得停
雖然親在亦須仕努力勗爾所榮名榮名得失尤須數
落落塵中尋故步我愛時吟短李詩人言合獻長楊賦
我年四五卽識君相與賭字傾其羣爾來歲月及卅載
文筆喜各持堅軍風霾雨黑傷年少我爲窮愁著書早
君無羨我覆畝書我實輸君事親好橋東惟爾巷南孫
海內知交有幾人勸君歸後復垂淚偃卧一室傷羈鬼
人心不同面尤異尺五惟營閉門地根矩終非入世人
寥寥時有胸中氣頃攜弱弟住長安黃葉秋深補敝冠
貧來雅復對牀卧眼底誰足謀饑寒窮冬道我顏何瘦
我爲傷親益思舅三徑憑傳問訊書十年我受恩私厚

更傳消息語孫郎莫向人前倚酒狂
殘歲燕山風雪冷
梅花開後夢千場

客感寄孫大

燕臺春日試飛蓬
无盡山川不定蹤
客久尙須遊二嶽
歸遲真待長千松
成鄰幸結東頭屋
投老同聽北寺鐘
何止與君交一世
此心無昧總相從

憶汪大蓮花寺

癖狂大
癖新愈

北巷南條共夕曛
見時雖少夢時勤
愁多壁著疎疎字
病久窗生黯黯雲
後死未妨還屬我
此生無恨爲交君
中年退盡春衫色
只有爐香尙細薰

敬亭山色對牀眠
彈指交期已九年
詩卷正愁盈篋底

風裁無恙立燈前
顏垣怨雨傷春早
古屋踈梅照夜鮮
應愧故人還未達
賣書真欲學遊仙

與楊三倫夜話并悼蔣寶善楊炳文

何因心跡許相從
失毋辭家共轉蓬
病裏春生勞遠望
愁邊書少憶狂蹤
燭孫千年城郭須
歸雀三客鄉閭總
號龍我擬買田身
計穩倚門同數九
株松

被酒閒徵少日場
樓鴉辭樹燕移梁
灑楊門徑春陰遠
秀蔣池臺夕雨荒
數口尙存顏轉瘦
幾生修得鬢初蒼
宵談祇厭燈迷燄
不覺風聲徹戶涼

連得孫大書却寄

江東有客寄唵箋
苦說人生祇百年
多病況緣憂患積

無家仍復歲時遷，雙垂別淚燕山末。
千折歸心春少前，心事累君身累世。
茫茫愁日又無邊。

和汪大憶舊詩十二首，卽效其體。

十五年前在謝家，上樓明月下樓花。
如今門鎖空春裏，一任閒枝閱歲華。

病怕東風護曲屏，每逢長日恨春晴。
幽眠未起西窗曉，銀燭光中度一生。

繞砌疎蘭入海棠，眠春鳧膩不分香。
當時夢醒匆匆甚，開戶斜陽滿鏡黃。

自愛幽居不結鄰，樓前十里漾空春。
溟濛水色溟濛雨，只向疎闌淨麴塵。

山色依樓水繞牆一層雲氣一分涼
高居莫掩窗前後
引得銀河接鏡光

城隅一曲上無端
城裏春衫城外看
只倚北樓傭不走
柳絲衝面怯春寒

見不分明夢亦空
接天樓閣有東風
幽窗覓徧聞歌地
只在疎螢細草中

水花春徧惺家池
十五華年鑑影時
今日再來羞野鵲
柳枝添恨鬢添絲

剪燭三更鬢乍梳
宵遊還覓徑生疎
誰知別有關心客
鸚鵡橋西識面初

兩重門內數春星
燭影微紅鬢影青
容易使他籠鳥榭

不來相伴讀仙經

看鐙歸後病多時
花滿房櫳總不知
今日試將簾幕收
亞墻開到殿春枝

移家一棹去匆匆
蟋蟀銀牀烏玉籠
盼得近春消息到
情懷無奈隔江鐘

贈莊四寶書卽題行幃

京華遲日飲千鐘
風味都憐酒味濃
入世偶然成短翮
長松如此亦雙龍
身因早客眉痕皺
書欲名家指繭重
手版到君須遠宦
未應同我住鵝籠

連雲樓檻接深池
記否兒童竹馬時
花底衫裳同侍母
簾中書策遠尋師
相看夢冷情疎日
欲詠兄肥弟瘦詩

遙憶謝家羣從好玉顏都已鬢添絲

二月十五日與汪大至天橋酒樓薄飲乘月而回

青郊三里月紅燭一杯春痛飲消餘晷能閒有幾人壇

雲入窗暗山鳥上樓馴只隔軒舳外車塵雜馬塵

爾念邗溝水經時照玉顏予悲白門柳曾復伴春閒鄉

樹偏繁夢華年渺未還疎櫺愁絕處聊與眺西山

憶舍弟時抱病南歸

弱弟如形影相隨作客初抱關吾妄願舍弟近在館中

當得涉世爾九疎粟水顏常瘦塵沙髮屢梳難好待營

田一頃早與共扶鋤

籬桃三兩樹歸及見垂枝藥裹須頻製郵書莫更遲饋

蔬憐阿姊挈袖識諸兒只有傷心處門闥入始知

春江行贈汪大

紅闌干影接天一江春水闌干前闌干搖紅水搖綠波
底闌文百回曲我共春江魚同飲春江潮滿聲出入鯉
魚腹水色蕩漾吳儂瓢吳儂家花滿畦春風來江北飛
君門前千樹桃春雨落江南飄飲水暮還朝思君不可
邀水遙遙尺五篙夢迢迢十九橋

憶遠行寄孫大

波淼淼星搖搖約君不來算已朝吳帆停越車駕約君
不來春已夏春光九十靜掩關幾年春閒君不閒曾雲
萬里宵征路却恨君閒我難佳十五已作同巢烏南枝

北枝名對呼十九更作尋源魚曉行雖遠莫復俱東流
水深南枝有陰千里與萬里兩心同一心朝心徘徊莫
心怨幾日春魂自凌亂莫剪踈桃入戶枝春花開上橫
門扇

谿南曲

谿西月不華谿北桃無花風光只落谿南路和月和花
築樓佳花枝二月人二旬樓高一層春一分谿光已隔
畫橋影柳色自門疎闌春岸雲凝紅水雲白總遜春衫
好顏色百花開處百禽鳴樓上添衣樓下行尋芳肯到
春谿口隄上行人學垂手放船肯過長河滄牆頭女兒
做畫眉畫眉尙避春鶯見照鬢都疑水禽羨鏡裡濃雲

曉上頭竹中輕粉宵勻面春旛親製初護風樓月三面
懸玲瓏眸迎深館迢迢綠手展文窗扇扇紅星蕊夜久
愁猶立露冷草香蟲尚蟄百餅薰籠總厭燒啟帷試放
生香入消息今年異往年客巢新定故巢遷愁邊曉泪
疑含露望裏春潮已接天傷春曾到春臺畔籠鳥生蘇
茶敢喚背客親移北戶鐙呼鬟更掩重門扇短短疎籬
漠漠塵沿谿樓閣對牆身緣知谿路經三折只共波光
住浹辰可憐門左閒亭塢三月誰爲衆香主拋客年光
誓不停迷人草色尋應苦一樣扁舟去未還五湖蹤跡
異三山春來依舊花千樹夢醒空愁月一彎

二月二十三日復與汪大上天橋飲醉歌

著書不爲千年計，直借陳編壑奇氣。出門不逐萬古愁，聊上高閣開吟眸。天橋樓前一杯酒，昨日苦思今在手。我能飲君能留，三十莫抱二十憂。識君二十年，尙少屈指十年君。未老眉痕鬢影未減青，一色綠衫同似草。盈樓飲客我獨眠，未飲滿擲青銅錢。座中誰識兩少年，江南江北無一田。尊深酒熱莫更催，頭上一雲紅覆杯。休嫌飲盡衆賓散，伴客時有春禽來。城門樓上春陽滿，一鳥轉春聲。緩緩城西山，色影接天極。視惟愁目光短，今日白晝飲復勝。清宵吟百壺，雖盡意不盡。兩客所喜皆同心，醉顏時紅亦時白。一市圍觀不相識，頗說近來無此客。

二十六日過汪大齋頭見餉酒者汪大云留以相待歸
後夢汪大以昨酒別餉人意甚不樂醒後戲作此以
寄之
故人不入夢入夢牀頭酒帳中燭影欲碍眉枕上道書
猶在手夢時得失乃可知莊生偏悅夢醒時君不見心
空不著閒輕重憶酒憶書都入夢

宵望

登墟聊一望萬瓦月光齊地迥風生樹春濃露覆隄雲
光迷向背田綠誤東西莫逐巢枝鵲回聽警曙雞
屠大令紳以報餉入都話舊賦贈四首

遠宦迢迢十載餘相逢我亦頷添鬚賢勞已覺官聲起

憂患偏憐壯志虛，釜欲生魚惟上考。書應成蠹，少寧居重來流輩俱清秋，莫哂狂奴尙鹿車。

一縣無能滿自家，水深山瘴路尤賒。未妨茅解吟詩鉢，慣聽荒城破曉笳。民雜獐獍難定戶，官清胥吏厭隨衙。敝衣報政來京闕，却使尋常計吏譁。

剪蔬我奉北堂餐，市酒君憐阿姊寒。錯伯隨汪氏與其家五載篝燈通夜紉，常時籬落饋春盤。青雲志節賓朋慰，綠鬢升沉里巷看。今日乍逢先涕下，板輿天末羨承歡。

門前都復有青山，憂患時時擬閉關。客早自憐華鬢改，官貧莫愧俸錢慳。閒中歌板消年歲，度歸後谿船遞

往還我亦尙營千載業著書多欲待君刪

得內寄衣

縫裁初見汝封題百結蕭蕭故縷稀猶恐亂將慈母綫
此生相殉只鶉衣

送繆公子公儼出都

五嶽未陟一欲歸難戒塗撫劍送子行浮雲亦南徂子
有東顧心戀此巢上烏予裏欲南馳念彼濁水鱸兩地
忽易居一心安得無子行過岱宗爲我謹獻書已辦十
兩屐願屈神所都俯視六合間靈氣藉發舒神乎幸勿
哂東海賤丈夫

送董秀才思駟南回

曙色起北垣星隱西南隅暉暉殘月光與子升遠墟輪
蹄百萬中中有吾子車車行飭弗停遠復屆子廬妻子
念遠歸悅志慰歎墟七載殞在堂寔窆匪得徐江流入
海州地大土亦腴鬱鬱千高原富此人鬼區子其勉營
作庶効人子劬吾將爲子文明子志節紆恭聞哲人言
爲善報有餘勿以世澤深異此祿利虛研經世務通窮
達盡足娛吾家北溝頭數武距子居近聞積滯霖尺水
通積淤黃葉堆作薪復富鰕與魚兒童各兩三應客清
且癯他時著書人兀兀子與予

送莊四寶書至廣東得十二韻

我辦東山屐明年上岱宗鬢峯山霧綠眉隱海雲紅爾

泛南溟棹虔心禮祝融地虛風力上天濶日華東嶺嶠
游逾壯川塗望欲窮裏人依畫舫憑客寄詩筒遠宦憐
公舉謂令兄寶篆時任雲南會澤令微疴念敬通謂舍弟兄三郡別尊
酒兩年同得句酸醎外言情哀樂中艱難知稼穡少壯
歷磨礪佳覺雞餘肋歸慙鵝有籠早營田二頃耕鑿慶
年豐

爲楊孝廉夢符題錢三維喬秦中畫冊卽寄維喬時職縣

何時得入函谷關放筆卽落終南山南山連綿畫不竟
拔取一峯來入鏡胸中有山卽有樓下筆有川兼有壑
豈惟山水色不別樓上客醉疑眠鷗醉顏昏昏憶孤在

逸客都爲酒錢累，剖胸欲入秦中雲。洗眼仍須渭川水，
南山浮光北山夕。陽飛橋如雲，不能跨。怒蜺飲渚，裁成
梁林梢。幾尺天光足，怪石森森點寒綠。此間應復置錢
郎，四十癯顏尚如玉。南高峰北高峰，宦遊今落名山中。
靜掩關客帳，夢好時時還。吾曹須勸苦，不閒直當爲畫
追追一谿之綠水，落落湖上之烟鬟。

奉酬繆公子白沙河見懷詩

爾如華亭雀，不欲識二陸。解后得值張季鷹，雅志不復
矜飛騰。我如昭邱狐，讀書名博物。茂先可語不識機，亦
欲辭歸住蓬葦。

卷施閣詩卷第二

陽湖洪亮吉著

憑軾西行集

辛丑壬寅

書從兄顯祖畫卷

家有十步池引水蓄百魚室有三尺墻種竹滿四隅令
其泉上有石竹中通渠穿徑之筍不以入餐過橋之魚
不使上竿魚皆習主人已忘江湖思修竹何娟娟亦斂
干霄姿主人不歸歸有時主人有一弟個儻素好奇曾
就主人宿愛此半畝之竹一畝池奇石落落清流澌澌
掩戶十日卧出關百里馳蓮華峯頭攬明月挂爾谿邊
屋角之南枝

酬黃上舍鉞

閒日偶傾燕市酒，經春別爾謝家樓。故人入夢疑黃鶴，
早歲相期共白鷗。判與苦吟常入夜，最憐華鬢欲經秋。
江湖浩蕩休歸急，風月分番且賦愁。

趙大至得孫大入關之信兼聞蔣表弟良卿欲入都城
東酒徒無一人居里者感賦此首近簡黃二楊三徐
大

一歲居里傾千壺，兩年爲客償宿逋。城東日日添酒壚，
城西時時出酒徒。城東酒樓一十六，城中少年出相續。
酒翁歎息酒嫗愁，可惜少年皆遠遊。少年誰最狂雅數，
孫與黃就中短趙。差有檢結束身手，趨墮場東風吹春。

入酒樓當時少年百不憂三更酣春樓上頭紅燭光滿
樓前洲騎龍弄鳳世不驚只有酒家知姓名城東城西
路回惑只有酒家門徑識酣嬉落晷非可常一朝餞我
束急衰濃雲浮江雨暗海海風吹人顏面改離家豈獨
無酒筵太息總無諸少年出門各歷路萬千前後差喜
皆遊燕酒徒十輩五得官餘者未免謀饑寒孫郎苦戀
里中樂昨亦襍被辭江干新春忽夢晴谿曲暗識溪南
草應綠醉尉衙前碧月圓蘋風乍轉春流足花枝縱好
酒縱醇我識一城無酒人豈惟花發無酒人兼恐減却
樓前春春去春復來春情忽然失朱顏變蒼顏黃金鑄
不得君不見少年雖歸非昔日又有城東少年出

清明日關中夢先慈感賦並寄孫大關中二首

三千里外無家客
寒食傷心念北堂
未死夢魂通夜永
浮生淚眼怯春光
頻移骨肉依青隴
雅課兒童種白楊
天末故人還抱病
風檐此日思茫茫

爾緣親老亦遊秦
短札頻言去住因
句曲宦窮居未得
穀函塗險客方新
溪山迢遞應謀築
天地分明許結鄰
各有著書心跡在
未堪終歲作游民

十八日早偕同人至天橋酒樓

閒蹤亦已忙
侵曉試遊襄
楊柳閉門處
桃花發曙光
露香深幕徑
鵲語靜周廊
屈指春三月
還輸逸客狂
過橋春五里
登閣樹三重
風轉闌聲沸
塵將遊騎衝
鶯

花憐震蕩衣袂競纖穠咫尺郊壇外春雲總似龍

法源寺訪黃二病因同看花

長安城中一畝花遠在屢西法源寺故人抱病居西齋
瘦影亭亭日三至一叢兩叢各稱心前年去年看至今
今年花盛病亦盛轉恐病久花難尋天光未發雲半沉
墻角有樹交深陰故人此時花下吟頭鬢露沐光浸淫
梨枝桃枝分不得楊柳接天青一色海棠雙樹復絕奇
花背深紅面浮白長安一畝不數看莫夢江南千里陌
法源寺近稱海棠崇效寺遠繁丁香花時可惜雨聲阻
不爾遊屐時傍徨看花抱病還難顧我更因花乞同住
春陰如夢不逢人墻角游禽出無數故人逸興猶不凡

日復一訪同幽談君不見回途却值如龍馭日晚羣言
看花去

三月二十六日同人至崇效寺看花作

絲風飄林雨灑空寒甚十日留春容馬頭拂青馬尾紅
青山亦隨馬首東岡原東來氣深旺青山低昂瓦檐上
迷行一里始出林古寺山門兀相向門高徑古叢青草
松已百年僧亦老門前見樹尤絕奇屋畔無枝不娟好
高低深淺藉發舒禾苗不生地力儲培根渥節厚人力
挺此七尺花形殊樓前一株復兩株捎破屋瓦參浮圖
危檐高柯勢凌躡意以向背爭妍姝海棠無言墊桃李
鶯聲不來空晝永尋廊萬點白參差恍若銀河瀉星影

閒心愛看日午花采色詎似殘春葩原形十里足雄厚
天路尺五饒清華花開雅興無虛日三度餞春留冀北
柳絲廳北敞高筵贏得山僧姓名識看花十輩多少年
花下兩兩聯吟肩花枝已闌離思牽時崔二景儼欲南回目斷送
爾江南天來時車鐸喧去時塔鈴語明日狂風遽如許
竹裏猶零前夜雨

送崔二景儼南歸讀書并就婚

憶昨同醉長安之酒樓少年十輩君不浮憶昨同跨郊
局之駿馬借遊七人君最雅君才豈比凡少年我意雅
欲追前賢長安城中與君友五度碧月聯吟肩我交于
世皆蒼老朱賈淪亡益悲悼謂全板朱訓導沛高郵賈文學田廂吾曹緩

急須託身詎敢相輕此年少我感古人志行超雖未絕
交能寡交身今縱賤有殊稟冀與一世回輕與十年此
志不暫忘世人不知謂我狂鄉閭益復盛嘲毀并以餘
論加孫郎畏讒一室居疑蟄昨者孫郎有書及我謀于
衆謝不敏君獨不辭乎燥濕亦知人生饒緩急難爾少
年尤獨立朱門紈綺艷障天獨出英英矯餘習吾儕快
意得一朋如入玉陛升金門急持一書報遠人謂此年
少非常倫離風昨日吹原野花葉紛披已成夏交君未
久別念侵獨持一盃與論心酒樓花開三面陰馬蹄浮
紅尺五深燕秦十年遊近始抵鄉土晏公祠外簫鼓喧
競渡來看日端午離程關隴復數千

時余擬遊秦中南瞻無家

有墓田桑根草堂富經史舉半贈子窮雕鐫識君不嫌
遲別君不嫌早讀書谿南柳陰好新婦窗前月痕皎人
生聚散殊草草君不見百回相思令人老

四月初二日黃二景仁邀同人于法源寺餞春卽席同

賦得餞字

江南百萬花不看長安一枝春愈顯江南唵客花成瘡
買屋花中靜排遣憶昨欵門客大至半畝綠苔橫被踐
抱疴應客竟日勞客去閉門頻仰偃繞檐百匝唵成惱
昨黃君賦
花篇客不逢嗔花得譴吾儕立論貴平允勞者尤
當戒衷褊今宵忽復驅童至雅意欲爲花作餞書云昨
值風雨驟草色反深花色淺惱花不得更憐花痛飲無

辭袂衣典黃生兩歲爲花病一歲憐花愆可免祇憐花
謝客不留餞客餞花同一宴屬生悔過復賦詩明日欲
來花下展

將出都門留別黃二

拋得白雲谿畔宅苦來燕市歷風塵才人命薄如君少
貧過中年病却春

枵腹誰憐詩思清掩關真欲廢逢迎期君未死重相見
與向空山證世情

與丁二履端夜話卽以贈別時余約與屠大令紳共買
外家鶴蕩莊別業丁信言

已爲渠親中所得
並以志感

燕車代馬三千里越水吳鄉二頃田此志十年仍未遂

對君一夕竟忘眠，憑將書札傳廉吏。莫更犁鋤課少年，
未擬買山先買水。會須笠澤共耕烟。

新交數爾及崔陳，握手臨期意獨伸。聶政母亡尤念姊，
馬卿家在總依人。休嫌骨相前生薄，敢謂心期數子真。
風色滿天雲氣冷，更從岐路入西秦。

涿州三家店水木明，瑟舍弟前共過此。有誅茅之思書
此以寄并當示孫大。

異時我作樵蘇計，幸有孫郎及難弟。夫容湖畔結廬好，
我亦川居富羨芟。門前流水屋後山，照影幾度驚孱顏。
野夫何時得暫閒，偶借客夢歸蓬關。原空雅飛十餘里，
烟柳千條拂花起。吾家令弟昔愛之，殘月扃門數回啟。

卽今留滯何能走我獨橋南醉郵酒百年心跡幾相知
持此遙遙實良友

出都行涿州道中見芄麥徧野慨然有田廬之思因作
田家詩二十首寄意並寄芮光照楊毓舒兩布衣

朝耕山上田頗苦赤日酷雨氣來北山蜻蜒滿空谷家
遙餽糧具釋耒坐石屋日晚牽犢歸下山泥浸足

疇昔情農畝蓬門生長蒿頻年生計足梁燕亦來巢豐
嗇理有常由來非一朝社日集子孫烹蔬酌郵醪中坐
垂誠言百事須積勞

山村十餘家古木自回互筍穿來東鄰果熟落北戶居
鄰結姻婭鷄犬互相顧出門望原田高低百餘步仲夏

天氣晴涼風集高樹茶瓜供過客留話愜幽素日晚樵
童歸問名均不誤

二月序始和黃花徧林原濃陰滋宿麥春露洗高原雞
豚喧早市牛羊出毀垣隱塘花爛漫澗水潄溪鳴鳩
聲不已釋耒聽無端心切崇朝雨都忘向曉餐

采桑升高枝衣上日華轉遲遲看春陽一谷柳花暖沿
林緒風至對樹鶯睨睨不惜枝葉長但嫌心力短東家
采桑女日暮行苦遠沿回大堤坐心急待同伴揮汗忽
不停春衣又將澣

窮鄉寡文學頗愛土俗淳茅檐八九家五世相與鄰兒
童讀書歸行處拾墮薪偶逢大父行拱立識所親日晚

餉北臯牽衣渡橫津。憶朝誦書沿途諷。逡巡
門前隙地稀。屋後半畝綠桃李。皆豐年云。茲佐嘉穀高
曾手栽樹。均作出檐木。日午蔭北牕。茅檐靜堪托。溪風
一回蕩。山果枝上熟。童稚不識爭探懷。已均足
層冰何稜稜。雪積冰上寸。日色照亦寒。谿風利如刃。經
旬斷來往。閭里走相訊。鄰翁釀村醪。屈指年事近。還因
隔城郭。甲子無可問。晴宵仰瞻天。北斗知歲閏
力耕心志純。外物不得動。雖經百寒暑。寢息無一夢。妻
孥習辛勤。百事常與共。秋成共欣慰。春至卽播種。年豐
養神畢。臘酒互相送。尙晒鄰家翁。年衰腰足痛
邠雞一兩聲。持鎌待天曉。出門不知塗。沿林警棲鳥。宿

雨零衣裳原頭刈新草牛饑我心急況復犢離抱入口
嘗苦饑飼牛嘗苦飽

墻頭百草花秋至尙顏色涼雨朝來過秋蟲鳴屋脊驚
茲時序變當菜不能食葵枝翳南軒疎黃落如積物微
經手植幾月盈數尺榮枯本隨候催我鬢蕭瑟村女不
感時明燈夜牕織

山泉奔曲澗澗曲使魚肥板屋臨流水當窗白鷺飛高
枝曬魚網圓牖挂簑衣莫訝軒牕陋黃塵入戶稀
枕上雨聲過蒲葵生曉涼隱聞屋後雷鯉魚飛過塘盃
夏天氣昏檐間杏初黃梅實早薦新原麥亦可嘗壯健
旣不閒婦稚習築場商量醞邨醪待插三田秧

田家偃息早月出戶已尙連闥無人聲屋上促織鳴寂
寂秋夜長眠早亦易醒荷鋤向西疇露澹明疎星
朔風吹南山黃葉滿一屋掃之向墻隅然薪一冬足田
疇雖不廣常滿甕頭粟閉戶無所營時還把書讀

巖阿近開闢鬱鬱多桑麻人耕北山翠牛食野田花廢
壘都牽果零疇或種瓜亂雲埋古徑飛瀑落人家境地
殊清絕寥寥噪曉蛙

仲夏一月雨屋中衝流泉楮鐺來樹間全家具晨餐兒
童騎土墻葺漏尙未完天霽日忽開泥衣曝先乾晴晦
出一時驚雷復喧喧

飼蠶候三眠線絲日千度辛勤一生內衣未識紬素東

家有嬌姿生小無所務披服非不多著新卽厭故昨暮
會北鄉驚看機上布

寒鄉率多壽作苦況不閒暮飲谷中水朝耕山上田不
聞求長生倏忽已百年同時一輩人白髮並及肩但苦
東作忙日出難晏眠

種松連高岡云有先世墳一歲增尺土巍然竟成原寒
食飛紙錢盈阡拜曾元但苦樸陋鄉諱字已不傳日晚
祭掃歸野花紅如然

四月二十六日抵河間縣知崔二先一日發却寄此首
車停古驛日已曛窗南一鐙昨照君鐙花未落客先起
瘦影已逐寒鴉羣清晨共出官河左柳眼迥君方及我

楊生行色念北堂君亦曉夕馳歸裘車聲馬聲原上走
百里程遙亦何有路人傳君好身手清削真同道旁柳
道旁柳花飛貼肩君行曉寒籠玉鞭山雲濛濛壑衣重
清冷偏宜馬頭夢違君百里猶可追車上敗鐸聲如雷
祇愁殘月沒前路征馬愈嘶人不住丁生念友君所知
昨復屬我傳相思閭年少盡君等使我慨歎相知遲
黃梅雨廉纖南行亦殊苦紅棗花紛披東徂迫炎暑丁
生五月方出都歸棹應防惡風阻君不見長江風黑暑
浪煎函谷關險愁雲連阿兄西行路復千送彼蜀道升
青天時命兄將
蜀定省

五月初三日臨清關阻雨因食角黍有感

徂南日共風鳥語忽值龍行北來雨行人衣濕饑火煎
且復車前餐角黍沉思此景傷年載谿上幽雲久相待
三更清夢越鄉間尚有半樓燈火在

自臨清關渡運河曉行

曉星未落催客程夢聞雨聲醒復晴車輪安穩陌塵軟
如乘越舫烟中行河流東渡樹如薺一綫中流日華起
行人上馬亦壯觀開闔中原數千里

館陶道中

柳絲濛濛新月高臥聞笛聲過館陶催車向路日已昃
霞色尙映征人袍城邊古路尤雄直松矯如龍百餘尺
古來奇士倘復然獨立原南歎高格

元城道中

元城縣東榆櫟田千株百株青蔭天車行五月不知暑
道上漑漑鳴流泉草香花暖千家室闔戶都爲賽神出
河流兩載喜漸平慶與農人食新麥

五日客感示崔同年景儀

馬上一枝榴火紅行人朝日發清豐淒涼古驛值佳節
倦客如醉吹薰風風花無情翳前路客憶江南岸頭住
野花匝地試驕馬谿水拍天喧競渡局門不出十五年
手種楊柳都搖烟寧知今日道旁坐麥飯冷飲茅檐邊
鄉間少年誰可憐錢郎鼓聲絕客筵爲錢舍人中餽趙時下世已二年趙
家樓閣昔年飲覺我盛氣何無前橋烟谿月百回白壑

坐惟留陸生笛沿谿瘦蔣亦不歸

時蔣大齊空鎖書堂
耀客山西

北邊宅吾儕流落縱如許客裏聞歌尙軒舉終能不學
輕薄兒醉挈妖姬作吳語崔生似舅尤清婉共我遙程
數千遠佳辰只惜鄉夢無卧看車前斗杓轉

未至黃河十里阻風宿辛店明日始從柳園口渡

惡風一日阻急程十里外聽黃河聲黃河聲急著雨橫
高浪戰雨喧三更洶洶到枕不安寐廡下劣馬時奔鳴
披衣支戶起危坐飲滿百盞神終醒邨荒味淡食不咽
雨暗飽嗅蛟龍腥耳中歷歷聽顏壁川原曠望生夜明
樓高燭冷萬慮絕不覺孤月來窺楹風聲雨聲罷酣鬥
百鳥歸樹天光清半生飽向江海宿此夕河浪聲尤驚

清晨徑渡大波伏霞氣壅席青紅平十年履險不知數
狂直自笑波濤輕

自河南入關所經皆秦漢舊蹟車中無事因做香山新
樂府體幸成十章

滎陽城

滎陽城高百尺因阜築城如鐵色漢王夜出城西門滎
陽以東屬楚人惜哉一鹿抵死爭食肉不足思分羹當
時若翁幸不烹乃火紀信燔周生嗟嗟兩烈士殉主亦
殉名我行天下歷州七奇險無若滎陽城君不見滎陽
城值太平排百雉無一兵司關午卧門掩扇百戰古城

今下縣

北邙山

北邙山頭松百步前碑後碑橫作路碑前繫馬客不愁
還喚北邙山下渡前津流水無停刻松色蒼蒼蔭斜日
白楊無風亦蕭瑟千樹萬樹升涼月林鳥夜啼穴兔蹲
千年不看葬貴人居僧閒乞紙錢挂寂寞知是誰家墳
穹碑愈殘文愈好前人傳多後人少始知坏土繫功德
不在森森數華表嵩高山色遠復蒼眼中親切惟北邙
君不見征車須卸此山側松冢蕭蕭無暑色

尸鄉置

尸鄉置客欲愁三十里進生王頭海中山波欲湧五百
人同死土壠有死士無生王王頭上殿目尚光九重真

龍爲一哭韓王楚王顏瑟縮腐儒遭醢理不誣王頭乃
復償腐儒我來尸鄉中白日忽挂樹鄉人說王尙如觀
君不見王愛士士效忠誠不若項王故人呂馬童手裂
王體居奇功

賈誼墓

西京執戟郎綠鬢忽已皓太宗愛老臣乃少武皇愛少
臣復老坐令人惜賈洛陽懷奇亦不值武皇灌嬰周勃
噲伍耳是老秃翁何足詳長沙西來對宣室漢皇才高
殊自失固知尙鬼由楚人因從楚來詢鬼神鬼神之言
亦陳戒漢廷惟生識成敗君不見微唵賈生賦車過洛
陽界墳荒無人碑已壞紛紛何況里中兒我亦少年先

下拜

董宣祠

東京六酷吏五輩政足觀王生非其流類合附宦官名
儒歐歛首尹京威聲始傳董少平乾坤初平天子武徑
直寧知長公主赫然盛怒乃可撓九重幸識小吏名殿
頭東西排赤棒百轉安能回令項吁嗟乎臣賢王聖誠
難得却齋王威成令直君不見祠西半里府所治道旁
百碑名去思叢碑雖高復誰記只向道旁思酷吏

金谷園

咸寧以前多吳氛元康以來昏戰塵晉家全盛只州載
却值金谷園中春美人顏紅與花匹百斛名珠易珠一

卷之四
樓頭光碎紅珊瑚主人殉財兼殉珠傷心豈獨名珠墮
轉眼洛陽城亦被持螯仙客取達觀與廢都從醉中過
園花開園樂陳朝千觴菜白樽二十四友皆僉人此輩
可惜惟劉琨

二嶠山

偃仄復偃仄西經二嶠山山溜衝作道巨石橫爲關關
門前黑如許西飄秦風東晉雨南陵北陵事蹟陳違讖
夏后兼周文止憶晉五帥秦三臣爲晉勝爲秦奔晉人
雖墨衰秦人亦素服向師茫茫慟秦穆老臣此時無淚
哭出山一里路漸平巨石夾道愁縱橫君不見山凹不
特炎暑酷曾有野鷹來攫肉

函谷關

車行摧輪馬傷骨一綫路中盤八日今晨始及關北門
月黑望關關欲崩新關高插天舊關深入地赤沙濼濼
白日翳一日一夕車帷蔽樹根石脚露土窰穴土一尺
經旬勞居人生世稀見日面黑映戶疑山魑君不見秦
人虎狼據谷口百二遂爲虎狼有寧知天險不屬人六
國敗後終無秦豈如乾坤蕩平天險失前車後車行接
轍人生快意亦有時馬上詩成車出穴

潼關門

出險復入險別山仍上山河流五夜色昏黑一片日紅
先射關壯哉龍門濤至此始一折驚流無風舟尙失大

魚如龍欲迎日風陵津北起黑波重舸徑向中流過河
聲漸遠坡愈迴却拉馬首看全河君不見哥舒拒祿山
魏武被孟起門開如雲列千騎喧聲動天箭灑地時平
雲氣亦卷舒孱卒立門司啟閉關頭餽罷客亦閒早有
太華開心顏

華清宮

秦皇墳上野火紅萬人燒瓦急築宮築基須深劖山破
百世防驚祖龍卧雲暄日麗開元朝祖龍此時庶解嘲
人間才按羽衣曲地下未燼鯨魚膏前人愚後人巧工
作開元逮天寶離宮別館卅里環羅綺障眼如無山紅
闌影向空中折高處疑通廣寒宮仙妃天上坐無聊玉

笛一聲飛入月華清
宮臺殿工欲訪舊事無
衰翁泉流嗚咽助淒思
冷暖曾無內官試君不
見山前四月開海棠早
有野人來試湯

贈馮編修敏昌卽乞題機聲鐙影圖卷子

馮君南海儒二十年不出門前靈絲一萬頃篋底縹青
數千帙出門看海入讀書元氣吐納如靈珠荒厨烟斷
有時有百怪窺戶無時無豈惟不畏亦不唾一室靜坐
忘三時偶然一出試有司衆喜貢爾來京師

聖人方開白玉堂數十萬軸陳琳琅蓬萊山高碧雲裏
仙客正復需東方鯨鯢戮後乾坤蕩萬卷盤靈蠹魚上
晴窗日一校祕書手冷玉籤沾薄釀儔居頗厭人海聲

下直只住西南城門局似鐵不輕出解后偶識黃方平
兩年落落京華夢文案無題輟唵諷有時申紙出萬言
筆壓鱷魚愁不動大馮君小馮君君若入君復告我神
仙羣謂張解芳廣南怪底少珠貝歛攝精氣爲斯文君不
見我家空住東海頭曉日正面清江流慙無文筆束江
海潮汐澎湃無時休江流日日晴沙壅上有松楸百年
冢先人志節實不誣待覓數碑高置壠文章不朽今見
之對面勞我經年思吾待會合既有時放筆爲我唵風

詩

徐大書受浴牛圖

南溝水流北溝水行苦無舟幸有轅下午羨君使牛如

使舟跨腹穩渡春塘流南灌永清北溝水濁濁流須浴
牛水清留濯足螺千升泥一斗尺鯉寸鰕無不有濯足
流還入牛口君不見春田之外官路高百千萬事如牛
毛人饒千馴不能樂君有一牛亦是豪

聞孫大二女皆殤書此憫之並促入都

朝不見爾暮不見爾不能得爾書使我煩憂不能止朝
知爾枕一書芽知爾入酒壚鴉飛鵲翻門索逆盤盤展

文居今歲殤兩女隕一奴

奴今歲進

亦以

縊鬼復跳

此巨縋

學史耿升

以赫然三重門常有十幅符長人

鬼伯利弱徒其餘精鬼強睥睨孰敢如陽春倏然日陰
煞盡掃除丈人康强大母扶行見中婦歸而將雛爾飢

先女詩話卷第二
二
久失偶又苦貧曷不遠遊負粟以奉親長安輩流中近
復無爾比吾當屬王三爲爾戒行李

十二月初六日宿讀雪山房話舊卽贈崔公子景儼
經旬頻過訪識爾氣無前客路三千里春光十九年錦
書堂北枕紅燭夜深筵一夕虛牕夢無忘共被眠

謝貞女詩卽寄令子振祺

我年始十五母遣從里師其時謝氏居遠傍陳忠祠貞
女撫子名振祺十五入學初勝衣一出入奉母儀貞
女雖有子室居嘗涕洟白日何昭昭顧視久不怡上堂
奉魚殮入室餐薄糜兒行讀經解唔呷市肉食子身苦
饑我時親見之歸以語母共歎歛爾來二十年不復相

聞知昨得尺一牘邀我唸風詩開緘忽涕零負米感後
時吁嗟失母人遑敢措一辭雖然母前爲我言貞女之
節世所希汝行克屬文闡彼孝且慈母今雖亡母訓垂
忍一握管銜酸悲詩成最爾廣孝思作詩者誰洪孤兒

卷施閣詩卷第三

陽湖洪亮吉著

仙館聯吟集

辛丑至癸卯

八月十一日夜終南僊館坐月聽趙芝雲彈琴作

秋花黃秋月涼細步曲折行秋堂秋堂美人琴思生起
喚靜者彈秋清南山月明一千里北堂琴絃三四鳴聲
迥欲入月絃和不驚秋東西十五房蟲韻咽不流一聲
何低一聲復揚大宇乍濕微吹新霜絃淩絃切四五聲
此時秋聲畢入城江南夢遠忽歸去聽此柔櫳空中行
茫茫神明區杳杳不可攀怪靈千年巢此山有時白雲
成美人青瑣窺客垂雙髮有時元鶴化童子丹顏未脫

遊人間風車月馭倏忽倘過此驚我忽斷忽續一
一空
中彈虛房無人素月團飛雨入夜青苔寒幽音欲乞紫
府和空腹冀得明霞餐君不見彈鳴琴憶仙駕月宜秋
琴宜夜

同作

孫星衍

秋河下映秋池清中間月出隨波盈烟中影結多時
綠風裏輝流不定明秋堂主人有仙骨授簡資僚待
秋月珠履宵沾白露移碧紗暮對青山揭此時分照
入千門十二閨街靜碾塵斷續城中傳析響依稀樓
畔搗衣人銀屏夜落橫琴影月底弄琴琴索冷指上
清光凌亂生絃中商意分明緊一彈秋月生波瀾再

彈秋花欲語言流螢乍落看還住斷雁將飛似更還
石闌前頭百重樹葉葉枝枝化烟霧樓閣疑浮海上
來風泉忽到山深處曲終月淡天爲高何處仍吹苑
轉簫一聲約住流雲影萬里魚鱗豔不銷主人尋幽
足幽思何必東山挾聲伎君不見終南仙館夜深琴
門外終南碧無際

十二夜雨坐

彈琴留白雲涼雨入今夕離離秋葵花深黃落如積閒
房雨中坐細酌尊酒白寒意吹不開空憐倚風笛
所居堂西偏秋氣亦逾冷房櫳旣深靜蟋蟀共淒警三
更檐霧入澹此紅燭影欲展江南書先悲客秦嶺

十三夜射堂觀月

沉沉碧苔影皎皎寒潭光秦嶺上孤月清輝滿射堂繚
垣鴉點黑零棟燕泥黃一聽山陽笛行歌慘不狂是日

秋書中得

馬嵬

馬嵬驛旁佛堂三楹唐楊貴妃舊縊所也今歲三月
余偕莊公子達吉至郿縣二鼓抵此以燭視壁間石
刻斷句約百餘首率無佳者因相約出新意為之至
漏四下各成六截句乃上馬而去

客程新自會昌回刺眼燈光宿馬嵬錯訝驪山舊烽火
一殿紅燄逼人來

半晌匆匆訣路岐縱然死別不生離他時金闕西廂約
天上仍懸會面期

佛堂宵半劇淒涼清露微茫月有光漠漠紫藤牽一徑
花開猶認舊香囊

五家合隊事全非鞭馬都看出近畿猶勝宣陽諸姊妹
陳倉化作野雞飛

天教國色鑒興亡遺冢偏留官道旁一片軟紅飛馬過
豈堪重問荔支香

茫茫蜀道返秦京難遣君王日暮情只有上陽頭白女
不承恩澤竟長生

哭朱秀才潞二首

會同原北數歸雅原樹南頭識爾家上已覓春衣袂冷

清明吹雨帽檐斜詩從公子筵前諷酒憶瞿曇坐上賒

君釀酒極美零落數人重點檢兩沉泉路兩天涯君

余及孫君暨林公子奕眠過從風數今林及君俱下世

移榻曾依鄭廣文故人頻到手難分譚狂一夕空生死

夢冷三年靜見聞身後詩名常笑我眼中山色竟埋君

元言未就桓譚死畢竟誰傳楊子雲

十五夜

闌干千尺雨聲收坐久頻看燭影流秦嶺雲高連太白

上元月澹應中秋俗言中秋陰曠與明歲元夕曠多年客思金尊滿一

夕天風玉笛愁好把濃陰盡吹却庾公清興在南樓

同作

孫星衍

常時偏憶此宵情直到今宵客恨成如此月愁終夜
對往來雲愛一天生舊游似夢依依在酒力輸心細
細清又是芳筵忘未得芙蓉池上共吟聲

秋夜有襄崔二禮卿

蘭薰桂亦薰燭燼復思君歷亂百重嶺微茫千里雲松
窗無人夢亦幽化爲孤鴻遠相求江空離離橘柚洲天
遠漠漠沙棠舟夢君何如在君側夢苦知君亦相憶劃
竹痕留指爪青看山影入修眉碧星橋七夕祀茶瓜紅
豆問庭接砌花三層閣冷唵秋雨八扇窗開佇月華蕭
玉里畔清遊寡落落朱門手誰把遠恨吹成宛轉簫秋

聲響徹參差
瓦書堂歸後倚樓東
詩帙翻殘興乍慵
葵扇絲輕秋撲蝶
橘燈紅小夜搜蟲
才名此日推昆季
二十往鴻學強記交
許忘年趙不虞
謂味辛舍人
書憐似舅何
無忌思親有日計
程還重上巴陵八角灘
相思應望秦關
嶮憶爾重歌蜀道難

嚴侍讀長明招飲分詠齋中花木

數叢牆角放無端
玉色居然照坐寒
應是神仙常散髮

不教收拾上星冠
玉簪花

石闌千畔倚斜暉
葉葉枝枝惹砌雲
數到前生合惆悵

美人顏色葬秋墳
秋海棠

靈巖讀書圖為畢侍郎

公才旣大識亦先一山讀書曾十年山奇澗仄泉溜壑
石古路削雲浮天三間讀書堂昔昔坐復眠研經覈史
志力堅偉抱不欲談神仙龍吟于波虎嘯山公時賦詩
靜掩關全湖水色看不厭一世寫入胸裏間雲窗陰陰
關不得靈氣空山潤生殖松兮栢兮百餘尺一一如苗
手中植我開名山圖綴以七十峯烟巒明滅不可識水
氣自綠巖花紅茫茫月波寒極此三萬頃長檠短檠宵
不輝空處猶搖露華影奇書讀罷手自緘山腹適有藏
書巖乃知名世本蘊蓄中外文武才皆兼公官于西昨
偶還放艇窈窕尋烟鬟兒童不識鶴倫識約畧少日書
生顏西人德公不暫忘行祝入相光巖廊觀圖倘復識

前後天未回首吳雲長人生事業固不同萬卷要在填
心胸君不見靈巖山界不稱公須借太華銘奇功

黃二景仁以舊得宋鑄山谷詩孫印屬題卽以誌別

智永視右軍遠祖乃七世觀其筆端奇殊不愧哲嗣神

明離合偶得之不惟書然亦有詩黃生年少苦乏師口

誦祖集無一遺童耽詩祖詩長獲法孫印靈文出山雷

電迅黃生得之筆奇進二十七世六百春恍以句法傳

文孫吾家駒父有美聲合彼難弟稱三甥若論源派責

繩武內外均應奉初祖我慚作客矧多病未暇從君乞

詩譜與君離合亦可歎客卽借印曾三番縑囊緘佩入

華山時君將好句藉可通天關君不見印方以寸深數

黍有才如君庶得主聊藏篋笥貽子孫百世傳公用心
苦

九月初三日雨後偕黃二孫大遊薦福寺

薦福寺中秋氣陰寂寥一輩愜幽尋唐餘舊碣苔文暗
僧老閒庭竹樹深金碧樓臺清磬響青蒼巖谷暮鴉沉
眼中歷歷皆千古留與詩人劫後吟

慈恩寺上雁塔

憶從初地擅名場閱劫來遊竟渺茫韋曲花深秋暮雨
終南山古易斜陽高張岑杜詩篇冷天寶開元歲月荒
莫笑衆賢名易朽塔前杯水已滄桑詩澗碑數劫

關中送黃二入都待選

欲別復念我我歸猶無時江流入海家倘在越客到秦

寒自知同居江城申門臨北風裏三月發一書迢迢及

秋尾君言少賤耽百憂欲為卑官已不羞長生如鶴善

俛仰莫更高視輕同儕翰林仙人瘞黃土鶴恍離巢後

失主餘與君之賜殊笥河先下斷知我非憂忠不克伸

兀兀何為著書苦昨來得家書一紙猶不足妻常歸寧

兒罷讀草堂雨北西頭屋尋檐讀罷色亦怡不嫌才奇

貧亦奇吾家阿連亦志士都下索米時長饑雖然一二

年亦須約歸期傾資構草堂買石安漁磯兒童不讀書

日課種一畦君迎板輿行人官我守親墓居江干居者

自臧行者歡南溪邊北江口他時官滿放歸艘我倘持

魚壽君母

朱孝子詩

塵勞十年三駐車華陽岡南孝子家伊惟孝子家松蒼
 栢逾古茅堂做三間全家讀書所我識孝子父亦識孝
 子昆孝子承父兄事事求諸身欽其善氣蒸一門百鳥
 就樹欣春溫妻孥不憂僕夫樂雞犬未識君家貧東門
 柳條三易春我重來遊送廣文謂全椒未識君家貧東門
 孝子憂父病對我戚戚忘朝昏俄馬一刻驚死生骨肉
 至痛肌膚輕抽刀揮股股肉零何言孝子非好名諱此
 一割如諱刑創鉅至死無呻聲茫茫華陽岡哭聲一何
 苦麻衣唁君憶三度我歸哭母君哭父我猶能生君竟

死嗚呼華陽朱孝子

乾州馬生爲寫凌波卷子因題十二首

年華三五日樓閣兩邊春絕憶驚鴻影閒中寫洛神
書緘二十年字暗無人曉臨水覓游魚尋巢問棲鳥
破夢閒尋久松間第幾廳凭闌有深誓雲隱半天星
殷勤一紙書夜久映牕讀忽地訝光華池輝後樓燭
春愁自不同橋影隔西東一度塞簾見朝曦映頰紅
拋殘千種書祇習娒嬛記縱不學神仙衫裳有雲氣
專愁病已侵長日瘦難禁不愛春花影生來百種心
門地寒如此蕭郎合受徒頻緣問攻苦開篋贈奇書
初三新月來幽徑自迷輝小膽愁逢魅沼廊吹笛歸

留茲心一寸記此谿三折倘復有相逢春船岸頭歇
悟後心常定閒中恨亦消猶餘空際影風裏帶裳飄
春愁發杏花客夢醒亭午聊復借銀牋遙情細相數
湯大令大奎以公事至甘肅往來皆過西安書贈六首
遠宦棲閩越

皇程向雍涼故人稱早達客鬢亦初蒼報政心猶昔
嗟篇興較長終南山色裏留與話斜陽

三十年前望能詩獨有君閒中思數子風裏悵離羣徐
稹頻留蜀謂鞞謂醜謂錢郎近宰郵謂職謂惟餘漆園吏天

末共秦雲謂似謂撰

所居曾咫尺岸柳不能分舊與君比昔居城東古巷一條

直疎鐘兩處聞兒童尊輩行里俗習溫文社日成嘉會

初看接坐芬

余年十數歲以里中公事識君于劉氏宅

移居曾幾載蹤跡始相違我誦諸經徧君成進士歸舊書留次第新宅羨光暉兩歲消寒飲燒殘官燭輝

平生耽著述興發每忘餐事僻須頻承書成欲借觀壯心消久宦歸路憶衝寒二月春光好看山合據鞍

連江三百里風物渺相思骨相癯如此官齋清可知幾

家分薄俸賦職衆君一縣誦新詩正有循聲起無嫌報

最遲

終南仙館獨遊看山桃花作

閒尋古廊日數回人日已見山桃開江南驛使昨傳訊

破臘尙未舒江梅原高樹古春尤早地稔年豐戶均飽
終南山色對高齋天放一株春色好春風開簾日射攏
草根未青花已紅橋南冰判出潛鯉墻脚氣暖驚鳴蟲
苦啞桃李二十年綠鬢漸改花枝前有情誓不負鸞燕
簾底零落詩千篇山原氣候殊南北花亦因方異顏色
冶葉倡條豈共時冰魂雪魄同高格看花春首非偶然
幽賞旣愜兼逃喧園東容膝坐不厭板屋總傲江南船
君不見乎園賓客春多暇妙舞清遊各消夜三更歌吹
殷地時我亦閑來坐花下

元夕看桃

元夕一年居一方接天歌吹來咸陽終南山月盛光采

一夕樓上鋪新黃崇仁坊前百戲陳雜樂共作秦聲尊
頗欣土俗樂豐歲巷少服馬居無人嚴寒初除信風勁
風裏試燈燈不定端禮門連長樂樓萬聲壓市囂難聽
連宵賓從席屢移選舞徹夜殊忘疲屏風高障碧天色
蠟泪滿堆紅地衣園南獨客愁爭逐看花欲來深徑宿
避寒三度著春衫照夢千枝列華燭墻頭月色清可憐
桃花一枝影入筵江南無此早春景自愛枕上看花眠
須臾舞寂將殘夜月向城西鵲巢下一陣簾前料峭風
遠雞聲裏寒桃謝鄉閭此時誰復留癯崔瘦蔣成俊遊

禮卿

三雲橫塘半里足簫鼓燈火直接三元樓十年兩度清

遊寡更有汪倫手堪把

柳下

俱與

在揚州廣子客

江館

雲迷宛轉簫帝城月照流離瓦

十六日早夢破書懷

正月十六天氣陰窗色欲曙聞鳴禽殘燈未滅枕書在手
詎卷頁勞重尋景純雖復好奇著叔夜兼不妨幽吟
房櫳春思集黯黯檐角雨氣來森森眼看十日易新歷
屈指百夢交寒衾蔣家高閣睡頻見堂北老桂年逾深
無端童稚歎漸老一輩才調誰猶欽心雄欲狎萬奔馬
氣尙曾却干黃金丈夫要可嗜聲色細故詎得關胸襟
卽今壯齒已逾七坐覺客歲三交壬談經旣慚中壘歆
著史亦愧山陰沉惟餘一事似朱穆欲守六義追鄒湛
九州山川快登臨五嶽方寸平寄嶽寥寥一編望古今

今音不操操古音三千卷在倘傳世寄此一寸空明心
十七日曉起

曉寒逼戶微吹雨柳眼欲青春不許簾開如夢見山桃
玉色亭亭尙無侶闕空春氣來如絲墨雲成鱗開日遲
閒移鵲巢向北枝恐礙雙燕新來時

二十四日侵曉園中看桃作

倏然千枝開夜風桃花不香春氣濃重帷未曉已高揭
靜放花態嬌簾櫳看花背樹鵲不知鵲夢尙落東南枝
輕紅淺白漸分影曙色欲入光參差情孤意冷千回走
月墮烟寒著花久倚風一樹恍如人露眼紅顏欲回首
看花人老花莫嗔客鬢曾與花爭春年華三十事若塵

欲訴舊事無桃根

題黃石齋先生手書詩卷

斯人不賴世世實賴斯人一息不死軀天地所以存有時而責躬時而念友昆時而誨諸子大義何諄諄我欲起九京危苦與悉論南中劉念臺北州史道鄰八埏變非常無過明甲申嗟哉數君子亦配殷三仁操筆爲語言氣若江海奔雷霆走其間足懾奸佞蒐誰當贖此牋懸之國東門否亦寫百通各付子若孫滔滔萬萬世藉以扶人倫

楊孝廉夢符泣硯圖

一方石母所藏兒名甫成母已亡泉涓涓墨池滴盡是

孤兒眼中血我遭孤露偷視息對此徬徨不能食少貧
無硯寫以罇六經手書母所傳至今罇在猶拾龔我念
親恩抱罇泣君孤此意當早識莫負區區一方石君不
見男兒負硯已可恥負親不得爲人子
慶將軍桂屬題方山松石卷子并送入

覲

憶近雲霄

天語溫十年三度拜

殊恩

詔宣耿秉趨

丹陛功定班超入玉門前部笙歌聽乍徹舊山松石記

還存藍輿小駐非無事卧看終南濕翠痕

曾騎竹馬備兒童生長鈞陶荷相公

將軍為尹文端公第四子

吳苑

佇看持使節沙堤仍望繼家風經霜塞北顏猶昔似畫
江南夢乍通幾處舊遊題句徧近聞多已碧紗籠

送蔣大齊耀南歸

外家廳北記重行已苦無人喚小名冷齒尚冰寒食粥
倦眸猶怕讀書繁新來烏鵲巢枝改乍長兒童口語生
手授一編仍未習十年端愧望孤甥對公手授書尚鍾

雜詩

淵明古奇士識者唯延之一世乏知己日唯唵我詩永
初人物誰不足供一唯柴桑五柳間寓目一何遠與其

交俗人心隔貌繾綣何似桃花源寥寥結雞犬

賈生治世才經術亦第一偶然作詞賦秦漢渺無匹惜哉生非時世正尙刀筆販脂屠狗中宛若獨雀翔幸值賢守吳亦識計相蒼倘欲覓賞音庶幾張子房

張耳殊庸才陳餘實烈士薰蕕本殊別何可締生死一遂爲趙王一則死泚水後世俗益澆借交傾良朋皆張肇其端可惜得沒身雖然夫與妻身各事兩人微詞寓刺譏吾服前史臣

馬周值貞觀李泌逢肅代迹其遇合奇事欲出紀載桓桓良相業洵足邁流輩臣主旣相得底蘊無不傾終始無纖毫沒哀生則榮何以僅贈官不復得易名

宮中及府中一體皆董率小臣戲殿上夫乃宰相失彼
哉前史臣反晒無學術桓桓申屠嘉法欲斬鄧通其事
雖不行血已漬府中不學孔博山唯知媚董公

古今一石才植已擅八斗下此一萬年升合定無有如
何魏晉下代不乏作手又言晉南渡已絕第一流立論
旣可唾失色亦足羞吾視古才人皆若貉一邱

春睡

春睡覺來美窗桃發數枝無人自開卷初日上簾時

倚梅圖

春風已到江南否手植玉梅堪凭手探春消息肯孤尋
翠羽飛飛貼釵首凝寒徑雪猶封苔非具仙骨誰能來

愛花雅復識花性逸翰不遣依樓臺泠泠風放枝高處
花氣籠人亦須住剝蘚分明認舊題劃釵依約成新句
花光月露看難真月欲傍花花傍人徘徊半日不分影
袖底高壓江南春江南春到三千樹須記名花望花主
錦幕寧陰處士詩廣平已有新裁賦

宋謝文節公橋亭卜卦硯歌

并叙

研歛材修九寸七分廣五寸六分厚九分額篆橋亭
卜卦研五字面左右草書云此吾石友也不食而堅
語有之人心如石不如石堅誰似當年采薇不食守
義賢也轉背右題程文海銘又右題大明永樂丙申
七月洪水去橋亭易爲先生祠相地得之閩後學趙

元硯中正書題宋謝侍郎研五字舊藏天津城西海
潮菴雍正初周上舍月東焯以米易得之今湖南巡
撫查公禮最所心賞歲丁卯月東構疾時巡撫公官
廣西太平府知府月東臨沒語其子持書抱研行萬
里至太平以贈嗣後公官于四川十年會

皇師平金川公蒞其事常與硯偕歲壬寅公有湖南
巡撫之命自四川入

覲予得謁公于陝西巡撫畢公之座因屬爲歌以紀
其事云

卜卦研隨忠臣六十四卦反覆陳早識宋運終庚申橋
亭邊卜卦所一片趙家乾淨土有時米盡卜亦閉讀易

無聲飲泉苦集賢銘後處士銘六十八字兼元明橋亭
東西流水清此覩欲出鏗然驚建陽城研易米得錢卽
揮得米喜海潮菴米易研瞻研如瞻昔賢面誰云石一
方重乃抵璞玉故人欲之心已諾研得所歸方瞑目嗚
呼研兮前身不從謝信州後亦不殉程趙周物經百劫
復得主光彩早歷天西頭臣忠友信兼生死抱研來還
知孝子攜經萬里越百川研兮得完人是穿君不見研
今隨公不離側軍中十年尤著績飛符四調糧草檄屢
殺賊三爻六爻有時卜一詠一吟隨所適平生亦聞周
月東今不見研先交公研修九寸一寸厚聊成一卦卜
研壽書絲辭作研贊海水枯石不爛

贈花園爲巖公子觀賦

巖公子姪人袁子才先生青衣也公子悼亡後先生舉以爲贈因繪贈花園係以四詩公子索同人共賦云爾時壬寅八月十八日也

秋社分明日欲斜肯容燕子到天涯生來不出烏衣巷長自王家嫁謝家

一卷曾披金石文

古刻子韻金陵

玉郎才調信無羣奇書

校罷還題句可寫新裁簇蝶裙

識字偏多性亦柔談經帳後十年留鄭家詩譜聽曾慣他日傳來與阿侯

安石筵開酒百壺春名桃葉記曾呼他時倘放江干棹

更有桃根贈我無

二月十四日自西安送蔣三知讓至臨潼試華清泉並
上驪山絕頂侵曉復酌酒爲別因口占送之

灞橋楊柳春風青南山桃花錦作屏看花溯水不知遠
送客過盡春風亭正逢驪山明月圓華清宮中試湯泉
閒從栢路至絕頂天半檐鐸風冷然飲酒亦不樂獨謠
殊自傷馬頭明日落花片指點別路愁絲郎城南小史
翩翩影謂鄰別有春人夢難醒花過二十人半生人縱
欲愁吾齒冷東瞻太華雲千盤一條清光露欲團三更
暢好眺烟景道士催客荷柴關來時一山烏鵲飛去踏
松頂驚巢棲君不見驚鳥初啼慘將別且酌驪山半山

月

十九日姚按察頤招集冠山堂雅讌卽席賦呈並送至
湖南新任

花朝送客青門東柳絲濛濛一萬重柳絲迷雲花匝路
月光如花亦穿樹穿樹明月光愁人月到十九花初春
風光如此復愁別冠山堂裏離筵陳昔公建節來湘川
取士一一皆蓀荃外臺聲名更煊赫三月欲上春江船
離心明日長亭道難遣圖中舊花鳥葉底琴聲枝上陰
可憐都似江南好平泉賓客氣肯降公也愛士尤無雙
春燈滿前酒百缸思渴頓欲傾春江春江頭采蘼蕪
黃陵廟前啼鷓鴣楚天千里清且都此景却憶秦中無

秦中幾日雲愁結太華終南渺傷別車前送者百輩喧
回首中條色清切憶公日日來花前公所手植姿尤妍
紅闌十二好遮護待取歲月枝參天轉愁三月春如許
公去花前復誰語別夢都牽楚澤雲挂帆來聽瀟湘雨

附同作

孫星衍

冠山堂中列紅燭主人有酒傾百斛中丞夜呼客論
文客辭不歸靜寄園園名春風吹愁散懷抱座上才
人各英妙平原孟嘗並一時却望長安共西笑千金
招賢東閣開千金買花池館栽看題捧硯盡紅袖潑
墨試取青眸回桃花千枝弄容悅欲奪尊前酒嬌色
一聲豔曲飛上天明月白雲行不得獸鑪紅深三寸

灰那信急雪凌春來停歌出戶一驚顧醉影忽落瓊
瑤臺雪光朝朝花暮暮愛客筵張日三度明朝花落
雪還晴主人遷官客岐路終南雲生入洞庭客送主
人霸上亭回紅轉綠不容惜去去爲國馳威名尺書
問訊衡陽雁何日東山續歡燕園深花發客愁來此
客知公亦稀見

清明日偶成示孫大

一春曾未見流鶯屈指韶光數漸盈新月如眉過寒食
東風吹雨作清明無多簾影牽塵夢不斷楊枝縮別情
知否白雲谿畔路半陂新水踏歌行

花時四面敞疎櫺花氣穿櫺夢易醒春樹乍遮千頃綠

南山只放半樓青
回廊雨勢添簾潤
隔院禽聲怨戶扃
最是眠人連夕醉
水邊人影柳邊亭

癸卯三月十六日孫大將入都並車送至灞橋折柳爲別因憶己亥春孫大送我石城東畔至此已五年矣感而賦此

石城東畔牽衣處
灞岸西頭折柳時
人世五年重惜別
春風兩度費吟詩
才人學道狂應減
村酒澆腸醉始知
今夜驪山正圓月
未嫌清夢逐君遲

歸卧孫大書齋讀所著山海經音義却寄一首

憶君重卧草元亭
對燭攤書戶早扃
豈意異才逾郭璞
未因狂醉失劉伶
閒中花鳥探羣雅
悟後文章似六經

應愧故人耽著迹一編留與潛心靈

附留別詩

孫星衍

翩然歸騎出青門草色長亭綠未勻不信朝朝花底
醉東風偷換六番春

不斷霓裳按曲聲無邊銀蠟徹宵明歡餘醉裏成書
易紕繆何曾似子京

洛下東西屋接聯等閒人望若神仙未妨皇甫輕居
易日日危談動四筵

予與嚴道甫錢獻之洪穉存王秋塍客節署最久議論時有不

合

鎮日瓊筵錦瑟傍人言書記倚疏狂黃金擲得休嫌
重只費長門字數行

紅燈和月影參差每日閒街罷宴遲守尉平生多狎
侮不妨馬上細吟詩

城南風日入秋清憶得攜朋落拓行雁塔聯吟一長

嘯本來李杜不題名

黃仲則游秦曾與
存及予訪城南勝蹟

識字時時一座傾著書往往食時成傷人漫說狂如
故北海如今薦正平

雲山須作少年游處處韶光要客留灞岸春風石城
月梅花應笑柳枝愁

卷施閣詩卷第四

陽湖洪亮吉著

官閣圍爐集

錢大令汝器知武功臨卒之日自言當爲汾河神孫大
星衍後適汾州因爲文祭之並邀余作詩云爾

昔者巨卿死友厥有素車之馳子文酒徒無損成神
之骨恭聞故實不謂逢君曩以燕遊妨君小節圍花
作縣傾穴移金桃分子瑕之筵手進襄成之袖一日
則古疑無死千秋則蒐猶樂思無何越人大去淒涼
山木之心向生重來墮淚山陽之笛宛其入室喪予
平生然而文翁之知亡日燕飲如常子通之令太山

妻孥有夢雲旗畫接鳧宵飛彼汾一曲如玉娛戲
之方姑山藐然神人翔泊之所僕後車日載五嶽遊
來渡如婦之津過臺駘之廟所思予美忽藉君靈選
迺壺觴徘徊祠宇方冀靈衣羽葆損爾尊嚴散髻斜
簪助予跌宕烏乎參差誰思猶揚楚江之靈絃歌赴
節尙涌舒姑之浪我懷如夢君豈忘心倚玉何時模
金宛在況復愁加岐路悲甚生離靡無感再逢之難
桃梗被漂流之笑罔兩問影慙先後之無期丹朱馮
身庶歡娛之有託澆君壘碣保此嬋媛知我幽冥庶
其歆饗

故人不特多高秩闢廟作神今六七洪厓不僊有奇格

留作廟中酬酒客今晨得讀孫子文欲傍汾水爲拈毫
生能痛飲死廟食侗不負錢王孫花枝英英開滿堂
憶初逢君興飛揚君言得閒且引觴爛醉卽卧花枝旁
別來春衣墮秋霜此語濶達殊難忘君不見歌干聲飲
百場少年有願須先償旣入神籍安能狂

華清宮故址聯句

甲觀推三輔鎮洋離宮溯盛唐邑常秦內史長洲吳山

作古陰康統自先天禪江寧嚴祧承五葉昌麾戈綏國

步陽湖洪負斧振王綱百度依皇極陽湖孫諸臣凜憲

章封巒兼泰華長洲吳拓地盡河湟上理幾元化真

靈降帝鄉長生期縹緲秦來中禁厭周防懿此邦之右

長明 隗其鬱以蒼根蟠西土厚亮 陰逼午雲涼嶺半亮

分星宿星衍 峯多雜雨暘懸流明鏡夾亮 注壑委紳亮

長濺霧晴難覺亮 赤霞曉不遲巖端呈絳闕秦來 樹杪亮

架飛梁萬戶銅交鎖長明 層岡粉界牆百司環近陞亮

吉 十宅錯回廊花夢迷前路星衍 星躔接九潢跋烏光亮

隱映亮 支鵲影微茫七技鳧依藻亮 千官鶴引吭鏗亮

鐘蚪拂郁秦來 開扇雉飄颺珠鞞騎三國長明 金羈關亮

五王煒衣同輦侍亮 黃徽一輪張大駕方逾亮 星衍

前驅已過閭受朝簾箔暗亮 頽朔瑤璜鑿蓬觀私榮亮

李亮 沙隄窻植楊陳辭無董勸秦來 懸象有禎祥翹葉亮

調元漠長明 宮商儼贊襄嵩呼中谷應亮 天語隔烟亮

詳陟降由旬島

星衍

低徊十六湯星津詞鄭重

紹昱

月

地幸彷彿紫玉裁為邃

沅

青霓想作裳樓臺長結霧泰

來

卉木不知霜昔在恢基日

長明

由來閱武場

唐自高祖武德

六年始幸溫湯校獵於驪山嗣是著為令典

穹霄乘作肅

亮吉

外事用惟剛

衰草無邊白

星衍

驚沙一片黃英雄歸駕馭

紹昱

飛走

識騰驪叱咤風雲氣

沅

越趨劍戟光能彪相顧盼泰來

狐兔敢遮藏藉使韜鈴習

長明

兼令士馬強載惟思尙

父

亮吉

諫不拒東方騶俄成逝

星衍

從禽遽兆亡錄

纒淪洽鏡

紹昱

柄畚失干將養虎真遺患

沅

封狼肯受

戕三塗容易裂

泰來

四窮苦難塘火箭飛黃屋

長明

金

戈指御牀親征詔元降

亮吉

下殿議先倡貂珥倍行幄

星衍 蛾眉勉急襄將軍何跋扈 亮吉 天子太傍徨殺氣

橫官路 沅 陰風慘佛堂白飄三尺練 泰來 紅斷一枝棠

掩袂辭孤驛 長明 銜枚走北邙帝車聊蜀道 亮吉 天意

自儲皇內草方傳命 星衍 前茅已劃疆蚩尤行就修 紹

昱 黃道復當陽司隸章重靚 沅 勾陳氣載揚九河供洗

甲 泰來 八駿頓迴韁去似春難別 長明 來如夢未忘翠

微睛歷歷 亮吉 新漲綠汪汪澀浪猜鳴佩 星衍 宮花罷

晚妝安從鸚鵡問 紹昱 酸遺荔芟嘗錦襪愁雙掩 沅 金

釵淚一行星仍迴七夕 泰來 雨祇怨三郎短景勞催馭

長明 長星勸舉觴軒弓看欲墮 亮吉 秦璧待誰襪有客

歌長恨 星衍 含情訪未央陰符資聖姥 紹昱 嘉頌第元

暮氣候三春盡沉虛無一徑妨坐憐斜日瘦泰來行愛

野雲翔蹇產金仙閣長明紛縵玉女房檐虛凋菡萏亮

吉瓦鬪破鴛鴦冷蕊低妨帽星衍么荷緩拒漿暗紅流

不散紹昱真艷洗猶香守吏邀傾蓋沉耕民拾墜璫探

懷惟古意泰來發韻總清商舊史書承統長明緩猷倚

峻良如何三紀盛亮吉旋致髦期荒重色原傾國星衍

由奢每積殃存亡機自決紹昱修短運靡常幾見宵烽

誤沉空悲夜市忙何因降西母泰來堅坐話滄桑長明

周忽鼎聯句

銘及釋文

佳惟王元年六月既望古朔望字從臣望遠字乙亥王

從亡不同此用正字

才在周穆王太口口

此行十八字許慎口籀曰智論語

有仲

忽漢書古今人表作仲智許慎說文解令命古用女學

字無智字有門字智應亦智字古文

更乃且祖考治卜事易錫智赤古爾雅以為即環

口口垌用事王才在遷此字上從省文函中作天又從

文遷虛居井鐘鼎家皆以井為卿案周公字所封那侯

穆天子傳有井利泰有井叔易錫智赤全禮天子月奎

采玉名三智受休口口上王智用絲金臣作朕文孝字考

通竅解字有宀云古文作爻此從宀從白智玉篇云

亦作蕭紫解字有蕭牛鼎智其萬口此行蝕用珣祀古

然則鸞即蕭字古文

砢子子孫孫其永寶

右共八十一字蝕者七字存七十四字疑者一字

佳惟王三四月既生霸霸字從月從軍所謂月始生軍

翔正辰才在丁酉井叔才在異應是地名敢口口此

字事了玉篇云古文及小子贅書皆異而義總同以限訟于井

叔我既賣贖女五口口同父用斤馬輦絲限訟曰比則

畏我賞古無償字馬效口口此行十畏復乃絲口此

蝕效父酉訟讞截曰于王參門口口此行共木枝用責

征徒賣贖絲五夫用百爰即錕字錕者錐也古者以二

三錕鄭康成注詩慎說文解字云錕錕也今東萊或以

刑其罰百錕偽孔安國傳六兩曰錕陸德明音義馬融

鄭不用六兩之義故以許書及東萊云為証許氏之

小雅曰二十四銖曰兩兩有半曰捷倍捷曰舉倍舉曰

五五同詩卷四

字又禾奉壽有白選漢書蕭望之傳有金選亦選即銜

與選字同泰餽亦云餽此小子餽與辨餽作罰罪之詞故

亦用此 犬即別 出五夫口口上罰匱口又君眾豈全井

叔曰才 在王口 蝕此字 匱賣 廣口口 蝕此字 狹不迭 造奴 從

從解字之與 狹同 習毋畏 從威字 于比習則拜詣首

受茲狂 齧齧 齧五口 此夫齧 蝕曰墮 庸字 古曰盟

桓曰龍曰口 此齧 日相事爰以告比 匱畏口 蝕兩字 共以

習尊返 胡稱父 鼎有登 同羊 茲 三爰 餞用 到茲 茲 及

習匱每 借為于比 口口 此行十九 口口 蝕舍 齧 齧夫五

秉曰才 在尚畏處 乃邑田比則畏復令 命曰齧 諾

右共百有八十二字蝕者二十一字存百有六十一

字疑者一字

晉昔饑歲匡眾及臣人私夫寇芻禾十秭韓詩曰陳穀為秭

數為極以匡季告東宮廄口庖乃及乃弗還尚書我與受其敗解

作引女匡罰大匡廄首于芻用五田用眾一夫曰秣

漢書百官表俗益字亦籀文蒸用臣曰專勇口胡桓曰

賈為廄又古文以曰用絃茲三四夫箭首曰今彈塗字從

舍省聲以此論之是從喪無廄則寇是口此字不可疑

馘未詳余曰或以匡季告東宮芻曰才在唯朕口此字

賞償東宮廄曰賞償芻禾十秭遺十秭敢人私秭口

餽字秭或弗賞償則口此字詳山未詳秭廄或即芻用

田二又有臣口此字月伯庶父教有月薛尚功讀為舟字用即芻田十

曰乃五夫忽受匡山

此字未詳和

右共百有三十七字蝕者四字半蝕者一字存百有三十二字未詳者四字

鼎高二尺圍四尺深九寸款足作牛首形藝文類聚引三禮鼎器圖云牛鼎容一斛者是也銘分三節第一節蓋因王錫忽赤環赤全璣等而用金作牛鼎以祀文考宄伯也第二節則小子徽與井叔訟以金百爰贖五夫忽受五夫而爲誓詞也第三節則匡衆寇忽禾十秭忽告東宮因與匡季爲誓詞也合四百字乾隆戊戌歲巡撫公得于長安屬坵爲釋文土花歷錄不盡識也旣命工鍤剔字蹟顯露因以偏旁證之

古籀而可辨者咸得焉巡撫公矜此幸存與同幕士
更唱再和成聯句一首以玷如豫章之識韓城鼎也
令畧疏文意兼紀由來書于詩後若夫字畫難稽或
磨泐未析則從闕疑之例云壬寅之二月十有五日

錢坫記

陳倉石鼓昔初得

沈

韓始欲歌辭不敏偉哉斯鼎晚方

出

秦來

坐使才人俊難忍鑄成二尺徑四尺

長明字或

如螭又如蚓東坡欲讀歎塞默

亮吉

南仲如尋有譌僻

賴通六義求偏旁

星衍

頗涉百家知的埠文云生霸合

班志以霸爲龜差可引

沈

又云賞

手

馬証許書有賞

無償乃其準推尋井氏得穆傳

秦來

考驗王居值京尹

同名不嫌或齊忽長明去古未遠猶稱朕信知穆後有

共宣亮不到周餘入徽猶豐宮當時大裕禘星衍重

器昔聞陪業箕銘功示世真恢奇沅覆鼎入門何轉殿

六卿無事飽公餽泰來同姓駿奔分社祗百鈞涵牛自

腹潤長明半面鑄饗允日眇雷雲舊制匝糾結亮彩

翠細文浮癮彫薦之仍几承以黼星衍佐以莞筵續之

純巧倕如過訝齧指沅力士試扛曾絕臙豈知楚問至

郊鄙泰來早見秦謀動儀軫子孫永寶嗟云云長明七

鬯一驚憂蠢蠢遷都已謝挈瓶智亮吉入泗還聞貢金

隕休屠出世先崢嶸星衍長翟模形亦輪困此時此鼎

落何處沅藏壑藏舟守其牝咸陽原頭亦流燒泰來渭

水都前緣封眇會鄰馬冢勢隄杙長明留鎮終南骨嶮

嶙誰云有耳竟沈埋亮吉幸免折足遭牽紉宣和大索

究誰獲星衍神物欲降須天允時清一出世方寶沅斗

際多年氣成蜃廟堂之質古所惜泰來草莽如遺孰當

愍試讎經傳識科斗長明藉埽俗學喧鼃電泥沙乍脫

尙斑駁亮吉顏色驟開還艱鱗靜思世事直奔駒星衍

却愛字鋒仍畫隼與君拂拭過銑盪沅使我摩挲類珉

瑠焦山鼎存苦狹陋泰來吳郡地大空隱賑靈巖之山

水之涘長明積翠疑鬢黛疑鬢鬢明駝千里好移致亮吉

錦巖十重宜載糶詎因螭魅避光芒星衍要伴金仙置

闌楯釣金摩拓動都邑沅闔縣傳看走愚蠢便從空界

與山壽

秦來

不共恒沙隨劫盡高齋古色燭鬚眉

長明

祕室清吟鉢肝腎成詩或讓侯喜奇

亮古

識字庶謝楊

雄晒星衍

開成石經聯句

并序

唐刻十二經及五經文字九經字樣在今西安府學

後舍通計一百二十有八枚按宋黎持記石舊在務

本坊天祐中韓建築新城委棄于野朱梁時劉鄩守

長安從幕吏尹玉羽請輦入城中置唐尚書省西隅

汲郡龍圖呂公復徙置於府學分爲東西次比而陳

列焉明嘉靖乙卯地震石半摧陷

本朝康熙庚子曾經哀輯未歲厥功乾隆壬辰中丞

畢公持節關右釋奠伊始詢訪古刻見下宇傾圮植
石零落顧瞻悚息旋於榛莽鏤會復得遺刻數十方
爰議修建堂廡排比甲乙分植其間用以侈錫方夏
垂示永久竊惟經典所以載道顧道雖無窮而器則
有敝石經肇自炎劉熹平所立凡四十六碑魏正始
間仿之所謂一字三字諸刻久隨運代遷徙至後蜀
成都宋開封臨安並有樞勒今惟祥符僅存四石杭
郡僅存八十七石而已夫書原稽古易著觀文竊歎
古今鑒藏家偶得宋元剞劂叢書別集每相珍惜夸
詡矧夫聖謨古訓復爲唐賢校勘書寫勒在堅珉垂
諸東序天球大貝其爲寶貴當更何如而世之人往

往未暇顧此其得謂知所先務者耶壬寅春正月上

丁中丞致祭

廟廷同人咸往觀禮竣事後循覽貞石相與共賦長

律一章以志其事凡八百字并屬泰來書於碑末用

代題名云爾

孔壁羣經在沉斯書八體更請觀唐太學長明直紹漢

東京伊昔乾綱振江寧張復初因泰道清殷憂開福祚

北仁讓戢戈兵發迹同陽武亮吉除姦過子嬰冗員裁

伎術星衍隻日見公卿馭世方多暇沉司天亦有禎李

充陪釋奠長明翟黼奏開鬻祕閣東西列復純遺編甲

乙呈其時冬十月姑載號開成鳳漏傳深禁亮吉天

香雜佩珩軒堯臨斧辰星衍稷契掌機衡先鄭原遙胃

沉臣覃敬署名備官兼祭酒長明乞上法熹平拜表稱

干冒復純鋪墀久屏營五三經屣屨廿百六卷從橫帝

曰嘉斯績亮吉疇咨展乃誠宿儒須日拔星衍天語自

風行識藉揚雄洽沉讎資子政精校量秦博士長明趨

走魯諸生法變陳留蔡復純形摹下杜程殊文刪囹圄

卿日月塘武新字戒靈縉鸞吳樣自由元度亮吉

音仍用德明選毫知免泣星衍驅石有神驚一一蒲車

載沉堂堂露闕盛琅玕交動影長明絲竹暗藏聲元白

真藉口復純韓裴欲眩睛扇天當北戶廿切地倚南榮

峭似崩雲駐亮吉駢疑駭浪撐蛟龍時攬畫星衍奎壁

三五月寺百四

夜晶瑩煥矣依天府沉巋然鎮斗城卜年傳萬萬長明

碩畫自唐庚豈意壇山石復純難藏汲縣坐斯文愁一

墜姑大厦竟同傾節角薶苔蘚亮吉棖題竄鼪鼪流傳

多鷹版星衍剝落半沉阮一片從樵牧沉何方避鼓鉦

代移應鬼守長明時去懼雷轟有客來開府復純多年

此駐營使君終好武姑幕吏竟非儉便訝摧為礮亮吉

翻成愛似瓊聖經危更續星衍物理否還貞浮世真過

隙沉嘉賓等食莘竭來同訪古長明悵好值新晴僻水

深浮藻復純林鴉細學鶯偶因尋鼻肩姑復此觀崢嶸

鈎勒曾緘篋亮吉摩挲獨倚振升堂欽禮器星衍忘味

等韶讖與士為模楷沉伊誰覆棟薨時清修廢事長明

公德及斯氓

謂中

手自披謁額復純心憐共瓦鐙護加

丹楯麗

出帶土花

頽石鼓初遷地

亮吉

蘭亭頗覆罍

是碑猶磊磊

星衍

試擊尚硜硜賴子窮三體

沅

因公更

一鳴許書時不用

長明

周籀俗何輕昉史譏非妄復純

參功詎合旌為求文歷歷出直使意怦怦有口初嫌士

對字

以口亮

文帝

三田竟易晶

釐字

以三晶

旺罔非秦忌

改臻

為之

星衍

多景葛書并

影苑

始加

景葛洪

似此

諸經易

沅

能無下士爭書循安國偽

長明

傳亂左邱盲

九易惟從費

復純

三詩直取亨雅詞加亟鳥

亟音

禮

本失濯

滌

作

纛玉筋非無伎

亮吉

珉材若待評時

如追史佚

星衍

隸豈守秦嬴

當代開蓬館

沅

呈書及晏楹雅流胥蒼萃

長明

藝術有

根莖藜火虬檐澈

復純

仙才虎觀盈百家刪稗莠

姑萬

卷別瑤瑛論列須公等

亮吉

招要盡國英陽冰曾獻東

星衍

江式有餘情玉燭調方久

沅

鴻都事合賡蜀經成

露電

長明

宋刻久榛荆

作聖誠超古

復純

如川一到瀛卑唐徒爾爾姑佚漢自

醜醜揖讓黃虞夏

亮吉

翱翔頡誦彭魯魚迷早辨

星衍

科斗寫誰令舊刻爭留詠

沅

新材待發硯大書重作貢

文治翊恢宏

復純

集終南仙館觀董北苑瀟湘圖卷聯句

圖

以謝元暉送龍詩淵庭

張樂地瀟湘
子述二語為境

一綠千里何迢迢沅人烟不接水氣驕秦來雲霞今古

見復消長明天若葢笠峯覆瓢姑扁舟胡來波上飄亮

絲風微吹絲雨撩星衍前有雙姝顏若茗沅下謫經

歲猶垂髻秦來仙骨一束從風搖長明欲出天外難招

要姑坐中一人衣帶影亮吉華葢柄曲星垂杓星衍瑤

罕戍削侍從沅乘風而來氣忽颺秦來得非有虞從

二姚長明往帝七澤都三苗姑從舟三人靜不囂亮吉

綠袂乍舉朱唇歆星衍排笙絙瑟相和調沅始若有慕

終無聊秦來將母楚人為楚謠長明傾耳欲聽心搖搖

萬象匪意所及料亮吉零陵內史仙格饒星衍新亭

促別心焉切沅詩非沈約迺謝朓秦來想涉太古神寥

長明憑誰意會來生綃地鍾陵仙人官庶僚圖志畫見

源鍾陵人微軀遠寄如鶴鷄星衍中洲北渚時逍遙沅

瀟江湘江初上潮秦來水色欲盡天為繚長明其下雜

插蘆葦蔗地間以弱柳垂烟條亮吉一千年前新月嬌

星衍遠映漁子來巖腰沅譬若蛛網人蠟蝟秦來目所

到處神與超長明真宰止訴誰遮邀地靈均墜鬼已莫

招亮吉王郎經湘亦復天星衍蛟宮龍堂悲寂寥沅水

底大集文壇泉秦來靈珠出握光入霄長明以日為夜

星為朝地幻作墨寶猶騰焞亮吉翻飛落手豈倖微星

行裘之古錦匣亦雕沅東西北隨使者輶秦來秋堂展

翫清以漻長明題詩媿比英咸韶地直須大斗胸中澆

亮古 爲公浮白歌離騷

星衍

消寒一集登靜寄園平臺望南山積雪

分賦得雪字

層陰凝高齋淒念集素節凌晨瞻終南歲宴已飛雪華
筵撫時序瑤館坐超忽凜凜朔朔風沉沉眺遙闕微黃
辨清灞積素連太乙屢井何鬱紆川原互明滅幽人來
若鶴深徑望疑月心空冰柱響耳訝竹梢折豐歲諒可
占晴陽盼方切

消寒二集同人集姚觀察頤冠山園分賦齋中草木

水仙

海客歸無計江花見有情遙蹤同水國小草得仙名一
種忘言契先春與目成簾疎莫遮却新月影中橫

天竹

簀簞影不同千點亦玲瓏秋實偏憐小春花欲讓紅拂
闌朱粉暗映樹火星中自覺冬容淡移瓶插數叢

木瓜

一種香偏永踈簾曲几傍殷勤何以報轉側敢相忘木
性還經歲瓜期已履霜青門一樽酒風味許同嘗

蠟梅

素心誰與侶宴歲獨含葩香冷回殘夢塵昏隔故紗過
秋疑剩葉籠月似無花燒燭須頻看羅浮信正賒

消寒三集吳舍人泰來招集講院席上同賦食品二首

鐵雀

銅標鄴中記玉集魯東家似此名先遜還應味可誇以
珠彈乍惜似鐵鑄非差十月綿初重千頭炙欲賒成羣
來塞積洗處落邊沙大厦蹤曾託空倉粒競譁覆車還
共取墮網亦誰嗟骨碎登樽俎肌豐佐齒牙蟹螯鋒欲
避雞距銳寧加異物餐難數吾生欲有涯未妨調肉糜
稍足點薑芽食罷興三歎門前數晚鴉

銀魚

小言真可賦微物信堪憐種匪來銀穴名真壓錦筵形
輕團柳絮影細貼榆錢未覺盈筐貴初看布網連吳船
珍乍寄越客嗜尤先漑釜難渝色和美詎改鮮晶鹽看
乍點甘雪試同煎夾箸慙三兩隨波憶萬千餘芬還沁

齒薄味轉流涎偶帶冰霜質相忘江海邊塵情聊自遠
鄉思暫教峯何日吳王膾登盤得比肩

消寒四集十二月十九日為東坡先生生日同人集終

南仙館設祀并題陳洪綬所畫笠屐象後

誰攜玉局堂前酒七百年來為公壽中丞愛公才似公
邀客設祀高齋中高齋玲瓏檐鐸壽公無詩公不樂

公生于蜀卒在吳吾鄉一樓還號蘇刺家舊宅有樓為

所歲嘗以此日人傳樹古樓亦古公昔撤瑟予懸弧童

所歲嘗以此日年學句殊清瘦詩法從公夢中授樓前溪水百尺流公

前艤舟予放舟憶公登金山謁公入黃樓十年三度祀

公處畧識清潁兼杭州平生憂樂誰能悉盡裏蒼然見

鬚髮公也何心詠螯龍天乎賦命遭磨蝎世人雖知公
未若公自許東京黨錮范孟博北海奇人孔文舉無端
住世厭世名飄然上天作列星衣裳怪底切雲霧雙屐
一笠淨空青我于公舊公宜識易羨書生住谿北公思
陽羨我思鄉江岸田荒歸不得瓣香到公應已知天上
樂或忘年時烏臺舊案公莫思紫府且復吟新詩
消寒五集嚴侍讀長明招集寓齋分賦歲事四首

掃室

居然一室住經春嬾學嵇康得性真蛛網布來無隙地
燕巢移去擇嘉辰窗濃未拂雲山翠篋冷猶棲京洛塵
眼底乍看陳迹淨檐前鵲語亦懷新

烹茗

爐響間從竹裏聽，霜華初試酒初醒。
參差烟繞屏風碧，深淺山從穀雨青。
渴思幾番憐永夜，空江千尺憶中泠。
終嫌結習除難盡，訂罷茶經又水經。

試香

數種貽從西域遙，拈來仍與栢同燒。
故人一瓣心空寄，繡被經時氣未銷。
渾惹凍雲來冉冉，放隨清夢去迢迢。
酒痕滿漬征裘敝，且復濃熏度歲朝。

糊窗

近刪竹葉通朝旭，欲易桃符感歲華。
作賦十年餘故紙，籠詩四壁換新紗。
爐烟已隔香空篆，檐鵲難窺語乍譁。

一榻琴書幾回睡早看晴色上梅花

消寒六集同人集花鏡堂分賦青門上元燈詞

桃塢南頭閣一層坐來春夢尚嘗騰休嫌青鬢風前改
十五年看客裏燈

蕭郎清興本無端幾度添衣備夜寒拋却廣場千頃月
却來城市覓燈看

坐來不復接雲笙自理三絃撥玉箏休放吳歌惱清聽
四圍筵上總秦聲

更闌一騎去匆匆衣上香飄葉葉濃行到北樓人海沸
開元坊裏戲魚龍

小徑行來避市譁生疎還怕路頻叉蝦蟆陵北寒塘側

月午閒看隔院花

踏歌聲復轉城東樹影微
茫月影空一盞佛燈同劫火
慈恩塔上夜深紅

漢宮餘瓦尚參差遺事惟因故
老知想見殿頭傳蠟燭
不教明月擅秦時

城西古寺足勾留煮茗清宵話
勝遊歸騎忽驚春月暗
南山晴雪照危樓

留髡筵上酒頻堪檀板聲清我
尚諳客散未教春睡穩
夜深簫鼓在樓南

頻燒紅燭待孫郎醉後閒眠六
尺牀遮莫歌筵苦難散
五更催着舞衣忙

消寒七集招同人集朝華閣分賦長慶集生春詩四首

小樓

何處春生早春生在小樓月中簾影上風裏笛聲綠
意枝梢破紅情燭畔流三更乍聞語香氣落牆頭

畫廊

何處春生早春生在畫廊一雙人影瘦十二曲闌長掃
壁雲濤湧巡檐月露涼微聞屨聲近知欲採疎香

遠山

何處春生早春生在遠山多時看窗影幾日驗眉彎地
覺晴雲上天將空翠還遙遙數重樹先合夢中攀

曲池

何處春生早春生在曲池水紋開宛轉負眼動參差舊
夢牽萍葉新愁颺雨絲凌晨卷簾看波影上來遲

消寒八集同人集小方壺賦憶梅詞

一年看梅在廣陵平山高下樹千層寒冰乍削波中鏡
碧月初圓天上燈一年看梅在姑熟二月花光艷溪曲
避冷人登白紵樓尋幽艇放青山麓曾尋梅信到錢塘
前後山光接水光幽窗與雀論高格石屋隨禽嗅冷香
富春江郭潮初上千樹垂垂亦齊放此水東流我復西
晴波影裏疎枝漾錢塘歸後住江邨更載梅花向白門
刺史宅邊餘幾樹可憐樹樹識吟魂家園亦住梅前後
只惜花時客行久驛使頻看寄遠音明年花放人歸否

石旬爲客住京華十月先看深窈花園空陸弟吹簫冷
枝小崔郎壓帽斜愛梅不合秦中走待得花時憶花瘦
夢裡分明見折枝閒中寂寞眠清晝我賦新詞舉玉樽
梅花深館寄汪倫劍潭舊宅有憶梅館舊東門外三條巷臘雪今
餘幾樹存

消寒第九集同人出西安城西南訪第五橋故址回途
至香積寺小憩約賦六言二章分韻得長頭二字

初三月色雖好第五橋名已荒雲與石厓共削客同原
樹爭長

香積寺中午飯樂遊原上春遊水脉欲尋龍首岡形忽
現牛頭回途至牛頭寺以日晚不果入

卷施閣詩卷第五

陽湖洪亮吉著

太華凌門集

壬寅癸卯

初三日抵玉泉院

雲光已不同出樹門青紅過澗方三里穿林復數重引
泉通十頃築館面層峯松蔭迎人遠花香落掌濃杉條
旣疎直荷柄自玲瓏魚梁棲夜鵲獸吻墮秋蟲日沒風
雲徑天低星宿宮臺廊通靜氣樵牧接閒蹤拂塵開石
舫展簟對疎櫺靜看初三月才聽戌夜鐘

自玉泉院至五里關

入谷氣始陰上坂地復失盤盤行空中石亂忽拒轍維

時正晴午昏晦霧欲結遂令高峯雲慘若太古雪陰寒
生蒼苔錯落繡根節神工竟草創巨斧未刻截萬古積
鬱怒欲下勢已猝危茲幽人居陟向崖底笑云開北邊
牖夜半或見月欹松橫成梁直石立作闕幽瞻正徘徊
飛瀑頂上出

由車箱谷經十八盤諸險

一松扶升天一石絕人地信哉雲門塹巨石上鑿雲門天塹四大字

奇險難久閉坡陀半日上直下復里計飛騰挂枝猿曲
折旋磨蟻非徒鑄鑿工迥出神鬼意坤靈信難戴天意
恍立異排空刺日月鬱鬱試鋒利仙人萬問屢破碎忽
被棄巖東不開闢拓以巨靈臂十折復八折草路入雲

細回瞻足幾失直視神乃悸藍輿尚徐行天路誠匪易
自莎蘿坪至青柯坪小憩

出谷始有見怪峯驚彎環人行莎蘿中襟袂何爛斑藍
輿折危橋飛瀑爲洗顏樓臺破空垂天頂壘石闌蛇紆
逕蒙泉虎響生高壇明明暑氣隆頓覺秋意殘客子念
早饑徒侶衣裳單瞑坐百尺亭道士伴我閒掬彼石鏡
水餐此桃實丹紅日不覺午青光交一山巖扃雖云高
目力與往還森然下天風靈氣何能關

從天井上千尺幢

空胸衝松風側笠敵日色危瞻千尺幢出井級已百驚
沙亂迷目瘦隼莽攫客雖云級凌厲益鼓氣峭直手滑

鐵索熟足落石勢側幾將隨崩濤險復墮崖脊調神久
方定置命往逾力唇焦呼聲勞力竭心氣逆洶洶雲俱
垂蕩蕩天若壁同儕詎能顧出險未過刻身今逾輕
援後竿祇百尺

過二仙橋憇媪神洞

人蹤旣已疲天險亦少收行行經危橋橋回出高樓房
簷交層雲松子一尺浮飲澗襟抱涼蟬聲亦鳴秋怡神
洞門前石几清且修絕壁下日光正罩青松頭高樹皆
人巢飛羽反不投構此尺木棲有若絕壑舟東西皆深
厓遑識路所由天意開西峯惟堪化人遊徒繙黃庭經
塵跡難少留

經天梯升日月巖

峰危殊難飛路斷鐵索在高瞻誠堪驚欲往寧有待思
隨天風升值此雲氣駿千尋無寸曲百上不一逮足勢
久已虛腕力忽欲息先登倘一墮直下無地載誰云心
胸奇驟覺腹氣餒遵峰意猶掉履險志不悔乾坤分層
梯日月絢疊采巉巖升甫半突兀觀頓改腰平終南山
目直大瀛海

仙人竚望雲臺諸峰

石勢亦欲轉孤峯圍成岡道隘東一門逼仄五里長絕
壁雨露稀草綠忽已黃陡上數十盤飛隼安敢翔鑿石
不少寬鋒刃趾已傷東西十步餘飛石橫作梁背倚千

尺巖下視萬仞強華雲披南山初月映石廊闌千難重
扶欲落勢早防直下龍所居雲霧會渺茫思隨飛仙人
下一探所藏離離攀虬枝盤盤出羊腸

日昃經蒼龍嶺

先登夫何難欲往恃所執瞻茲雲路駛揮此雨汗濕途
危氣偏降退九進乃十峯寄誰人開空處陟置級蹤疲
欲暫駐石石倏起立山腰衝風來忽攬頭上笠中途一
驚望呼出不得吸前行盡頰偃垂鐵苦繡澁危均騎虎
勢過趨老龍蟄因堅向禽志差免阮生泣身輕既出險
始覺百憂集前望金鎖關儼從訝生入

通天門縱眺

茲門通天門，獨上願已果。危闌折逾峻，空處雲落彙。先
登需伺儕，疲極藉神坐。清泉流巖腰，甘果摘道左。紆徐
手堪掬，偃仰足復髀。高低峯巒奇，濃淡青綠裏。轟轟下
山日烈烈，燎原火冥冥。天餘青落落，星綴顆高瞻。數峯
色藉此一徑，鎖當須鼓全神。始力戒終惰。

坐玉女峯望東峯松檜

入雲復出雲，數里上空冥。白玉築一峯，黃金開層局。慚
非列真期，已到仙人庭。雲窗借蒲團，坐半日已瞑。松檜
一萬株，山黑團古青。空濛洗頭盆，正落北斗星。檐廊時
思飛，風掣殿上鈴。非烟亦非花，衣上空翠馨。直下半里
餘，樹色尙未暝。回觀信恢奇，物外猶亭亭。

侵黑登落雁峯

大聲非常聲山響接天響冥蒙黑四山顧視青在掌初
升尚牽蔓絕頂已弃杖洶洶何隆隆高絕不獲仰元衣
披雲霞赤足踏緯象卓哉峯萬仞不置一山巖清泉冒
峯巔穴大若瓮盎酌茲洽洽水空彼一一想塵寰既高
出天路愈欲往瞻西一星矐下放六合朗昏昏三條流
遠近色蒼溟奇標竟遵一遊跡實寡兩燭刻石上銘來
遊異時儻

夜從落雁峯足至蓮花峯

青蒼無端倪石石爭作嶽濛然元氣在至妙不雕斲侵
冥登峯稜天頂已在握中厓視星緯五色辨班駁長蘿

輕堪騰劈石積不仆滂滂足生霧歷歷頂落雹無端分
陰晴慘若變晦朔稍西勢逾峭直上怪風撲孤鐘方三
聲老雀忽一啄危壇禮星斗珠露聚作幄何當逢秦人
險絕臂欲捉

未曉由金天宮西至環翠巖望山南諸峰

飛隼不到處高松搖天風冥冥四更山初日颺遠紅樵
子導客遊徑絕強欲通持火破白雲四山青濛濛松花
開巖端香氣來無蹤屏山西南周翠色一萬重引客坐
北窗衣露何鮮濃清寒杳難勝山霧積欲空俯視一徑
沉頓覺來跡窮時聞泠泠聲不知何峰鐘卧起出石門
山童進晨供

金天宮夜宿

雙闕兀立峰西東斜陽欲落已動鐘間階百級聚蟋蟀
要使天且聞秋蟲齋心正盥碧潭水香炷乍謁金天宮
天衣颯爽坐坐神斧廟落交庭中三重門閉寡天色
山果自落靈旗風宮中道士張巨儼自說七十顏如童
向求軒闥事偃仰遠指樓閣穿青空虛廊暝色下無際
歸寢更借神燈紅闌窗四面且勿卧星若斲益懸當中
作書下寄訝流輩與鶴共宿南高峰

松檜亭待新月

東峰戶久扃蒸此雲氣濕濛濛深棟間松鼠貼若蟄窗
開分雲一西一東山南歸鴉驚飛其中石泉何空濛俯

映新月色初生雖微茫原上千里白回看黃流昏色帶
清渭夕青峯收青欲上天山綠如雨歸平田一山茫茫
白霧連空際止裊香爐烟爐烟濃塞歸路月光如花繞
階步山童携酒出石臺却似野鶻穿烟來

縹紗嶺納涼

雲門古松三十七三十六株鱗盡裂一松蟠蟠徑離石
勢欲上天猶去尺白雲移松巔巨石忽欲走巖風吹征
衣上險切星斗石鏡露落山泉微光暝色入樹松花初
黃人間殘暑不至此崔嵬乍著宜新涼雲光深霞色淺
倒影空蒙衆山顯枕泉半日不飲泉飽向松梢餐露眼
四更上落雁峯看日出

落夢視初日起來攜孤筇河東閃電來先見中條峯昏
 昏九州烟黯黯三霄中大聲皇皇地軸空玉色隱隱天
 門東東星西星景濛濛南斗北斗雲滃滃忽然前峯開
 已發松頂蒙滄溟隄近一千里海色上視搏桑紅樓臺
 金銀一萬重日上似戴仙人宮黃人捧日力逾駛耳畔
 隱覺聲泅泅十年絕頂兩度見壬辰四月遊黃山曾霞
升仙掌峯看日出
 采爛爛光雙瞳白雲穿空入太行飛雨若席傾河梁是曉
隔河人間塵夢尚未醒我倚絕空餐清光君不見天高
爾甚鐘動氣尤肅下嶺仍須注紅燭回崖俯視亦壯觀洛水

隨闌十三曲

下抵玉泉院口占答華陰令送酒

昌黎尚識華陰令李白才登落雁峯餉我一樽開石酌
乘風先酌玉芙蓉

華陰廟六十韻

太華高羣嶽秦神貴九州帝同周二時佐視漢諸侯一
德承蒼昊千年統尊取原形回阪峻閣勢出關浮浩蕩
門題迥差峩石級迥練均吳下市琛集海南舟一巷營
千廡三衢列八騶同場圍說法隙榭聚觀優磴左盤蒼
翠廊低飾黝髹瑣窗籠蟋蟀寶肆挂筮篋摠抗金銀闕
全虛青綠疇竿危衝太白棟峻壑神邱絕躡飛烟裊層
城聳榦抽絳霞披紫閣白電鎖朱樓昨者垂紳佩諸天
覲冕旒到階雙屐響入殿一衣摠侍吏咸依楯真官悉

擁矛

御香懸日月

宸詠切奎婁工作千人集莊嚴歷歲修

詔頒中府帑帑頻遣大臣籌黃屋開南面丹梯閣上頭更

憑黎庶樂仍望

翠華遊并豫推彌廓川巖眺欲週扶天排碧巘劈地出
黃流足跨崑函險腰馳曲杜郵沉雲極羈馬飛霧洒泉
鳩儼覺巖雷湧森無野鵠投雨龍垂檻攫風鶚入雲按
冥漠心神炫孤危足力柔俯瞻秦地窄高動杞人憂傾
耳聲疑聆齋心實有求尙須窮日力詎敢作神羞降闕
瞻叢廡依楹覽四陬虛房丹粉落空室鬼神幽曠朗人

問世陰沉地府囚百司紛案牒兩造恍啁啾意或威林
摠觀真邁等儔繪墻虛舊蹟展戶闢新眸八角檐鈴峻
三層柏子稠散仙巢棟節陰烏穴杉瘠鐵鎖西封檜欄
扶北偃楸窺原驚白鹿剝樹走青牛槐目舒經漢公腰
折白周語奇誰紀載境古足夷猶風柝沿林杪嵐光瀉
瓦溝斷看碑錯落精愛石雕鏤唐碣尋陽孕周文變眼
攸校量逾宋揚剝落過岐蒐壁石蛟螭瘦崩沙爨屨愁
鑑形當愧魅識字竟輸虬凡此殘文在皆經劫火留高
穹籍撐拄萬古識琳球記擅雲間陸廟工爲潼關軍民
同知陸君維垣承
修凡碑樹古談窮天口鄒九垓初極覽一葉正迎秋月
者皆別標名

露零如豆霄星燦若榴晦明分積氣暘雨荷靈麻早試

一老古詩集卷五
猱升木明同鷹脫鞴翮從毛女借詩學楚人咻蕭蕭瞻
疑在明明願易酬真符如顯爍帝所亦行游

朝阪行

一碑僅露尺細視萬歷年風吹河東沙日沒河西田黃
河身高田亦高碑石九尺埋蓬蒿君不見居人耕沙沙
沒踵子孫出盡高曾冢

三門當黃河門半以土窒惟開城西門日夕車馬出居
民防害願築堤萬錢鬻石兼運泥君不見河流已退催
租急堆土若山堤未立

昨傳黃流增驛到八百里官方坐早衙失色推案起白
鬚吏人前執裾官今勿驚安衆愚君不見官無一言吏

會意日午傳呼縣門閉

龍門一百韻

鴻流何包荒天地縣滯釜湯湯勢誰極莽莽氣頗粗當
夫開鴻濛誰復任析剖師心嶽平坦用意極莽鹵奔濤
未三折中路忽一挂激令流洶洶奪彼原廡廡忽高復
忽下驟吸乃驟吐欲博天帝笑不慮河伯怒直看凌孟
門意若撫幼豎高奔觸風翳倒射激天鼓無端星辰衢
幾作魚鼈塢馮夷旣飛騰鱗伯亦跋扈微窺意向若欲
規天作府巢傾窟更陷利大害亦普側聞昔陶唐其俗
雜歎撫有崇司水職四岳實舉主惜哉賢非賢有若瞽
子瞽寧隨河性導竟以民命賭法官罪不糾悍辟恩轉

恬或言驅蛇龍何不役羆虎欽哉虞帝聖不受岳牧侮
八殞事誠難任子不任父九載功復續治水先治土赫
然雷霆行詎假神鬼輔遂徵百川長繫以八尺組招呼
不敢後瑟縮乃欲偃羣爭貢謨策遠畢集圭組雖皆據
淵藪不敢觸綱罟憶夫初離家正值啟欲乳出門始聞
哭在室乃敢撫冠經屢挂水履識百易蠶茲山當洪源
厥險抵天崖巖奇未經鑿功驟不可樹若高不肯下若
仰不欲俯凹疑氣初懾凸訝勇欲賈昂看楚趾高伏欲
晉腦監逆如蠻同鼎順若彝貢磬嶮嶮臯面削曲曲卻
背僂纍纍髮全禿齷齪脾半腐甯成陵黯上韓信耻噲
伍若行若中止若立若遭踣一起一落勢不得不用斧

喧摧穿右脇折拉破左股快哉源昆侖忽一瀉肺腑又
疑天西門落作秦北戶神驚走相告天口忽若杜意非
滔滔平曷以萬萬古強爲生民計不受主者誣驅除到
鮫鱷束縛若辦殺尾初出長城頭險觸砥柱涑汾滄渭
涇五水畢集潄艨艟船舠艇一棹敢入浦荒荒束奔騰
兀兀植標楮但聞巨靈蹠不見女媧補大哉回天力允
矣幹父蠱九五勲縱酬百萬工孰估惟神有庚辰襄役
逮甲午居然奠九圍功足配兩廡至今三門山若集百
石駑誰言下浮竹不及追駿馭紅桃漲三春頰鯉集萬
數驚如梭投機捷若矢射堵橫流尾竿榻扶浪首瓮甌
壁立五里危直上千尺武先登頭戴角已落腹破肚如

藝角闕廷盛士集鄒魯夷然美交醜下者玉雜賦無慮
萬與億得上百不五徒然限仙籍甚或人食譜尤傷額
墨點那得尾火炷紛紛敗鱗甲徃徃漑鷺脯川奇思一
究雲間不使覩徒勞測尋丈難復量斗岸方區信瑰瓌
人物亦黻黼有漢太史奇遭時肉刑苦表書本紀傳今
古聖賢薄沉才下泣別堅筆基盪努傲高徒權輿彪固
敢翻侷神雖妥鄉壠名首歷史部寧惟嵩高嶽克降仲
山甫探奇搜殘碑懷古酌濁醪迢迢望舟楫歷歷植稼
圃區雄左馮翊縣近古役羽分流灌蒲郃餘潤及杜鄴
旁田號膏腴陸產昌稻稌寧能忘

帝力早亦識神祐

朝今邁唐虞

殿昨舞千羽

四聖百卉載五風又十雨羣所奉約束異類就規矩禮
祠倘思建

奏請每不拒施丹塗神宮撐碧向晴宇磨厓深鐫銘室
石突作室允惟萬世功先薦一束脯勲勞至高大鐘磬
盃搏拊推源祀黃熊配極用白琥恬波衆皆慶報德神
所取靈壇交松烟石屋裊香縷回聽波濤翻忽覺風雨
聚靜思元圭烈普戴赤日煦聖不可知神吾無間然禹
抵盞屋書院與王明經開洪步月至三鼓始宿

青松夾幽居高下白鷺翔客子行人門衣上新月黃圭

人高齋卧未醒止客暫憇松風尙客行看松出亭外不
詰主人先解帶主人睡起客復眠爲客松下開長筵南
山如屏列坐前山綠似雨零層田主人新齋月尤皎遠
有松風入簾好縱談舊事不厭疲清析數聲帶巷悄松
聲入竹韻滿空月影穿栢尤璉瓏軒墀東畔樹如洗更
挂北斗光簾櫳流螢三更入衣袂主人無言客先醉桃
笙展罷未欲眠門外終南立空翠

自城東沿山行至樓觀作

山雲展碧山禽語松櫟十圍時漏雨隨風亂捲白石圓
山果礙帽皆如拳斜行一里山色好人行讀碑馬齒草
摩挲未已石勢欲勒馬離碑愁欲倒仙人舊宅今作祠

騎牛丈人稱水師五千言古昨校定

非借秋颺先生以傅奕本校道德經

青山白雲人可思樓臺切天朱火噴遠有道士來迎門
疲蹤據石暫思憇水杓飲滿甘泉溫穹碑列三層石橋
亦尋丈馬嘶巖石鞍挂松塵外溪山覺清曠巖腰一角
鳥道空遠見下觀斜陽紅前宵一雨尚未足濕霧滿谷
雲滃滃邀登百級歷飛觀人語寥寥落天半爲開仙幄
禮上真更止殿門揮雨汗殿旁松竹闢一扉揖客入坐
紛追陪山風吹顏露灑衣清齋飽餐松子肥飛泉分流
竹梢重瞰壁依微出深洞邀遊客倦復苦辭上馬出門
鐘已動

清曉出盤屋書院二十里入南山遊玉女泉歷黑龍潭

並憇仙遊寺作五首

出門望山行再轉山已失
鄰鄰白石灘遠水漾朝日清
寒生松林涼露時墮一朝饑亦堪忍
撰袖出桃實沿流飲清澗澗淺足不沒
時聞山花香橫波弄晴色沙田極
千頃秋至課梨粟清絕廿里程幽人尙荷室

巖腹徑十里四山圍平田飛瀑山頂來
正灌麥壠邊人家亦無多雲白接炊烟
山童跨黃牛掉尾不用牽數步過石橋
就飲飛瀑前林禽亦忘機飛鷺何翩翩
愧挈馬足塵踐此草色鮮曉日闕北窗
山齋望疑仙

雲紅開層層草綠迷半里牽衣來山亭
泉聲出亭裏墮隴扉旣闢窈窕窗亦敞
層山列如屏高處聊隱几天風

遞清響醒夢均可喜東扣玉女祠危潭似無底泉涼齒
初沁石冷跡頻徙倘有飛仙人相遺一雙鯉

山腰落飛濤潭氣晴亦黑高低及三里聳積鐵色石奔
流無回湍觸柱卽倒射東西危支梁傾仄險墮鳧雖堅
壯往志勝覽塗限尺蹲茲盤石坐飛浪高及額東瞻七
層塔倒影入波直雲霧出不窮幽靈信龍宅

寺古不記歲門欹戴蒿萊峩峩古金仙腹背生綠苔風
積丈室塵經月客未來欵門渴求漿實指一樹梅幽扉
旣重扃潭響猶奔雷閒覓石級層上此千佛臺回視當
午日正向南山開山前飛火雲騎馬詎得回解衣坐須
臾支几消濁醅

過終南鎮

山禽飛向山澤禽飛向澤山禽翎紅澤禽白終南鎮前
一萬家均飲山綠餐山霞山溜注水還無涯良田出門
百餘步力倦還騎水牛渡果熟原南悉知數

急雨登五丈原謁諸葛忠武祠

清晨出縣霞色晴迷路久指原東行溪深幸跨馬腹渡
雨急似向龍鱗傾坡塘陰陰滿杉櫟原南怪風吹馬立
離原一里石徑奇草深尺餘靡向西風雲變色渭川湧
太息復有荒祠遺原高祠荒一間屋廟栢森枝直斜谷
斷碑棲棲石齷齪土人耕烟拾遺鏃入門禮謁日已曛
梁棟南北交山雲陰廊細繪漢丞相分廡尙祀前將軍

雞豚雅識居民意祀典雖崇復私祭遺冢蒼茫失大星

十人傳有
葬星處

綸巾颯爽留生氣烏鵲上樹客出門却視渭

北昏霾屯回風蕭蕭馬蹄起如掌原平三十里

鄒縣道中望太白山積雪越日清曉復由縣抵清湫鎮

入太白山三里憇上池作五首

茲山何皚皚一白天際突奇標隱難見太古已積雪陰
厓絕風雲寒影刺日月寧惟樵徑斷鳥道亦已絕遊蹤
屈巖扃當午氣凜冽天風偶吹蕩時落飛霰屑洗眼看
北山巖光較清切

昨來南山風一雨山半綠危瞻上峯雪倒影射飛瀑三
更寒霧重青氣溢郊谷皎月出上方泠泠四山蕭奔流

不注地奇響聞觸木皮衣禮星辰盥沐壇頂宿絕牖光

景殊靈明或神燭

發曙禮清磬望雲臻層層行穿松檜中鞍袂何空青山
禽引雛飛松子雜露零陰崖一回瞻訝若集萬靈雲氣
出
不窮觸石石卽冥千尋頻深潭驚見北斗星天光依
微開山腰出危亭

亭半泉脉落石淺泉流深一掬石上泉能令千里陰映
泉鑿深池涼至故客襟奔瀑灌頂來四注竹柏林頽峯
屈成梁半里石脊黔嶙峋出東南建此儼閣尋坐酌太
古雪永清塵外心支枕卧石龕泉聲曼鳴琴

西峯何高奇雲出迷向背青松交雲蘿展此十里翠草

香難知名一谷別蒿艾沿流溯清泉再轉白石礙巖回
偶孤坐霞朶亦時墜側徑樵語喧連柯訝危戴獫行渡
深谷雲白踏欲碎幽賞歷一時晨曦上衣帶

後漢陂行戲贈汪進士應奎

時汪主鄆縣書院約同遊不至

馬蹄三日行山前高下不盡南山田原高土肥喬木列
時有流水鳴濺濺稷州城東及鄆西窮披縣圖尋漢陂
沿山十里歷阡陌祇見果熟秧低迷土人爲言百年涸
決水爲田取萬斛田坳積雨亦作潭水淺無能及牛腹
陵移谷徙何代無漢代蚤失昆明湖茲遊適值新霽夕
萬頃明月同波鋪朋辭暑疾不至此壺觴獨來岸頭止
君不見不特漢陂陂前無尺水好奇亦少岑夫子

春盡日偕陳公子暎攜酒至曲江村看牡丹作

殿春花紅酒亦香
攜酒十里來花旁
春衫少年束急裝
玉鞭搖搖片馬黃
花堂主人酒先把
揖客登樓望君馬
游絲拂地柳接天
連騎直至花枝前
花枝紅紅水波綠
照水花光十分足
墻隅一朵徑若盤
顏色轉盛蜂成團
紅闌影外春陽轉
主人惜花幕難捲
花枝照眼酒入唇
綠鬢未愧稱春人
午餘花酣客微倦
攜鞭出門馬嘶汗
更插花枝馬頭看

將賦南歸呈畢侍郎六卜韻

微生三十年奔走
及廿載方其探幽奇
直欲出宇內
秦中富名山高欲兩
秦岱公乎稱好士
一世莫盼矚儲書

羈蘭臺引領西望再維時歲辛丑四月節值胸春官初
下第喜極乃不慨急束一篋書重欲等耜耒艱于行李
費肩背自負戴塗長三十日勇進不暫退微聞番回肆
小愧盡芟刈公時調兵粟旬日敵王愾全秦一書生土
氣自百倍疲車來青門十五亦列隊公才善鎮靜管不
耀甲鎧乘閒一投刺急復請相對嘉其一言善俾得列
朋輩賓僚皆天人詎敢驟置喙均蒙采葑菲各各沃饒
酌周旋旬日中技發不得耐陳書近百軸云以待清論
公云有數才洵足名一代極知言獎假厚意實可佩公
時出一篇雅頌等切割牋文百重繭筆力欲透背時時
驚望若不敢冀津逮維于廣堂上默坐聆警欬偶道一

士奇名已入夾袋嚴冬十丈雪深夜理茶焙愛此說上
甘足若蹲兩敦吾鄉數蒙莊所屈節近作倅錢生姑亦
經彥急欲及鋒淬賓筵有時開燦若列采續殊源復千
派到海一一滙孫郎才偏奇近苦性隔礙人爲推甲子
星或入計亭非公鑒其實世視若棄穢新年陳華燈列
坐視礪礪行牽歌袖急幾至酒德悖維公善調劑諧語
息衆對前時別公去感激欲傾肺公無慮其狂狂實恃
公愛鄙人最無能才足守水碓童年承母訓勤學掌亦
焯今來秦楚大詎可列鄘鄙公也待士均一一勤勞徠
軒寮皆周行闕物卽頌賚爲開軒楹東點人山半黛感
今得知已生世可不悔雖然受恩深益不揣冒昧一言

願陳公好醜匪一概公雖仁覆物曲木勿姑貸之將別
公去非爲憶鰕菜郵奴馳高函發紙忽三嘅爲言叔衰
病久客否自在昨復一書促厲語責憤憤行買百斛舟
柁鼓湖上壞公前爲購室屋好不破碎行當列花竹喜
尙遠闕闕明發函谷關思公我心癩

卷施閣詩卷第六

陽湖洪亮吉著

中條太行集 癸卯甲辰

自西安至安邑臨黃二景仁喪奉輓四首

生何憔悴死何愁早覺年來與命離病已支牀還出塞

君扶病自京師逾大行出家從典屋半居舟竟歸好入

王官谷名在空懸太白樓君早年以太一事語君傳欲

定卅年心血有人收西安幕府將為君梓遺詩

歸骨中條我未安為憐親在欲憑棺君病中欲葬中條須營江

畔墳三尺好種籬前竹百竿君性平空有頭銜書尺旒

愁餘名紙伴高冠君衣裘為醫藥質盡卒才人奇氣難

銷歇六月松風刮殯寒

早年援霍與齊名月旦人先赴九京

朱笥河先生嘗呼余及君為援霍今

先生已下世

共哭寢門思往日

先向借君在西安開笥河

獨臨

遺殯愴生平貞孤論盡朱公叔存沒交餘范巨卿却愧

素車來未晚樹頭飄山旒將行

倜儻平生孰可如遺緘欲發屢踟躕交空四海惟餘我

奄到重泉更付書

君作太夫人書畢目已瞑復蘇乃更作書貽子于西安

庾亮報

函疑可達臺卿服友感難除傷心昨歲青門道執手危

言未盡紓

君不善攝生去歲別西安余又苦規之君雖領之而不能從也

五月十五夜宿蒲州城外因遊普救寺作

人來桃林塞月出普救寺蓬蒿埋山門碑斷覓餘字急

行百里馬汗流却向寺東謀少休寺僧開門揖客人一
塔面坡高百級閱尋石級上五層遠見太華高峯稜滿
州城郭亦殷阜夾縣石闕分衢燈山僧煮茗來邀客月
臺坐僧言家本縣北居五十年從寺中過恒逢征騎急
叩扉不詣古殿尋廂西山僧語客客微哂更引長廊看
朱粉

臨晉道中

驛騎抵二更衣上殘月出風沙浩茫茫峻坂復百折奔
馳念亡友詎憚炎暑日沉疴逮三載慈母旨甘缺臨終
馳素札瞻嶺願歸骨置茲達士懷慰彼遙念切吾徒重
然諾未可異存沒殘夜聞馬嘶荒塗險相失

道中望中條山作

昨歲蓮峯宿看山百里遙茲來因哭友不及訪中條雲
色分秦晉河聲捲暮朝急行凡幾日猶未及巖腰

風陵渡歌爲巡檢李璣作

風陵渡頭行客喜昨來長官聞姓李長官白哲尚少年
法嚴不受津吏錢津船月支得歸橐十舸戕戕敢橫索
官騎白馬立岸頭行者色喜津吏愁津頭鯉魚長數尺
長官市魚時宴客漁人得鯉爭進衙發錢還比市上加
我聞客言爲動色長官清貧我亦識君不見津船東西
暴客多客行結隊乃敢過官好安得常監河

六月初六日襄陽舟中望峴山作

昔年羊太傅勝地日相還賓客黃初後勳名太始間我
來登廣武無淚灑茲山欲試登臨興征車偶未閒

初七日泊舟候風

沙上月初白微茫漢水東三更峴山色斜影舵樓中村
鼓偏迷曙神鴉已警風無人共杯醞復此憶羊公
舟中曉起

一程復一程山縣枕邊過平明讀道書飛雨書上墮青
松障天赤日東魚網尙挂星瓊瓏舟人闕窗曉氣紅却
入萬頃荷花風

六月十五夜宿漢川板湖口夜起視月並送舟子回家
夜闌闢戶光明徹不覺月圓疑曉日靈湖萬頃影接天

巨魚枕波效客眠平波無聲岸風快柳絲牽船出天外
船行十里人不知輕扇未舉生涼颼隨波微茫歷湖口
朝寒初生水楊柳舟人夢醒船抵村却喜到家還扣門
將至漢口江水大漲舟行值風甚險

大波如帆飛高岸徑三尺小波如荷卷葉葉悉翻白大
波森然湖氣黑小波粼粼滿舟濕帆檣東西若隼搖人
影高下生林梢村人三日懸釜爨危視屋脊來長篙此
心安得百念平眼底擾擾心猶驚君不見風聲水聲鷺
飛起隻影掠波還數口

鸚鵡洲

七子才著建安三士奇不獲全才人易與忘者奇陳琳

不誅非偶遺雄謀生殺人頃刻斷皆果平原書生無一
可世能殺之不必我狂生不殺示有容持刀乃早及孔
融宏農少年亦融伍峻網肯寬楊德祖咄哉禍正平奇
足與命讎生作鸚鵡賦死葬鸚鵡洲君不見大兒與小
兒一死尙等倫君逢傖父亦殺身惜哉已辱薦禍人

二十一日自漢陽渡江登黃鶴樓

初日波如掌平飄一葉東攜童自登閣與鶴共臨風曉
氣三層白厘聲八面通延回望江國青霧點遙空

再偕友人登黃鶴樓

仙人真復好樓居樓影涵江江影虛一客正携京口酒
百錢復得武昌魚相邀話舊三層閣共展臨風尺一裾

却望洞庭西灑淚素交詩句十年餘

壁間見七友黃仲期庚寅年詩句

七夕吳上舍紹漪招同畢山長懷圖王太守嵩高暨諸

同人集漢江天都禪寺抵暮泛舟後湖至二鼓始還

幸成四律

是日雲如蓋亭亭向客舟柳邊才繫艇花裏一登樓病

鵲栖難去奇書曝欲收鈎簾待嘉客清景足淹留

復此秋堂集佳期已及年風花澹今夕河漢渺中天波

影吞簾白霞光照座鮮一舟迎一客鼓浪个如仙

坐覺良宵永秋燈替月來夜聲千樹出涼意一帆開鄰

舫乍飄笛賓筵時舉杯樓臺厭曛黑白鷺忽飛回

醉後衫裳委闥嘗入畫圖溪山留勝賞風味憶吾徒鼓

棹出潛鯉到門啼夜烏惟應良會好客主念全無
是日舍姪琰以小病不至作此柬之

行穿修竹倚疎桐到客皆憐鄉語同合坐九人浮醖白
卷簾七夕拂雲紅吾家法護工秋思小病維摩怯晚風
穩待明朝洗車雨清涼應復鬥詩筒

江漢書院喜晤秦表兄朝鈺賦贈一首秦前官楚雄太
守

官清萬里乏歸裘轉向名區闢講堂爾汝共憐生計切
江山如許著書忙時以所著消寒詩話等見示宵深已入高堂夢話
舊都稱大父行忍把外家遺事譜十年羣從半淪亡
漢江舟中謁座師杜凝臺先生時奉使自湖南回復奉

諭旨至武昌獄率上二律

晴川閣外挹江亭落落天空見使星
迓吏乍傳津鼓急
闌風先值畫橈停帆圍鸚鵡洲
前綠旆曳胭脂嶺上青
明日鯁生須謁事高情還啟碧莎廳

三度清江使節馳

公庚子年曾奉命至四川

獄實心尤荷

九重知如山案理淮南獄
匝月襟題漢上詩
官燭幾條當座出新涼
一葉墮波遲受恩
祇覺彭宣最此日
辭公有所思

黃鵠磯題仙人祠

黃鵠磯似黃鵠仙人遊
空鵠飛落鵠壽計以百
仙壽計以千
我不識黃鵠安能信
神仙何人云費禕亦如

鵲言翟子威君不見兩黃鵠言猶莫據何況樓成鵲先

去

大別山訪魯肅祠

大別及小別兩山波中央小別戴土頂以方大別累石
形何長楚水窈綠楚天青蒼江流合漢流夾此明鏡光
故妃墳前桃李香山相傳有將軍祠旁松栢荒行人前
來問桃李松栢荒涼廟將圯君不見歟存此土不可忘
曷不附祠神禹旁

七月望日觀前湖放燈二鼓復至梅子山懋臨湖亭作
山石百級湖波千層山月不復輝耀此湖上燈湖船遙
遙來叩關一湖燈光隨上山松梢竹梢露初炫時有鴉

影驚飛還開蓬高歷松嶺天青欲壓四山頂君不見人
聲既遠月亦涼松頂如蓋危亭方

崇府山飲劉氏園

山城半里卽一曲曲處山光照墻綠城欲上山猶碍麓
主人園好冠一山非有逸客門常關竹徑過雨花爛斑
爛斑花紅弄秋影主人壺觴客醕酌城上角聲吹酒醒
舟中望匡廬

終南太崑頻秦關關外中條昨偶攀獨客塗長四千里
澗句遊徧五名山到來大別秋方永看罷匡廬棹欲還
九朶白雲天際落好同瀑布澗征顏

自九江關放舟至彭澤作

曉涼吹雨出江關，薄暝彭湖第幾灣。
舒簟正來殘月影，推篷却望小孤山。
道書有味教童讀，秋水無心與鷺閒。
卧聽鄰舟集鄉語，北風猶是計程還。

彭澤卽事

四山圍一縣，泊處月昏黃。
空水足魚影，吹波生晚涼。
雨雲愁黯黯，葭菼路蒼蒼。
獨酌盈尊酒，因風酌馬當。

移舟泊小孤山

湖雨初飄江雨收，大孤遙影小孤浮。
湖風直上北邊閣，指月正生東海頭。
雲外數星連斗極，檻前九派接天流。
請看直下千餘里，不覺人愁我欲愁。

東流江舟憶唐縣尉軼華却寄二首

此唐詩

頻從使節到江干

壬辰戌戌皆隨
學使者幕主此

秋半江聲帶雨寒雙

鬢綠慚爲客改四山青憶上樓看故人作尉功名冷小

閣臨流烟水寬甚欲寄書憐道阻倚檣離思忽無端

未因善哭識唐衢肩拍洪厓廿載餘春水到橋同喚渡

綠楊垂巷共鄰居巢門尙記雙鷓鴣釣艇頻攜尺鯉魚

憐爾宦遊予久客夕陽荒徧舊茅廬

江行舟中雜憶從母姊弟四首

孤露家何處江干尺五墳但餘松滿徑無復杖迎門搜

篋衣裳故尋圖笑語溫昨杳秋漏永千里乍通魂

昔日雷津戍參軍寄妹書今逢江口月憶姊亦踟躕馬

磨生猶窘鰥田稅未除一名期弱弟何日得看舒

相依曾幾載，憔悴日支牀。眼底無兒苦，懷中有母香。老

猶儲粟米

從母早寡，惟二女生計。甚窘，尚時謀拯之。

別每誦河梁，外大歎

魏詩百餘篇，時下傷心淚，應知為壻鄉。

秋來惟憶弟，衣敝客經時。薄宦欣堪就，衰親惜未知。寄

時愛女

兄書有淚，先我鬢添絲。風雪柴門望，歸期莫更遲。

二鼓順風自花揚，鎮放舟至蕪湖作。

清江殘月影放棹，下蕪湖。衣袂出螢火，帆檣掠夜鳥。吳

歌聲乍徹，戍鼓聽疑無。一夕船頭響，兼程百里徂。

舟中望采石太白樓感賦

清江秋月圓，放棹出晴川。三更舉首別黃鶴，鶴影欲拍

空江船。蒲帆南來不可收，竿杪復拂仙人樓。壯哉東南

海氣浮碧浪影逐紅雲流仙人昔乘赤鯉魚遠勝黃鶴
腰身癯乘風飄忽千里餘半道或欲遊佳廬昔居仙人
樓洒熟輒一篇掉頭江海別五年綠鬢詎識才如仙客
遊萬里來松亦百尺長松聲如龍客鬢蒼樓好亦復侵
斜陽一詩題高樓一詩寄道士君不見偕遊少年盡客
死辛卯至癸巳與顧文子黃仲則同我欲登樓淚難止
客當塗頻遊此樓今兩君俱下世

舟中望青山因憶舊遊作

琴高谿畔路謝眺宅邊峯水綠明城上山青入鏡中魚
苗上波黑鳥喙集枝紅竹深風宛轉橋淺月玲瓏野翠
添流潤仙雲落樹濃帆回曾駐影樓靜憶聞鐘濶訝漁
梁斷危看石磴空勞勞遊乍記昔昔夢思通且復吟漁

父還因寄遠公

抵里門感賦四首

到門已作羣魚泣久客空餘陸賈衰猶憶十三年上事
典衣沽酒奉高堂

年時歸值倚柴門百徧先誇識字孫今日兒曹誦經過
不曾親聽已聲吞

姑理征衣姊勸餐送兒三月上長安如何五載音塵隔
無復牽衣但撫棺

阿應新來文筆佳彌甥學語就人裏謂汪甥應科九泉

呼姊還相告弱弟差欣得宦階姊以李弟幼失學其成立尤切

八月抵里門寄錢大令維喬二首

握別江干雲樹秋故人宰縣我狂遊曾尋舊句南山上

關昔遊遠識循聲東海頭却晤惠休勤問訊遙從小阮

溯風流宦情客況居然似羸得新涼詠暮愁

清名摠注淞江東白髮衙胥說大公君尊人鑄壺先生官蕭山知縣早

值尚書傳使節更逢仙令繼家風後門寒素餘徐邈北

海門生有孔融余為君伯兄文敏願借一編書世德臨

風三度感無窮

八月二十五日薄暮自吳門舟抵靈巖山館偕張上舍

復純等止宿次日得詩六首即寄西安節署

南去水方迥上來秋已闌平橋人語斷小市夜燈殘側

徑禽迎路閉扉鹿抱關星明瀉灘急樹暗上樓難疎窗

響叢竹石砌點幽蘭
悟徹巖棲志泠泠泉在山

空蒼千盤松紺翠百仞壁森然
西向青却此東日赤幽人旣宵起
山館候晴色直下千頃波
棱棱遠帆仄山風次黯黯松果墮
歷歷開局面軒牖梁燕訝素識容膝坐
小齋稍休試登陟

谿橋蓮葉東小閣靜回風聚此游魚影
能令水氣紅房廊檐互覆竹栢葉交通
月采依簾漫天光卷幕空蘋絲旣迢遞
石柱亦瓌瓏半日看雲坐還疑碧鑑中

重簾驚宵明室暗光乍吐披衣見殘月
水色亦映戶東南遵回廊叢竹靜堪俯
泠然岩露下絕壁恍有覩疎窗出燈火
因復禮菴土茅室無鐘魚何知非太古

楊柳三層閣芙蓉九曲廊晚花偏嬌旋秋士覺心傷寒
蛩抱根泣疎螢點節涼一花依靜檻千葉隱回塘氣候
當秋杪池塘生靜香

萬安僧袈裟塔歌

平生不啻旃檀林今日偶訪袈裟塔袈裟塔名由義士
不爲西來傳佛法宋家未造僧萬安爲僧作將皆偶然
此身所自有君父不敢浪語稱逃禪流離燈昏粥魚墮
却使滿城飛劫火轟然巨礮衝雲梯半天淋漓肉雨飛
飼鷹飼虎苦不飽何似茲僧捨身好年經七百塔尙完
赫然空門爲改觀莫謙之徐道明方外節義皆錚錚君
不見子昂不識忠孝字空寫佛經盈一筒

九月九日蔣太守熊昌招同人集息養齋雅讌卽席賦

贈

昔我同君遊雲谿草堂月雲谿明月踏百回草堂主人
飲連日十年重招邀素髮已欲飄黃花滿籬酒百瓢訪
君乃在烏衣紅杏之雙橋似聞欲息塵中鞅近有一齋
名息養淮頭潁尾官六年傾囊却喜餘酒錢酒錢雖多
酒人少坐上招邀半詩老我家于飲詩亦豪胸有太華
終南高爲君消盡百壺醪明日訪菊還東郊菊花黃菱
角香北墅泛艇東郊浮觴風聲雨聲一旬絕月影星影
三更涼君不見主人閑客亦狂中秋飲醉連重陽
遊西山自花犁坎至慧聚寺因止宿

連山東南隅金碧塞天地盤盤殊難升徑窄入一騎抵
門聞疎鐘再轉石級細樓臺從東開參差屋櫺麗頽松
蒼龍蟠修竹巨若倚憑高一遙矚妙欲出觀記山風颯
然來萬戶倏爾閉一谷白日遲桃梨聚春氣紅墻及巖
麓碧瓦山翠膩猶餘綠千盤蒼澹被割棄芒鞋輓轆轉
輿極乃一憩暝色衣上來天星出巖際

由慧聚寺上嶺行三里許抵化陽洞復持火入洞行二
里許

下盤升天門再轉人地腹先行脚示勇寄命一寸燭高
低勢如削人險恐不速鋒鋷旣嚙履偏仄忽碍目陰飈
來颼颼蠟炬光已縮何知芴昔青但訝衣袂綠高疑衆

靈居做若萬間屋，泉靈恍無底。梯迥欲出覆，呼聲引同濟。怪響集空谷，石黑捫有稜。腥疑蟄龍伏，牽衣乍前踵。引頸屢後矚，奇險不可名。靈區晒卅六，由羅喉嶺抵檀栢寺憇。

北谷天未曙，李花明一山。稍南辨晨光，驚此桃蘂丹。花香本難名，草氣郁若蘭。層田植梨棠，密林間松檀。五里及寺門，流聲已潺潺。碧瓦見佛樓，清泉出僧關。屏山忽然開，萬樹綠欲彎。山靈待遊蹤，百卉未敢殘。俯見木筆花，高低映修闌。明昌搨殘碑，舍利建石壇。寥寥百千年，倏若指一彈。靡境不遠搜，僧雛導躋攀。興倦高閣眠，赤日門外閒。

由檀栢寺後二里抵龍潭憩八角亭作

溯泉來空山百折泉不見亭午微北風千林落花片孤
循危磴上花瓣驚拂面半里憩石樓疎鐘禮神殿危崖
急奔溜直下有如箭石墮儼作梁松頽合成澗山僧導
東轉傑閣忽高建百卉合一山人稀閣鶯燕清泉鑑毛
髮坐久復生戀涼燠旣倏殊風光亦千變谿茶向樵乞
山果有猿薦暝坐不覺遲歸塗月如綫

戒壇古松歌

沿山西行日光斷一松如龍黑天半松根一龍榦九龍
欲攫臺殿凌虛空虬枝北出風力駛五里亭邊落松子
蒼然一頂常宿雲巢雀不敢呼其羣枝蟠入石石不知

石窾常見生靈芝年深力厚觸山破根斷猶穿北山過

客行破曉卽看松高下樓閣清光中南枝迎陽日氣濃

北枝臘雪猶未融倦時眠松根醒時看松色山僧愛松

亦如客隔歲松花餉人食一株旁倚態亦奇偃蓋靜覺

春陰移復有一株雲氣重一風微吹餘俱動詩僧名爲活動松

其餘八九縱復橫傾耳搃作龍吟聲初唐武德至今遠

山古寺古濤聲平詩創于武德五年我留三宿非愛山松下百

匝偏忘還君不見看松如我亦無兩昔海終南各千丈

余歷遊諸名山所見松樵黃山及終南山樓觀所有嚴句

龍潭憇八角亭亭外櫻桃百餘株花色紅白可愛桃杏

亦盛開因而有作

我行人谷正溯風一山桃花飛向東山深谷轉風不到
尚有杏蘂垂深紅孤亭八角當山半百樹櫻桃向春炫
此花顏色異常花紅影壁波波影綉傍花前行轉坡陀
花氣撲處春禽多墻隅花積厚寸許照面忽覺朱顏酡
四圍青山落白雲高下南北花光薰亭坳坐久不知返
袖底香氣來氤氳惜花平生不折花祇向花下矜春華
山僧定後始招客石上分餉新煎茶如眉新月已上牆
花葉尙帶斜陽黃歸塗似聽春禽語明日白雲將作雨
獲鹿縣早行

出門欲看山山險落額上盤盤車輪摧巨石橫一丈疎
林縱森峭遠與峯頂抗怪禽啼檐端聞聲不知向冥濛

氣成雨谷暗久不亮缺月墮半規昏星露三兩梢梢寺
鐘動塔頂儼可望居然升天關至此斷心匠凌空勢如
攫入穴險欲葬千盤隨高低百態具偃仰颺驚擊車幔
露腳衣上漾破曉望始驚黑雲蒙一嶂

井陘關題成安君祠壁

輔楚滅輔漢興耳乎曾客魏信陵項不臣劉不屈餘乎
能死趙王歇存忘不易心所安亦如留侯志存韓不然
富貴易易耳稍一屈節王無難鬚眉英英面白皙趙邦
立祠名報德世人漫說李左車不從其計原非愚君不
見英雄一誤殊堪死勿頸交先有張耳

由固關營至井陘縣山行

人傳井陘奇山石立若榦直下類削成泉聲出淩亂斜
行人深谷人馬祇見半崖空響易徹隔嶺遞相喚松櫟
忽萬重天青四垂幔偏于危絕處觸目得奇觀石罅花
亂飛禽驚人雲竄坡陀更前折性命呼吸判危維此天
險卓絕念神算居人耕土春時得鋒鏃斷成安以爲趙
淮陰以爲漢太息陵谷遷殘陽落高岸

井陘縣

我行縣東及縣西百里石田麻麥稀青山缺處見城郭
楊柳合抱山禽肥前宵一雨春泉足水淺石深傷馬腹
停車問路客始愁却到斜陽盡頭宿

核桃原

持鞭笑指官塗左濃綠一山將作果鳥聲繚蠻枝上墮
果熟垂枝園已鎖深山五月果作糧客來入錢許飽嘗
高枝纍纍摠盈握行人食殘鳥還啄

石門汎

遠山青近山綠不斷山光與天複異花闌圍如覆屋南
岡北岡果齊熟危塗一綫盤兩輪忽然青天開石門行
人失喜車軸折停馬看山還半日

塞魚城

唐受州故城址尚在今作汎

一綫月開天關車聲馬聲去不還關頭老兵持火照十
里回皇谷猶耀我乘殘月來塞魚馬走半日偏嫌徐君
不見荒臺合有神靈守城廢花開大如斗

介休縣署中望介山有感作

我思古聖賢憂來不能坐庸人均遭逢抱志獨軼軻包
胥旣逃賞夷叔共高卧茲山號旌善云以志君過猶封
綿上田終勝翳桑餓

禁烟緣子推競渡弔繫屈秦昭專上祀陶潛名九日不
知千載上何竟少佳節古風殊堪欽吾懷若饑渴四序
任所遭何心記年月

晚宿水頭鎮

水郭帶山城喬林倚修竹人家總臨水山翠亦浮屋遙
聞城西鐘知從水南宿萋萋三月暮芳草綠成帷鄰歌
度崇垣聞聲惜遺俗懷人屢開篋推枕起燒燭却上嶺

千盤靜看汾一曲

曉度韓侯嶺

嶺有淮陰侯祠俗傳侯墓在此

持燈行三更十里雲氣濕一穴落半天乘車穴中入土
門旣回互石罅復百級樵蹤升如猿貼壁立若燕初疑
徑深阻再轉亦已及足劈樹杪雲參差見原隰餓鳥及
疲馬破曉山頂集荒荒開幽琴忽忽墮雨泣征衣慙短
後下馬致長揖西瞻秦塞迥北望代雲立雷雨交一時
披蒿讀碑急

國士橋

智宗已滅誰報仇趙人乃漆智伯頭漆頭何爲作飲器
臣亦漆身甘作厲漆能變體炭變音所不能變惟其心

咄哉劍術非不精
離橋數尺馬已驚
嗟嗟原過生不若

豫讓死中都祠荒
澤水泚千載石橋
名國士原過禰在
北齊中都

縣故城西一里又史記原
過見卷太山神于王澤

曉發洪洞由臨汾
襄陵至太平縣宿

汾水四州綠姑山
三縣青前晨發介
州算擬宿太平道
經伊耆鄉懷古跡
久停風俗固大殊
茅茨而土型炎雲
起堯祠峩峩昔神
京樵蹤絕千年松
栢頂上平糶衣致
心虔下馬五里行
高低多原田一徑
入窈冥引領夕亦
勞停車飯初更縣
小無百家十室九
已扃深黃草頭花

新月荒半城

出運城二里抵野
狐泉復上亭子望
鹽池作

野狐拜月昔有亭野狐得仙泉亦靈泉靈終覺在山好
百折不肯逾禪扃亭邊老梅乍垂實實密枝低鹽上結
車箱連日馱火雲愛看清涼萬堆雪

歌薰亭

山光台處樓臺陰直下百級窮幽尋青天白雲不改色
只有山溜無鳴琴琴聲宜民俗以康坐使風俗同軒皇
君不見石琴七尺猶在牀想見當日垂衣裳

運城與沈運使業富話舊即席賦呈二首

萍蓬蹤跡尚天涯十五年前客郡齋柳歲沈君官太

至此固應憐范叔見公猶憶在秦淮柳申夏于江會從

官閣聯吟久及與郎君上計偕柳剛察柳秋登賢書

舉兩世知交幾回別又逢投轄暢離懷

炎天騎馬謁公門剪燭頻招旅客鬼謂黃君景仁去一
其客死于此

析山光憐久別十年賓從歎誰存辛卯壬辰間與徐同
客太平署中者餘賈

田祖顧九苞及黃君今已先後下世壁中尚欠分題句衣上空餘舊酒痕

元伯縱亡留母在白頭朝夕感深恩謂黃太孺人

寄丁二履端二首並柬崔二景儼

人海叢中兩少年憶聯昆季鎮隨肩詩慙敬禮新投句

逆有親贈書答宗之遠寄牋淵得書二研北故應留絕

業城南都復少閑田心期白首真無幾短趙狂孫共此

賢

何因躍馬向西行蹤跡偏憐去住輕幾日羽書馳隴阪

三旬腹疾卧咸京高齋說劍山泉湧小閣看星夜漏平
疎賤未嫌關國計靜燒紅燭佐籌兵

言舍人朝標自西安携唐開成十二經石刻回將貯于
先賢言子祠屬作詩紀事並以志別

舍人南歸時百碑載一軸爲言先賢祠遠在尙湖曲名
宗富羣從薪楚秀相錯童而受諸經頗誤里師讀安其
所聞見竟以登簡牘紛然譌偏旁令甲屢不錄午卯甲

君理中及吾鄉以書題紙軸字畢字錯誤舍人憂之深
不錄者甚衆其實皆沿坊本之失未暇耳

思一變習俗茲經唐石刻元度所詳覆雖非禮堂定合
者十已六牛要束之歸莫飽蠹魚腹祠旁爲相地列以
十間屋旬時登拜暇把玩亦可熟尤期鈔萬本急欲正

里塾君家諸小阮麗句翬流服儻欲窮六經應知讓臣
叔

贈程上舍敦卯題其抱經圖卷子

我初識君時君方作文我賦詩

校巴歲隨朱竹均先生
士歙縣識君子爲人

申八年相逢在京卯君耽六經我注史少年已過學亦

深君窮古文我古音

時君校說文解字及釋名等
書而余著漢魏音亦適成

此圖

初作我能說兀兀圖君抱經日畫師詎識君少年不貌

昔日風姿妍堂堂歲月三十載貌更蒼于作圖歲拋殘

心力祇兩端枕書甫了還據鞍燕齊馬首歷欲盡秦漢

蠹簡窺將完宵半語今昔我慘君不權作詩纔畢示孫

子

時與季仇
客節署

白日窗外升三竿

甲辰四月自都門抵西安聞使節有太白禱雨之行追
及于盤屋遂同尋仙遊潭止宿時四月望日也莊大
尹斫方宰此縣公子達吉因繪元池訪古圖索詩歸
塗于馬上得一千字卽寄大尹并公子

我遊西山來欲與南山抗太行升盤盤赤日貼背上醒
夢二十程忽已過千嶂才經蒲東門大輩儼相向驚雷
隔河至電影衣上颺手劈雷雨開徑渡百尺浪河西土
囊口城闕標閭閻跨鞍窮日力如棹不一撈山形盡東
轉似復有所讓忽然青天開隄落千里障滃滃雲霧塞
恍若渤海漲兼程迫使節勒馬時一放迷塗入深谷屢
被野人誑一日一夜馳旌節乃在望持鞭才半揖已見

馬頭傍代拂三斗塵驚喜問無恙材官及步騎各各腰
有張鳴鉦屏喧雜旗幟悉肩擱騶從飭皆停征馬各繫
柳一谷驪駘驛灘左色混滾頗慚碧潭水爲我洗泱泱
雲山招客久不暇迹近況翩然攜狂孫蹀躞踏此碎石回
鄙人十年來特辦屨數緇東西及高下興至靡不徃王
生瀾馬疲甚壓坐體偏壯煩遲不能到殊覺致深悵再
折人一山已隔塵埃堦摩天青松枝當午日不煬人家
隔流水列屋摠如舫白鷺羽若霜軒窗久馴養桑陰翳
南牖列箔飼蠶蠶經年住城市奇氣久抑喪茲來豁懷
抱各訝神色王袞裝穿樹出香炷集半鼻樓鐘不須擊
風至自播盪寧惟童叟樸雞犬亦殊狀鳳臺暨龍堆案

籍覓式樣穆滿祠已古南北高有閣八駿繪四隅逸氣
壁上旺稍南讀書臺淺步石碾硃我諳輿地志石室此
蓋妄搜奇涉危構歷屋寡閃闌高卧一小亭四壁天若
帳崖南防獸突車軸寒數兩時聞控弦聲一矢忽集吭
上人言山有虎時撥營
兵數十屯谷口備之班狸窺無跡祇見野鷹掠是時
將仲夏春色尙駘宕紅白滿路花庶草亦蕃蕩渥夷置
行幄圍坐一隅厥微聞暮鐘動極視益軒曠南寺北寺
間水谷深且漾橋危支獨木空處絕依傍森森高浮屠
積雨青綠荒蛇行出危巘石缺補以甕山神避何處深
谷走跟跟恨不揖之出導我歷蒼莽癯王瑜逃官筵私
復買却釀拉客入蘿徑痛飲腹屢脹居然遊興發無暇

事揖攘選徒饒十輩一一均可仗入險戒不譁足恐致
跌踴公然遵部勒私詔善將將猶驚賢令尹僻處皆供
張山厨清脆備僦吏具蔬醬羣餐毋過飽云欲歷岷嶓
四顧白一山屈指月正望北斗垂谷口大欲奪瓮益溪
奔石復滑窄徑樵所創頻手奇絕處欲以性命償松根
劃山破石力不敢擋石谷蟲亂鳴幽深忽如壙濡頭松
栢露寒意欲挾續塗危值犇獸訝極以臂攬竟復貼耳
過似不敢猥狎崖南既無路西去若有嚮草深愁毒虺
鼓勇孰先侶狂孫首頻肯非是不獲暢梨桃及乾糗絡
續有童餉逼仄路若繩月暗天忽亮折松插巖扃歸路
備遺忘泠泠天風吹遠遞樵子唱升中眺天闕直視無

所妨纍纍星壓帽高絕不獲仰山僧促歸頻改道走橫
嶂荒祠偶長揖非欲冀神貺力盡捉短筇如瞽者有相
洶洶黑潭水直向頂上漾極知終宵饑急語致饑饉百
壺澆茗飲未若酒無量暝卧玉女房殘月落衣笮夢中
諸仙人各各手與亢稍眠復驚起傳語東急裴亭午集
樓觀兼訪化人葬元哉五千言似欲一彭殤終焉委恒
幹致我久惻愴阿戎忽狂呼鋪紙窮意匠作記累百言
三復寄微尙君才當避舍我尙負輩行索詩故不應先
乞飲醇醢我詩本能奇近避俗人謗匆匆據鞍就別馬
走踉蹌紫閣白閣雲曹騰醉中訪

This image shows a scan of a page from a book. The page is mostly blank, with several vertical lines running down its length, likely representing the binding or the edges of the text columns. On the right side, there is a small, dark rectangular label with some illegible characters. The overall appearance is that of a scanned document page.



卷施閣詩卷第七

陽湖洪亮吉著

緱山少室集 乙巳至戊申

寒食自潼關至閩鄉道中書懷二首



塵欲浮冠浪拍肩未成寒食賣餠天兼程驛路猶飛雪

是日大風隔岸山村乍禁烟舊友別來逾二稔聽風

並雨雹幾名花看盡入中年匆匆節序渾難遣柳葉牽人到酒

邊

一種人間未了愁杏花斜月屋西頭都無芳草能迷徑

只有閒雲易上樓金釧影移籠畫軸玉簫聲徹動簾鉤

殘宵舊夢何時醒門外黃河拍岸流

出關日先東畢侍郎

花信長堤草覆汀上坡楊柳接天青
半春移節來關外
一路傳書向驛亭
管下名山皆有嶽
坐中奇士盡談經
報公欲著河防畧
燭跋更殘手未停

清明後一日懋靈寶東二十里風雪寺作

馬上游絲拂面過
匆匆寒食奈愁何
鶯花已逐華年去
風雪偏于岐路多
石鼎水清勞吏淪
壁苔碑暗費親摩
重來綠髮蕭疎甚
入定枯僧鬢亦皤

緱山道中夢遊仙詩

嬾跨茅籠上玉京
新涼踏月海中行
回頭碣石都無影
移得黃河近洛城

真誥親繙太古前容成展上本齊肩吹笙歲月三千載
子晉還稱後輩仙

三度人間謫乍還玉虛容易綴仙班淮南雞犬偏無劫
穩住紅雲碧落間

來往閒雲不定方茸遊西海曉扶桑玉龍行雨都無暇
驅作羣仙代步忙

八駿前頭一宿翔步虛聲引玉鏗鏘不誇帝繫誇仙繫
幾度瑤池侍穆王

上界仙人住杳冥閒來紫府鬥心靈青天大似彈碁局
空裏時聞有落星

裁雲片片作窗紗銀漢西頭織女家天上晝閒無個事

隨風時唾碧桃花

自檢名山結靜緣藥爐丹竈火陰然忽然萬里紅雲破
流下仙人濯足泉

太室峯連少室高黃河空裏影迢迢緱山幾尺神仙地
引得羣神日夕朝

蕭史吹簫子晉笙半空鸞雀鳳凰聲神仙一例都年少
白髮無從住玉京

天都逐便訪浮邱更向空同石室遊雀背乍涼還乍暖
不知人世幾春秋

闕童五百執香爐玉節新從紫府除碑石拂雲都嬾看
神仙不習漢唐書

紫府三層碧玉臺
曉雲濃處百花開
蒼龍白虎司天闕
却放騎驢道士來

妙義同參帝釋居
龍華會上集簪裾
忽然海水浮天去
無數星官盡跨魚

秋半天中看月華
廣寒宮闕泛浮槎
玲瓏玉樹交無影
空裏聞香不見花

天上仍攜古錦囊
依然覓句擅詞場
都緣長爪仙人少
勅取麻姑降李郎

膠舟南邁世人憐
傳說昭王作水仙
畢竟上蒼忠厚報
一家眷屬揔昇天

采樵三日入烟深
絕巖嶺分明屐齒橫
再轉一山雲氣隔

松花如雨落琴聲

遊戲東池采碧蓮被風吹得髻斜偏倦來只踏飛鴉影
却訝羅裙黑半邊

詔書新降玉霄宮南下關門啟數重勅取海魚三百尾
放來天漢待成龍

借得仙雲一片平展來如席睡難醒多因夢重雲頭落
閣在松風盡處亭

金闕南頭奏玉牋薦將師曠更司天神光豁處雙眸炯
曾見仙人總角年

天帝分明築外臺琪花瑤草勅齊栽裴家玉杵溫家鏡
擊取神仙眷屬來

洗馬清談庶子狂
勅來仙案與司香
才名畢竟人天重
詔册仍徵白侍郎

共守東皇藥竈邊
傳言玉女試金仙
回眸不語拈花笑
一夕都生離恨天

駕鳳閑來碧海濤
霜柑偷食近千林
都因橘債償難滿
強得天公爲雨金

玉妃兩兩鬥新粧
騎雀公然下界翔
却灑黑塵迷世眼
不教親切見衫裳

童顏如玉髮齊肩
自守丹爐五百年
騎得石牛偷下世
一生不願做頑仙

怪得雙成玉手溫
搏桑三日弄朝暉
鯨魚死後滄溟漲

添得天南綠一痕

嶽瀆羣神賀正回玉皇高蹠坐層臺虛窗亦養紅鸚鵡
慣述人間瑣事來

無多識字便成仙香篆惟留易一編詔取洛陽王輔嗣
茅亭重與論先天

上方光景若飛烟臺殿空明徹四邊三十一天無月看
月輪只照兩重天

憫旱

鎮日帷車坐偏愁雲氣晴客行殊望雨敢說爲蒼生
兩歲多憂旱山田赤地多到秋霖雨集瘠土更防河
百車汲井華綆斷水亦竭辛苦野人言殘冬已無食

三月黃花少蓬蒿積菜園殘燈山館夜殊復愧傳餐
嚴侍讀長明屬賦歸求草堂十二詠

思話軒

我愛思話軒默坐久無侶香草一尺深秋蟲自相語

冬讀書室

寂然冬讀書一夕抵一歲若及三十年便足一萬載

知白齋

坐臥知白齋萬卷閱金石墨氣升作雲寥寥室生白

過雲室

一室名過雲籤軸紛滿架掩卷看青天雲生亦如畫

蒲盧學舍

學舍名蒲盧萬事取相類只恐劉真長當今本無輩

知魚檻

濠梁靜觀久白頭能知魚魚相忘江湖豈復知有餘

賓竹廊

長廊列筍當此君無不可他日或生孫大父行屬我

目聯臺

言登目聯臺四望各百里身世忽若浮大江流足底

恭塢

我尋茶塢來茶味如在口倘欲邀狂生壚旁合呼酒

兼山

拳石有山名石勢殊卓犖如許山不看出門遊五嶽

白兔泉

泠泠白兔泉石闌高一尺倘值梁王賓應繙鬼園冊

小香林

寒深香意遲夢破花枝小無數雀飛來江南春正曉

孫大自句容來貽我二石刻書甚各賦一詩

吳衡陽太守葛君碑

君歸止三月我夢已百回君來打門夢初破破夢示我
孫吳碑我聞黃龍年赤烏日一縣神仙都姓葛麤沙大
石人弃之取以作碑奇字突鴻臚冷卿倘哲昆南海傲
吏稱文孫羅浮草上罷官急遠遜衡陽政聲立試問鄴
湖酒一甌何如句漏砂千粒君不見葛君碑在縣西縣

南英英祀達奚縣南有達奚將軍廟莫能得其本末將軍夜半過太守賀

爾石傳名不朽

梁天監十五年井銘

祇園近小池一雨浸深井

井在句容崇明寺側余乙未年客句容與孫人等時遊焉

我看紅荷花時餐井華冷井闌危坐無慮日詎識足邊

奇字出孫郎為剔百年苔楷法稜稜三十一蕭家半壁

江山麗塔高參天井入地

寺有塔甚古相傳六朝時建清和月後天

驕陽千乘萬騎來皇皇淨名釋後兼好道去訪宰相華

陽岡此時淮堰成逾月

梁書天監十五年四月淮堰成萬井森森植楷

骨仁心詎惜六州民却憫居人道旁渴茅山道士鳩工

徒作井十五逾臺符一亭覆一井一井深百尺行人如

願飲甘泉宗廟反憐非血食尋源知味不可忘欲蓋石
屋名蕭梁興亡一瞬中都付塔鈴語更喚井底龍亭前
作飛雨龍言守石已千年奇石旣顯龍升天

胡民部文銓蔣公子光世招飲相國寺

已拚泥飲度蕭辰紅樹前頭忽覺春偶語乍來窺檻鵲
高枝偏隱上樓人相看舊雨都如夢更展屏風已隔塵
幾曲艷歌歸去晚碧流離瓦縱屋辰

籠街紅燭照歸鞭書記平安有報牋天放薄寒醒宿酒
人傳太白是真仙隔坊宛轉猶聞曲上馬槽騰祇欲眠
明日戟轅傳勝事哦詩聲徹曉鐘前

贈陸民部鐘師送入都

去秋同侍鹿鳴筵二百人中最少年通籍早司金穀重
趨庭還羨采衣鮮機雲洛下東西屋草杜城南尺五天
今日送君春正好青門遙望紫絲鞭

聞謝大令聘由固始擢守鄭州却寄

太傅園亭我下帷早年蹤跡鎮追隨基爭別墅心尤競

詩學春坊格未卑

王庶子大雀
為石房師

製錦乍來遺愛里栽棠

留伴叔敖磻同官尚有吹笙侶留滯天南報最遲

續

自密縣至登封謁嵩高山留山下三日徧遊嵩陽書院

及少林寺回途訪三石闕

巾車及鄭州風黑已三日行經大隗山谷險忽距轍大

青被原野氣候亦殊別十里輒一亭穿雲到新密山光
時破碎風捲出林栗一谷石若羊高下齒馬膝地肥糞
翠暖村叟袂衣出馬尾別大驪馬首揖太室洗眼洎水
濱看山庶真切

四面各萬里茲山天當中言尋古圖書名號有獨崇足
踏河洛流背與三塗通赤日照上方正如心在胸誰云
無神仙軒昊已築宮天帝湯沐饒嵩陽與登封自非雨
露殊何以歲屢豐是冬大年不見長松枝亦翳天門風

登封壇處南外方祠在北惟留少室峯割作化人宅

林杪

寺在峯下祠前一株柏屋外太古石言從天地始便已挺孤

直軒轅雨七書堯代雪三尺倘欲與細論長風閃林黑

太室少室闕開母季度銘茲文在世間一字一列星我
來遊嵩高兼謁縣吏庭覓得數榻工南北政暫停如猥
升松梢先劍首蘇青聞聲不見人墨汁樹杪零三日始
畢工為文謝山靈字既徑寸奇文亦比六經牛車馱百
張回鋪草元亭

自少林寺攜僧欲登少室峯以積雪不得上還憩子晉

峯待月

山空無定影雲白亦疑花坐待輶轅月聊烹塢院茶曾
聞餌雲母誰解贈丹砂五岳此遊四還家鬢未華

余曾謁真

定恒山及六安霍山壬寅
秋復陟太華實此而四

送王大令復之官臨漳兼寄楊州收芳燦伏羌徐州倅

書受太康

西關西去川原古下第六句行役苦

余以甲辰報罷後入關始與君訂交

是時君爲短主簿夷門東來景物澄河浪三月方飛騰
是時人呼龔縣丞君才作賦尤可傳景龍才人王子安
競爽遠有楊盈川卽論詩筆亦擅場鄴下首溯登樓王
作配乃有徐偉長梁園賓客嘉書記才子爲官亦游戲
却被人呼作仙吏君不見神仙吏不可忘楊伏羌徐太

康王臨漳

戲詠玫瑰花

芍藥花嫌小荼蘼香較濃連宵枕函裏開得一枝紅

偶得五百字酬景方伯安枉贈之作

五年客京師五年客西秦十年亦何爲頗與載籍親昨

來遊梁園編校事亦殷雖依尚書居一面或數旬貪讀

終卷書久立門外賓盤盤齋西頭乃與公比鄰君前官按察時

高齋與節樓比識面雖未嘗吟聲日相聞前奉一卷詩未讀已

束紳開帙贈友篇古意何溫醇我雖未面公已晤公心

神豈惟識公賢公友亦絕倫方今富羣才作者日以新

誇多而鬥奇如鳥爭鳴春若論性情詩

當代無十人昨來喜爾篇憂國何諄諄民之饑渴懷乃

若在一身

聖人垂衣裳周覽靡不臻惟茲大河南民俗庶可淳疇

咨雨暘區責此司牧臣溫溫今尚書百族依其仁抑聞

爲治方寬猛得並伸推誠固宜先條教慮勿違自非東
吏嚴易表于物勤此方當河衝水旱又已頻調劑幸垂
思蘇此十郡民明明哲人言芻蕘亦諮詢吾儒道無方
詎敢分域畛值昨憂旱災露坐每達晨雖無牧民責憫
此俗痛呻又聞垂空言不若實意存元公生中唐疲俗
善撫巡春陵詩一章字複語句陳不妄作一言言言盡
真純重之如典謨敢並詞客論期公亦如斯古治藉以
振立言非徒然六籍乃本根公行擁麾幢我亦邦國珍
各望致遠謨貴在質有文廿年客諸侯利弊粗得分前
蒙相公知謂大學
英文肅公謂可軼輩羣相公居東華于公世
婚姻我行讀公詩宗法倘可循公才及前修況乃性行

真感激贈一篇交誼賴以敦行當計吏偕千里馳短輪
方其未屆塗先欲一掃門傾心于所知拂拭衣上塵公
其佇清聽含意庶畢申

戊申社日送友人至河北

去年社日風鼓浪渡河北今年風更峭掩卷送行客梁
園作客無可誇春半欲過無春花昨升射圃望原野青
草不見餘黃沙狂來濁酒誰能捨更逐兒童趨里社丈
夫志業亦區區割肉聊同宰天下

杏花四絕同方五正澍作

倚牆臨水只疑仙艷絕東風二月天要與春人鬥標格
有花枝處有鞦韆

春陰薄薄霧濛濛
兔在江南細雨中
千朵冷光看不定
辛夷花北柳枝東

春當好處鎮無聊
自向簾前理玉簫
手把一樽歌一曲
紅顏祝過百花朝

十年騎馬曲江頭
拂袖籠肩憶俊遊
畢竟植根高處好
占他天外小紅樓

開封寒食懷里中
勝遊並記壬寅癸卯
看花韋曲之勝
漫賦二十截句

賁却黃墟酒滿卮
破愁聊飲半春時
東風吹得沙成海
不見江南雨一絲

時旱甚

沙堤高比鐵浮屠
不信經時草未蘇
七百年來理春夢

閉窗私展上河圖

才人艷說李深之東髮能題七字詩一事至今志未得

賣花聲過晏公祠未句余童
年作也

枕溪樓閣水迢迢租舍南頭巷北條半樹桃花一雙燕

與鄰家共
之故云十年同住裏河橋

閒來時傍女牆行半里蘇蘇草欲平蝴蝶滿樓人不信

日烘花氣上春城

經旬曾未踏蒼苔杏樹花踈欲替梅紅到枕邊驚夢醒

一枝捎破紙窗閒

溯流歸去路偏賒欲到溪南被柳遮時有鷓鴣啼一兩

墨雲如夢卷千家

辛夷合玉柳垂金
襯得簾前一片陰
渾愛曙光初破處
遶闌來看百花心

短短疎籬曲曲塘
過橋十步破雲光
春衫不上梨花影
只覺月明衣袖香

一拳奇石構幽居
小極攤書向午餘
何事鏡奩光不定
紫藤花影罩紅魚

醉醒渾未識天涯
古寺南頭一徑斜
似有塔鈴傳細語
菜花黃徧那人家

兩年頻識曲江池
紅杏尙書是本師
知要傳公舊衣鉢
碧紗籠徧紀遊詩

樂遊西去幾長亭
杏樹交紅柳接青
却碍白雲無路上

南山屏是百花屏

豹林谷口亂山交
三兩幽禽挂樹梢
與我一般無宿處
木瓜花覆舊時巢

半日招提問路行
欲歸已有野僧迎
一峯才轉一峯出
北斗向人衣上明

皇子陂前一徑通
藍輿三宿水聲中
小樓東面不曾掩
夜半月來花頂紅

傷春筵上憶王郎
容我朝眠錦瑟傍
榆莢盡飄荷樣小
更無錢與買年光

折柳傾觴日數回
班驩欲去更徘徊
送人一片南山月
穿到霸橋東岸來

花時頻入少年場兩兩遊蜂逐隊忙
悟後始知春意淡
沿溪都種白丁香

被塵封處客難行
破曉愁聽粥鼓鳴
輕燕不來人跡少
客宿誰與證清明

寄錢三惟喬鄞縣

昨聞急使到河干
珍重臨期語百端
念友心情成疾疾
著書蹤跡尚平安
閒中閱世誰先覺
夢裏聞君欲去官
繞宅太湖三萬頃
幾時同我把漁竿

張憶孃簪花圖

花紅無百日顏紅無百年
只有茲圖中花與人俱妍
當時一笑春風閣頭上好花
終不落可知花福亦修來長

得纖纖手香握卷中小立亦百年不覺衣帶飄東邊幽
蘭無言露猶濕花意人意交相憐百年花尚香百年人
不老題詩我憶卷中人莫更錯呼張好好

題夷門餞別圖爲浚上舍廷堪送友

三千食客都無用四十斤椎乃有靈風黑滿天塵繞地
欲從何處送秦青

雖云卿自用卿法坐覺人愁令我愁目送羊車出城去
柳絲五月已驚秋

趙大懷玉寫經圖

小時一筆不得書吾母教以分行踈小時一字不能識
吾母教之先點畫識從一字至九千寫自一筆幾連篇

年華屈指心先悚書欲如山筆成家人言學術有淵源
我視庭闈若周孔自傷孤露東家子不謂君前亦如此
卅年文譽冠九州可識從親授書始白雲溪頭橫舍東
吾親若親昔過從互依膝下問奇字各舉傳記談如風
檐前風樹聲無定不待孤兒讀書竟生年不造痛亦同
六十三年月冬孟吾母及君母葉宜人壽皆六十三下世又並以十月貽親望子
以令名我免爲惡慚先靈卽論至性愧君甚泣血寫徧
千回經吳門日昨來何駛共展雙圖淚難止時余亦以寒齋永慕
圖屬君一賦長句題篇不敢寫今稱母但知兒小名耳

七夕詞倣方五體

閉門三日雨無聊聞說秋霖漲絳霄若使天孫有餘巧

柳梭應已化成橋

汲船新到綠沈瓜
早汲銅瓶薦井華
佳節莫栽閒草木
牽牛花映女郎花

商量羽葆日相過
蕭蕭長雲裊裊波
莫喚填橋舊烏鵲
好教精衛去填河

紅閨小極戶常扃
只看銀河眼轉青
忙裏却添閒意緒
拜完新月拜雙星

題仕女屏風

尋幽徑有三更霧
小病人如四月花
胡蝶影多簾影少
幾回隨夢入西家

怪來書味上春容
校得仙經意乍慵
不信驗他雙指爪

粉痕猶淺墨香濃

三年渾住宋家東一語嬌羞尚未通他日曲江亭子上
借他簪鬢一枝紅

徐孝廉嵩芙蓉湖上讀書圖

有峯三十六都接海天青爲夢魚龍聽先繙嶽瀆經鏡
取千樹綠鐙借一湖星莫厭春蔬淡時餐雨脚腥

嚴侍讀長明平生樂雨花岡二忠祠竹木之勝漫後適
權厝於此其子爲圖乞詩因賦此篇

梅花如雪開朝暎昔時翩然來叩門山僧驚起欸尊客
石上煮茗春泉溫佛樓花謝剛前度遺鬼偏來賞心處
山僧行脚尚未歸返使先生作常住梅枝垂實葉暗廊

琉璃一鏡綠到房闌干幾曲助回勢總帳瑟瑟生新涼
 萬言結習難忘却真見唵聲出樓角可知此客不尋常
 三護鳴鑾四登嶽壯志方期獨擊鷹赴書已附西飛鶴
 枉憶春風去住舟後癸卯甲辰間與君先長懸夜雨東西
 閣謂同閣道紫君不見雨花岡南坡草青前後車馬來無
 停先生高卧事亦得不見墻外勞勞亭

黃通守易訪得漢武梁祠堂石刻聖賢畫象既為亭覆
 之又繪訪碑圖索詩

高平石刻皆雲烟千載復見嘉祥阡平原武安吾不識
 得姓要在西京前大河南移川變陸削石稜稜數間屋
 不隨巨浪入滄溟中有聖賢牢置足四百餘字漢八分

句字樸棟如皇墳以之持較李剛刻四角但少龍鱗文
訪碑客至何瀟灑拓地爲碑營大廈道旁錯認魯東家
一車兩馬栖栖者

八月初九日將赴楚中童少詹鳳三邀同張學使燾崔
編修景儀趙舍人懷玉蔣上舍齊耀預至吹臺登高
歸飲寓齋卽席賦別

人生擾擾東西走快意登臨亦何有梁王城外亂雲飛
天預商量作重九翰林仙人張別筵邀客先上層臺巔
五車聯尾出東郭七騎矯首來雲邊紅沉綠暗青林表
人亦踳躄若飛鳥中臺陡接天半風吹斷語聲空際裊
歸來酒腸誰最寬詩老昨幸留餘歡謂張使一時忽得兩

短李崔趙何處可覓詩方干時約方五冥濛樓閣鐘聲

細清夜淹留賞心地遊客鄒枚讓馬卿酒徒毛薛依無

忌却憶三條樺燭人時正有青衫白鞵雨如塵名經我

愧身非佛作賦羣推腕有神少詹及舍人皆以勝遊一

夕聯吳會別後萍蹤復誰在明日朱仙鎮上眠先商黃

鶴樓頭醉時少詹亦

中秋夕自尉氏至朱曲途中玩月作

四望各無際疑行萬里沙碧天微有影初日定輸華露

采鷺棲鵲雲光發檻花此時心跡冷誰復夢思家

中秋夕三鼓作

秣露下千點砌蟲鳴百端此時羅袖影一一上闌干佳

節異鄉好清輝徹夜看延回思往事坐久不知寒

自樊城渡漢遊峴山歸謁羊杜二公祠作

我從南陽來欲飲襄陽酒秋霖三日不暫停馬足泠泠
挾波走還攜梁園客遠上樊城望昨日秋風捲地來一
條漢水浮天上襄陽城北樓正開放艇若從天際回城
樓高與柁樓對無數山綠衝帆來松楸連綿十餘里客
到寺門山忽起昔聞峴首今始登一石真堪入雲裏可
憐好景輸後來削壁點上千年苔紅闌干落一汀水白
日照舉堂中杯當時幾掬西風淡更值山公百回醉寥
落征南身後名何如眼底杯常在習家羣從噪一時我
知萑彊亦可兒滄桑陵谷幾回改何處可覓山公池白

雲茫茫一干頃曾照前賢角巾影羊公遊後渺無人秋
草荒寒沒人頂山前一亭昨復傾騎馬上負浮雲平難
追國士濡頭飲亦愧英雄髀肉生一碑橫眠一碑側石
上摩挲感今昔百世來分風日佳一編欲正春秋癖詩
左傳歸路情騰醉不辭乍醒還謁二公祠可知此客今
無輩放許高吟峴首詩

隆中諸葛忠武祠

遂有經時卧知逢漢德終地當天下險山卽宛中隆蜀
國望難極沔江流不窮蒼茫墮清淚知不爲羊公

九日雨中飲楊進士倫江漢書院齋舍卽席賦贈

堂中書百堆門外雨三尺堂裏讀書人修髯新若戟前

時別君處七客揖馬鞭歲月苦未多兩復地下眠

謂莊舍人

選宸楊司務仁基

君思武昌魚我饌終南鹿食鹿苦鹿肥還尋

渭濱竹首春寄君札八月無報書聞言楚水高魚蝦自
登厨我乘東南風鼓此接天浪帆落卽訪君疑君坐天
上讀君五年作飲我九日觴腹笥旣已富修髯有時張
轉思三十年交君及君弟君弟亦服官時君弟官在峯州判官適至
自知吾老矣無言契闊久且喜會面初兩心苟相親天
地不得疎

道中作

亂峯高映斜陽赤谷裏人行已深黑溪南新月透山來
千朶白雲遮不得東西秋水隔一村踈涉尙喜山泉盪

山村樹濕昨宵雨石屋泠泠出蠻語

黃鶴樓

黃鶴磯前黃鶴樓到來一笛欲迎秋神仙蹤跡成長往
吳楚江山此上流帆影靜排千雉堞檐形飛控兩雄州
支頤我正東南望却有雲生碧海頭

仙棗亭

纔泊金牛港口沙上山亭復傲浮槎真疑楚國萍如斗
誰識仙人棗比瓜白鷺雨餘飛急浪紅闌天半放秋花
談深我亦饒鄉思中時值聖百椀頻澆陽羨茶

月夜再登黃鶴樓憶尚書師荊州

上城已有角聲催睡黑窗櫺信手開十月魚龍先入定

三更烏鵲自飛來
巴人路向雲邊出
楚國天從溢口回
誰敞庾公樓畔月
不勝清興待銜盃

種菊

古人愛深黃
今人愛淺碧
豈惟人事殊
花亦悵今昔
晨買花至隙地
種盈尺百種盡
弃之聊存花
正色清泉日
疏灌間以數
奇石倘訪泉
明居沿流卽
彭澤

食饌

江客嗜飲江烹鮮
及羨藕無絲
傍江住常復
面山走茲來
愜心素百步
距江口江水
照讀書江船
送春酒武昌
魚旣好鄂渚
柑常有右手
留校書持螯
還左手黃鶴
樓送史上舍
善長至南昌
並寄王方伯
和

蜻蛉舟黃犢車爾不如仙人陸行有黃鶴水騎赤鯉魚
豫章城武昌郭仙人不如爾朝登武昌之飛樓夜宿豫
章之傑閣一樓旣參雲一閣復接天洲前鸚鵡喚客不
能住閣上蛺蝶飛舞開寶筵司勳詩筆王郎文我優爲
之何論君成名當世偶然爾拍手笑殺神仙羣神仙舊
侶吾能識方平牧羊今作伯有時耳傾彭蠡百斛滯手
拗匡山幾方石明月湖光一碧百花洲香四塞興酣容
我倒玉山不然爛醉從君校金石

方伯近著
金石集成

送蔣孝廉知讓歸江西

屋角新月明送君在今夕君言歸故里營家有期日一
奴一馬縛兩羸千里冰雪高巖岷黃塵飛盡綠波出却

上黃鶴同高歌

時揚進士倫主講
武昌君言當訪之

君家兄弟今無輩百

歲相知亦何愧知君念我當有時啓戶來看九江水

爲張孝廉鶴題烏巢風雪卷子

枯楊聲已悲夜烏啼不歇男兒處窮海十日九風雪朝
烏催讀書夜烏催閉門枯楊作薪爨不溫老屋還倚枯
楊根去日長來日短夜烏窺人顏色慘讀書成名何足
言不若識字依親前君不見兒行不離親烏飛不離樹
烏巢呀呀能反哺失母孤兒哭何處欲望重泉作歸路

卷施閣詩卷第八

陽湖洪亮吉著

靈巖天竺集 丙午至巳酉

跋英文肅相國所藏錢文敏詠物詩卷子後

故紙方三丈尚書五字詩九原悲宿草七客有餘思

集余風雪授經堂者七人同觀是卷粉墨傷心色詩以雲母烟雲過眼時

猶慙門下士亦辱相公知餘相公見街亦多昇數

入值同趨

梁殿偏匆匆落墨寫驗牋曾携暖翠浮嵐上步堂相公

名暖翠浮嵐忽寄閒坊冷巷邊文敏初弟維喬報一版人卻得坊市上時相國下世甫數

月小友忘年情愴惻兩家多故淚纏綿相公詩格尚書

筆當代何嘗有後賢

丙午二月十日借錢三維喬楊大夢符等元暮探梅作
停帆及山椒雨點忽破夢東風來林間春衣香氣重尋
山三折至一亭樹梢微紅雨脚青山光雨光乍零亂薄
暝花紅出天半空林黃葉時一零木葉盡脫花含馨全
湖香氣收欲盡時有孤客揚幽舫白雲不在天碧霧欲
沉水一片溟濛盪成海危瞻花路復百盤瘦影先憐幾
人在時錢等先在花光如月澹不分松翠入戶團幽芬
繞花百匝不知厭可惜下有春人墮時對砌張持千觴
揮百尊不飲已慚花下人來聞曉磬聲歸及晚鐘動春
泥深深鞋浸縫十里回途花作衙

贈崔三景侃二首兼寄哲兄景儀都下景儼劍門

客兒微子本齊肩未向衙齋識阿連今日西堂賦春草
懷人蜀道上青天難兄執筆趨蓬觀小弟裁詩壓綺筵
三處離愁一杯酒夜寒聊與對牀眠

曾訪疎梅徑石橋錢郎度曲蔣生簫

謂錢大令暨蔣上舍陳尊悶愁

歲月過三十如夢谿山似六朝五夜衾裯交燭淚一旬
衣袂未香銷穠春正好須歸去且莫風前折柳條

由淨慈寺至龍井道中作

離湖始入山一徑青裊裊土風殊清淳花比桑麻少人
家嵐氣重屋角出青草馬上人影高窺林撫窠鳥空外
山雨來方嫌出門早

龍井小憩

昨夜月沉前灣朝來白雲不閉關
欵關僧少復誰伴白鷺引客來
前山山巔一亭高百尺峯後峯前
勢相及行人天外忽舉頭一谷石
奇都欲立

冒雨尋三生石

一寺雨松梢零天半樓閣閉青冥
三生寺邊石如屋我坐剝蘚看題
名山空氣候殊難省冰柱檐前燕
巢冷春風開徧半山花尚有半山
紅樹影

薄莫至湖上小飲

行人乍離山山色已如夢回聽南
屏鐘薄暝數聲送衣單思中酒春
醪喜盈甕漁人蓄魚處引水漸成
街雙鯉

欲飛時全湖綠俱動

錢唐舟次作

芍藥開雙枕芙蓉刺裏衣不知花是繡蝴蝶上牀飛

錢唐歸舟寄錢三維喬一首

昨來揖客津亭東布帆如雪已挂風春風亭前一杯酒
送客多于道旁柳我行小別君遠官十艇接尾衝波寒
虎溪橋頭住經日塔影亭亭對波出全湖雨勢閣上來
放艇忽欲尋疎梅梅枝高寒雨聲急倒著羊裘雨中立
攜花滿船夜不眠花底裙屐皆神仙時崔夫人
亦偕往我船載
酒獨欲前更有一艇鳴么絃么絃初斷笛聲起白鷺繞
波飛不已哦詩聲細出舵樓更放健筆圖清遊時方作
聯舟推

集快哉風帆不獲取一日一夕來湖頭湖雲正好湖月
輝惜爾遠宦余仍歸五年回首別孤嶼夢度江波逐君
去君行送我一惘然何日更放梅花船君不見故人十
輩多爲吏誰爲梅花決歸計

送楊大夢符至東平書院

巷南春泥深一尺知爾欲行行不得杏花枝頭春日晴
爾今別我有遠行欲行不行奈何許隔渡先聞喚船語
莊生莊玉立北岸偏瘦影已過溪橋前趙家兄弟巷
東走拂盞垂垂道旁柳沿溪送者三四人日日痛飲酣
青春青春回首六十日與爾同舟及旬月忽然疑我欲
作仙著脚萬樹梅花邊忽然疑我欲出世百尺崖邊懸

無始看花十回月五回更向西浙看山來山花流紅照
杯酒碧月蒼茫墮湖口茲行樂事無不有十舫峩峩集
良友樂亦旣已極別亦不必嗟劉安鷄犬亦同徙羨爾
一舫携全家此時只憶城東門桃枝李枝將放春莊家
筍足酒亦溫可惜眼底皆離人時蔣大齊耀將赴選盛
二惇大人都補官赫大
懷壬亦有
西之行作詩寄癯崔兼與瘦錢說年荒花好難久居
我亦清明挂帆別

花朝日訪袁大令枚江寧卽出隨園雅集圖索題因賦
以志別

生年雖後可不慙圖中五君識者三吳門尙書年近百
臧舟亭邊亦相值沈敬
齋我讀尙書篇已識袁尹賢白

門深秋一相訪苦說詩人惟瘦蔣蔣心餘騷壇落落此

數翁若論一筆尤推公圖中少年昔驚坐陳州此日鬚

眉已如我公前罷吏學閉關却有謝傳遺東山後先居

山兩安石公不爭墩名自敵條然松竹倚北原因憶主

者名隨岡闢未確卅餘年來執牛耳不到茲

名不起不自詰茲名士林偶然落筆貌昔遊歲則乙酉時

清秋園林疎疎風屑屑已覺尙書履聲出彈琴既無絃

垂釣亦直鉤少年落紙不肯休我見識是非常流此詩

此畫誰能遠出筆都憐才蓋代南北詩人十數公如

文圖程定不文端相公錢文僅餘一老梅前

輩山中訪客當花朝擲我一卷如牛腰止留紙尾盈一

尺寒夜乞我來揮毫隴小眠齋宿小眠齋外花光紫

窗前藤花甚開讀書讀詩愁不止尙餘一客味生平掩卷來尋

尹公子圖中唯尹公子
蘭未及謀面

道中遣懷十首

月館風廊望若仙眼花濃笑髮齊肩讀書燈下匆匆見

此事分明十五年

欲歸清湍已迢迢忽覺沿溪笑語飄風裏紙燈拈不定

暗扶絲柳過紅橋

長廊轉盡欵幽房鐙穗微紅月乍黃天半忽聞金釧響

最高樓閣整衣裳

私理銀瓶汲井華個儂薄醉未回家鸚哥欲睡人還立

團扇親拈自煮茶

看星歸去已匆匆
圍圍扉怨小紅
贏得夜深談往事
一雙人立雨絲中

春波東去迳西斜
紅杏枝低戶半遮
垂淚別他雙燕子
烏衣巷口欲移家

酒溫香膩乍魂消
月來冥濛隔絳綃
早有玉人傳細語
百花生日是今朝

團團月扇放簾低
對面梳頭背面啼
故倩旁人說春夢
自來庭北剪棠梨

夕望征帆已百回
模糊明月上梯來
梨花一樹宵無影
却傍人人素袂開

往事怔忡一夢中
欲械清溪寄東風
可堪行到無人處
一樹桃花著意紅

秦二世泰山石刻止存二十九字在泰山碧霞元君宮
乾隆戊午年復燬于火榻本甚少今夏黃州作易拙
得一本寄孫大因爲賦之

昔者東海神照見泰山火惜哉篆法存竟值炎燼禍神
人嗜古理則同急雨已下元君宮碑雖不存紙本出光
焰尙燭秦封中我聞漢家重六經丞相半武夫秦人棄
詩書當國悉大儒咸陽門邊呂覽取泰山碑旁斯篆留
一摩巨石衝天上一抱遺經入黃壤爲陵爲谷倘有年
碑石漫地下遺經出人問經學既大昌籀法亦可窺人

摩一本曰觀爲豈數丞相東封碑斯言雖狂由激發日
寶斷碑臨萬札君不見欲將一字比一星二十八宿應

添伐

童上舍鉅所藏晉太康五年買地別歌

大男楊絳買地別太康五年歲在乙亥云九月廿九日

黃滕園澤北瞰湖古名今地勘不符今爲山陰十七都

明嘉靖坤山陰十七都人耕地乾坤六合甫歸一日月四時須作質

瓦尾更言如合律可憐青蓋飛前年四十三郡登降賤

當時曾不費一錢太平土價高于玉買土爲墳傍山麓

四百萬錢稱賤鬻土公當日疑有私賣地不與天公知

故列證佐詳年時前孫吳與後司馬劫後山川餘片瓦

光欲流虹手難把童君好古無一田一瓦乃直三百千

抱瓦日向高齋眠瓦文棱棱六十字不及質君真恨事

采入晉家量域志闕著陳晉疆域志道成荆中黃滕

青門送別圖為史上舍善長賦即送歸吳江

渭城西去青門東古今送客愁不同咸陽原邊馬行少

只覺客從東去好去年別青門今年客梁園梁園為客

忽不樂放眼歷歷思秦川幾年君向何方住客却

望秦川作歸路貪看削雪萬重山行到斜陽最西處東

西歷盡詩一囊也抵陸賈千金裴吳江楓落句雖好何

似變體吟伊涼讀君詩完飲君酒七尺憐君好身手塵

衣浣向海東頭飽看日上滄溟流

送邵秘校晉涵入都補官

君行不得行一尺大梁雨流潦衝夷門街泥積如許大
 梁雨足欣有秋君雖不行我夷猶廿年三度與君別被
 酒歷歷追前遊逢君乃研經逢君乃注史當時苦說兩
 少年只惜黃郎已前死仲則騎龍弄鳳戲里閭斬蛟射
 虎節不拘性情至此忽一束細校科斗牋蟲魚讀書識
 字居然異長句猶能矯奇氣大龍山下別君時千六百
 言君倘記辛卯壬辰懷與君同客安微學使幕後于壬辰寧城下相別各為詩八百字以贈馬
 三月上巳筵江水一樓詩一篇我歌白袷方詠月君著
 宮錦行朝天長安米貴居偏易蓬觀為君著書地宣南
 坊外三斗塵一客入門驚故人故人久別儀容野日倚

陳編與傾寫已看貴紙寫南都君時著水南都事倚少

築臺名爾雅十年哀樂事亦同往往相左紅塵中即君

本韓南歸訪都訪君門不值是年冬公亦遭太孺人憂及甲辰春入都訪君又于二日前奉太公諱南下不

見梁園握手亦意外濁浪飽吸餐炎風河流拍枕朝難

醒官燭燒殘夜忘永蠹魚窺客客不知雙鬢都垂二毛

影盤盤萬卷縱堆窗只覺逢君氣早降禮堂若寫羣經

定君署南江我北江江君據漢書地入海許自號南江余

亦據地理志毗陵西北在江東人海因顏其草堂口西錄北江云

黃州倅易得漢石經尚書論語拓本殘字共一百二十

七因自繪象于後索賦一篇

陳留中郎真大儒六經能以一手書一手書後萬手模

卷之四

大學門外車填衢闕堂皇皇三百尺日月入之光欲奪
 當時共喜聖籍尊可惜偏遭漢家末碑成不遣巖巖馱
 預恐識字驕龍攫惟應儒者得觀覽證以師說無差謬
 六經之文萬萬古水濡火滅均可補周篇秦已值祖龍
 漢刻晉還逢石虎緜注石虎撰大河左右地可觀掘
 土尺許皆琅玕魏安僖冢逸書出唐御史府遺碑傳殊
 欄地纏柳柳皴皴此經此本誰所拓疑古疑今日詳度八
 分縱異石室體一字已勝稽山閣語嶽嶽蓬萊閣刻
 黃君是年三十四尺壁換來殊不易賞音不啻爨下材
 寶墨尤逾枕中祕吾儒策勳亦可哈詎有麟閣兼雲臺
 研經半世貌逾古畫像且復登蓬萊虛堂六月消暑色

且借此碑讎隸釋中郎中郎不能值我見虎賁五歎息
送沈秀才思詵回浙中就試

三口檐漏聲正慮大河決沈郎馳征車乘此疎雨歇一
奴鬚蒼然一馬色驪粟亦有酒一杯迎門且言別歸裝
不憂儉萬卷深壓轍八月天地潮排空試詞筆吾鄉窮
令尹錢大令望我一書切軍門亦吾友嫌腥天上吹
感策君行倘相值定復詢消息爲言頗善飯暇卽耽著
述去去弗復違沿塗有新月

吳大令錫緯以一月抵大梁卽奉檄勸賑西平遭疾遽
卒亮吉等斂金相助至九月旅櫬僅乃得歸率賦此
首哭之

夙交君叔暨賢昆

子與君季父祖健及仲兄繼緒素相契

相識方欣萃一

門濟水南來會門酒

中夏子下第借崔君古七景儀赴

大河東去與招魂夢為蝴蝶同飄忽

一時下世已生與蜂蟬競且昏更向邗溝尋舊侶

僅兩人存如君所居枕仰講巷東西辰長予童時舊相識

孫思雍布衣潘章叔上合二十年來先後下世今存者惟君叔暨錢樹參明府二人

送汪秀才架堂歸錢唐

琴堂曉日列長筵執卷呼名始得前

陽湖予始應童子

識柳我傍上牛依砌下君騎竹馬出簾邊論文尙記三

千士時二縣應童子此事多應二十年今日送君惆悵

甚使君墳草已芊芊

喜楊大芳燦至大梁卽送入都

十年復一面萬里各在胸重來酒壚邊恨已無黃公幘
則我方強仕歷九州尚恨未極天西頭君才早宦原非
過僅得一城如斗大花門嫠面昨負恩城大如斗真思
吞升平本乏邊塞績小醜乃建君奇勲手揮稜稜萬言
檄左手更兼能殺賊城頭一矢落一人餘者不敢來爭
門飄然望君一千里耐好客日讀軍書爲君喜丈夫事
業豈偶然頗恥僅以文章傳等身著述亦何有我抱壯
心看北斗涼秋九月集大梁左蔣並在寧辭狂時轉將
壯齡精躍適此時頗復憶孫楚謂淵爛醉尙滯華陽岡
眠遲消盡雙紅燭別久話多還抵足尙書愛客知客狂

夜勅齋厨餉醞醪一旬送爾城南臺倘得殊擢君還來
君不見吾徒會合真無幾更隔十年愁老矣

乞梅詩投左二

故人齋畔樹植我小池東他日花開處如君笑口紅
疏池貯料斗構石帶莓苔預恐秋窗寂先移春樹來

卷施閣落成偶賦四首

我非一世人世味本無泊中年感孤露顧影失棲托故
巢有時歸戚戚寡歡樂妻孥中道合久對面生怍衣食
粗已完聊爲事疏鑿閒身置天地非可自菲薄臺佟忘
世事幽賞寄巖壑藉此山一房寥寥迫五嶽

晨涼始讀書午倦亦展衾昔夢旣爲昔今夢成其今夢

醒理未殊安得分戚歆昨者疏一池貯水不欲深安知
旬日閤不復成雨霖閉門晝常關石古苔氣陰積卷貯
石旁一詠兼一唸掩卷忽憮然此意難復尋迷陽花斷
腸卷施草傷心傷心以名閣淚下霑衣襟

東鄰啼鶉鳩西牖蟬噪柳忘機一延佇物態欣有偶茲
晨風日好爲具約吾友豐歲慶有期先秋富菱藕雛童
識南北欵戶速誰某齊年居七八大者顏未叟各各徵
所聞居然足談藪傾觴及終日僅足盈一斗中坐或慨
然年前失黃耆

昔者慕著書鉛槧二十年傳世難預期庶足慰目前前
年少尹亡黃仲檢討疾亦綿紉惜哉同心人生命均

不延初日照屋間神澹不復眠
偃仰萬卷中有若田大
田注史忘歲時炎暑忽已遷
一雨斷徃來展卷晤昔賢
餘事非所營庶以全性天

七夕獨遊放生禪院兼至楊氏宅訪友有懷進士倫武

昌

一院千聲出風蒲葉葉秋怪雲都上殿野水忽平樓石
徑歲逾圯禪堂昔未遊夕陽真有意穿樹到東頭
九株松檜綠遙識草元亭鄂渚客偏久山房昨已扃欵
門逢地主佳節指天星正好涼汀坐相攜采素馨

初八夜蔣太守熊昌招同人小集卽席賦贈

久別真憐廢過從舅家庭樹尙葱蘢
屬本翁從樽前

秋思催春燕天外晴雲挂雨龍安志約僮
邇客門詞鋒狂唵痛飲都成慣不管前溪渡口鐘

冒雨

行人未歸處雨點黑如鴉細路獨三里秋原餘幾家魚
梁人波冷荷徑送香斜爲有年時舊留賓過水涯

郊宿

磚墻南望處十里月空明秋露洗逾綠殘鐘敲更清樹
疎涼意定塔古夜光生不覺心神寂寥寥夢未成

夜起

水南一燈明復昏欲歸不歸夜向晨秋花如拳挽行客
月露似眼迷歸人流螢出門光乍小徑密人行復披草

却到橋西愁石欄寒鴉噪客來何早

早行

曙鴉聲一片秋露洗高原暗影驚谿樹迷塗出毀垣磬
疎分寺塙波響涉泉響畧約危如此松梢手欲援

紅梅閣小憇

野人愛郊野近郭行半里紅樓出林梢星壇入雲裏因
緣開北牖半日坐難起秋圃黃金花空潭赤文鯉

東郊憇劉氏花園

出郭閑行閱歲華風光偏足野人家涼生碧玉參天樹
秋到黃金布地花小閣四圍巢燕棟夕陽三面響魚叉
林園不欲窮幽處留魚閑時共鬥茶

飲酒十首

人生天地間各各私所有未知室中物屬客百年百
歲非可期得半亦云久萬事取目前沉沉飲吾酒
憶從墮地來不識天上事同儕應念我久別及一世飲
酒或夢之時時致沉醉寄語區中人無爲擾余睡
嘗嫌生世遲千載隔鄒魯不知更千載我又成太古詩
文代相祧視我卽鼻祖所以勤著書空言不無補
作客二十年衣食知其難卑身與周旋不敢忤世顏人
事旣以希飲酒輒閉關頗哂一世人苦說不得閑
性癖喜獨尋不避卽與壘高原何蕭蕭愛此木已拱要
知百年後行者皆接踵春到骨亦知柯條節間聳

涼蟬飲清霄下者口亦啄物性饑渴同飲酒人所獨神
明頓通徹味乃勝食肉所幸吾已多東鄰酒家屋
黃生苦不達飲酒或酒悲孫郎庶通方量復與興蓬吾
皆與之交泥飲輒不歸一死一別離行當徹尊壘

秋聲來無時當戶鳴蟋蟀夜短心甚長沉憂逮朝日界
身處天地非敢計家室百念集一尊傾觴亦將噎

客有一寸心抱此亦云久妻孥不能知庶可喻良友悠
悠二三子悼歎莫吾偶一世乏賞音吾將寄身後

前日無好懷昨又寡勝侶今晨心賞至檐外忽風雨蠟
屐雖已攜塗泥積如許感此復閉門終朝杯獨舉

將至烏鎮幸成二首呈崔通守龍見

我騎竹馬甫成童綠野堂開識萬公王年歲于錢文敏

城進裁句早甘牀上下飲泉今徧浙西東居歷著金華

炯雲霄事業看兒輩謂張君編夫婦神仙艷里中若說

通家較清切伯孫楊畔拜扶風

蹤跡愁邊與病邊放懷應不受人憐中郎才筆推前輩

太傅門墻記往年端鸞威鳳羽儀終就日成龍腹尾盡

升天淮南賓客如相問只我遲回懶作仙

四鼓渡鶯脰湖

三更涼月侵放棹復幽尋客念此時寂鐘聲昨夜沉露

翻千葉白雲定半湖陰只有閒鷗鷺能知大地心

夜話贈蔣上舍陳尊三首

秋樹齋頭夜氣深故人久別話升沉黃金市上空求骨
白雪尊前孰賞音循吏幸依崔不意器輅雖通守專家
應學董無心辨訊董孝廉思年來絕業誰能識撰到清

風與竹林

二十年前共閉關白雲谿上著書閑曾拋屋畔撈鰕渚

君有別業在鶴却買州南射虎山君尊人近買宜興縣

蕩近屬人矣期當獲別日壯懷應少減故家生計未全慳何時得遂

幽榭志揮笛風前與往還

新正二日太倉毛州倅大瀛招同銘山張上舍舟歛方

上舍正澍無錫鄒公子恩三山徑探梅卽席賦贈六

首

昨來世事繁今晨賞心果寧惟市聲絕十里斷烟火行
盡落葉聲寥寥花數朶

衡門當道左客至主人辭園林非一房樓閣掩扉時開
傍宜春帖離離紅亞枝

合牖敞風櫺離堂開雨宴陰晴花氣殊深淺雲容變
斂向南枝將無待春燕

疎香不到處山水足清華曲澗流時斷幽巖路忽又開
心聊點筆元日詠梅花

雙筵旣藏釣獨客時唸句淺醉已學狂欲歸猶未許且
上百尺樓簾疎試春雨

居然人慕蘭

毛君字又長故云

亦有字同揚方布霧方誰學談

天口乍張無爲勤遠送揖別此花旁

初二夕宿漢口聞爆竹聲不絕

漢水入江處東西一道斜五更喧爆竹十里散飛花已
破早梅萼還驚徹曙鴉聊應當鄉語淺夢乍回家

確山贈金同年朱楣

故人爲此縣幾載有賢稱隱几書三尺當門嶺數層雨
肥山郭鮮風瘦驛樓燈馬亦諳清况衝寒只飲冰

元夕宿尉氏贈張大令大鼎并寄徐州倅書受

去歲中秋永駐藏中秋日往武今年元夕寒雨回明月

好都向此城看邑宰幸同譜盤餐聯素歡遙憐徐騎省

雲外倚闌干

朱仙鎮元夕

鄭寒逢人日朱仙值上元殘燈依半壁春夢入中原日
直危樓影天連野燒痕明朝騎馬去又過古夷門

洪兒歌爲徐同年書受賦

尚之三十後生子乞余命名余舉前人之例名以余
姓而以余名字之曰孟吉則因其庶長也並作是詩
昨來欲訪夷門雪獻歲發春才十日故人舉子乞我名
我名故人子不輕我年始十三六經都過目書堂學咏
新月詩得句先令輩流服爾來卅載饒憂患文筆天人
倘堪贊我老雖慚晉始興兒行何減吳元歎字之以吉
名則洪富貴或過我文章止期同白雲谿北餘環堵我

有三兒健如虎架上盤盤萬卷書他時一半虛分汝

董生詩贈董上舍達亭

董生賦吳山指上立采虹董生賦南海舌本翻龍宮我
知董生由趙左趙左轉王不識董生才過我我詩往復
頗不窮不及董生句更工我文亦饒氣不及董生律尤
細董生知我我不知直待頌編千篇詩袁君愛巧欵令
徐愛真論歎二者生筆皆能臻不然何以天風海濤相
間鳴亦復雜出紫燕百舌黃鸝聲董生三十無世名我
吟一篇見者驚還生詩編生自省我在何能壓公等

閩官詩

徐上舍均爲言乾隆壬辰年其尊人某官邢臺令漫

于官喪歸至臨清大風覆舟一妹三奴盡斃惟均子甫四歲憑棺蓋得免時奉天何士錫爲閹官爲出錢募役得曳柩出水四人者皆爲藁葬又賃屋居生者數月均甫自邢臺至臨清得奉喪歸暇日爲余述其詳余感何君之義爲賦此篇

臨清閹閹置官閹官閉閹方一日忽見天上來浮棺浮棺誰舊令尹急溜失風船沒板一女數奴鬼不返漆棺浮處沉四屍棺頂乃復憑嬰兒漕船峩峩下水來大聲呼閹閹不開閹不開衆皆詈閹官倉皇掉其臂三百閹夫聲若沸曳棺出水兒亦蘇魚腹奪出雙亡奴漕船不前漕卒怒拍手大言官得賂官寧受取得賂名爲德不

卒非人情奴行烘衣兒進粥更爲羣棺賃雙屋周巡一
日至數回越六十日喪方歸君不見何聞官救人出死
力送哀淚尙垂棺側竟與棺中不相識

濟源謁濟瀆廟作並寄錢州倅姑西安

我昔尋淮源騎馬至大復濟源今始訪尙未及王屋馬
頭星落日未光天半忽然落太行山形西上水東下中
有百里雲之鄉雲鄉萬畝收常寂水鳥鷺絲時作對開
門飲水性不浮頭上白雲還可戴尋源人廟得數潭酌
以水杓殊清甘坐思地脉出靈異更有一源穿寺南延慶
寺西南有一藻萍靜覺微風起那識泉流及千里不是
源俗名海眼天青落眼前都疑赤日行潭底殿頭斜交松栢風碑頂

錯落填青紅九州三瀆得配食北海一神成寓公廟後

海神又有三瀆殿水光沉沉走靈氣飲水沉兼知水味點波縱

乏魚眼紅入饌復添萍葉細艸似艱萍雛童道我行不

休出廟遠看珍珠流土人指點復非一我卧欲向山南

遊斜行卅里無平地石觸馬蹄如斧利車箱側坐作一

篇聊當西尋濟源記我有故人官故京萬言能辨濟爲

漿糶辨以彌雅濟爲楚爲何時並馬入河澣誤置論甚辨應訝蔡河

原號楚

延慶寺

向西行一里側耳水潺湲古寺埋荒草春風被北原上

樓迎雁過遠樹避禽喧欲抑飛揚性時時酌水源

盤谷寺

日斜來谷口新月正東升石壁餘千仞空山祇一僧
品泉殘雪淨當窻白雲蒸照我歸途好寥寥塔上燈

盤谷寺東山墅題壁

我來自級盤空砌一樹臘花香蓋地詩中臘梅一株花
穉積地許香尚
出門正值過嶺風半里疎疎挹香氣此山泉水不出
山曲折偶落幽人關泉流落處閣飛起更向天半支紅
關閉心歛戶還相揖一馬一奴催去急臨行偶展几上
書窗外白雲如崔立

盤谷寺道中

盤谷路屈盤怪石都欲齧馬行既傷蹄騎馬復傷膝馬

鞭苦不前奴亦涕垂尺當其勢倉皇天頂作深黑天黑
未黑幸有星松櫟百樹流空青入山行遲出山急馬上
別山聊與揖

宜溝行

宜溝驛中逢節使三日馬蹄聲不止衝途驛馬苦不多
役盡民馬兼民騾民騎不給官家食更要一騎增一卒
馬行三日力不支馬病乃把民夫笞長鬚壓後尤無忌
急選官騾訪官伎民田要雨官要晴一日正好兼程行
車前輿夫私歎息曾與此官居間壁官前應試苦力疲
百錢得驢詫若飛君不見人生貴賤難如一不是蹇驢
偏有力

夜過漳水橋

十里平沙兩戍樓，薄寒衣上點春愁。
行人莫問銅臺事，漳水如今入海流。

自錢唐放舟至上虞，卽寄唐人令仁植，嵯縣。

我拋西子湖來訪，山陰月山陰道。
上夜不眠，明月都疑古時雪。
古人何太閒，今人何太忙。
四明山色笑人久，狂客一去誰能狂。
山陰舊友無人到，還訪山陰昔時廟。
巢梁秋燕忽翻飛，螢火遙遙出門照。
山前月綠山背紅，十里燈火連青松。
神簫法鼓聽不足，水面黑已搖靈風。
北山雲暗誰能見，星點如萍落波面。
枕中秋夢爾許長，船上月痕移一綫。
我思訪友至剡溪，故人手版歸無期。
曹

娥江水秋轉綠話舊還來此江曲天台山連天姥青舊
遊十載難重經偶然雲朶錯江上訝落十二芙蓉屏道
旁峩峩孝女碑當日偏遣兒童爲閒繙榻本坐船屋落
落可笑時無才自非賀季真誰識李太白我羞黃絹詞
祇憶錦袍客詩成絲雨忽下汀屈指明日秋當晴會須
散髮飲官酒百尺樓上眠秋聲

湖上看雨

雨聲不著地惟走松栢梢山風颯然來時時撼鴉巢歸
鴉點黑雨點青星出復漫天冥冥樓高百尺陰晴變山
外月明山裏電

湖上坐月

老於見言集卷之三
三
闌干旣戀月月亦戀闌干十二回廊內無人徹夜看青
天沉沉黑雲破時見東山鬼燐大星沉月落雨一天闌
牖更枕荷香眠

湖上夜起

背山十里行何遲沿湖草香人不知草根螢火草頭露
照客歸夢三更時紅疎綠暗誰家宅十二曲欄眠獨客
開門無意望雲山秋水連天月華直

韜光精舍

山頭戴屋屋戴山山上又復開禪關斜行百步路深阻
飛鳥不到人應還竹梢垂垂栢陰直一徑夕陽紅欲沒
雲深草暗不見人蝴蝶花開四山碧

山陰舟中

四山圍一澗流水不能東
青草添波綠高雲映樹紅
挂帆零竹雨啟帳引松風
已覺衾裯薄寥寥秋氣通

夜坐

三更人意定風竹自敲琴
樹樹月華直峯峯秋氣深
海雲當戶落齋磬隔烟沉
莫飲寒潭水空明此夜心

中秋詞

樓上月疑尋人穿戶南北還
當門墻頭花疑伴客覆屋
高低復窺隙秋棠軒北待月華
出戶小語聞呼茶葍絲
如指藕如臂齒冷怯進西園
瓜池臺左側闌干右隔巷
萬燈輝若晝琅玕鎖徑不一開
坐久竹風涼逼袖三更

月暗絲雨飄約伴溪北行三橋走橋人多不相省獨向

橋心鑿春影

錢三維喬以桃花卷子屬題時錢新室將落成因作長

句貽之

春風百萬花枝旁桃花李花能不香桃花紅紅李花白
誰比春風好顏色昔人飯桃三十年顏色姣好都疑仙
人生駐景亦虛語聊取玉貌臨風前披圖一人美無度
綠鬢猶留遂初賦東邦溪北斗城南欲種桃花閉門住
一株花開千萬株紅蔽天卷圖忽忽念疇昔此景只有
南山邊牛頭寺古慈恩側雲欲不紅何可得君今臨水
築新居縱不栽多亦當百春風一吹香半空隱几如坐

南山中半城鶯燕在何處聞氣只掠花西東初陽入樹
光凌亂一日風光百回換尋常客至門不開祇許鄰童
上墻看我家亦傍溪水隈桃無一株愁舉杯豈徒營燕
不相訪蝴蝶絕少窗間來與君街東西屈指月三五攜
樽來遊莫相阻我今題作桃花塢

楊秀才岵谷漁樵問答卷子

聖不自聖何其謙執射執御無能兼儒羞爲儒亦何意
欲漁欲樵誰者是方其學爲樵不識世有淵方其學爲
漁不識世有山用心可一不可二君意胡乃雙相關我
知終日樵薪復不盈東何以贈君爲君歌伐木終日漁
魚復不上竿何以贈君爲君詠忘筮吾儒之道無不該

況乃二者當優爲樵夫笑士匪無謂漁父鼓枻何悠哉
君家家法爲儒好天祿可讎元可草堯夫經世吾懶觀
復恐誤爾儒爲禪

有人都者偶占五篇寄友

孫比部星衍

自君居京華令我懶作詩作詩與誰觀誰爲定妍媸一
篇偶賞心世論不免嗤一篇牽率成俗賞及在斯我雖
不敢言得失我自知唯我與子心膠漆難喻之我工子
開顏我拙子不怡非惟字句間兼爲審篇題前寄袁尹
章枚昨答汪叟詞蒼霖上皆有墨瀋由君指其疵或時
作一篇我心如亂絲置君于我旁素者卽以治別君居

三年作詩少千首以此厚怨君君能識之否

邵校理晉涵

自君居京華令我懶著書一義偶有疑搜篋復發厨不然在君旁理蘊已畢杼問一必荅三背誦若貫珠君疏爾雅篇訂正五大儒使我心上疑一日頓掃除君師錢少詹大斯精識世所無吳門及錢唐復有王鳴盛與盧文弼皆言此書傳遠勝唐義疏盧爲校三匝誤字一一鋤惟嫌體清羸力疾廣授徒穀梁疏倘成孟子義定乎別君居三年我書不盈尺以此厚怨君君行亦當識

章進士學誠

自君居京華令我懶作文我前喜放筆大致固不淳君

時陳六藝爲我斧與斤不善輒削除善者爲我存儀真
有注中此事亦絕倫藐視六合間高論無一人前者數
百言並致洪與孫勗其肆才力無徒嗜察陳我時感生
言一一以質君君託左耳聾高語亦不聞碑論君
于文體嚴注于文體重筆力或不如識趣固各臻別君
居三年作文無百幅以此厚怨君君聞當瞪目

管民部世銘

自君居京華令我懶詣人詣人或有忤時時致紛紜誰
能爲幹旋並復正色論我病非由他半或飲酒醇君齒
逾十年戒之每諄諄畏此一尺面巖冷無陽春我交有
趙莊懷玉述祖我交有楊倫數子亦獻規使過不敢文

餘人非不言言亦或不聞言豈有不同數子愛我真前
時傍君居藉此得束身傭書蘭臺中得免一世噴別君
居三年酒失屢自懺以此厚怨君君行倘相念

汪學正端光

自君居京華令我懶入山君雖不能遊喜我窮躋攀陟
險慮我危懸樹驚我頑嘗坐白石邊靜日待我還復恐
相背馳時喚林壑間每挈酒與肴解我饑渴顏共艇泛
釣臺同車出昭關十二盤嶺三百六十灘時登仙人
峯時上毛女壇我狂不可遏藉子爲捉欄不然險上天
失足性命殘紀逢實雄奇君誦皆循環別君居三年過
山亦不諳以此厚怨君君時常一噓

酬崔太守龍見時攝處州守

萬里歸來攝一州
桃花嶺畔使人愁
松杉密處稀耕隴
麋鹿閒時滿郡樓
到海怪風聞尚憶
愛山狂客記曾遊

兩學使至此

秋從王官清何事忙偏甚幾許新詩落矣頭

寄崔三景侃三十二韻

昨來遊西湖兼爲訪君病
迎門一相見坐語不能竟
歛臥六尺牀朝曦與相映
紅窗闔兩扇尙畏曉風勁
藥物貯枕函醫嫌不符
症復言昨携燈失手不持柄
燈燼誤拂眉癢痕額間釘
君雖顏色瘁玉骨尙精瑩
竹扇揮不停羅衣策屣淨
神清能照物朗若玉爲鏡
榻畔數冊書拋殘未裝訂
爲言是君集偶亦取諷詠
雲箋蒙四壁愛

好實天性翫几插白蓮秋桃花亦倩朱魚賦甕榼水淺
喜游泳憐余欲稍憇深室早除屏阿母喜客來開扉急
延請齋厨戒葷殺蔬筍搬欲罄銀梨手中擘綠果盤內
釘傾觴復携榼一一催使令憶昨握別時君妻尙初聘
今聞娶盈載嫵婉並能敬君兄持玉節失喜早相慶仲
子昨有書潛修怕奔競惟君忘進取所喜達時命晚挈
臥具來紗厨放端正辭君不可得連榻話宵靜絮語不
覺長疎疎佛樓磬雖癡談尙劇使我醉時醒一夕話數
年奚奴隔窗聽松檣移影徧殘月復窺徑明發倘別君
重來尙難定

九月念一日自府東街醉歸由迎春橋取空濶處玩月

歸舍喜而有作

我從缺月看至圓復自月圓看至缺其間何夕最賞心
初八十三今廿一月當八日剛上弦日午已挂城樓邊
私心催送夕陽去好透清影來窗前十三此夜清輝好
遠挈幽人踏衰草灑御船儀初疑飯飲味辛乾
斲姪鱗仙趙家樓上千盞清縣尉衙前百燈皎今宵無
意復出遊坐客失喜相攀留擬剡州入坐存謙主人
初歸萬餘里塵面未洗邀朋倚歸途正值如圭月照我
城東堞樓隙沿溪寂寂揔閉門剩得清涼沁肌骨我生
愛月歷八州月色無異殊歡憂中間多病復沉醉誰肯
徹夜懸簾鉤少年二八還三七得月不眠眠若失古巷

迢迢走欲窮高樓漸漸看將徹出門漸遠月漸親千里
對月如鄉人幾回愁苦向之說高興亦引同清樽海門
浩渺江流羨看月出波還漫浪萬斛清光一葉舟誰言
我不居天上蓮花峯東玉女盆五十六無黃昏齋心
曾向石壇坐百怪看月來松門嵩高夜色尤無匹霜一
層蒙尺深雪緱山明月向南來三樣寒光一時結東西
南北遊萬場祇恨不上天中央我疑青天月色不及此
有若鏡面皎潔鏡背無輝光看殘月慘新月歡百歲月
止千回圓尙嫌平地住時久起處落處不得一一窮其
端我詩被酒尤清快說月還愁衆星怪夜深說月更有
神引得一番兒女拜

爲史秀才次星賦焦尾硯

硯才係端溪石閩江舟人以支茶竈史君客閩時出
錢三百易之其半尙焦後琢爲硯因名曰焦尾云爾
昔有焦尾琴今有焦尾硯山中木石豈有知不遇才人
不能辨琴來變下五尺長此亦日久支茶鑄磨之三日
故紋出洗以海水逾清光端溪僞質今無限此石故應
稱舊產有時携向沸水旁蟹眼尙侵鵝眼史君才大
不可量攜硯歷涉天南方興來草辨漢赤壁否亦或賦
秦阿房草堂他日吾當識匣以紫檀時拂拭人生皆作
如是觀爛額焦頭稱上客

偶成

卷施閣詩卷第九

陽湖洪亮吉著

西苑祝釐集

庚戌辛亥

萬壽樂歌三十六章

并序

臣謹按唐臣元結有補樂歌十章白居易有新樂府五十篇類皆言簡意深可以播于樂章歌曲
臣嘗慕之伏見我

皇上御極五十五年仁如天宏如地舉凡廣聖極神
謨文定武類非形容所克盡致今者恭值

八旬萬壽慶節臣幸得擢魏科備員詞館自正月一

日恭讀

恩詔以後親見

皇上敬

天法

祖勤民察吏諸大政足以度越百王而垂則萬世者
已不下數十事輒不自量謹依類撰次爲萬壽樂歌
三十六章非敢繼元白之逸塵亦庶乎衢謠壤詠得
附本朝樂章之末云爾

元日詔第一

上章之年月初建旭日初升太和殿

詔宣宗伯上玉墀二十二條宣讀徧九門以外齊歡呼

一日數驛馳郵夫

殊恩豈獨神州內

普錫還教外藩遠遐哉上古迄漢唐三千年來無此祥
皇皇

天語真堪述每遇庚年輒逢吉

讀實錄第二

作者聖迹者聖天命元年遠雍正我

朝開國值泰交百八十載如一朝夜向晨讀實錄玉檢

金函日三復人言

帝治超軒鴻崑師

三祖及

二宗

巴勒部第三

巴勒一部遠在西徼酪食漿飲同時獻表云敬

大皇帝如敬佛三寶珠瑟瑟衣班班道畢拉兼烏闌哈
哩海野先稽類巴拉八都還合掌

坎扒窪經第四

樹頭椽高五六丈其實纍纍花可釀葉名貝葉取寫書
一葉百字如聯珠梵經不到西南部以意作經遂四布
國基旣兆立普哇傳經亦名坎扒窪坎扒窪經有義不
歸佛法不歸僧只願歸依

大皇帝

貢字象第五

南掌所貢

貢子象貢子象人面刺花人性獷遠邦百載名老搗左
佩右佩皆雕瓜別乘數象來中華不嘉遠物嘉誠效
特敕象房增俸料

春燈詞第六

昆明湖水連天碧萬盞燈輝一天月臨湖亭上看春燈
魚龍曼衍從東升春燈詞接春帖子遠自乾隆丙寅始
辛壬以後皆八篇却與卦象同綿延生生不已真堪卜
今歲自隨還至復年年歲歲游豫同誰識義蘊陰陽通
宸篇下計歸政日却合伏羲全部易

普免租第七

免錢糧免漕糧四次兩次看騰黃今年詔下

恩尤厚普免正供由

萬壽三分減一十減三前史盛事何庸談大農錢粟雖
頻散耕九餘三積儲慣戶部銀仍八千萬

殿勤政第八

夜未央乾清宮中燭煌煌日將出勤政殿前傳警蹕機
庭綸閣三兩賢日或一再瞻

天顏萬幾當晝皆周徧七品宰官多引

見法官御苑名總同行在亦復懸堂中江寧行宮讀書
有勤政堂

若以今方古隻日視朝何足數

續石鼓第九

太學中周石鼓二千年來石文古若將一字比一篇却

合關睢及殷武

石鼓舊存僅三百十字

親加排比較短長重刻十

石陳堂皇舊者藏疲珍珠琅流傳至久還堪數周宣中

興製石鼓乾隆

萬壽年春補

八徵璽第十

古稀天子古已稀復越十載符貞期重華宮中製聯句

旣壽永昌猶泛語嘉名肇錫得未曾爾章特與鑄

八徵石經若舉殷宗例享國百年重製璽

五福堂第十一

萬年天子兮萬年觴五代元孫兮五福堂儒臣歷檢明

宋唐得者六輩錢吳張士夫獲此慶已長帝籙從未膺

斯祥膺斯祥由慶洽十一世還徵

玉牒

釐四部第十二

四部書帙萬萬提要一百卷臣附臣熊奉

敕撰全書告竣已十年有

敕亥魯頌重編

本朝實事皆求是不遺傳疑留一字文淵畢釐文源百

臣日夕來

御園東南三分皆無誤海上然藜校文溯

御製集第十三

御製詩御製文近自巳酉溯丙辰文一千詩五萬五十

五年成百卷九經廿史義蘊宣四岳五瀆搜根源遠紹
二典三謨傳巍巍卷軸如山立豈特帝王難冀及十倍
漢唐文七集

五國朝第十四

東西南北車書極朝正國王三十一三十一國分年來
春秋冬夏邸第開普天同慶當斯日五國遙遙適相值
神雞五色魚八捐貢及犀兕兼拾獠史臣若舉春秋筆
五國來朝王正月

開經筵第十五

讀洪範讀名誥五三六經開祕奧萬幾之暇日一編春
仲敬復開經筵經筵樂奏何雍雍抑詩還取衛武公昔

賢

今聖皆先覺九十耄期還好學

親釋奠第十六

臨雍歌幸學詩八天子猶尊師崇賢坊大成殿二月
上下來釋奠春渠如鑑波溶溶前年

天子臨辟雍太平盛事皆稽古鄉飲酒歌詩樂譜

朝日壇第十七

朱旗絳扇來城東

至尊親詣朝日宮黃軒紫幄光如燭

至尊親詣齋宮宿太平五色雲擁輪迎日正見雙黃人

雙黃人捧日起朝日禮成天下喜

登岱宗第十八

會稽南恒岳北西及五臺中太室天旋向左

帝邁東卅年六徧巡岱宗吾

皇卓識超秦漢但禮天中不封禪天門日觀瑞色開八
句

天子騎驪來

謁闕里第十九

猗昭維則聖人在昔衆善若林六經乃宅猗皇是飲

聖人在今

宗謨旣纂

祖訓是尋青旗央央越歲來謁前聖後聖其揆則一歲

則庚戌月維庚辰山左三大禮祀畢臻

百歲民第二十

廣督摺直督摺百歲耆民山肩立滇撫章皖撫章民間
五世共一堂

太和翔洽超前代不產麟皇產人瑞朱提文綺出上方
幾餘染翰錫一章耆年壽婦布魯特絕域貢珍由感德
萬壽科第二十一

萬壽節萬壽科九十八十來婆婆春官一百二進士外
一百人年已至

詔出東華盡宣賜膠庠抑阨五十年閭苑盡許稱神仙
白髮亦戴花盈顛升平盛事誰能及兩宴南宮值庚戌

大學士臣璜謝摺

勤察吏第二十二

盜不讞責總督清苑縣官愆莫贖吏蠹民責撫臣高郵
州牧罪較真

皇躬一日周萬幾外省案牘何從稽

詔書直下諸大吏當戒江南與直隸

清字藏經第二十三

西華門中闢經館大小乘經堆欲滿法門先寫百二章
排比兩晉兼三唐

國書結體尤嚴重舉筆如龍復如鳳經成一藏功萬千
佛力祚

皇萬萬年

黑龍潭第二十四

三月麥四月秧不雨麥瘁秧將黃

行宮宵旰無時釋先詣黑龍潭外歇排空萬朵雲垂垂
真龍不禱雨不來

三大祀第二十五

三大祀歲必親五十一月象輦陳南天壇北大內百尺
燈竿與相對壇內宮中合虔拜耆民夾道成風謠五十
五編

躬南郊

山莊第二十六

灤河之北臨邊墻每年避暑者來山莊雲山四面奎文署
云是山莊最高處澄然四海集一心日日亭上占晴陰
殿前引見員管滿吏部帶來分月選更撥幾餘念柔遠
山莊但識無災歎日昃可念

宸衷勞

經壇設第二十七

九門中官吏車一日百輩來徐徐殊方絕域摩肩入在
籍諸臣亦羣集分曹百輩爲一班盡檢大寺開經壇湖
山郁作梅檀味初日輝輝照初地青梯樓閣須暫開
無量壽佛拈香來

盛典增第二十八

萬壽盛典凡六門

聖德

聖文兼

聖恩萬方集慶儀文重其次繪圖同獻頌巍巍蕩蕩難
具書特徵二事古所無八徵五代奇祥起塞外闢疆三
萬里

夕月壇第二十九

朝禮日來東郊暮禮月來西郊

鸞輿親向齋宮出

萬壽節過才一日規壇不獨祀夜明二十八宿兼經星
不見唐貞觀樂五闕隋開皇坎三尺豈如吾

皇大祀躬致虔禮成光景生中天千秋金鑑懸當前

安南來第三十

安南來安南來國統雖舊基新開廣南大吏為陳奏親詣

天朝祝

天壽路人指點盡識名安南國王阮光平海邦自此知

冠履好變文身與椎髻

阮光平奏請從
朝章服特旨俞允

前殿宴第三十一

太和門中頻列讌日日平明御前殿七旬宴後復八旬

下逮屬國兼陪臣年九十階一品特

賜金尊殿前飲千人統計歲萬千稽首合作今

皇年就中受

恩誰最樂國子監 臣郭鍾岳

祝嘏樂第三十二

祝嘏樂樂一部歌者歌舞者舞敲銀瓶擊銅鼓萬里遙
遙來祝嘏太常樂奏列四蕃不數貞觀兼開元蕃王親
向階前祝更獻十章名法曲法曲十可歌亦可詠一章
一章名特標謁金門賀

聖朝 詠光平道 萬

昇平寶筏第三十三

三層樓百盤砌上干青雲下無際上有立部伎坐部伎
其下回皇陳百戲蟠天際地不足名特

賜大樂名昇平考聲動復關民事不特壽人兼濟世萬
方一日登春臺快看寶筏從天來

王會圖第三十四

東西廿里如繩直夾道樓臺成頃刻千層覆屋百尺臺
大舸載自東南來回廊曲檻天然合空處扉櫺自開闔
方壺圓嶠咫尺間海上頓訝移三山拈毫若準唐貞觀
玉會圖應添百卷

普天慶第三十五

日庚申圓明園中

法駕陳日甲子乾清宮中鹵簿起宮中御苑石作塗萬
叟夾道還嵩呼如山燈火連湖曲想見太平調玉燭

萬萬壽第三十六

萬壽節日以十三時八月月瑄日徽皆叶律我

皇御極當丙辰越若稽古堯期臻五五數復箕書陳無
疆若展大行策萬有一千還五百

馮少卿應榴夢蘇草堂卷子

時馮作蘇詩合注

少卿室冷無纖塵頰濱翩然來叩門履聲皇皇響空谷
欲前不前猶躑躅褰簾一笑霜滿空迎門次公立長公
長身高冠貌奇古七百年來覲詩祖邀公不入亦可思
一屋光燄皆公詩夢中自謂得所師敬告欲續施元之
公雖不言心已可來處仙雲落如朶峩眉山月清可憐
半夕移挂高齋前來時不迎去何送我謂非真亦非夢

醒來急詣南頭翁

謂翁方綱

證以畫象將毋同君不見少

卿詩名滿人海夢裏師公醒如在因君我亦念辦香太

白樓前一江水

自蒙陰縣界早發從車上望泰山半日始抵山麓又步

行半日憇高老橋日已曛黑乃尋路而返

夙昔好大言岱宗視秋毫茲來距百里意念肅不驕靈

風吹車帷總向西北飄日上戴一山半白雪未消平明

開東峯忽與天爭高向背卅里間鉅細無不包聖人坐

明堂若受萬國朝半日走未休才能憇巖腰絕頂豁一

門注視久亦勞誰云千丈松貼若徑寸苗海氣漬石厓

天聲走林梢來乘西月光去揭北斗杓小酌白石泉吾

行過飛橋

臚傳日馬上口占寄畢尚書師湖北

五年爲客曲江頭屢向慈恩寺裏遊
曾解絲衫陪廣讌
愛拈紅杏上高樓
看花未必輸前度
擢第偏教遜一籌
好繳公門舊衣鉢
至今慙愧說袁州

昨年里中有入都者偶占五篇寄友海內交舊見之共
詫以爲洪體今適一年余留官京師里中知好復往
來不能去懷適汪甥楷以定省南歸爰更賦五篇寄
諸同人未章并以示弟原吉及兒子飴孫見者幸勿
復以爲創體也

盧學士文昭

里中誰取憶我憶抱經堂抱經翁七十讀易猶琅琅餘
經貯案頭日漬丹與黃盤盤經師居庭草一尺長問字
數百人誰來上堂皇匪徒文體垂書仍誤偏旁俗學錮
性靈反厭師說詳一月偶一來惟應伺餽糧就中領悟
誰庶有顧明與臧鏞堂顧生嗜說文臧生勤爾雅百里
澄江中誰如二人者

錢大令維喬

里中誰最憶我憶竹初居前年養疴歸買地十畝餘四
邊何周遭桃梅竹棕欄規高欲巢禽掘地乃種魚魚鳥
旣獲安餘力營吾廬一室開八牕風日來徐徐主人欲
登樓花氣爲縈紆主人欲出門芳草攔衣裾北巷呂秀

才景尚南頭畢居士涵偶有剝啄聲經旬一來此

趙舍人襄王

里中誰最憶我憶味辛齋味辛齋中居風日多好懷五
日一出遊經旬宴朋儕我居與若居僅隔南北街花時
與月時出入必與偕君尤善清談觸緒理不乖差苦持
論莊時爲雜詠諧同志六七人均能外形骸無日無客
來闈做不必排不來亦有時或值體不佳盛惇大吳堂
近南歸莊寶書蔣齊耀復遠宦預苦離別多臨觴定三
歎

蔣上舍馨

里中誰最憶我憶杏花樓杏花旣已枯種杏人在不雖

無一株花花下石尚留雖無種花人畫象懸樓頭昔爲
大母居謂外王母今屬孫曾遊孫曾昨問訊敬我齒已
優童年看花詩黏壁尙四周種杏曾幾時一讀一淚流
檢點樓下人半又客遠州阿三庶雁行阿二廷耀尙兄
事何時續栽花吾當日三至

弟原吉兒子飴孫

里中誰最憶我憶卷施谷拔心不死人時來谷中宿谷
中有羣書谷中有嘉木主人出門去書好無人讀花紅
上斗棋草綠出垣腹賴有主人兒時來理書簾稍移碍
簾燕時剪出墻竹昨宵家問至北上期亦卜愁無束裝
具典却里中屋一書寄令弟一書示飴孫此谷不入券

爲吾鎖重門

百題城東訪月圖

余家清暉橋距城東門不三十步出城古寺五六排
比而立寺後爲晉陵縣故址廣場數百畝幽人三兩
家余每晚食後必一詣其處半里之內鳥之有巢花
之有名者莫不與余相識卽風雨夕不能至夢亦詣
焉庚戌獻歲將北行友人錢明府竹初畢上舍蕉鹿
爲合作城東訪月圖遂係以詩云爾

月初三至初九一日一回城外走十三以後人不閒人
靜月好更先闌徹夜不遣城門關月過二十看星出乘
殘月歸更欲絕人言我愛月如癡不識城東月尤潔城

東有白堦城東有紅橋橋痕下欲枕蘋藻陰影上直干
雲霄迎春堂北東西路一草一花都識數匝月能來二
十回繞堤何止三千步三松一客靜淹留復有危巢結
四周好寄吟蒐與烏鵲夜深隨月上城頭

張進士若采梅屋讀書圖

築室高丈餘鑿楹深尺一我愛一屋中書外無長物無
心種桃李無心種桑麻我愛一屋旁梅外無餘花書牕
只向梅邊拓果熟好從書上落長身如玉忽然來不是
主人疑是崔

送莊通判所至漢陰新任

太乙從西來終南向東轉我前甚羨君十宰山水縣君

宰郿鄠宜君蓋厓富平長安咸寧渭南朝邑諸縣今擢判漢陰高觀潭上銘牛頭寺中

詩君前亦羨我五醉桃李時花枝歷亂山南路紅欲上

天雲轉妬君從山縣偶然來一路尋花入韋杜黃河西

岸渭水隈我頃亦復騎驢來君官郿及蓋厓朝邑時余皆曾上其署中君家

令子亦好友十日留飲三千杯仙遊壇北風飄瓦君坐

藍輿我騎馬意外孫郎手重把慈恩塔下日炙軒君墓

石刻我上巔拍手尚有婁江錢謂獻之尚書竇從居然

昇醉裏後先升上第萬條紅燭百篇詩贏得人傳杜書

記識君已卅載別君又五年重陽風日正晴好相與共

話金臺邊治中別駕今何有五十才名作通守鄠杜山

田買不成全家更進褒斜口離筵重傍菊花開適有尙

書信使回畢竟梁園賓客好如今視草用鄒枚

吳布衣蓬瀛寄示紙仿秦漢瓦當爲題二絕

陶泥作瓦形難古

近西安陶者能燒漢當與真者無二

爛紙爲泥法轉

良總是劫灰燒不盡有人閒裏仿阿房

應共錢獻之程齊

作雅遊青門西去曲江頭蠻牋十

樣如分寄君定能成五鳳樓

送李同年廣芸赴任浙江

上章閣茂歲科舉出

萬壽我方登岱宗三月乃北首遊山筆殊健得遂柬賢
後同舉一百人于君契尤厚君才富詞藻早復窮篆籀
闡中萬言策兩策蒙進奏春官遲錫燕新例試當覆

光明殿東西

賢良門左右

聖人親試士如漢策孝秀眾中君最捷一卷成正畫引
見來

御園麻衣改紳綬人才較清拔竟以民社授官由楚改

越以邈老母老欲遷就十月始出都風號雪花驟同袍

凡八輩執酒道旁候疲馬出北門依然學寒瘦阿翁循

吏傳裙酒酌亦以進士車上可尋究努力報環先無徒

事琛賤輪軒倘重到舊侶可全覩郎官改祕閣此例亦

有舊二十有七人今歲蒙恩入館待子成列宿

王大令復自汴中來邀同人小集惜陰秉燭山房羅布

衣聘作圖紀事是日并送儲明經潤書南歸分韻得

租字

有客歸何急疑収陽羨租似君來正好還挈朗陵厨官
滿趨金闕春濃買玉壺朝衣吾幸典衫笠入斯圖

十五夜對月獨坐有懷里中舊遊

獨酌一樽酒含情上小樓故人難會面明月却當頭隻
影長廊入清輝滿鏡収誰云天上好今夜不勝愁

送萬大令應馨之官廣東

謫仙樓頭乍相揖君年三十我二十初識君在朱旂若

高懶張黃皆平山堂外飄長裾君年四十我有鬚廿年

歲月真如駛高東井顧文子張方海黃此中死卽今海

內論心交汪子劍潭憔悴孫郎淵如豪馬蹄亂踏長安
市前後與君成進士若論位置殊可商君爲外吏我漫
郎一官遙遙六千里三月仍難具行李僮饑馬瘦住不
安我轉質衣謀爾餐孫郎汪子交終厚日揭破車門外
走窮冬行色畧已成此時送君須出城崇文門前別不
足更借宣南坊裏宿故人有子稱能文購種昨歲主我
今依君君不見貧交生死原非偶此子年來況無母君
先令讀等身書我爲故人兒娶婦

錢同年福昨乞假南回書此送別

君歸我何憶我憶西湖水飲水亦已香水中菱更美湖
中誰最憶我憶裏湖魚小繫雙篷艇時來五柳居湖頭

誰最憶我憶山陰酒一葉載百樽千錢沽十斗湖邊誰
最憶我憶上山茶煎向深甌內如開數朶花預想君歸
時食單先出宅烹魚水要鮮醒酒茶先摘此時却憶金
臺人無米飽飯天街塵人生快意當有日君倘能來我
應出

崔公子景偁竹樓圖

竹綠參天筍亦抽偶然竹裏有高樓不知樓上人何處
我欲打窗尋不休

三尺寒檠七尺牀阿三曾共捉迷藏謂景偁兄落來詩裏

還相識爲我窗西補夕陽

袁安卧雪圖爲王太守嵩高作

屋頭無炊烟門外一丈雪此時屋中人已恐不能活永
平及永元三世弼天子此時屋中人如何遽能死閉門
一卧歷一時門外雪深殊不知洛陽縣令來何巧從事
汝南饑欲倒門外雪花飛入竈從茲舉足一出門衣被
四海皆陽春眼前高卧匪無意預想俗僚當還醇君不
見丈夫一世歸襄抱有事日多無事少卽論無事亦須
眠那得閒心訪安道

三月廿五日小病初愈至法源寺看花適得崔三景侃
書却寄

剩得韶光有幾時病餘端不負花枝商量欲把春衫典
又值微寒颶雨絲

幾日人閒蝶却忙
引人花底款遊廊
傷春正憶昨年事
迎面一枝紅海棠

冥蒙花外語呢喃
燕子真同佛一龕
千尺綠陰吹不斷
粉紅牆北是江南

鶯鶯燕燕可憐春
乍款花枝乍款人
無數亂紅飛上柳
更疑楊柳是花身

一春心事費商量
欲趁春陰夢幾場
花上曉星花底露
分明著眼看年光

春盡傷心抵歲除
江南別後意何如
丁香花底槽騰醉
却展崔三二月書

五月初三日偶成

蜀葵如錦繁籬根檐雨初添屋漏痕新月乍來簾正捲
槐花落盡不開門

五日憶白雲溪競渡作示兒輩兼寄錢三趙大里中


黍裏菰蒲酒泛芸薄醺閒話小兒羣江鄉四月餽新雨
樓閣三時盡白雲溪果作紅偏礙帽岸波搖綠欲煎裙
誰憐天上清如水手擘桃符遠憶君

送丁二履端南歸

白雲溪水向東流我住南頭爾北頭小市酒帘頻夜飲
斷橋蠟屐共春遊鳩來天上愁無盡却惹人前罵不休
屈作宰官原可惜時擬借崔曼亭太守至荆州也應差

勝客荆州

情懷苦被繭絲纏時醉時眠亦偶然誰向西窗喚人醒
一房春夢碎難圓



法學士式善招飲詩龕并至西直門看荷花卽席賦贈

一首

翰林近日詩名盛遠有詩龕近詩境翁開學方綱額詩其齋曰詩境

龕主人尤嗜詩退直閉戶吟多時

龍樓鳳閣森前後尺五天邊住偏久五陁山色落墻頭

時有閒雲墮高柳開門十頃荷花潭邀我早日同幽探

故明星落已催駕我本蓄意來詩龕馬前遙遙兩紅燭

十里路中晨睡足詩龕已到不索詩舊讀主人詩已熟

東頭詞宗百菊溪御齋宗伯宅復連街西鐵侍三人分

日操選政時有滿洲四朝詩選一室墨雨揮淋漓以詩存史誰能

及佚事多年苦揆輯遺山已矣傳習亡北斗以南惟此

集清談已竟還傳餐飽食散步來河干城門正對御河
口萬柄荷葉風聲搏官衢南北車如織騎馬欲歸歸未
得青槐影裏晝初長我亦玉堂將入直

七月初四日遊極樂寺看荷花分韻得看字

出西直門三里而近有極樂寺焉長河蔭前高阜倚
後其東有國花堂西有勺亭皆城外之幽構也梧門
學士以偶日下直徧招同人飯于詩龕接軫以往車
行者三里舍車而徒復二里甫抵寺門綠陰當空赤
日亭午池荷東西曾不百步間以傑閣繞之回廊水
氣升岸結爲輕綃林香入波漾此晴采于是或瞑坐
巖側或孤行竹中或擘箋庭隅或讀畫塢側堂高于

垣者一尋門低于砌者百級重寮洞開直視十里負
戴而來者望之如鷗乘軒而過者擬之以艇坡塘高
低岡阜回互香氣拉雜雲光降升促織繞砌聲如碎
琴風蟬過枝韻疑零鐸遊藤綿延上樹皆紫細草芬
郁杼花必黃乃蔽炎牖爰開北窗松露尙零柏風成
陣家京國者離然有雲表之慕宅南中者又恍然有
江鄉之思焉林陰屢移羽觴乍接果則紅暈徑寸與
藏冰而共升瓜則生黃滿盤汲井華而并薦陶令之
榼無時不攜韋公之莼適心而飲相與商確今古縱
談雅俗據石命句臨流作圖幽襟旣抒勝賞斯愜又
破曙而遊薄暝始返星河滿空影乍曳平籠燭雷雨

在後勢忽掣于軒帷此又晴晦出于一時涼燠交于
俄頃者焉同遊者爲許封君兆桂張運判道渥李刑
部鑿宣何工部道生吳明經方南及梧門學士與余
凡七人運判旣爲之圖余因序其顛末云時辛亥年
七月初四日也

長河萬柄紅荷花匝月不來開已半花枝似嫌河水窄
幾葉亭亭欲升岸初陽入浦看難定十里雲光自凌亂
寺門南下景最幽可惜年時水波斷田田葉瘦花枝悴
我欲重煩桔槔灌新秋天意亦可知雷雨急將新水換
別來花不忘前約一朵迎人出橋畔東西燕剪掠不停
惹得盤珠落無算鶯黃鷺白來成陣一一見花如欲喚

花香深處朱樓好，檢點新涼放詩案。明朝無用騎馬來，
畫取花枝卷中看。

送趙大令希璜之官夏邑卽題其三十二峯詩集後

昨來卸輕裘，今復馳急騎。牛腰詩卷行，必借復恐人呼。
作塵吏趙生三十詩名早脫手，羣公已傾倒黃生。謂仲

租屋與對門，五夜登誇詩句好。爾來十載官長安，君行
入關我出關，終南太華昔皆歷。所恨背我遊梁山，搜奇
別勝狂如馬，好古如君亦應寡。摩天欲覓秦昭箭，掘地
能尋漢宮瓦。山南山北行不休，官好到處容勾留。幾年
頗喜善摘伏，一事可慙同摸邱。盤盤法物歸樽俎，奇字
入詩詩愈古。我披三日手不停，可惜良朋已黃土。贈仲

歷官差喜名區多昔傍陸海今黃河譙城北去黍邱在
不日付聽疲民歌河流日夜奔馳速此土年來亦非沃
故人一語欲規君好破夜陰披案牘

跋鐵宗伯保容臺詩卷後

梧門學士交何遲乍見示我容臺詩宗伯屬梧門學士轉示亮胡容

臺詩名高北斗三百二篇如一首誰言官貴詩難工此

卷半出雲霄中

西清南苑日趨侍日月滉漾天花紅橫山北上灤陽道

眼底萬峯青不了直廬夜半忽朗唵拔地倚天長句好

琅邪參政劉嘉禾翁麟詩名海內歸秩宗先生健

筆復軒舉要與冀北開宗風萬條紅燭併官騎正好同

官有難弟玉關學玉保玉河斜月午門鐘馬上百篇成復易我
前讀公詩今復隨公遊殿頭作賦公最賞可許執筆從
螭頭君不見丈夫事業垂區夏豈僅曹劉與方駕他時
一品集編成我欲作文同鄭亞

法學工式善山寺說詩圖

茅屋十數間青松百餘樹昔爲說法場今作談詩處說
法祇了生死緣不若說詩能使死者不朽生者傳倘同
天釋較功德一瞬萬古殊相懸梧門學士才名勁說法
亦同僧入定席前傾耳凡幾人木佛都疑座旁聽談深
不知寺在山高論往往通天關指揮若假鐵如意花雨
欲落茅檐間詩龕左右詩如海時譏近丹墨紛披幾年

載他時悟後忘語言更有不傳詩法在

送周同知世紹回西安

詩名宦蹟廿年中雅與高三十五同君好二十雙節正

堪膺上佐百篇曾共賦東風同官一輩憐亭長自號

音亭長時因爾連旬夢石公君與張舍馭欲別更邀通

夕飲城頭殘月已如弓

贈陳方伯淮

十年兩度謁行旌叩閣皆逢失喜迎殘雪尊罍滋水驛

經秋風月武昌城詩名早見題襟集世澤欣承曳履聲

倘許從容話鄉里鵝籠我本舊書生

偶成

白露甫三日闌干著意涼偶然飛雨至花亦點頭忙
雨中答法學士見懷之作

重門三日雨百鳥響俱寂秋館渺無人青苔夢行客閑
房夜難寐矯首望城北昏霧接半天連林色如墨遙憐
通德里定閉草元宅瓦燈紅一盞砌草荒三尺應有苔
唵人披牕檐漏滴

卷施閣小集

秋樹脫一葉素心來幾人將以屐齒頻補此閒庭春閒
亭立多時一客入門喜胡蝶亦翩翩飛來客懷裏斜陽
倏西頽新月已在東同心六七人團坐秋陰中秋陰何
離離一榼傾未了幸有石上藤先扶醉人倒屋南青梧

桐屋北雙株槐諸君欲言歸正好月滿街

十三日張運判道渥招同人小集分韵得露字

長安路花無邊酒無數醉中陶陶十年佳酒客家家識
門戶西風幾徧吹酒人去何處今朝花下飲忽復思前
度主人愛客黃金富何不先將酒人鑄長安路人生行
樂須及時君不見屋角殘星草頭露

中秋日無月獨飲

中秋月一年無一年有有月卽出門無時滯盃酒離離
雞冠花短短鴨脚草秋紅旣傷心秋綠如何好秋雲吹
黑入酒尊長安北來無酒朋坊南深冷一間屋判與無
月還無人闌干影外初停雨舞罷筵前小兒女我有心

情梁燕知三更尙作將離語

十六夜有月

幽人喜新晴屋角看星影
巡廊才數武圓月出西嶺
白雲東西飛不停七里壇
樹秋烟平危樓驚起白蝙蝠
似曳疋練空中行天橋南北
千家宅萬瓦參差月光濕
柳絲如沐草垂珠添得碧
苔無限色微風吹空月流波
出翠落向城隅多清輝入掌
覺微膩衣上似復傾銀河
歸來敞南軒傾此一榼酒
三更靜後無一人却喜戴頭
惟北斗北斗未落客不眠
一榼酒盡愁無錢光明如此不
須燭却把道書梯上讀

卷施閣詩卷第十

陽湖洪亮吉著

祕閣研經集

辛亥

南樓憶舊詩四十首

并序

夫鳥以高爲巢魚以深爲穴居魚鳥之中者人也築
基九層而上爲之樓則與鳥爭高矣濬池十仞而中
爲之島則與魚競深矣然鳥啁啾而爲巢使無矰繳
之患則終歲猶是也魚屏營而爲穴使非芳餌之誤
則畢世無易也人則不然飛狐落雁之嶺八埏之險
也鳥所不能飛者人或上之矣奔霆浴日之區九州
之浸也魚所不能歷者人或過之矣則夫陟險不已

將迷東西揚帆倏來杳無津涘當此者其亦有故巢
之戀在沼之思乎南樓者外王母龔太孺人所居也
余以孤童幼蒙鍾愛年未毀齒從母移居姊越十齡
弟才匝歲魯國男子方驚毀巢漢陽孤生未歌窮鳥
由春徂冬衣無單複之製以夜繼日瓶無逮晨之糧
爨爨焉踽踽焉蓋十五年于此焉若夫雨龍竹馬瓦
狗泥車探春燕于棟頭捉秋蟲于徑裏岡賭跳而將
平井投輒而欲滿臨溪咒鴨涉渚撈蝦旣兒戲之無
方亦童蒙之求我此一時也隨母梳頭之歲從師識
字之辰烏馬混于一篇蚯蚓登于半紙藏書之篋時
匿意錢衣帶之旁私携面具同學則謝家阿買送餐

之竿與神燈並出販脂鬻藥擊鉢吹簫莫不紛至沓
來風馳雨驟此又晏嬰之宅因近市而居奇虞氏之
樓以臨街而角勝標孝侯之風土記荆楚之歲時差
可連類而書削牋以奏者哉詩四十篇稿成以寄巡
檢二兄上舍三兄文學四弟凡爲此者亦所云寄魚
鳥之思今昔之感也

沿溪樓閣枕南頭溪水迢迢自北流怪底近來鄉夢好
一旬多半杏花樓

載來塵具不盈車孤另偏應託外家絕似幾番霜信後
一枝籬落寄生花

余家自迨賂先曾祖大同城工核減
帑項田產悉入官至先君子下世遂

無乙椽
可居

循廊三折入層梯板屋居然判畛畦不向大家厨索米

自泥新竈小樓西外王母以南樓西偏一間令太安人率余兄弟及三姊居之

七齡入學感孤兒逃塾先教都講唾燈下國風還課讀

始知阿母勝嚴師余七齡附學實君舅氏書塾蒙師為憚牧巷先生外兄肇新則學長也

婉轉隨娘識白憂貧家照水亦梳頭不知梁燕緣何事

却怪春人懶下樓此言諸姊隨太安人作苦終歲不下樓也

三月青黃不接時燕南書札寄歸遲朝來欲糴桃花米

已報租船到水湄外祖母田不滿百食指浩繁每及缺乏時素園舅氏館于京師亦間寄修

脯歸供
匱乏

黃泥墻北颺街塵簫鼓嘈嘈聽未真清曉上書還木半

巷頭不放在看迎春

則裴氏小奚盼日影之不西怨鷄聲之太早此一時也至乃歲值元枵門憐奇窘仲理則厨難耗鼠史雲則釜欲生魚井淘麥屑反避知親徑拾墮薪偏逢長者然而天青入牖水綠周堂秋月塞門春花交砌何嘗不破蒂而四顧擁絮以周遊此一時也又或蘇季士書全家盡返桓姬索米半舫爰來謂曙齋舅氏及適楊氏從母中外則雙丁二到不乏奇童弟兄則錫未封胡并饒道蘊虛堂論史鵲亦垂頭側經猷詩蟲來嚙踵篙師南巷雅乞書符蠶妾北頭偏多問字此亦一時也授徒北館作贅東堂卜商色養之時賈誼秀才之曰會稽僚壻動色而見巖生陽元尊章改顏而親劇子鄰

有束絢之饋室無憂釜之聲闢竹徑而待賓借柏堂
而讌客此又一時也詩曰維桑與梓必恭敬止又沉
螟蛉果羸之場與松柏蔦蘿之所乎此則明明如月
難忘在闔之辰悠悠我思無踰樹杞之里遺聞傳于
廝養瑣事得于鄰童畦栽赤莧則湔上之蒼頭穴識
金鑲則羊家之故媼失簪楚國墮履徐方燕知春社
之人犬識衰門之客延陵之劍無封樹之堪懸班惠
之書有篇題之可認能無墮傷心之淚鐫思舊之銘
乎又況臘頭社尾上巳元宵餅值春辰饌名令節楊
柳半橋之月芙蓉北市之燈水增一尺則已嚙閤門
樹密三重則隱開樓扇爛龍之首與鳴尾競高彩鷓

夜寒窗隙雨淒淒長短燈檠欲迷分半紉絲分半讀

與娘同聽五更鷄餘八九歲時自塾中遣歸每夜執經從太安人紡側讀恒至漏盡

一年多半住江邨饋歲匆匆入里門不待郡城元日到

江船先已送河豚此謂素園舅氏妻楊孺人江陰楊文定名時猶女也一歲歸寧時多惜蜡

臘乃

十齡左右謝家甥孤露偏憐易長成綰得一般雙角髻

家家戶戶拜新正

侍郎宗派號東莊愛女先教住近坊便了作奴如願婢

有人分日饋羹湯玳瑁適莊氏從母事外氣常分日饋羹

西頭阿姊慣句留小極扶梯不上樓約得走橋諸女伴

背人月午更梳頭

天中節後賽神多十六雲車次第過剛是卷簾迎面看

水嬉又報進城河吾鄉乘車相傳隋司徒陳杲仁守城時所創今司徒誕日及賽神皆設之

城內外凡十六坊故數亦十六

迎門西去徑欹斜曲曲房廊被柳遮一尺井闌涼沁骨

記曾團坐說人家外家清洲近門西偏有井最

清明過了又端陽母不梳頭針綫忙幾日斷餐緣底事

疊錢來買束修羊脍都從師者饋束修常以清

衆裏聰明百不如學將新樣寫神荼比鄰一半迎春帖

乞取蕭郎弱腕書歲餘前歲日臨溪三五小

久別都應見面生相逢幾徧問年庚早來阿母房前過

親切重聞喚小名此姑適河橋程氏姊姊為曙齋舅氏與余同庚從宦京師十年

問齒長
幼故云

江鄉豐歲景偏饒親製連環小樣糕一棧牢丸三百顆

歲除筵上吃元宵

此指適楊氏從母居城東鄉芳茂山下歲除嘗饋外王母饑及粉丸外王

母以分給諸孫及余
等粉丸俗名元宵

走索人教細馬馱十番纜了又秧歌臨街樓上慵騰坐

要看魚龍徹夜過

樓前為縣學場每
春日百戲俱集

問訊厨娘去不回歸寧百徧使人催五更枕上春波響

知是山橋艇子來

從舟楊自棧居後隔二歲始一
歸寧外王母必遣人促之方至

樓前楊柳最依依樓下人家試袂衣那識清明好時節

滿樓胡蝶雜花飛

雲漢清明前
後風景尤勝

尋常不放到門邊生小都憐疾病牽記得廿三逢縣考

小心囑上渡頭船

籍指十五歲時初寄湖應童子試也

連屢北出竈新添叠日齋厨課米鹽買得吕家新宅子

小房分住白雲尖

嚼齋舅氏出後從外祖文元遂徙居白雲尖

新裁錦襖束當胸競渡先將逆浪衝日午晏公祠外路

暖波初試小青龍

吾鄉竟渡最盛以余所見不下十餘有金龍小金龍青龍小青龍白龍及

緜色龍

別開池館隔重墻半種芙蓉半海棠留得一方明月在

倩人涼夜捉迷藏

此指從舅氏叔宸先生所居在南樓西偏饒有花木余幼時常與中表寅

嬉戲于安等此

社公生日是來朝已聽沿門畫鼓敲今歲燭龍添九節

簇燈還插滿池菱

元宵及社日並有籠燈自三節至九節不等其簇燈之佳者俗名滿池菱

八字門偏路復又春陰曾不隔窗紗冥濛添得墻頭黑

知是東鄰皂莢花

此指從舅氏秀君先生所居在南樓東偏鄰有皂莢一林覆屋常滿

塵上真疑欲汚人尋常眾裏亦嫌身蓬門一例先教鎖

明日高齋會六親

自移居後外家有太謙集太安人常鑰余兄弟于室中不令出

一條幽徑幾家通徑轉偏憐曲似弓攜得紙燈何處去

石榴廳北捉秋蟲

外家東廳側有長巷一條門凡三四從外祖承嘉及從舅氏于璜先生等

並宅馬石榴廳即從舅氏居也

銀泥榻子粉紅墻蛺蝶遊蜂爾許忙一陣暖風初過處

百花齊撲曬衣場

南樓後有隙地一屋為曬衣之所

纔過中元又下元賽神簫鼓巷頭喧年來臺閣多新樣

都插官花扮杏園

賽神會中每用七八人扛一棹上扮金元院本諸故事名曰臺閣

手簡先蒙羣從招郭東明日合登高晚來乳媪床頭說
好吃倪家九日餠樓外臨水有小家住宅三四其一
也

新來小婢勝樵青識字依稀認一丁乞與百番書紙仿

韋郎十五擅書名此指索園翁氏自紅西罷任回有浙

一室如瓢枕水隈綠楊影裏小門開紙鳶脫手人驚散

却值先生曳杖來外家書屋名

昨宵短至飲梅漿功課新添日影長還喜學學堂人散早

初三新月上紅墻樓東

榻子通明刷絳紗小庭三面放秋花已涼天氣清如許

約伴今宵守月華庚辰辛巳歲後值中秋日每與外兄

南樓子月華
恒至徹曉

除夕初開讌喜筵諸孫合隊拜床前有心欲乞奇書讀

辭却朝來押歲錢除日懸青錢結百索賜
押歲錢亦名百索

園扉斜對禮門開纔著襪衫馬已催惹得比鄰皆注目

秀才初謁泮宮來此余初補博士弟子員日也從
舅氏園門與學官禮門正對

露滴新紅水染藍兩重門裏試單衫齊花撩亂春如海

記得年時三月三吾鄉諺云單衫三
齊花兒單衫

只把聰明譽慙孫說將孤露便聲吞紗帷寂莫庭花死

垂淚頻過通德門外祖母以乾隆丁亥十月晦日
世不數年樓前杏花亦萎

題張同年問陶詩卷

同輩二三子詩各有所優或優春夏氣亦或優于秋惟

君一卷詩盡把秋氣收讀詩亦不同候有昏與夙或當
暎凍星或欲秉明燭惟君一卷詩宜剪秋燈讀昨携君
詩歸氣候已迫冬倏然一室居四面皆秋蟲又疑秋鳥
鳴嗷嗷滿寒空此聲非出砌此聲非出籠有聲亦無聲
均出詩卷中秋燈乍滅還乍明時復朗誦時孤行思君
此意不可得無乃造物賦爾偏多情燕臺住十旬蜀道
遠千里思親兼念友悒悒何能已我欲借春氣生君十
指問方君作詩時桃李皆開顏迨余讀詩日花色猶斑
斕然後登君堂飲君酒我狂可百樽君捷亦千首謫仙
和仲仁姦諧蜀並庶幾若說今人已無偶

附原贈作

張問陶

翰林筓未遇名高神采王歌聲塞寰瀛筆與嶽瀆抗
今春同拜官識面鑿坡上示我紀遊詩雙眸豁層障
墨雲騰十指一往但奔放崑華想欽寄江湖寫清曠
眼前真實語入手見奇勑五字作長城騷壇踴名將
我生齊楚間望古心無讓衣染泰山雲帆迴洞庭浪
年來苦饑走轉喜遊蹤暢足跡半人寰舟車隨所向
夢中窺海日愁外看雲嶂方域所區分鶯花亦殊狀
方知詩律難一得終無當小技具神工乾坤歸醞釀
軒然讀次作一片官音亮萬象羅心胷此才胡可量
詩人遇不窮名士語何妄努力頌昇平殷勤副時望
長至前一夕久坐待張同年不至兼懷里中舊遊拉雜

書畢不覺破曉

三更正穰人一馬嘶過巷失喜自啟門正與馬鞭撞馬
鞭東指客面生孟浪客前還致聲入門無聊出門走更
向街西布春酒歸來風葉隨打門打門童驚欲詈人僮
癡貪眠客貪起十二曲闌行不已隨闌一曲酒一盃靜
若主客相追陪青天淡淡雲如掃月光畢竟江南好金
波樓閣紅闌橋去年此月還此宵相思不獨人如鶴兼
有野梅初破萼梅枝開落未一年轉眼客路成三千人
燒銀燭朝天早我典金貂猶醉倒坊南遠客期不來不
覺一窗先白曉君不見我居咫尺郊壇中壇外雲氣升
如龍更殘烏鵲不敢東

天子今夜居齋宮

附

張問陶

臘月十三日與朱習之石竹堂錢盾夫飲酒半夜忽
有作道士裝者影門掩入視之則洪稚存也相與痛
飲達旦明日作詩一首分致四君同博一笑

勝侶偶然合何妨一舉杯南隣朱老聲如雷大呼僮
僕無遲回曼卿亦復隱于酒錢郎爭勝惟狂吼閉門
歡笑儼一家掃除賸客如揮帚回看好月來窗下更
洗清樽同卜夜肴盡將擒寺狗烹壺傾又向鄰僧借
客貧歲暮時搔首豈不懷歸愛吾友任他風析響三
更密坐談心還執手何處微風入開簾若有人羊裘

瓊履五柳巾莊嚴妙相如天神大叫取酒來四座皆
逡巡疑是唐朝酒人李太白不然定是荷鍤所埋劉
伯倫屋漏之神或大笑公等無鑿混沌之七竅樽有
餘瀝且澆之乾坤浩浩知爲誰吁嗟乎乾坤浩浩知
爲誰醉中各化飛雲飛

十二月初三日雪霽邀同年張問陶顧王霖過飲醉後
作

牆東半畝園雪積難置足客來門亦鎖護此一庭玉高
低枝上白萬條愛惜不遣兒童搖今宵却初三新月出
墻腹峩眉山下人聞來訪庭竹掃此枝上雪迸作盃中
春冷飲亦可堪胸次饒春溫閒中富貴誰能有白玉黃

金合成酒屏除童僕不入門行酒却驅坐上賓公榮不
飲亦殊苦罰作怪禽筵上舞墻陰一尺掃不開醉便埋
此何須回一層銀燭輝一層新月影樹頭屋角看更奇
倒射清光百餘頃主人不送客亦行脫畧酒後皆呼名
來時衣上黃去時衣上碧來乘斜陽去月色君不見人
奇馬亦清到骨嚼我海棠枝上雪

附同作

張問陶

臘月初三雪後拉容堂就穉存飲酒醉後酣卧雪中
不知何以遂至松筠禪院五更酒醒見案上有朱習
之方茶山名刺僮云此二公者昨日戌時過訪坐此
室中談笑久之乃去主人不知也因細詢昨日事僮

云主人在雪裏時但聞洪顧二公呼李太白主人在
床上時但聞朱方二公叫劉伯倫而已

賓主威儀一笑空酒杯嵌入雪當中大家伏地同牛
飲直有無裏已上風

錦衣玉帶雪中眠醉後詩覓欲上天十二萬年無此
樂大呼前輩李青蓮

何人負我入輕車混把空門當敝廬寄語鄰僧須看
樣非仙非佛是真如

上帝敲門也不開偶然醉死亂書堆比鄰二妙真多
事悄入遊仙夢裏來

張同年將乞假歸蜀醉後作兩生行送之

一生居坊南一生住坊北車聲馬聲不得停十里路中
常若織我馬見君馬鳴聲一何高君僮與我僮望著手
卽招我來時多子來少馬繫寺門僮醉倒青天如磨旋
不休醉裏有時來打頭心癡直欲走天外下瞰日月方
開眸朝沽三升算盈斗吸盡東西兩坊酒朝衣典盡百
不憂尙有身上青羔裘一生皇然開笑口那著酒錢街
上走一生無聊想更奇酒盡伏舐壚邊泥有時忽下牀
有時忽出門人來雪裏衣盡白疑是送酒柴桑人幕天
席地原無礙十萬人中兩人醉醉中分手亦不辭淚墮
黃公酒壚內君不見長安莫復輕酒人酒人腹裏饒經
綸容卿百輩等閑事爛醉尙復噓陽春一篇我作臨行

曲馬帶離聲。欲哭從此長安少。一生酒星只照南頭
屋。

附同作

張問陶

讀君兩生行涕笑。一時作黑夜關門讀不休。打窗奇
鬼爭來攫懷詩。急走心茫然。遠登雲棧如登天。人言
彼土卽吾土。藏詩可以經千年。我方欲西行。一星墮
我前。戴罽衣。甕佩龍勺。俗客驚駭疑真仙。莫驚鬼奪
詩。我爲公呵護。且復立斯須。和此好詩去。是時下界
冬已殘。風狂雪虐天漫漫。一生牽衣愁欲絕。一生和
詩嘔出血。城南萬柳禿無枝。天詔酒星綰離別。重讀
兩生行。如見兩生情。一一若吾語。大痛難爲磨。翩然

一躍入杯底繞地萬人呼不起生瑜生亮偏同時萬
古之名今已矣酒星抱月來擲入兩生杯兩生驚起
糟邱臺歡呼轟作隆冬雷忽聞門外征馬語兩童泣
下紛如雨馬聲高朗童聲俯似訴兩生離別苦一生
聞之悲一生聞之喜兩生悲喜人不知天外浮雲地
中水君不見開天盤古氏其情最可憐九州莽莽無
人烟獨坐獨行一萬年又不見高真之居亦孤寂舉
酒招人人不睨九天費盡百神謀僅奪唐朝一長吉
兩生把盞同軒眉居然日日相追隨一生偶送一生
去臨期何必吞聲悲我馬莫憐君馬獨君僮莫向我
童哭雲天萬里好聯吟共把長空當詩屋

再送張同年一律

更從何處別且復上高樓
一世真遊戲三旬偶滯留
已超生死劫難破古今愁
何日青天外同君一舉頭

附同作

張問陶

吸盡都城酒萬杯此行原不算空回
眼前醉語天叟去別後詩情夢補來
小佳談心孤月滿狂呼拍馬亂
山開思君他日書千紙定向峩眉頂上裁

小除日仿唐賈島例與張同年問陶祭一歲所作詩並
屬王文學澤爲作圖各係以詩

君詩四百篇我詩六十首君詩苦多我苦少
差喜流傳同不朽我年二十登詞場接詠
已有橋西黃仲則晏公

祠內祭詩處一屋神鬼皆憎狂生年三十九奇肆是日
孫郎號同志筆壓南山白額愁挺鋒復把生龍試燕秦
楚趙遊何壯所不能臻祇天上風月千場酒萬場醉中
歲月偏奔放爾來四十氣已降筆陣敢詡今無雙异才
爾復出西蜀百斛龍鼎邀同扛前年同客龜山左我不
知君子知我直待蓬山頂上行相知一世方能果我詩
與君詩識者不能別雖然我自知與爾陳一一長江一
萬里先瀉君門前若論飲水源我較輸君先一年三百
日日有昏曉若量日出時我比君家早君如吸盡江
水源使我門外朝夕無奔湍我如繫住西馳日令爾屋
頭終古長如漆我放白日西爾蹴江水東高高下下總

無極與爾分半填心曾爾筆何處架青城與峨眉我硯
何所支黃山與天台天公夜半笑口開餘子位置綦難
哉此時一瓣香裊入九霄碧惹得千家與萬家如椽紅
燭都無色君不見黃郎黃郎已前死不及見君詩百紙
孫郎雖狂一字無見爾亦作奇人呼今宵約不來苦說
有官事坊西令我走不休欲拉閑人作陪祭醉中一客
爲作圖更遣一客題分書時殊適至君不見門前車轍
痛掃除分付鬱壘同神荼今夜俗客不許來催租

送張同年問陶乞假歸蜀

并序

乾隆五十六年歲在辛亥二月朔日同歲生張君問
陶乞假歸蜀其及洪亮吉采玉田之蔬挈山陰之尊

送之于國西門曰足下家居遂寧婦留成都鼻子遠
宦已傷親心累臣贅秦復悲身計然則足下辭金門
而南邁並赤日以西馳勞乎此行蓋非能已仍復迂
道密洛戒途雍梁爰謀裏糧並訪親舊西嶽道士留
之而不能東方細君隨之而共反百武之外弱弟出
迎一門之中密親咸萃解笏金而貯案被采服以娛
親雖巖生告歸相如乘傳不是過也又足下宰相四
世孫也葛侯冢畔八百之株尚存名公祠旁一隅之
宅能割谿茶可采則病婦攜筐山筍欲抽則衰年補
徑秋原半頃稅給于王官春韭一畦食供于家老而
且糲米作糲春麥爲羹以資餘人或給耕者甫生之

犢等愛于孩提頻來之燕視同于親故則亦物我均
適心形兩忘者焉又況蠶經禽演不乏奇書蛤港羸
田別開精舍臘頭宴客社尾迎神朝衫忽著則鄰里
詫觀縣介偶來則牛羊驚竄南軒旣闌北牖時開果
落枕前花開鏡裏一林百樹招鵲辭雅雙澗疊波留
魴放鱧若是者采其吉語娛我眉梨懲彼殺機戒茲
子弟播三田之種閣上巡觀虞七月之章房中屬和
未嘗不集吉門之慶極幽居之致焉定省之暇時而
出遊則峩眉當其前青城出其後大江流其左資水
徑其西解角之鹿可施鞍橋浮鼻之牛以當舟楫餐
雲欲嚼之嶺采藥斜陽之洲團蕉數尺非佞佛而可

跌危梯百層不學仙而亦往閑防疾厄時覽方書偶
有篇題緘之經藏此則金門大隱不止平原玉筍真
人復來宏景若夫僕與足下之交道又可言焉僕處
鳩音之里君居吠日之方蛩距之合無由牛馬之風
不及乃闕前一覲忽若素知飲中百篇愛同前哲顧
性嗤釋氏敢侈前因亦鄙道流詎云緣法靜言思之
迨卽吾儒之所謂如舊相識乎夫卅年成世足下旣
近之僕則又過半矣俯仰一身離合萬里常恐百年
交道不盡然精氣不散當成神明風車電帷來往不
絕則僕與足下又何慮哉又何慮哉自此之別一日
之內僕眺朝陽君眺夕采一江之流君飲水源我飲

波末則亦何嘗有須臾之間遠近之殊哉保喬神理
時時讀書簡牘不詳悉之于夢亮吉頓首頓首

城南初日照高樓樓下勞勞僕馬愁此日別君須握手
古人見爾尙低頭交同北郭推三世學許東方記十洲
竟欲上天留不住夢竟隨過古安州

附留別詩

張問陶

離筵相對別情多曾與羣仙會大羅半世心交偏得
爾十年詞筆偶登科堅持壁壘爭詩律亂擲尊罍闕
酒魔忽送孤鴻天際去月明千里意如何

年年奔走逐風塵又對春明折柳人蓋篋隨身千管
秃鷄衣衝雪一童貧山中酒熟還家好雲外心閒得

句真肯學長卿西去日高車駟馬嚇鄉鄰

一椽破屋寄三川累我西行欲上天十萬峯巒生足
下尋常雲月在眉前花時泥飲從田父雪夜狂歌理
釣船只恐重來忘禮數倒持手版謁同年

小碾輕車出鳳城東風煖到子規聲一官偶得常疑
夢萬里能歸豈好名細詠白華真樂事便言畫錦亦
人情迴鞭忽下憐才淚八百孤寒羨此行

袁大令枚病中以自挽詩索和率賦一篇寄呈

我生爲鮮民逮養苦未果孤真同孟陋名合作楊軻雖
然檢此身欲死尙不可唯公丈人行早結文字緣事勳
與文章一一喜可傳卽論委蛻期事亦須推袁幸公未

死時我欲代公述二十厲志初七十著書畢若論文福
兼公可死者一早年預清班繼復作循吏風謠至今留
俎豆倘可異若論位望亨公可死者二君卿取十妻諸
葛得二男身如柏枝強境若蔗尾甘若論居處優公可
死者三十洲縱未逾五嶽已畢至黃山武夷間垂老游
復肆若論山水緣公可死者四拾遺蹈耒陽供奉隕江
澣昌黎不攝生和仲備疾苦若論年命豐公可死者五
中書廿四考方鎮四十年汾陽處危疑長沙疾繇延身
命匪不達得不償失焉何如公致身半世卧巖谷入門
與出門偃仰無不足若論心志舒可死不止六世凡號
爲儒家置公一編上者師公文次學公詩篇下逮決科

策誦之口流涎公名聳聳知公貌僮媪識或疑天上人
或引作前哲寧知公尙在年僅七十七如此復不死寧
能望神仙勢必神采離形作塊壘牽與其卧閨闈曷若
墟塚間顏公自爲銘陶令自作詩頗怪同輩中一一不
和之逮公始創例編索執紼詞我謂果愛公生并致脯
奠及公能飲食一切口嘗徧庖人出新意尙可令公羨
又公在地上說鬼不肯休恐歸地下時萬鬼聲啾啾蓄
憾旣已深瓦礫伺間投公其見夢余聊可助一臂公雖
塊然亡我尙有生氣鬼車與鬼馬碎易一萬騎公今雖
自挽我更欲速公公如讀之竟大笑聲隆隆當嘉此狂
生交道有始終

袁大令以辛亥除日復作告存詩七首索和戲加二絕

奉答

赴書昨日過江東消息傳來總不同我信戴逵無死法

越中名士勝吳中

辨誤錢少宗
赴書至京

儻來勲業那堪論
絲竹東山道自尊
却見白鷄原不碍

故應久占謝公墩

已抵紅塵一百齡
名山五十載
韜形如何更展人間限

天上多應妒歲星

告存纔接七篇詩
此語賓朋喜可知
誰識仙山樓閣裏

有人望眼欲穿時

準擬銘旌已欲題
無端白日忽回西
生天成佛都應後

莫晒精廬孟會稽

耆舊居然壓輩羣老來心力著書勤十分彭祖當時壽
却愧公還未一分

人嫌不及此偏過恐是神仙受折磨謫籍至今填未滿
周妻何肉累公多

名山咫尺好攀躋趁此春江綠欲迷畢竟太真年命脆
請公來日試然犀

脫手新詩衆競鈔豐干莫怪舌偏饒兩篇多作非無意
先代巫咸賦九招

里中十二月詞

辛亥小除夕避債沙河門側因憶里中舊遊及諸勝

事爰成十二月詞十二首

西瀛里畔人聲沸翠色染天紅蓋地排門剝粉書豐年
屋後水扉燈影連橋上人橋下艇不斷槳聲兼帽影東
迎邗水西接城夾河祇聞爆竹聲料量香燭南街口共
向喜神方上走元宵節近當出遊却喜客歲晴中秋縉
西瀛理中爲百貨叢集之所臨河一帶皆染坊屋上
飛竿插天大率皆曝布廊也除夕爆竹聲尤盛諸朝紅
綠紙積地常至寸許又里諺云中秋雨打上元燈若隔
歲中秋晴則元夕月必大姤以此爲驗十常不失一

右正月

神祠昨日銜花笑屈指社公生日到龍銜九節茭滿池
就近還叅各神廟後街絲管聲沸天鐙影直接斜橋邊
衣香隊裏春雲熱謁廟仍須夜深出鐙光疎處穿市過

社公不拜拜社婆延回只說歸塗枉朱雀橋邊水聲響
笑指鄰家姊妹言百花生日還相訪公理中近年尤重社
宵更盛城內外社公祠數十區惟北後街及斜橋二處
最修整至期絲竹聲每徹夜不絕領城士女皆于更定
後出遊朱雀橋在玉梅橋
東過橋即楊氏園亭也

右二月

二月二過三月三薺花黃徧穿單衫單衫何處尋春好
先踏艤舟亭畔草紅梅閣接迎春堂一路草香花亦香
紅牆缺處危樓突正好滿塘春水活賣花擔子不得停
昨日寒食今清明花間古廟門開早一片香烟接花裊
傾城人出不遽歸緩步却從城北回君不見興蘭欲訪
閒桃李却惜山莊前已圯里諺云三月三薺菜花兒單
布衫簾舟亭紅梅閣迎春堂

皆在城東距城北三里有青山莊為前明吳氏別墅林壑之勝甲于郡中雍正中張布政迺居之後籍入官為里中富民所有乾隆三十一年其家中落遂拆以償通今久鞠為茂草矣

右三月

玫瑰花香一城嬾數起數眠天不晚城彎北去覓午涼
柳線亂將行客縮鱗魚上市值萬錢山筍轉嫩櫻桃鮮
微泉閣枕緩雲閣商畧欲啟茶蘼筵廉纖梅雨纔經夕
已報江波入三尺趙家樓上望欲驚畫舫却與樓窗平

出東門至天寧寺後有曲巷一條名城灣夏中納涼所也微泉閣在縣學西侍御史董玉虬別業今歸趙氏緩雲閣在雲渡東

右四月

柁工昨日支關鈔迓得龍頭出神廟龍身沉處奠酒肴

頃刻龍尾波心搖六龍城古龍舟七城北東西按方色
 一層彩額鎧一層水面徑看高百尺晏公祠外臨河澗
 朔日先聞賽神鼓三元高閣颯錦標聯尾北出迎春橋
 飛竿快槳都成隊船上樓中卷簾對打招要取波面寬
 一舸前呼百船退雲溪半里樓接天一河鐙光人不眠
 龍頭纔過看龍尾四面十番絃索起洞庭楊梅甜不酸
 更有盧橘堆成盤舵樓吳姬約早餐港口昨到江魚船

每歲競渡時一龍舟劍支澗暨關稅銀十餘兩常州城
 有六門舊號六龍城余所見龍舟有大小青大小白及
 烏龍金龍五色龍凡七午節後篙工取大石沉舟身于
 河底而以龍頭藏廟中至用時乃迎取馬晏公祠三元

雲閣在

右五月

萬花開後園林老日永如年客來少銀衫斗笠思出遊
 城北水上多危樓窗樯豁處天光現十頃荷香撲人面
 東西兩水夾寺門水綠欲把門扉吞紅闌幾曲生林杪
 屋古似巢僧若鳥閒僧喚客客不應小艇出市前溪淺
 晚涼莫向閒街走九栢山房門新酒城北放生巷西外
 有池寬至十數頃
 荷花甚盛菴南卽元處士謝應芳祠祠後有樓甚
 涼敞又西行數十步卽楊進士倫九栢山房也

右六月

七月七日侵曉妝牛郎廟中燒股香回塗更把裙衫整
 織女橋邊鑒春影彎彎新月看至圓結伴好上臨河船
 東塘北岸人爭覷倚艇低頭放鐙去今年鐙樣人更誇
 飄出萬朶紅荷花年年歲歲祈無疾自信今宵鬼緣結

君不見東家女兒結束工染得指甲如花紅斜簪茉莉
作旛勝鬢影過處饒香風又不見西家女兒還未嫁閉
戶挑鐙坐深夜神鐙社火總不看獨望銀河占米價此
外十里有牛郎廟旁一木橋俗名爲織女橋中元日土
俗普放河盞又多市楮幣于深夜燒之名結鬼緣七夕
前後天河隱不見者常十數日吳俗
以日數之多寡驗米價貴賤多不爽

右七月

十三月如元宵十四十五光尤饒蒹葭莊來鶴莊更有
蘆墅淺堪嘗歸來樓上開扉望正見光從海門上江波
濯月月更涼千戶萬戶堆新霜層樓影向三更直高下
稜稜瓦檐濕更殘女伴出走走橋行過八字剛三條顏顏
難却鄰姬請更走烏衣及紅杏莊家燈謎猜不完曲巷

更有花鐙看打十番跳百索攔路復看飛鼠落兜鞋纜

了復墮釵南街怯行行北街君不見團團明月方迎面

一入采棚天不見蒹葭來鶴二莊桂花取盛蘆墅在北

橋級元豐橋斜對烏衣紅杏二橋名在邗溪上近年中

秋鐙謎盛行已酉庚戌莊公于達吉在里門延名士十

數人專司其事以是所製尤膽炙人口中秋前二日恭

右八月

中秋說餅辰重九題糕節汪三湯餅倪婆糕却與龔九

作三絕出門衣袂多北風偏向南郭聽齋鐘再轉僻寺

來城東驚聞天半人聲雜一郡人登七層塔攔門一客

索一錢鼓勢直上浮屠巔窗櫺八扇迷方向咳吐皆飛

街及西瀛
里九盛

鳥巢上前行如挽後若推足底復有人頭來飛梯盡處
波如鏡坐久蒲團始神定閒尋菊種來僧房更借苦茗
澆詩腸歸途忽見紅燈簇禮斗筵前夜焚籙雲溪倪婆製糕葛仙
橋汪三製餅皆舊有名近厨人龔玉魁製粉丸亦精清涼寺在南郭外九月中香會頗盛自城南至東郭必出崇慶寺前太平寺在東郭有塔七層爲九日登高處里中人常以九月禮斗城東毘耶室塔隱山房皆禮斗壇

右九月

一花一草都無色黃葉砌邊堆數尺下元會好強出遊
乍冷客亦披輕裘蕭辰欲借笙歌暖排得雲車大街滿
迎神曲好還送神香篆影裏回陽春馬山紫蟹螯鶴蕩
青魚尾屈指消寒會當起舍南竹屋梅乍開掃室使已
安尊疊趙君飽噉吳君飲更有蔣君工食品潁州酒政

推嚴明不到四更杯不停君不見坐中有客歸何遽欲

附租船上墳去里中賽神以清明中元三元三節屆期

兼設雲車臺閣故事頒城士女咸設幕觀馬蟹產太

繩男食量兼人吳上舍祖健稱豪飲蔣太守熊昌酒政

他人做之皆不及又吾鄉展墓以清明反十月

右十月

租船歸日盈筐載精穀上倉粗入碓嚴寒料理及薺鹽

買得城南幾挑菜花豬成隊羊一羣冬至日前商祀神

蜡筵開處賓朋滿紅燭壓簾行酒緩清歌小部方上場

門外嫁女笙簫忙君不見東鄰贅婿仍開讌自說豐年

百般便連天爆竹西半城一月不停歌吹聲樂工醺醺

里巫飽却詡今年日辰好俗于冬日預蓄菜數百斤
富人于冬至後報賽名曰蜡筵是日必備請親朋又里
俗婚嫁事必擇冬季若遇豐歲則更多亦昔人霜降逆
之女水判而止遺意也

右十一月

桃仁滿把饴盈掬臘八家家煮膏粥袈裟三百紅滿街
穿徧一城云化齋闌干影裏飛花爆相約廿三先祀竈
神祇五路土五方屋後有井堂前倉小兒新年上學堂
牲醴并欲祠文昌年殘百物先儲蓄家燕賓筵喜俱足
君不見書生計絕可憐研斷凍墨書春聯臘月八日
粥并饋親鄰城東天寧寺僧徒常三百餘人臘月初則
空寺盡出名化臘八未祀竈舊以廿四日今則家計稍
裕者皆移廿三土俗以五路神爲行人歲盡則祀五方
土士人則加祀文昌朱衣歲除寒士之窮窘者恒設筆

聯于通衢代寫素
可得數百錢

右十二月

卷施閣詩卷第十一

陽湖洪亮吉著

五陘聯騎集

辛亥壬子

雨窗讀何水部道生詩適有饋蟹者率賦一首卽題卷末

平明生輕寒秋雨閉門大窗風扇如鬼梢入竹數個起
來天冥冥枯坐無一做攬得一本詩中邊頁先破案頭
光正黑捉就窗隙卧讀一首兩首大叫急起坐波濤欲
掀屋日月忽顛簸無端蟠虹霓光怪生土堊排空一枝
筆五岳透皆過凝然七字出重欲百馬馱又如五兵利
當者無不挫讀時忽狂笑一屋悉驚邏一句復一滴恍

與檐漏和雖然萬言富無救一日餓忽然敲門來送蟹
有鄰左是時雖正晝牆外黑若磨安排醋盈盞疊取薑
桂剉呼童急斟酒好句我欲賀遺經嬾書寫卽此當清
課時爲雅切子讀詩一兩卷食蟹七八個快哉復快哉屋

漏頂上墮

自蘆溝橋西入山至花犁坎道中作

山程七十里半道馬已死澌齋駢行劉檢計主人寄坐僕

告歸一馬乃載三人來前山蒼蒼月初出對面一山看

落日微紅入水尚有光水底已復鋪新黃山風斜衝兩

山口倦客欲眠山石走一峯榭葉下趨人車上鈴鐸聲

疑嗔客行無糧馬無草三兩人家閉門早却怪前頭紅

樹多橐駝不到山初好

自慧聚寺北行歷化陽朝陽觀音諸洞晚上極樂峯作
峯形南北殊凹凸入地上天皆一日潛行五里不見天
蠟炬光遠空浮烟莓苔森森綠疑夢蝙蝠手捫皆不動
一風衝出微帶腥足底萬竅聲俱鳴好奇徑欲窮顛末
行僮失聲炬將滅四人急轉我後來風黑恍有千人追
是時屈指當交酉出洞見天天尙晝飲泉百盞神始清
坐調鼻息方遠行樹巔斜行途轉窄鴉點撲人如雨黑
東行一洞勢較低一洞復出清泉西斜陽沉沉嶺頭落
客意極疲龕極樂下方已黑天頂青側帽恐碍當頭星
自潭柘寺至龍潭久憇

一亭蓋清泉再轉泉已失山腹空若囊時時怪風出青
松高穴蒼鼠肥紅葉遠雜烏雛飛四山茫茫樵跡稀山
翠沁骨思添衣斜陽下嶺客上山山寺防虎門先關坡
陀石轉行客餓林果却從頭上墮

宿慧聚寺山房

寺門望殿樓樓迥若天上一松蟠殿角高復出千丈山
僧導客行不休石屋轉出青松頭客行開窗玩松頂下
視僧房若居井秋衾鋪月夢不成一夜枕上皆松聲松
耶雲耶不能省月裏千重百重影三更關戶禮上真北
斗正南來瞰人

日午抵潭柘寺至猗玗亭久坐

到門諸峯低青翠
收一殿直上百級奇
雲紅撲人面穿
廊入厨院百匝水聲徧
危亭圍衆綠當午無所見
林杪開北風晴陽落如綫
山牕當殿展涼燠亦時變
朝饑誰可喻山果幸時薦
吳筠雖說餅束皙仍賦麪
卧枕明昌碑狂思永和讌

亭有流觴曲水故云

慧聚寺夜起行馬鞍山麓

三更東峯明斜月逗林左
連閭無人聲獨徃意亦果
北戶昨已扃山風自開鎖
梢南通一徑細路出墻塚
碧樹合作屏黃雲散成朶
低同馴鹿步高與彌勒坐
一寺十數廊閒行止餘我
徘徊念儔侶水黑月已墮
歸路愁徑昏山榴綻如火

山房與卻侍講晉涵話舊兼呈曹侍御錫齡劉檢討錫

五張運判道渥

憶昨從君遊青山謝公宅五更搖夢醒君苦行不得出
門殘月尚在牆照見四野黃花黃傍花前行衣袂香綠
鬢欲與花爭光看山百度花千度鏡裏朱顏已非故五
獄雖成汗漫遊一春每被風光誤洪崖仙人寧足誇君
亦嬾種青門瓜雲山無意忽相合且拾山果烹谿茶對
床七輩今誰似可惜三人已前死壬辰三朔同遊青山
張上舍方海黃二學士才名上舍詩還餘李嶠真才子
今日張顛有替人曹劉聯轡出風塵青松白石談遙夜
艷李天桃訂好春時約重遊

歸途遊石鏡山作

馬行半日坡皆陡，榭葉隨風出林走。
桑乾河北飲馬時，却望樹色還參差。
平沙茫茫埋馬膝，復有一山當路出。
遠尋千級到寺巔，寺外城堞皆衝天。
紅林蕭疎日光薄，破樓無鐘殿扉落。
庭隅堆草濕一邊，夜半或有山魃眠。
梧桐葉

梧桐葉秋來大如掌，蕭蕭西風催蕭蕭。
打門響

何工部道生招飲卽席羅山人聘曹指揮銳張運判道
溼合作一圖名秋堂雅集因繫以詩

一人畫山一人畫樹旁有六七人嚶嚶屋中住曹興宗
昔時畫馬今畫松羅江東畫人不工畫鬼工張風子畫

卽有風猜葉恍起秋堂中兵曹詩百篇法時舍人酒一

斗劉灑比部談天李石我义手屋頭有樹樹杪山却怪

樹底門常關晚晴巷口車聲接一徑呼僮掃紅葉斜陽

入樹留一分道遠客欲趨城門時旒居君不見山雛窺

客喜復嗔認是昨日遊山人

遊古寺

入門悄無人北風吹小住誰肯揖先生長身一松樹

朱孝女奉親圖

孝女婺源人誓志不嫁以養父母父亡事母幾二十

年及母沒孝女年已五十依兄弟以居繪父母象懸

室中朝夕事之如生其兄某為作奉親圖索詩云爾

二十事父母三十依偏親四十作藐孤哀哀逮晨昏父
亡事毋母亦亡高齋却掃爲影堂影堂西偏兒所住生
死不離親一步行年五十不下堂父母以外無尊章畫
師敬復瞻顏色髮白未笄何可得椿兮萱兮合作圖
有儿榻兼詩書君不見孝可生孝可死由周秦逮今此
伊誰作配光青史北宮之女嬰兒子

歲暮飲酒詩十篇

一屋無閒人勉復出門走一巷無閒人驅車出坊口東
西街十里排戶歎良友皆云出門久十至九不偶沿路
爆竹聲兒童拍雙手車來仍復返斜日已西一世無
閒人誰同飲盃酒

飲酒或不樂時時復嘯歌讀書有時疲披牋亦吟哦設
榻書案旁所以消睡魔房廊亦周行時還撫庭柯大抵
一日中良朋間經過飲酒時究少讀書時究多

自爲京朝官童僕色不展連晨朔風至寒色到雞犬吳
奴昨告去朱戶別思欸今辰關右僕衣被亦將捲欲留
心不忍各爲計安善十年依倚久一旦忽辭遠周親復
交詈食窘衣不暖笑讀東觀書何如北門管

學士不能飲而時負酒錢詒拊甌侍講久輟詩躑二獨
喜客贈篇孝廉耽宵吟莊揚日出擁被眠廣文退食遲

莊劍負券愁逼年皆隔十里遙誰能比唵肩歡惊杳難

尋俗累苦復牽惟應孫比部淵如時闖笙歌筵

比鄰指揮署對戶車贏坊鄰雞第一聲馬嘶人亦忙否
則公案側貫索聲琅琅羣動旣已繁吾行起徬徨門戶
尙未開初日上北墻窺厨炊烟稀正苦瓶無糧吾師昔
人言冬日則飲湯

歸鴉值歸鴉十十復五五酒人憶酒人相思倍云苦寥
寥心一寸誰復可傾吐欲因西逝日寄此蜀江許江水
杳以深高原復相阻思君不能見夜起聽更鼓安得雙

鯉來奇篇概今古

首奇張
年船岷

屋頭無星辰積晦已三夕凌晨先習霰騎馬懶入直生
徒來饋歲野鷺間鮮鯽更有酒一樽聊云破岑寂雖慚
通德里差比草元宅呼兒開美醞小酌經案側正好無

俗人門前雪盈尺

人皆處城西我獨居城東城西人不來賓坐時時空非
徒息紛紜藉卧篇籍中口吐弱弟歸粥飯喜與同兒曹
誦經餘得句輒復工爲善無近名我師陳仲弓干祿不
欲多我法邴曼容興至卽舉杯消磨寺樓鐘

昨來京華居闕室作影堂晨昏覲吾親旬朔申辦香祿
苦不逮親時時我心傷幸伴弱弟居諸甥亦隨行誨以
勤讀書庶幾能顯揚歲晏風雪中懷人益傍徨一舅依
郭門兩姊居江鄉何時能合并築室先壙旁

向生無他奇貧甚益優蹇人言年歲竟屏當無一件開
函展然笑一室尙仰偃泉明乞食詩吾行恐難免欣然

喻妻子且設歲除宴爲歡極今日先把百愁遣待過元
日朝衣裘亦堪典

歲除以酒炙酌亡僕窺園并繫以詩

自余爲諸生汝卽侍左右皖江隨學使姑熟依太守兩
年居白下一載住京口逮擢明經科相從浙東走窮冬
遭大故九死返林藪汝也痛哭隨衣穿露跟肘經年墜
廬內料理及糶浚一僕乘間逃蓬門汝兼守余心感其
義待汝乃不苟除喪來日下百事益紛糅春秋兩闈試
十上九顛踣屈指十五年所值苦不偶親知久相弃汝
乃誓不負落落十數州商量覓升黜遊梁才匝歲客陝
時最久中謀金半百爲汝歸娶婦南下不半年長饑婦

先詬踉蹌復追及訢室有病母汝才工料事兼復習科
蚪每寫百幅書人疑出余手余交徧區宇能一數某某
孫黃暨崔趙識我交最厚不來同我憶來卽具尊酒各
能諳食性默爲理菘韭武昌城郭外客歲歷申酉地也
南北衝邨墟雜花柳平生汝頗謹苦被僚僕誘到此亦
有由都緣婦奇醜妄心希外遇或可副箕帚放艇夜渡
江時時逐鷄狗衙推頰乘隙間值墨灰毆有時方縱笑
遭我出行陡厲色一禁之鞭笞願甘受扶疴方就道風
雪復連嘍余來幸通籍解汝顏色愀遣歸迎眷屬兼爲
覓糧糗汝時雖已病聞語尙抖擻今年附舟至面色益
昏黝殷勤覓醫藥病早醫乃後短至節氣長時時伏床

樞屏除諸食品日僅啖葷藕沈疴由自取將死乃一剖
彌留三兩日作札呼汝舅瞠目不得言頭從枕邊叩卅
年爲一世誰識汝不壽汝行雖厠僕汝義實兼友汝不
善攝生吾行又誰咎急爲馳惡耗書至月已九汝母哭
定癡汝父顏亦叟伶仃遺弱女學語未離教一棺雖草
草必爲枕邱首除夕酌一杯傷心汝知否

小除日寓齋卷施閣祭詩作

昨年祭詩日同館挈仙史鱗嶮今年祭詩時闔戶僅兒
子一兒讀詩業未醇一兒學選粗有文呼來筵上作陪
祭不向屋外招詩人事功一歲慙何有詩一百篇文十
首借之作達亦可憐敢向衆中誇不朽此筵設自我此

例舉自唐浪仙詩句鏤肝腎積歲預恐心神戕我詩直
欲寫胸臆元氣未勵何由傷雖然一日間檢韵亦已忙
灤河仙鹿北谷羊作脯聊潤詩人腸南鄰詬誶聲北巷
市廛沸吾廬雖冷一事無尤喜門無索租吏一詩焚筵
前一詩寄蜀中狂生避債作臺後預想掩戶浮千鐘我
行亦返卷施谷欲仿長江作詩屋更邀諸老同祭詩短
趙狂孫附癩陸陸秀才繼輅年尚幼也

小除夕從家大人祭詩歌

飴孫

兒時放塾庭前過重慈提携待行坐桑陰屋側隨嬉
遊手捧新詩當餘課十年負笈從師遊樓前學詠珊
瑚鈎閒中分賦荷奇賞出語不肯同朋儔歸來朗誦

喜阿母慈顏一笑開眉愁歲除亦解束詩卷雅伴積
軸堆床頭屋傍十畝富風景絕愛春晚兼新秋偶然
好句覺自得僮僕徃徃嗤呶嘍艤舟亭畔蠡河地花
落花開摠能記年華二十春二分入世文章敢遊戲
春明北上隨慈親歲星在亥月在辰曾登鳧繹望泰
岱更喜擊楫經渾淪看山看水不相識問名一一窮
水根祝風咒雨一枝筆行客舟子驚竒珍燕中隨宦
樂趨侍一卷兀兀隨晨昏過庭重誡爾小子學詩一
語言重申閒堂月好命分賦擘牋榻管嗑陽春一篇
偶合長者笑一篇若拙長者嗔弟昆相賀復相戒冥
索時復煩心神金臺芍藥開河柳快飲百杯詩百首

夜闌掩戶時朗吟一屋兒童都上口卷施閣集排西
東更列酒脯酬天工庭除恪侍作陪祭缸穗凝綠花
冥濛太華培塿並時列光氣凌亂殊青紅瓣香縱不
在前哲敢說家學能兼通他年倘得爛一藝畧比過

適隨坡公

花朝日獨遊二閘歸適馮編修集梧得田侍郎震大通
橋秋泛卷子索題因率書長句于後

花朝日展重陽圖百年風光今在無蓼紅荇碧色不減
只有卷裏人俱徂河流北去都成岸驢背紅塵亦頻換
誰從物外觀古今石埕亭亭峙天半惜哉秋好何如春
津水乍綠無纖塵獨遊徑苦意蕭瑟坐恨不見當時人

百年似此清遊寡都策疲驢不騎馬沿堤正好迎面風
攬得柳絲盈一把米船東來畫舸西百丈往往牽朱旗
羣公觴詠致堪樂可念民力東南疲君不見東南十郡
沿江澣涉險誰憐挽輪苦就中若以河沙量我亦江鄉
一編戶田郎仁者固不同刻石告誡垂橋東即論文筆
亦殊健赤幟已植騷壇中風光過眼誰能久感舊懷人
一杯酒春禽送客如有情約我重來看新柳

葉舍人雯移居觀菜園上街東作圖素詩爲賦長句
樓頭擘山作兩峯門外江漢流無窮先生開軒日正東
繞宅萬樹桃花紅朝烹武昌魚暮飲江渚酒卅年撰述
無不有博士一官堪白首無端欲將闔闔排愛看紅藥

翻當階江頭池館覓人住反使猿鳥情俱乖水程迢迢
陸程少糧盡唯憑讀書飽津門橋南賃白驢囊金雖少
書有餘場來都門三易居菜圃開處真吾廬盤盤老屋
橫街後分半貯書嫌不穀鎖廳退直事亦忙目力苦短
書聲長談心時接北街李繡聯句尙有南頭王勣獻
君不見買山何似還山住一樣門前幾株樹屋頭添得
十丈塵失却雙川合流處

法學士式善屬題曹指揮銳張運判道溼所繪二卷子
蓬壺有仙人早歲卽食祿所居尤禁近

丹闕森在目官清饒暇日當千駐車軸閉門詩作命萬
事不貯腹我頃謂先生身外物皆足無須更誅芥天地

卽詩屋苦吟朝復夜雙舉日月燭惟愁鑿幽險或致鬼
夜哭元氣不可滴期君返真璞詩名試屈指海內不五
六餘如閱傳舍彼此可駐宿賞心雖偶寄過眼亦苦速
茲龕庶哭兀表以出檐木名山原有待壇坵今已築我
亦念故居卷施一隅谷

右詩龕圖

我家門前接早潮却行一里數十橋橋邊朱樓橋下艇
千尺闌干漾清影扶橋楊柳高接天樓上著客疑飛仙
偶然窗際落高詠却惹遊魚出波聽此橋此屋別幾年
轉眼風月凋朱顏幸從塵外覓棲止百步尚有泉濺濺
車聲馬聲何日歇每遇橋名輒驚絕橋心何止無水流

反惹岸塵高尺一先生詩思本最超更喜畫裏逢溪橋
桃花溪南楊柳梢著一斗室如鴉巢我因鄉夢頻生妒
君爲尋詩盍延佇徑攜秃筆及團蕉明日從君畫中住

右溪橋詩思圖

寒食出遊詞

牆頭無雨聲墻下無草色杏花一枝空復情薄暝吹香
作寒食春衣初試欲出門東風吹塵日已昏天橋南去
路如掌楊柳缺處藏春墳春墳高高盡尺五貼徧紙錢
知有主橋西燕子飛不停啄得幾家墳上土啄殘墳上
土來作梁間塵堂前宴客開酒樽卽是掃墓歸來人世
間行樂皆如此一邊生人一邊死消沉代謝那得知冷

眼却輸雙燕子東風吹塵日向西燕子亦逐遊蜂飛成
團蝴蝶出門去屋角幾樹桃花低坡陀高低土無隙高
種花枝下栽麥老翁往歲食有餘麥穗旣黃桃實赤今
年無雨桃少華麥隴三月飛黃沙關心歲事各惆悵令
我興盡思還家歸來閉戶同誰語一枕輕寒夜如許忽
驚飛夢到江南借得鷓鴣來喚雨

館僮折梨花一枝供膽瓶中率賦一絕

折枝聊復詡春華插向文窗影絳紗蝴蝶一雙來入定
錯疑添得樹頭花

三月廿三夜丁香花下獨坐適法學士式善以庚戌辛
亥兩年所作詩屬訂定因跋于後

丁香花底展君詩
花穗千條月一絲
句向卷中吟欲活
月從窗裏墮多時
商量握管題長句
珍重臨風嗅亞枝
明日欲邀花下醉
更憑殘朶索新詞

三月晦前一日清曉獨遊法源寺看海棠花下值馮戶部敏昌因同過寺旁亡友黃二景仁舊寓室已傾圮不可入感賦一首

出門誰是看花路
縱馬直前知不誤
斜行七里破曙光
馬不識途能嗅香
平明一寺攔街出
萬綠衝門馬驚逸
客行下馬方拂塵
花下已有先來人
羨君何止尋花早
花氣入簾餐欲飽
十分花事惜已過
砌下漸比枝頭多
明朝更惜花無幾
窗外怪風成陣起
看花人老花莫悲

花下幾見常追隨不然花枝南頭兩間屋曾有詩蒐抱
花宿眠時如鷗立如鶴看得開時復看落如今寂寞鎖
幾春花屋祇當詩人墳門闌雨圯紙窗破時聆唵聲夜
深墮君行歎息欲出門我更代花招客蒐君不見客蒐
定在花深處怪底曙鴉啼不住

暇日校法學士式善張大令景運近詩率賦一篇代柬
我詩時苦難法詩時苦易若欲詩筆工兩人先易地張
君下筆有古人我詩下筆苦有我若論詩格超有人有
我皆不可咄哉詩道匪易言何況雅頌至此已及三千
年誰無好句播人口大抵來往起滅一一如雲烟天有
日月星地有嶽與瀆筆端撼之不能動何以奴視荆朱

僕賁育若夫一身之內理更該心志各凌爍口眼各闔
開不將我之心志口眼寄于古人四體百骸內始覺我
與天地錯立成三才不能已于心乃復出諸口爲天地
立言于我亦何有所溢于目乃復矢厥音爲山水寫
照而我何容心一言二言精不磨千語萬語寧嫌多鋪
牋直可概八極濡墨真欲成江河然後張君詩法君詩
牛腰巨卷擲我我欲頂禮同所師且令前萬古與後萬
古得我數輩中立藉可相支持

晦日卷施閣餞春偶賦十首

紅杏枝前拜朔來丁香花底餞春回冷宮一月無餘事
祇向疎闌數舉杯

經旬常坐此花前
花幔愁開日影煎
怪底鬢絲都不潤
江南拋却已三年

白雲間有護花心
時墮高枝作曉陰
雲起接天花委地
欲憑誰與判升沉

細語擔鈴那得聞
城東風物感羈魂
春原一樣平如掌
只少菜花黃到門

雨絲真欲比黃金
尺五閑階草未侵
九十日春晴過了
却餘今日是春陰

春殘排日鎮飛沙
自掩疎櫺護碧紗
誰向燕南記風土
屋頭青草窖中花

閒禽多半向城東
花裏高樓面面通
不看生紅看生綠

天壇十里柳絲風

送春歸處做斜扉
星露微茫點袂衣
休更梯牆看風色
明朝不放紙鳶飛

悟徹繁華揔是空
興來擲笛自西東
尚餘幾尺斜陽影
要與春花鬥晚紅

一種心情小婢猜
四更猶自踏蒼苔
燕疑殘月衝簾出
那識幽人秉燭來

惜春詞

一風吹自東一雨來自西
風催花作塵雨催花作泥
作塵飛揚作泥定誰是
春花舊心性桃枝欲窺廊
柳枝欲窺樓窺廊見客行
不休樓上柳眼看春愁
入門復出門

不見碧天色離離滿徑堆綠陰明月欲從何地白心長
夜短睡不甘曉夢亦復歸江南夢時看花醒時叫芍藥
如盤向人笑

四月十三日張運判道渥招同王給諫友亮劉舍人錫
五伊比部秉綬何水部道生胡文學翔雲陶上舍渙
悅至海北寺街古藤書屋看花小集分韻得花字

一屋如舫門開斜半空吹香不見花入門老榦復橫路
根古半入鄰人家抬頭花向竹梢颭一架正把天光遮
綠雲濛濛雜紫霞花朵缺處蜂爲衙花光豈止潤睂宇
坐久衣上濃香加主人華筵開咄嗟有畫可質無須賒
巷南喧喧來酒車花片驚落隨飛鴉以花入酒沁齒牙

海濱石首津門蝦更喜蘆筍先抽芽年光慨如赴壑蛇
春止一日須豪奢對日握拳透爪拇陣譁上樹百徧
能搔爬酒盞嵌人枝了杖不爾恐有旁人拏十三清宵
月正華笑視竹影生窗紗忽思逃席路復又一徑却好
鳴官蛙到家冥冥吹曉笳袖底香氣留此此

自

御園回半道遊五塔寺寺中有古樹二株出檐幾數十
丈花開覆屋寺僧曰銀杏也爲賦一律

五塔寺邊雙樹奇馬行迂道款禪扉高枝似向雲中出
落葉猶能天半飛清磬幾聲催夕照疎香十里點朝衣
鄰齋東去春如海詩丹榜御極盛樂寺較爾濃陰覆院稀

廿二日侵曉偕孫大至豐臺看芍藥

馬聲嘶過柳梢頭宛轉雲容清淺流十畝竟從人外闕
萬花如向鏡中浮狂思海國春三月夢斷江城尺五樓
小坐不妨遲日出滿汀濃綠撲簾鉤

國花堂看牡丹

新綠叢邊競吐芽柳陰先爲障飛沙縱教風雨無寒色
占得樓臺是此花幾日酒中勞悵望有人簾底惜韶華
如盤莫向閒時笑第一銷魂數謝家

崇效寺看海棠

入寺先教蜂蝶忙殿前一樹倚朝陽若逢蜀客應回首
不作秋花恐斷腸夢雨心情初挹露冠春顏色肯施香

紅紅白白看千朵莫更臨風笑野棠

題阿少空彌達西尋河源卷子

鞭梢生層雲馬尾搖晴暉却行數里卽天上側帽忽礙
星芒歸雲外一株樹我疑是落棠不然何以夸父擲杖
來茲方石林何周遭復疑天盡處不然何以豎亥逡巡
欲回步地高于天石壓雲北斗背上生峻岫幾回洗眼
望來路祇覺黃氣一縷從東奔漢家西南羌元人鄂端
尾去此不知凡有幾一條天路雖分明歷萬萬古無人
經飲源三日馬亦靈五色石上飛而行天河轉近滄溟
遠三面銀光截雲斷行經萬里無一人立久氣如春日
煖乃知山經水注皆放哉眼底甫覓眞源回道逢青鳥

亦不訝見慣捧日黃人來

圖中繪花
餽黃馬掛

君不見相公奉

命安河流怒濤如雷喧七州此時那識鑿空使藐爾已

據大西頭一尋其源一疏委同日奏功

天子喜雲梯關北望板桐只隔地中三萬里

立秋前一日法庶子式善邀諸同人至積水潭滙通寺

泛舟觀荷分韻得學字

入門一徑何磽确山鳥迎人如鼓樂繞垣三折到寺樓

松櫟圍堂密如幄是時正值新晴後破曙圍亭色班駁

張顛窗裏先揮翰以指擘牋如可學卷頭祇寫波一層

已覺清光動棖桷苦唼尙獸人聲雜逕上高枝與商榷

何生入座先邀客後日出遊期可確


時約遊南西門坡
外金尚書園亭

陀高下石百堆坐啖冰棱與瓜飴新蓮去蒨桃菱核客
未及餐遭鳥啄累累紅果堆綠陰不問鄰家棗先撲誰
人升屋思逃酒墻角銀衫險遭捉樹頭啖果人不知風
峭時時墮菱殼碧筒盃好長三尺荷露殊清酒偏濁東
西拇陣何喧雜熱暑欲將衣袖濯趁閒拉客凌波去忽
有小舟無木樁船頭三四船梢兩喜得吳儂體修掣豈
惟快飲荷盤露盤底嫩紅時一榻離離百頃生晚涼此
樂江南庶堪較坐中誰復唵詩健欲以持橈抵橫槩弄
波東去香尤迥指爪時驚刺菱角潭平日落風正生手
撼前汀鷺絲覺

法學士以康熙己未鴻博前輩徐嘉炎等崇效寺雪公

房探梅詩冊索題爲賦一律

棗花寺裏看花日我後諸君祇百年見說雪公疑古佛
却驚梅榦亦飛仙馬蹄聲冷春三月鴻爪泥留尺五天
莫哂阿儂題卷末後來應又作前賢



1220



卷施閣詩卷第十二

陽湖洪亮吉著

黔中持節集 壬子

八月十四日闈中奉視學黔中之

命紀

恩八首

手披口誦日巡環清福誰言不等閒却愧

主恩原暹厚校文纔了許看山

未妨旬日緩征程官閣西偏瓊院清 時居會經堂西 八百孤寒

倘回首使星猶傍玉階明

學荒寧好作人師心賞偏教下筆遲日向一堂橫處坐

沉思不異課經時

二十三人說聚星

三主試十八同考及內橫排几案徹收掌二人共二十三人

扉櫺諸公僻事勞相訪我尚應慙劉石經

一紙除書下九重凌晨傳徧棘闈中神仙亦有升沉感

閑向瑤階說杜冲

時分校十八人惟余及江西李編修傳熊奉視學恩命

箱擎甲乙卷縱橫宵漏沉沉入五更忽得一篇勤擊節

却逢紅燭語分明

俗言燭花語為吉祥

七尺筠藍手乍拋

舉子入場例攜竹藍貯什物

竟攜文筆試同曹官

資深淺由君較

坐中有言科分深淺者是以及之

只我前年尚白袍

姓名題向榜頭遲短李才偏噪一時

填榜畢本房頗有名之士纔

欲解顏先下淚孤兒十載已無師

予少孤從太安人授經今大變人丁世

十
年
死

九月十六日次子盼孫殤

一病經旬朔行蹤爲爾遲如何束衰日却值蓋棺時
櫬楚威初斂予督課嚴參苓命不支九原翻羨汝先得侍重
慈兒爲太安人所愛

臨發志感

萬里初持節經旬屢斷菟受

恩原色喜念母忽聲吞負米程非昔傳經席尙溫明明
昨宵夢親見倚閭門

蚤發良鄉小雨

村雞喔喔五更餘馬陟坡陀步轉徐昨日晚涼翻惹雨

滿堤黃葉似遊魚

良鄉道中

我行雖值秋氣候已冬月尚喜天宇溫風霰猶未烈濛濛遠道開濕光楊柳絲盡初生黃歎鄉豈獨民無業樹底饑鳥亦餐葉

早發涿州

寒夜雞失晨馬嘶聲愈警十籠銀燭輝遠遜殘月影

由涇陽驛早發至望都縣小憩復抵清風店

早發涇陽驛兼程日未西力疲山縣馬聲短戍垣雞啞落雲千頃秋成菜百畦傳餐吾自愧車下有饑黎

蓮花池算訪汪修撰如洋不值留柬一律

豈料塵千尺猶留水一方風沙來數驛烟雨忽橫塘
幾
仄開波暝星圓蓋樹涼主人何處在雙雀入書堂

趙州雨花庵小憇壁間有雍正三年吳少宗伯襄題句
和者甚衆亦用其韵作一首示巷僧滿坤

一巷當孔道終日鐸鈴譁但願土宜麥不須天雨花乍
醒完縣酒頻浣趙州茶知我南來客勞勞問九華宗伯題

九華山人故巷僧詢及之

邯鄲題呂祖祠

兩年前尙一書生持節今看萬里行自恐功名亦如夢
漫逢人說是

皇程

白柏鄉至磁州道中雜詩

一日行兩驛所苦乏昏曉十日歷數州尤愁值僮殍眼
中過百井生計殊草草閭邑雖尙盈歡顏抑何少日斜
楊柳外一一閉門早驛亭依北郭路斷垣亦剗吏辭供
億困愍此山縣小僮僕有人心宵餐不能飽

昨日馳縣東今日馳縣西屈指兩月中萬里積四蹄我
願騎馬人惜此馬力疲渴引就水源行無使長饑此寧
欲市恩體物或庶幾廩吏慘不仁鞭撻詎有期我詩寫
驛亭墨淡字亦欹用以警牧民危言匪無稽

十里一驛樓三里一堡房塗皆列五軌楊柳疎成行持
較江以南地力殊太荒行者色苦饑居者無餘糧同源

何高低土脉鬱不揚
洛水旣已微
滄流庶湯湯
欲著水利書
俾引清濁漳
越俎倘代謀
何人宦茲方

北風連晨來
節候已冬月
荒荒野燒紅
補此炊烟缺
人家林木外
氣象何凜冽
饑來聊飲水
乾糗苦時絕
誠知年歲歉
生理亦殊拙
道逢駝背叟
引與話清切
辛苦無他言
惟祈一冬雪

道中寄真定邱太守學劬

雨花庵內柏林中
太守文章老更工
得句便思勤
寄與郵筒今變作詩筒

湯陰道中簡管同年世銘

時在河南撫署

強半詩從馬上成
孤吟不覺過層城
人因入洛三年別

天許看山萬里行尚喜石交難割席若論子舍各沾纓

時君方夷門東去繁臺路明日知君望遠情

衛輝行館憶已酉春計偕北上阻雨于此一日逆旅主

人尚識之

臨街樓上雨縱橫三載重來感客情莫訝馬前雙節引
道旁還識棄繻生

早發鄭州

此地通河洛車聲徹旦昏適逢秦歲首來過鄭時門百
戰荒原在三椽遺愛存謂子垣青不斷一綫上朝噉

鄭州十八里舖

連閭擊柝破林昏候吏迎人過一村無數鵲聲原上起

日光濃塞戍樓門

自鄭州至新鄭道中作

鄭州及新鄭百里劣不足程其土色堅乃可礪剛鏃森
森秃邱阜厥性不宜木行過郭店驛益覺欹地軸土門
何陰森岡隴愈回複出如囊露穎入訝車脫輹是知名
函陵曾不異函谷前行泥沒髀後矚塵眯目危橋經洧
水我馬行始速十里陘山青原田亦輪綠

早發新鄭作

陘山月落尙有星紅燭亂注幽禽驚坡陀逼仄若行巷
楊柳缺處天初明濛濛豈獨衣垂霧點滴初明馬頭露
天寒十月已有梁無假縮足升車箱

將至穎水橋

高原日午露初收紅葉踈林尚帶秋岸勢欲南岡自北
一條清潁向中流

十一日暮抵襄城行館作

龍陂山色參天半城內石坊高插漢昏時騎馬出南門
烟水微茫欲無岸沿橋南北皆石堤鋪岸月色何高低
排空忽奏軍門樂驚起大魚波面躍

抵南陽行館蔣表弟青曜自舞陽來訪因邀至前驛共
宿談次出行卷索題爲拉雜書此并以志別

白雲谿之東書屋名團瓢君家屋東偏小巷走北條酣
嬉少年遊厥性誰最豪我齒加長三賭跳欲競高阿封

愛汝深縱汝塾屢逃壓袖十數錢日市倪婆糕上樹或
偶閒墻東紙鳶飄阿定與阿馨屈指無汝刁光景若目
前歲月忽已遙自余爲孤兒怕與親串遭往事一縱思
痛極祇欲號十年三值君京洛及漢臬情話苦太長日
短繼以宵今作萬里別離裏益蕭騷爲汝設一筵環之
以兒曹汝姊亦不眠頻將燭花挑袖中出短圖灑落白
紵袍頽松兩三株日午響怒濤不飲顏亦紅唵聲激林
梢鬢豈類禿鷲須亦磔蝟毛欲我作一詩爲汝畧解嘲
前贅汴水頭樂土願久僑我意乃不然欲汝返舊巢庶
幾三徑中剪此蓬茅蒿他時我歸田與汝頻招邀投老
暇日多歡悰續垂髫支沐斗拱間勻甄補堂坳盆池益

裁荷更植千葉桃因君夢還鄉小立紅闌橋我醒君已
行雙淚頻頻拋

王大令復以雪苑消寒集屬題因憶甲辰乙巳間與大
令同客西安畢尚書師幕府亦有此集預其會者吳
舍人泰來嚴侍讀長明賈上舍元模莊通判忻錢州
倅姑朱秀才燥徐布衣堅蔣縣丞齊耀王文學開沃
孫比部星衍凡十人今甫八年存沒相間不勝懷舊
之情爰作一篇跋大令集後并寄尚書師武昌

憶昨三冬飲誰如十客閉嚴吳歸地下王賈散人間別
有神仙侶偏淪簿尉班謂錢朱雲稱久疾孫楚亦長鰥
避債媯山側謂莊逃禪胥水灣謂徐襟期總霄漢遊戲偶塵

寰醉每忘階級狂寧避謗訕別來經歲月遙隔萬雲山

吾子官初達高齋客乍還一編沿故事百首許重刪驚

坐名原振陳明經變詩最多登樓賦早嫺勝遊何灑落逸興與

躋攀水碧圍衣帶峯青門髻鬟嘔心憐句好握手恨緣

慳我愧持雙節行將化百蠻凌門欣咫尺謂尚書師河

水歎回環屬有同堂誼時方子雲孫香在幕府都愁會面艱感

恩情抑抑懷舊淚潛潛爾日風多厲相思月乍彎持牋

不能寐已恐鬢添斑

夜至林水驛

薄醉馳三驛迷途轉數岡岸藏茅屋小村入密林長水

鳥依沙白天星映月黃依微有漁火此景是江鄉

夜抵呂堰驛因憶戊申八月與方五正澍赴武昌阻雨

于此却寄一首時方尙在武昌節署

歷歷經遊所明明
美語溫半廊斜礙砌雙榻小依門隸
覺饑年瘦燈憐雨夜昏
思君幾回喚恐有舊時魂

樊城

樊城三萬戶
美語徹晴江
帶得斜陽影都開
臨水窗
賽神沿楚俗
吹笛雜吳腔
正好衝風渡
漁人盪漿雙

涉漢欲至峴首輿
丁誤輿入九宮山
時日已將暝
因小

憇而返

山光欲雨江欲晴
雲黑復白波微明
此時擊楫涉江去
薄暝始向前山行
林梢一抹斜陽色
高下山蹊一千尺

雲中道士來遠迎語不分明指碑石纍纍林果紅一山
傾耳祇覺禽聲蠻道旁礫石削如鐵山溜滴瀝苔花斑
沿岡久立怯北風送客出戶聞敲鐘昏江棱棱水聲起
却喜一星明舵尾

羊杜祠

拍手兒童送遠行荒祠重到轉欹傾金環倘識生前事
石碣誰爭死後名偶爾折肱成素志居然垂瘦戮遺氓
何如祇學山公飲日日高陽未解醒

宜城

一路沿江轉隨帆到郭門燈明小河集縣古大堤村欲
飲宜城酒偏貽京口尊隄署縣事花君壁間詩句在

三復憶狂孫酌澗壁聯上韻餘

將至荊州先柬太守崔丈龍見

昔年判鄆鎮昨來佐臨安我皆騎驢來訪舊河之干痛

飲曾幾時丈人復原官君前守順慶緣事左遷近始復原官郎君昨來稱

使星次者近復成明經劉綱夫婦鬢猶綠往往聯句開

中庭黍前五輩吾皆識阿四形疲阿三瘠因君我復念

存亡痛哭東山謝安石君為尚書錢文敏公婿是以云我今行役敢厭

遙昔者司寇馳星輅相傳一日行五驛髀肉總向忙中

消稜稜執法原無礙過峻差貽後時悔王令先悲少子

亡鄭公幸有孤孫在此州地大甲楚中城險况值江流

衝五年民氣未全復所願吏好年常豐尚書用法公施

惠法立民方識慈愛但使遺黎說有瘳何妨大府稱無
害武昌欲往道苦迂我視荆郢兼程趨心知尺一定相
遊果有驛使來通衢談深夜久殊難別駐馬卸裘謀久
歇酒酣試問座上人量好何如浙西日我持使節難久
停明日送我西南程匆匆更作道旁語殘月欲向衣邊
明武陵南去桃源路回望荆門在何處一山歷盡復一
山不到青天恐難住

自麗陽至石橋驛道中作

移居欲避千章木山鳥山人齊出谷高低一月共苦辛
高處結巢低蓋屋客行望谷如可遊前欲涉水愁無舟
茅齋了了見烟火笑語自共谿聲流背岡北去行難速

癩向溪東石橋宿三更入門甫卸裘頻起開戶看山光
寺鐘初鳴鵲聲起月墮長林三十里

早抵荆門州憩象山書院

殘月已墮風淒清水綠自向城頭明冥濛山徑開一綫
簾栗吹處幽禽驚吟堂豈獨山堆案堂下水聲還拍岸
芙蓉雖枯菱葉黃枝榦尚帶前時香周堂綠竹復千箇
惹我百徧唵回廊堂虛無人水聲憑窅到空亭與長揖
出門數步馬忽驚却訝樹頭山欲立

本欲詣武昌以驛道迂回不果行次建陽驛三鼓得尙
書師憑遞以適欲至襄陽閱兵爲先期行二日約相
會于鍾祥塗次時亮吉已越行二百餘里勢不能回

車再圖握手夜起不寐輒成長句一篇却寄

從公十年遊八年居幕府離公祇兩載月僅二十五餘

已酉春從武昌計北上至壬子三月尚書入謁都門復得握手緒計別時僅二十五日耳 去年公

入覲復得旬日從自喜師弟緣時可意外逢慈恩縱愧

傳衣鉢幸出公門早持節盤盃百驛敢厭遙更喜路從

荆河出才過新野縣已得鄂渚賤纛韃一何雄控馬拜

道邊襄陽日訪閑僧寺兩日待公書不至酒酣上馬嬾

出城縱有峴首愁重經大堤南去方逾夕夜宿荆門建

陽驛三更門外遞急郵失喜讀罷翻成愁偏憐此度緣

難巧惡遞書遲我行早自悔王尊叱馭忙欲從墨子回

車好細思會合亦有期公待人相光綸扉同門數子各

清要緇瀟如二雲我亦官滿歸京師城南奕奕鳴珂里
侍趨朝暮歸卯三館讐書我定隨百篇脫稿公應喜
此時憶公因不眠起視落月行檐前膏騰却夢旌麾過
只隔武陵山一座

抵荊州

早行荆南展然喜碎甃砌塗三十里渡舟復有兩下篷
恍若置我秦淮中濛濛水綠低飛鳥近郭更聞人語好
差憐屋瓦碎不完昨者江浪衝城垣危樓傾欹石坊削
城北至今人戶少爾來差喜皆有年移戶漸入居城邊
長衢似砥房廓寡願飭官窰急燒瓦此州歷歷鎮重兵
戶號十萬田疇盈災傷元氣亦易復吏不擾民民已足

宰官迂我勸駐驂導訪息壤來城南荆臺遺跡渺何處
但見蒼茫接江樹西琛南貝夾道陳簫鼓一城稱賽神
君不見新城峩峩堤屹屹我仰

廟謨同禹烈

城工及堤皆
勅建

至公安寄崔三景侃

十年五度手頻分猶喜常時入夢勤行到驛亭殘月出
一叢修竹卧思君

澧州城外渡澧諸水作

澧水綠如玉水清魚露目沿波惹得鷺絲忙高下日光
飛不足紅霞欲渡波攔住一綫分明接天處澧波入澧
澧入沅欲向何處尋江湍殊方晚稻收偏早黃葉自零

花自好行人十里香筍蹊踏得涔陽岸頭草

宿澧州行館夜雨因東州守方維祺

昨來行館宿蕉栢雨縱橫更漏分明處思君吏術精一
麾今出守三拜昔知名他日涔陽浦彌添望遠情

至清化驛

澧州六十里行抵清化驛其中涉三水淺者亦沒膝前
旌及行李半晌渡方畢盤盤升賴岡轉轉歷黝穴肩輿
忽高視天上炊烟出回頭戒僕御至彼謀久歇初日出
縱高杉林帶殘月晴光時破碎宿雨明復滅岡南勢稍
坦我馬行已疾手劈樹上橙聊先慰饑渴

大龍驛道中

五塘汎南塗百折二十四岡斜刺日大岡如龍小如虎
復有如雷水聲阻肩輿力盡跨馬行屈指籠燭當相迎
溪風蕭蕭生馬尾一綫日光馳卅里

桃源行

沅江水碧疑無岸一路布帆飛入縣藍輿偶憶義熙年
三復陶公一篇傳我知栗里宅卽是桃花源武陵路遠
不須涉咫尺好上潯陽船陶然酒後詩成偶可識漁人
亦烏有試問千株洞口桃何如一帶門前柳北窗日共
羲皇遊眼底尙恐無殷周何言秦漢與魏晉卑論不欲
驚時流華胥以上風尤厚事隔千年已非舊雲中雞犬
倘有知肯出淮南八公後但書甲子仍作詩此意亦有

誰人知永初開國是何世不若洞裏忘年時沉沉遠岸
楓林出恍若溪桃欲成實波流千折樹百盤再轉或恐
逢真源

夜抵桃源宿江上行館

澧水既已綠沅江流益清三更鑑江波波影逾空明昨
宵雨足山流黛添得江波幾層翠帆空若行明鏡中鏡
裏對舞山禽紅涉江何處江波狹欲向回塘問鷓鴣
鷓鴣忽迎殘月飛扇得水波流向西溪深綠暗途尤阻纔
見郵亭一燈吐三層閣上客少休閣底自任江聲流虛
窗閃白疑人面却是布帆來一片

桃源行館夜起

明知宵漏竟開燭光尙黑萬木裏一亭森森日難赤
西殘月影微露遠山碧高低飄濕翠不放白雲白江溜
昨有聲回汀沒三尺

涉蘇溪

蘇溪何彎環中有百家屋出門臨水坐炊飯白如玉樹
頭山果殊酸甜祇向縣中求食鹽涉溪前行馬礙脚水
鴨多于枝上鵲

過長板塘進山口作

甫過長水塘山色當晝昏林木旣回翳湍聲急東奔樹
杪出數家竟闕東出門非徒便趨麓藉可瞻朝暾欲習
筋力勤絕壁居子孫昨構木百章營巢畜雞豚空處立

一橋下倚松柏根我渴趨此林索水貯瓦盆箕踞進一
瓢詎識官長尊戒吏勿使呵喜彼風俗淳

武陵行館飯畢戲作

飲溪何其涼佐以稜稜薑

自常德以上水性過寒每食必啖薑少許煮魚何

過美芼此青青菜溪田晚稻亦有香山果嫩綠橙生黃
藟腸似荷山神憫爲我一林生瘦筍

新店驛夜起

四更林梢明月出光甚暫山禽影落波反使遊魚啖欲
攜雙艇子遠至谿南泛離岸山雨來衝波閃燈暗

出新店驛雨暫止留柬李學使傳熊

積晦殊難霽山靈倘待君料量三日雨留得一溪雲高

閣燈初燼東峯曙欲分猶餘竹間露衣上灑紛紛

人沅陵縣界雨中遠望壺頭諸山

沿溪雨猶零上嶺天始曙帶得桃源雲來穿沅陵樹濛濛
濛竹木覆一山不見馬公穿岸處男兒出身須立名足
底萬里遊行輕雖然垂老亦宜審當日何意輕南征君
不見二十八將登雲臺馬革獨裹公尸回論功我意亦
未允不特蕙苴遭嫌猜蕭蕭谷口松杉直怒榦都抽一
千尺精靈倘化蜀山蛇夜夜山頭望京國

相傳穿岸處有一巨蟒卽

公精靈所化也

發界亭驛

昨宿新店驛今居界亭谷試看黔中山久已離地軸藍

與不至天恐未得歸宿雲中數騎出北斗貼馬足我驚
一回碩詫是後來僕濛濛露迷眼背上北風肅高處難
久停身心願時束

廿八日五鼓師子塘西見殘月

如塵似霧影溪流惹得行人馬上愁却比初三更消瘦
曉星一箇占當頭

過揚武堡升嶺

我方下嶺謀少休前騎又復穿雲頭藍輿待得上岡脊
一谷白雲無馬跡高高下下半日中百徧起伏隨雲峯
有時望嶺行欲及石復離雲自孤立半空山果紅欲然
蓮管恨不如羣獫到來始信高居好從此擡頭已無鳥

將至辰州先柬陳太守廷慶

到州已歷百重山消息應知太守閒
釀酒乍迎千里客作歌欲化五谿蠻
日邊書至顏先啓天上詩成手自刪
爲問玉堂前度宿可曾飛夢入壺關

界亭驛南以山險肩輿增絳夫八名

卅日歷萬山所幸軀未損今晨出門望
失喜忽一哂輿丁增八箇繫絳筓輿本
爲言塗崎嶇藉此力勉黽不然升陁壁
或復致狂窘我感郵卒意百計致安穩
回思立身處曾未藉牽引茲雖憑衆力
失足亦能殞途同蟻旋磨客類牛負紉
高低旣相倚曲折若施準天路卽可通
吾心尙當忖

白露塘道中

沅陵三百里秀止萃林木居人讀書少見客輒瞠目雖
云枕山佳愛結水邊屋十月溪無梁行歌赤雙足山深
寒不至荷榦尙芬馥商畧出市鹽門前菜畦綠

山行

日光沉入淵水光浮上嶺水日空明中禽魚趣何永無
窮物外意所苦人不省魚將蘋作屋鳥以谷爲井飛行
寧復越各若守疆境我讀莊周書閉觀倘心領

廿八夜飲陳太守廷慶署醉甚四鼓起行四十里至馬
溪河乃稍醒

森森萬竹竿日出溪上綠涉此徑寸波溪魚圍馬足溪

流三折忽暫停石上戴土營危亭茅菴一僧閉誦經烹
茶餉客酒始醒指途南行入峯缺壁隄仍煩數人曳沿
山松竹忽無聲一嶺蘆花白如雪

將至辰州道中望大小西諸山作

施黔江上望山路劣纔通天壓松杉綠雲連橘柚紅緩
行長水驛時見伏波宮祀伏波陵界居人甚虔我亦無他願書

藏大酉中

初一日未曙渡辰溪

一州及四縣皆以水得名凌晨渡辰溪天黑尚未明卧
聽柔橈聲知較沅水平上流一燈飄爭渡喧有聲輕帆
觸烟來誤向溪左行船丁正徘徊穿出林鳩鳴

從山塘驛行十里至龍門塘一陁坡作

削峯峩峩天半立白馬白雲爭路入有時雲向馬首飄
馬足亦與雲爭高坡陀直下蹄難駐雲始離山欲升樹
乃知馬亦戀白雲行過西坡復回頭

渡周溪入山

沿山三日西南行山果愈美溪魚腥出門忘挈種樹經
靈橘百樹疑冬青水花茫茫亦登陸一頃寒蘆雜修竹
山危不平心轉平馬上睡起知身輕

十一月朔日發懷化驛輿丁甚速行三十里至板橋塘

天始曙

四更排馬陟山岡候火齊明竹樹光欲向藍輿續殘夢

鑼聲驚過第三塘

每至一塘塘兵輒擊鉦相迎

雙溪水繞一山流
溪上冥濛薄霧收
睡起不知雲弄采
錯疑天半有朱樓

大山頂

山頂樹樹杪人樹底歷歷吹輕塵
回頭人復出樹底樹上稜稜一山起
危塗似却反得前要在絕地方通天
拋書莫关無心得幾日山行增學識

板橋塘北入山

五色溪光炫眼新
到來不信是蕭辰
穿林石墮偏驚鳥
出嶺雲奇欲趁人
小夢乍迷千樹橘
長吟想見萬山春
行經谷口須重問
恐有當時鄭子真

已刻抵羅舊驛

我來羅舊驛日已及午候陰晴勢未分赤白雲相鬥須
臾赤雲升日影乃微溜白雲復歸谷空作一川皺山雲
本無心人意有左右白鳥亦喜晴勞勞向川咒

抵羅舊汎卽沿無水行

今來見無溪不復憶沅澧同此石磷磷無流清到底沿
溪山百折勢斷復中起似欲勒波住不放出山裏魚遊
戀潭曲鳥亦鑑波喜最羨臨水居峯峯石如洗房廊藏
暗谷石罅墮蕉尾天半露一窗知聞馬嘶起

山行至一谷

好奇往往入雲屨此谷無人或未經行到上頭心轉怯

四山緣欲破天青

至巴洲汎無水中生一洲長幾一里無水至此分流復

合

無谿忽分流水色仍可辨洲窮溪復合波影益惹蒨沿
溪盤細徑直下欲如綫馬走北谷中恍若帆一片紆回
出林杪馬上露人面同行成久別忽復得相見稍休厓
石上一一喚名徧愛水故緩行吾真欲成殿

自芷江縣曉行

沅州出西門頗苦歷永巷

出城卽板橋長逾一里上坊皆覆屋馬行幾不能舉首坊

屢無隙地覆屋不獲仰俯行一里始出坊欲曙未曙星

猶光溪深谷隄杳難辨撲面祇覺林蒼蒼前旂半日途

疑失數騎驚看隔山出人行貼樹馬逼厓上下朱纓紅
奪橘看山一路不覺疲吐納雲氣忘朝饑峯奇正惹人
回顧急溜偏從馬頭注

下山至大栗塘

輿丁愁上山我意怯下嶺步放不得停顛危出俄頃白
雲英英鋪嶺平誰識左右山崎嶇行人欲前飛鳥停勸
客暫憩山前亭一坡稜稜注千尺直下途危沉深黑始
知身世總若浮警若鴻毛輕一擲

上回龍關

夕宿無谿西朝發明山東藍輿天半忽一折坐處正落
空潭中心驚不敢復俯視尙苦缺處交長松回頭顛撲

復不至人說尚隔雲重重行經平地願少憩飽聽萬壑
衝松風

山行

探奇因失路觸處總高墳渡水雲成陣爭山獸作羣轉
愁人跡少渺與世塗分一晌支頤坐沉沉靜見聞

便水驛行館見水仙一盆榦長三尺香亦較江鄉者馥
郁爲賦一絕

傍山臨水幾人家下馬匆匆感歲華牽得客懷無別事
芷江驛裏一枝花

騎馬行

我昔居里門騎馬如騎龍屏息不敢言急復擊馬駿十

年作客奔馳急與馬誰知日相習風陵渡北中條西百
 里風馳入安邑謂馳驥二酬餘里即今騎馬如騎羊馬
 亦步步隨低昂愛之不忍復鞭策一日常教餘馬力朱
 纓纍纍玉鞭把我馬力常先衆馬舉鞭問僕笑不休何
 似吳下蜻蜓舟

渡無溪

土人名大河

溪亭皆有屋分半水禽巢昨夜前灘漲遊魚上樹梢
 無溪道中

我行十日歷五谿馬蹄不南即向西

凡渡澧沅施辰無五水

山深

愈轉塗愈出令我日日看山疲臨溪飯罷行尤急轉眼
 斜陽欲追及亦知此地近西垂好擇一山看日人

將至波州汎行入一山轉轉不得出林木甚美爲小憩
少頃乃別

沿溪北折山如夢濃綠堆林欲無縫忽然樹杪一綫開
穴底倒射天光來一村松竹復疑繪鷄犬亦雜居樓臺
林陰染黛山成幄我酌水泉疑漱玉君不見炊光上與
雲頭平烟火亦徹仙人肩他時縱復得霞舉誓與此山
通性靈僕夫催行三十里我坐松陰不能起卜鄰結宅
亦虛言但假十日山中眠

波州汎南上山

東峯視西峯已與碧天界南峯更孤迥意乃出天外峯
頭一峯雲不收似向天外仍回頭前山行完後山阻我

識天公用心苦六曲屏風界黔楚

將至大魚塘山行

水聲湍急處山亦讓溪流只此萬峯隙何來一葉舟石
潭魚瑣碎竹徑鳥鉤輻正覺孤吟好黃梅發嶺頭

過風木塘有感

及此塘西路連岡百折餘徑荒飛野馬名古泣羃魚人
說官資好吾傷祿養虛望原徒步過不忍坐藍輿

曉發玉屏劉教諭嗣武陳訓導秀升率諸生相送輿中

口占六首示之

一例青衫馬首迎羅施山半見諸生眼前指點爲文法
似此峯巒始不平

童年敢說有師承一事如今記尙能堂北雪深三尺路

不曾辜負讀書燈予少孤蒙太安人授經

潛修莫恨閉門遲倍惜分陰是此時却喜十州民氣愿

殿頭早荷

聖人知名見日蒙士習淳樸須勤為教導論以黔省

閣帖堂碑奈俗何烏馬三寫已成訛子雲門下生徒盛

誰比侯芭識字多

一字離音總不成黔音差較楚音清諸生莫慣稱天籟

好屈周顛學四聲

我無奇術報

殊恩欲闢當時通德門他日講堂勤問業六經誰似鄭

公孫

發玉屏縣

玉屏及清溪五十里不足其中山雜沓頗覺寡平陸寥
寥依斥堠時有幾家屋西南綠吞山雲歛日光縮猶欣
枝上疎土性無曲木山凹諸土著居各面林麓邊微歲
屢登稍聞事儲蓄深林鵲聲喜時得啄餘粟前及羊坪
塘村烟已成簇

山行

出山泉百折殊有戀山心澗水復時落重源何處尋紫
藤垂岸陡白鳥渡波陰卧聽灘聲急勞勞自古今

將至漫溪塘

漫溪途猶危絕巖立斥堠心疑不能到再轉谷已湊連
波何洶洶雲出與石鬥不知雲起落但覺一山皺前行
塗轉晦時見涉波獸濃綠復萬重密林無正晝

將至清溪縣上嶺

障坡千萬樹不覺有山城忽訝鳥巢外時飄人語聲撥
雲看塔峻映柳識橋橫及渡清溪水方知水色清

清溪行館見梅一株花甚爛漫喜而有作

風利如刀雨若梳一林花密竹蕭疎墻頭更有山無數
疑是江南二月初

何曾驛使解封題空向長安醉似泥三載別來惟兩面

白雲溪外卽青溪鄰門不產梅難于舍春初尉黠靴

適放數花然不
及此十分之一

夜移瓶梅入紙帳作伴曉起香愈酷烈復賦一首

自來荆郢南路愛曉行馬蹄慣踏紅燭影送盡殘月
聞鐘清偏憐昨夕山窗裏魂滯踈香不能起風踈雨薄
送出城猶執一花籠袖底

發清溪縣至梅溪塘二十里沿無水行山徑逼仄幾不

能上

盤山道險幾不通大石礙路如癡龍灘聲愈急嶺愈峻
嶺似不放溪流東一卒引馬十卒引輿頗念衝途人不
得常安居兒童生小登山易履險真如履平地百錢縛
肘餅繫腰口吸山泉詫甘味梅溪才過復小溪十里肩

上盤與飛書簽倒落茶具剖只有梅鼓猶在手山行望
舟始覺平船樓客眠尙未醒君不見行經平地僕夫喜
一葉舟驚笑波起

渡水至焦溪行館山水環抱林木尤邃覺巖灘剡中無
此奇勝也

山百折溪百回到來山水欲俱斷一葉忽破青冥來南
津樓北津樓津樹對出雲分流嵐光密處山花好十月
猶青堤上草沿溪一帶飛綠烟偏向人家鏡中裏人來
岸南立少時岸北征馬聞驚嘶行人衝寒馬流汗馬影
度波魚忽竄

盤石塘

黔中行兩日山險止梗道東西無起訖所苦寡阨要行
經盤石汎石脈始森峭奇峯破天出頰石突若廟排空
立一徑萬古不得到中疑穴靈怪縷縷雲出窾飛瀑復
百重誰能抉真與生平好奇性失喜忽一咲尋路欲出
山鷓鷯恍前導

侵曉入太和洞

轉覺岡巒峻難容地脈回客方升閣望山欲渡溪來市
郭燈初暗帆檣霧未開半時心境澈孤坐此層臺

上油榨關

一石橫絕天一石橫塞地盤空兩巨石缺處復鋒利雖
云置營汎劣僅入隻騎前經絕壁下轉覺人馬細東南

初破曙一縷入雲氣大息撫鳥巢吾形願同寄

下關逢驛使却寄張同年問陶

蜀時張方曲入都

君來蜀道如天上我渡黔關入地中今夜相思倘回首
各從北斗辨西東

相見坡

小相見坡折不休三起三落時句留藍輿正對我來路
迎面不復勞回頭盤盤路向雲中辨七里來尋大相見
石古途危細如綫馬頭亂撥雲濛濛馬上人面猶雲中
東西對立峯何陡天半驚看一招手馬頭已西人面東
隱約尙見坡竿紅飛泉攔路復衝出人面始同坡面隔
下坡十里行轉遲縱不相見還相思還相思不相見我

願天下人皆如此坡面東西縱復隔浮雲一日之中時
隱見或云會面數則離此則仍復分東西雙坡近又判
兩縣大相見坡屬施秉亦若古者好友百里愁分攜乃知在遠
仍如邇我念神交倘如此劉家塘畔作一詩火急封貽
二子

偏橋

重鎮當年建節旄石闌千步尚迢迢江南到此川程絕
想亦應名萬里橋

天梯關

在施秉縣城內

樓閣排空雉堞齊
寬旌高閃夕陽低
萬山過盡疑天上
不信前頭尚有梯

二鼓至飛雲巖秉炬上巖畧周覽卽回至養雲閣宿平
明獨行上巖并至聖果亭雲根泉等久憇

藍輿小睡已二更半里外響飛泉聲入門一徑生虛白
是石是雲同一色前行百級卽少休秉炬却憇巖西頭
征衣暫付山童澣先煮山泉與山欸自來京國夢始寒
枕上一夜鳴飛湍平明待得雲全出始向山根搜石窟
乃知雲亦無石奇石轉覺瘦雲嫌肥纍纍却似枝垂果
一朶峯尤奇一朶飛騰只在人眼前不遽拔地思升天
遵巔欲及仍難及石却戴松空處立玲瓏百竅生百松
飛起松亦當排空松身夭矯水若龍會見汝植天門中
須臾日晦光開闔雲復飛來與山合出門雲動石覺行

雲脚送我來黃平

巖側古梅一株花正放

碧澗層層暗綠苔石闌干畔久徘徊不知樹向巖中出
祇覺香從頭上來新月正宜當檻坐高枝疑欲待人開

寺僧云今日花始盛放泉聲石色都成戀便繞花光亦石回

黃平州西見日出

黔中行兩日天短日苦陰玉屏及清溪尤若日算行黃
平州北逢初七甫見平衢流赤日車前歡喜到八驩馬
上曝背寒威収宜娘山外風尤峭一半花苗出趨廟紅
綾肩上羊一腔七尺花幡引神轎相逢百里風土殊山
前老苗亦讀書怪來門帖宜春字明日欣逢日長至

至日發重安江行館憶京師早朝諸君子

過盡州西劣崩峯重安江水綠溶溶獨從萬里橋邊宿

却憶千官闕下逢

三殿左趨

燈影密

石經國史諸館皆在殿左

五雲高捧日華重幾年此夕朝

天慣猶向山齋數曉鐘

渡重安江上嶺作

三里與江背泠泠響尚聞前經百重樹始隔一川雲天

向松梢暝途從石罅分寄書情較切空有雁成羣

入大風洞半里阻水不得進

途行抵清平山不秀而樸盤盤十里外石脉已潛伏巉

巖當面出劣欲轉地軸停與人欹徑風氣早森肅泉流

四飛注細石時礙足絕險劈一門途寬不紆曲東南諸
 洞穴所苦地維促茲遊庶森爽敞及萬間屋恍若古達
 人推心貯人腹渾淪含眾有不太別清濁巖奇列千窾
 尚未及雕劖乘虛一燈入百怪露人目風輪覺森森大
 氣自回復寨裳行欲進捫黑若相觸陰房長入夜日月
 光不燭狂思傾海水一洗龍霧毒東西靈境闢真見列
 松竹方志云洞深可廿里許昔有高一廬者秉暝坐一
 縱思莓苔照人綠

晚晴自白泥塘至楊老驛山行

才收薄霧即新晴似畫溪山馬首迎添得白雲成
 睥睨連岡真似古長城

白泥塘北石零星下坂難教足暫停幽絕山村幾家屋
晚霞黃處炊烟青

宿楊老驛

雨山中間夾一驛驛路如繩盡高出山凹忽現數百家
瓦屋鱗鱗若居穴下山欲向橋南住水碧堤青渺無路
更殘繞砌空百回新月不過山岡來

度響琴峽

排空石筍立一山人向筍上行彎環盪輿舍此卽無路
危在皆從筍尖步行人至此亦掉心空有細響同鳴琴
琴聲愈急步愈促一跌幾將陷山腹我行萬山無此奇
過此一折山仍夷君不見危塗莫謂無人到此是康莊

通六詔

黃花坪道中

黔中雖易雨一雨亦易晴濕翠甫欲收早喜霞光明山
花亦時開助以百草馨最好山徑奇一轉一曲屏才過
清水塘已抵黃花坪回頭望諸山復覺雲冥冥

冷溪塘

四山盡高出中宅若一井居人欲入縣數里方及嶺松
櫟若井闌沈沈閉升景塘兵瞻導騎半日已引領樹杪
百尺樓樓前柝聲永相將過溪去溪水清鑑影太古雪
尙留何嫌水光冷

牟珠洞

層山天半列作屏下有洞壑藏真經到門口缺若建瓴
一徑斜入天光青飛空真人倚踈櫺法象奇古忘年齡
千百萬態韜真形旋螺三折步不停石上戴石何瓏瓏
巖深無人杳冥冥石腹夭矯參龍形中陷若穴堆蜻蜒
凝脂點乳流素馨石嫩可搯膏猶零恍如鴻鐘撞寸莛
絕巘往往揚空舩有聲無聲難可聆偉哉造物實至靈
鑿出雷斧弃飛霆另闢一洞居明星小者如盎粗如瓶
否亦或是仙人庭百丈高處懸飛鈴更有一曲雕雲鞞
馬前兩兩排仙伶馬旁力士疑五丁後來一人殊伶俜
側首鬢影光熒熒回身匿避如尹邢千年老雀初制翎
絕壁萬丈懸猱挺或如空原萃鶴鶴或如高枝綴蜻蛉

如人狝狝似豹躩回毛宜乘細角麕形奇態詭孰使令
久視方得心神寧稍南一崖結作廳嫩綠錯雜同回汀
碎影點出踈踈螢一門森森列萬釘五色變幻形玲玢
巨者恍若浮江萍山南如坎北若陁幸有巨石層層回
萬古不入蛟龍腥靈風蕭蕭雨濛濛晦朔惜乏知時莫
來遊如夢出若醒刻石欲作山前銘我留一言神倘聽
巨斧徑欲鑿崕巒一綫裂處開明廷從茲光怪不得局
正午赤日來亭亭時議歛用四則以通日光

過新安塘未三里見絕頂一關高出烏道卽隴首關也

延回行半日始至

才過新安塘未抵隴首界嶺樹千重復萬重驚看白道

懸天外計程七里行半時我意尙覺來何遲回頭忽驚
飛鳥墮隔却白雲穿不過

晚至龍里縣

清絕山城祇百家城門樓上晚吹笳猶餘濕翠取難盡
商畧明朝作曉霞

早發龍里縣道中雜詩

濛濛四山雨中有一山晴漏得朝曦影林鳩復怪鳴
絕巘疑無路雲穿一徑斜野花隨意放不復有人家
山樵值山樵陡壁亦相揖濛濛雨不晴莓苔綴圓笠
牛羊識分界不復過溪隈只有谿魚好斜穿石罅來
全家三五輩種藥此山中開牖摘生果朝霞滿袖紅

誅茅構一亭遠近皆可徙因貪聽溪聲移入前林裏

觀音閣

溪聲流不盡三折到橋南初日紅猶斂殘冬綠尚酣
疑僧入定真與佛同龕北閣休教掩衝寒性所耽

小除夕祭詩作

南行逾萬里小歲入三更爆竹驚心碎桃花照眼明

時桃

杏及海棠諸種並已盛開祭應遵舊例醉復盡餘觥笑向兒曹語今

年帙已盈

除夕寫歲寒圖貽徐太守日記

樂府新傳二十篇太守近勸事定番蠻花矻鳥倍鮮妍

使君循蹟吾能識記得相逢又計年山令時余隨守使

者至六安
得識面

風光知否入春無
竹葉青葱柳眼蘇
欲祝一番交誼水
臨溪仍寫歲寒圖

卷施閣詩卷第十三

陽湖洪亮吉著

黔中持節集 癸丑

人日登東山遇雪復攜客至黔靈山久憇

別來方十日春色滿山村樹矯將穿牖峯竒欲突門
半城新綠影齊上振衣岡露濕棲鴉徑春濃選佛場
我愧非安石山真似白門乍披天半牖同醉雪中樽
松陰委曲廊杏樹攢高閣城中客始來原上花先落
積雨厨烟重穿雲澗水溫馬頭山鵲噪牛角野禽躡
樹侵官道窄山壓女墻低馬逐雲頭上人隨雨脚西
三層樓上雪百尺樹頭花白欲迷天影紅疑迸歲華

廊長縱獨行龕小容危坐天上有人聲山樵墮松穎
小亭三面影清磬四時聲樹暗藏西嶺窗明瞰北城
半窗初積霰一枕昨聞雷時連夕雷鳴臘意屏前散春容鏡
裏開

新正初一日發筆

誰向黔陽記歲時殘年氣候較參差夢回昨夜燈猶永
春入空園柳已知小病乍將人事減薄寒聊遣酒杯支
驚雷爆竹都成陣門外三更雨若絲

初春憶里中諸同人

萬山深處住忽憶海邊春不特花香好兼思花下人花
枝濛濛柳條長花裏高樓日堪上危橋東轉多坡陀一

水出城名蠡河河流至此剛三折亭號艤舟人亦歇左

家兄弟工煮茶閑訪屋北踈梅花錢郎多愁趙生矯瘦

董

超然

癯崔

瘦

兄弟

鄉語

好毘

耶室

冷晝

不肩

塔影

七級

看亭亭圍鑪聚久清談足小卧還繙藏經讀蒙莊興逸

不可當來及曙色歸斜陽一童攜錢每先走爛醉城東

市橋酒此時十輩五客燕兩客復住荆江邊我頃南行

路七千遠道誰拍洪厓有山形盤回水迢遞夢裏還家

亦非易作詩火急欲寄回屈指到日榴花開

貴陽元夕燈詞

花聖連宵爆竹催惹他桃杏一齊開惟餘徑草難全綠

却值山南絲雨來

西南郭外盡平疇節使筵開百尺樓燈火似山人似海
忽驚天半一回頭

廿家門巷一樓燈火樹銀花夾數層只有笛聲淒怨甚
四更還待月華升

金鎖橋西送客回趁人叢處廣場開蘆笙吹徹秧歌起
逐隊花苗跳月來

一旬強半雨連綿不信黔南是漏天騎馬出門思鏡聽
沿街却喜說豐年

廉訪齋南笑語譁

姜廉使開陽每集同官角勝

負當筵絕技使人誇

射棚一盞銀燈上牆外驚傳鼓子花

花枝不異故園春短巷長廊記却真倚徧石闌干畔月

就中只少走橋人

簫鼓初停坐客稀

魯巖節使以予不觀
劇爲許日另設一筵

半酣筵上換春

衣七千里隔津門路却有黃魚入饌肥

古牆陰碧燭花紅待月樓高影數重一簇銀燈山半墮

乍看真訝下天龍

踈楊成幄水如烟錯認江南二月天星月未來樓閣暝

萬枝燈裏漾秋千

清鎖道中

春陰一堆紅白堆山翠缺處桃花開冥漾綠意石根迸

春筍昨夕聞驚雷行人衣上泥猶濕高樹塘邊漾晴色

山泉日午開鏡光菜甲花滿疑斜陽

過龍井塘上坡

李花如含顰桃花已迎笑藍輿再轉復一岡天外奇峯
鬥清峭春塘北折凡幾家飛蓋過樹驚棲鴉回厓陰陰
蝶飛滿春在海棠深處暖

春分日抵安平行館作

清削峯巒得未曾峭厓馬上却有承山泉圍郭綠三里
村樹接天紅一層遠道書來春正半小樓人去月初升
商量欲待尋巢燕齊捲疎簾喚上燈

沙作塘西上陡坡

連聲爆竹鵲驚回正好山南雨欲來只有桃花解迎客
趁人叢裏一枝開

人家多住石塘西石屋參差望欲齊
寒裏鷓鴣聲轉急
山雞飛上故巢啼

中火塘西入山

東厓及西厓深巷密無縫厓窮山寺突
補此密林空行人下岡脊騎劣急施鞚
石罅三百家隨波綠疑動冥濛遠天外
飛鳥忽相送宿雨時一零檐間杏花重
却蓋一層雲山房尚春夢

寒食出安順府西門校射

閉門甫經旬芳草已如積黃花瀟平疇
春露曉逾白青山迎道左濕翠馬頭滴
闢圃三里餘朝晴試騎射隄旌紅閉野
岸柳綠窺隙山鵲閃畫弓林鳥占門戟
于馬心

寄賞觀者足若植慙無養生技敢論扶風德聊記在蠻
方西郊度寒食

三十日遊金鐘山

百盤升作嶺一石削成臺山筍高逾屋天風響若雷澹
紅雙徑罽新綠一窗開正好容危坐齋鐘莫屢催

武當山久憇

道人侵曉初啓關一城花光浮上山闌干影外春陰膩
香氣依微塞空際交鳴鶯燕殊有情三里路中飛不停
深紅淺白看難足葉底參差間新綠看山百回眼轉青
山殿開處祠元冥殿旁一徑天風墮我借蒲團向風坐
此行訪客擬夕陽一騎忽復來山房傍花南行衣袂濕

花裏先聞響鳴鏑

日彭軍門廷約射鼓子

初一日出南門至華嚴洞持燭入三里許

百折山已深遵巖復千轉山扃深萬仞欲往怯途遠洞
門蠟炬擲兩頭直下無底光難留奮身一擲若飛鳥回
視偏驚洞門小土花濛濛綠滿衣巨石碍路如雙扉牽
衣屈曲入扉罅飛瀑偏從兩肩下危厓覆釜下轉空大
聲如鐘疑蟄龍孤筇欲挂不得挂地底陡復衝天風厓
窮路斷天愁晚半寸燭中人復返高低三里路蜿蜒出
履平地同登天當時誰把華嚴說已覺豐干太饒舌我
欲磨厓易舊名讀書山畔藏書穴

華嚴洞外山甚秀折而無名縣人趙氏聚族居焉余歲

試安順趙氏子弟獲隲者文武各二人因以讀書名
其山從土人所請也

城南十里路回環百折烟嵐水一灣却喜青衫迎馬首

華嚴洞口讀書山

是日值諾
生釋菜回

初六日發安順作

昨旬騎馬入行臺草脚踈青尚未回今日藍輿向西去
海棠花放蜀葵開韶光欲老愁梁燕碧月初圓照酒杯
莫更匆匆感時序山榴紅綻客仍來

上巳日自鎮寧抵安莊道中

銀塘北去山如鎖正好一村新綠裹沿林乳鵲飛刺天
掠得餘花落千朶藍輿小睡轉數岡夢裏時觸幽蘭香

山危已換長繩挈一半花苗帶花出林溪綠暗路欲迷
却喜穿樹如鴉飛今年上巳風差緊分水橋邊鑒春影
過橋南北分兩堤樵徑北去行人西柳絲濛濛挽客衣
去路開徧黃荼蘼

白水河

我尋白水源澗削流殊細西經白虹橋河聲始如沸前
行十里響不停巨石欲裂穿驚霆河流至此經千曲激
得飛濤欲升屋回頭屋後山俱破却讓河流隙中過非
烟非霧鬱不開此景豈是人間來忽驚一白垂無際高
欲切天低蓋地泉聲落處構一亭水色正壓羣山青離
潭一尺波如斛襯出空潭影逾綠壘方三月景不妍賴

此兩兩懸珠簾轉愁萬古簾難捲隔得仙源愈溪遠

有水簾洞為昔人避兵之所潭旁一枝花較紅照影只在空潭中四

圍山色高如岸祇覺白雲顏色暗眼中神物誰得看

相傳有犀牛伏此會待月午波心寒行客去不停孤吟我偏久

泉飛兩派君知否分送行人出山走亭側有二道往雲

泚

鷄公嶺

險絕鷄公嶺枝蟠百斛蛇嶺背有古藤粗幾百斛上樓天欲墮攀

樹日初斜怪石圍孤寺壘烟簇幾家下山途更窄警客

有棲鴉

關索嶺

山南路飛鳥亦不知排空翠巘逼天佳乃識細路懸如
絲前行問路頻相失時入穴中時出穴東西向背杳莫
分幸向林梢辨斜日兩山中間夾一橋細水畢集聲如
簫過橋三折方遵嶺忽訝危橋若深井前行籊條後戚
施時俯時仰愁難支征衣匆匆棘心挽攬客復有青松
枝居然一廟藏山半上視山巔尙霄漢停輿聊復酌山
泉以手讀碑疲復換後先濟美誰所云嶺上有關索廟
將軍當日或隸征南軍神扉開處山僧迓我敬英靈且
先拜虛亭留客聽晚鐘炊火遠雜山花紅出門撲面風
尤大幸有扶人竹千箇君不見來途一綫雲初破天上
驚着馬頭墮

永寧道中

一馬行天半雙旌逼嶺頭
澗光黃奪月山勢黑吞州
蟻穴開平郭援梯直戍樓
人家止三兩相對雨中愁

哈馬塘

哈馬塘邊路肩輿趁午晴
山如重甌合人亦左擔行
竹密都題字花杏不識名
前旌且回緩留酌野泉清

抵盤江過鐵索橋久憇復下坡
至涼水營午飯

盤江水流千里三月江水清
泠泠望無底岸東安順西
南籠天半一橋飄若虹
空中疋練交如織知費當時幾
州鐵高低兩層鋪板平
人行半空馬不驚登樓試面晴
江色陡下驚看一千尺
四圍山勢若削成樹亦直上無

縱橫危厓盡處僧房鎖三月榴花已如火闌干影裏望
行人一半分趨石厓左蠻中節物何太忙百卉開落誰
平章賞心豈獨無儔侶鶯燕南來亦蠻語出門石罅路
不分鳥道十里鋪黃雲涼塘三百家忽覺春如海我食
盤江魚還憶盤江水

普安道中作書寄南中諸友

別來春色已成團一種花枝隔水看榴火樹中風驟暖
芭蕉聲裏雨仍寒蠻方不定陰晴景瘴嶺先慵旦晚餐

南籠一府處貴州極南

處是

有瘴氣

便欲寄書無別語七

千里外客平安

新城行館卽事

繞廊不厭百回行客已離軒酒尚傾銀燭一條花兩樹
伴人清夢到三更

闌干都復綴青苔鋪地松陰綠不開半捲竹簾貪看月
鶉鴣啼雨枕邊來

南籠苦旱余抵郡二日卽得驟雨然麥苗未暢發也十
三夜甫就枕卽聞雷聲自南來雨急如注徹曉不止
喜而有作卽柬張太守鳳枝

經旬誰說使車閒憂旱心情未解顏乍覺清涼思擁被
忽驚雷雨欲移山沿堤松柏爭飛瀑合隊烏鴉猛叩關
却趁電光升閣望已聞歡喜到苗壩

答張太守鳳枝見贈之作

領郡天南復幾春，退衙仍是苦吟身。
苗蠻繞郭風偏悍，孔李通家誼最親。
千樹影中圓月上，萬山深處一官貧。
閑情譜到雙紅豆，莫晒吳儂白髮新。
太守補紅豆

南籠府東郊試射士作

盤馬場西綠欲勻，紅旗獵獵起纖塵。
貞看一角春山翠，忘却當前角伎人。

一條馳道倚晴空，破曉先聞響角弓。
正是柳塘風急處，亂花隨馬入雲中。

南籠道中夜行

藍輿三折面方塘，雨後溪光著意涼。
行到石橋剛夜半，野花殘月鬪深黃。

羊場塘西見海棠

三月風光疑有恨十分顏色已無香
林昏露薄誰人看
留得松陰護曲廊

發新城道中值雨

別來春色已陰陰收拾高低徧野金
花秣極盛一晌東風
豈無意雨絲都灑百花心

三望坡騎馬歷黑土坡老鴉關諸隘

三望坡前綠欲迷一鞭高與白雲齊
多因馬上人回首
惹得春禽逐馬蹄

楊柳三層接綠苔春陰如海浸樓臺
山凹一騎穿花出
錯認雲帆天半來

度老鴉關

絕險疑無路回頭雨復來正愁疲馬惑却值嶺雲開細
草黑如霧野泉聲若雷輿前長官拜何處與徘徊合南張

君世昌
迂至此

過保甸塘至盤江道中

隔江途若綫正對行人面更轉百坡陀江流尚難見

春盡日發新鋪至永寧州道中

到曉風難定山雲欲亂飛上樓初破夢過嶺復霑衣石
澗草蟲響藥欄花事非去程三十里如夢雨霏微

道中作家書戲占一律

過得鷄公嶺巒風說亦愁春田喧蟋蟀晴木嘯鴉鷓雷

雨輒排戶牛羊分占樓居人怕飛瀑竹屋製成舟

白水寧州署發至北口塘值雨

百折途如縷千林晝若昏嶺藏初祖塔苗別仲家屯竹
瘦欲穿石雲奇竟寒門隨車謠已愧偶值雨翻盆璉如

南水寧皆得雨
人有隨車之謠

觀音洞

仄徑西來日欲曛洞門流水綠云云
擡頭忽覺峯奇峭錯認天空數朵雲

半崖音響若聞鐘石罅纔開蘚復封
誰識洞中仍有洞小橋流水一株松

自界首塘至駱家橋道中

南岡北阜自分條如雨谿光路轉遙欲引行人向東去
柳花攔定駱家橋

乾溝道中書所見

新綠埴街馬過遲幾家竹屋枕陂池鴨欄明淨鵲巢整
却有野棠開一枝

初六日渡鴨池河至四方井道中作

隔窗催客鳥何勤涼甚先將濁酒醺才欲出門衣袂濕
馬頭猶卷昨霄雲

江干清曉泛浮槎隔岸山隅路幾叉行人白雲紅萬點
半空都放石榴花

將至黔西東州守張同年會埒一首

憶昨相逢渭水邊忠宣門下說齊年同官萬里君尤遠

曾宰三峯吏是仙到處溪山疑綠野予曾兩詣桐城別

來京國望紅箋借北上詩衙齋借榻心殊慰為我先開

卜夜筵

四方井至黔西州道次

危途既稍夷平壤拓十里溪聲流四面山亦伏不起良

田富林麓百鳥展然喜固知巢危厓心亦匪得已溪田

新雨後波活掉魚尾裊裊青竹竿抽梢入雲裏途長怯

晴日迂道走坡底一頃荷花風炎蒸忽如洗

十九日至入定城西坡上校射歸塗復詣斗母閣看飛

瀑

射場距五里清曉聞吹笳初日旗幟翻鳴鉦出官衙拂
露過北郊先驚樹頭鴉藝士植若墻臺高建崇牙下馬
入鎖廳山青四周遮臺杪射的紅高低奪明霞一水出
道旁來源抑何賒墻缺竹樹交路若之字斜直下百尺
餘依微有人家雲氣復四飛驚風走汀沙回路改郭西
山田夾鳴蛙飛瀑空際來濕此半嶺花客倦欲暫停禪
扉試煎茶

路穿巖

萬仞峯何峻巖腰豁一扉遠從波影入已有日光飛攀
徑野花綠排空石笋肥谷鶯偷覩客時復閃紅旗

烏西塘

清晨馬上來薄暮烏西宿烏西人已知巖頭注雙燭
黔西州署西偏有海棠一株大蔭半畝惜花時已過同
年張君約科試時再過此相賞因作此以贈之

海棠籠半畝辜負此花時車馬何因暇闌干有所思碧
窗懸舊句紅藥剩殘枝不是張公子誰能訂後期

張同年邀遊東山寺

山厨連日綺筵開邀客東峯角伎回是川約同人我比

謝公心更冷屏除絲竹始能來

石峭潭空夜氣生少馬亭上燭縱橫酒闌倘復待殘月

北斗欲斜山四更

將至爛泥溝上嶺

四山飛瀑合鳥亦誤西東乍劈林梢絲遙分寺角紅幾
家波影外終日雨聲中絕險藍輿折尤防撲面風
革撥塘遇急雨

百道飛泉合魚龍欲上天戍樓何處在野水忽無邊徑
仄花迷眼厓傾棘刺肩夜程猶十里愁絕馬難前
夜黑行三重堆汎南諸山中

卅里羊腸路高低夜色浮虎風腥撲面榴火艷擡頭雨
急三層磴雲迷百尺樓林梢一聲磬隱隱出平疇

贈周刺史景益

卅年家住蠡河灣只隔衡門不往還清切早聞登上第
沈淪我亦厠朝班閒情偶欲消餘晷齧齧遠宦同應歷

萬山何日對床鄉夢好白雲流水自潺潺

渡渭河橋

渭河北去路尤稀急溜橫衝石徑微二十二條衣帶水
劈空爭欲上山飛

楊柳塘道中

雨絲初斷日光微十里亭前試袂衣剛被軟香吹破夢
滿山黃徧野蘂微

白蠟坎道中

忽覺身無據藍輿下半空冥濛萬重綠中隱夕陽紅客
醉連宵雨花殘昨夜風誰言播州惡土脉較疎通

鴨溪道中

水田千百級中有石泉青一道復孤下四山相與冥過
溪晴乍永隔岸雨猶零最是椒花好時時破夢馨

五月五日遵義試院憶里中竟渡之勝十首卽寄錢三

維喬趙大襄玉

溪流一曲巷雙條燈影三層接畫橋我亦趙家樓上客
七千里外憶今朝

新闢柴門遠市廛病餘讀畫復逃禪謂錢多因暇日添

遊興偷上吳孃鴨嘴船

內河昨日雨蕭騷溪水平添綠半篙惹得龍舟銜尾去
十番船泊北城壕

簫鼓聲聲壓畫檐整衣多半出褰簾
檣頭艇子如飛去

就近還趨八字尖

河干扶醉却歸來聽雨樓窗半面開偏是謝孃諳良性
枕函堆徧紫楊梅

兒童撲手說端陽杏子輕紅梅子黃乞與一瓶桑落酒
醉眠仍入少年場

三元閣上久徘徊天氣陰晴乍熟梅畫舫塞河人塞岸
忽驚雷雨打頭來

雲谿谿北接官衙添得紅闌眼乍遮好是一河燈影白
橋東錯認月西斜

連日河頭畫舫開無端鄰姬亦追陪溪南一樹石榴盡
都到美人頭上來

艾葉紛披蒲葉長
盈盈酒綠泛芸黃
蕭王里畔鄉風好
幾日門前角黍香

遵義試院

花紅結作屏
小綠圍成障
引領望山城
山城在天上
遵義校射場
在城外六七里
因就近假副將署射圃校

士

三面青山繞角場
僅餘一面入斜陽
沿林石細馬堤脆
帶得落花來射堂

三里周垣百尺臺
斷碑如戟翳莓苔
多應曾作老蛟宅
夜半石厓喧怒雷

本明構
應龍舊名

回龍洞

過橋凡五折已到遠公廬徑削才容馬溪喧欲上魚曉
烟搖竹栢初日定村墟莫訪垂龍洞泉靈脉久淤

桃源洞

名區馬到亦徘徊竹葉迎人鳥語催已覺溪山隔城市

絕無鷄犬有樓臺前塵事向殘碑讀

洞土人相傳爲李太白聽鶯處

絕

壁花爭五色閒依舊澗聲流不住錯疑重到武陵來

渡烏江

出山殊有戀山心飛漿迎人過浦陰百折水紋千折嶺
急流時見點波禽

江流中劈四山開雨後江聲怒若雷萬朵白雲空際落
錯疑潮自海門來

馮巡撫光熊招飲卽席賦贈二首

是日馮初度

早識雲間大小馮

時令子開州鞞亦隨侍在署

克蠻方何幸服官同

欣看裙屐筵初啓難得民苗歲屢豐橐筆卅年呼內相

公久值趨朝四日領司空

自山西巡撫入青署工部侍郎四日卽有黔

持

撫之命到來倘覓稱觴地却有東山若待公

咫只衙齋遞往還識公心跡幾曾閒五年官已移三嶽

公自山東布政司調直隸旋擢湖南巡撫又調山西八月恩先洽百蠻

貴州任甫八月又

雲南秋半風雲迎使節樓高烟雨夢鄉關移家我合稱

同里只隔明湖水一灣

使院後墻俯臨縣倉有荷池十頃癸丑二月將按試上

游命工築三層臺于墻內五月杪歸池荷正花臺適

告竣因分日讌客于上同里楊上舍浦爲繪千葉蓮

臺雅集長卷同人各繫以詩余亦率成此篇云爾

北人喜看山南人喜看水我雖南人居北久有水有山
方不悔胷中先有萬仞山山外流水聲潺潺欲從山斷
水流處更種疎花築廬住拜官昨歲來筑中所見宛與
胷中同不特有山有水有高閣且喜山緣繞閣閣外十
頃荷花紅爲補竹百竿爲築臺三層蒼厖百舍比如櫛
靜裏已落書窗燈花枝紅水流碧雲氣時黃亦時白有
時天黑雨欲來却好一窗收五色宴客既有藕藕底復
有魚池蓮可劈桃可食酒盞借此青芙蓉簾垂百尺樓
千丈讌客眞疑在天上窗櫺八角澄影聯一城居民望

若仙樓高高觴滿滿豐歲莫教行樂緩黔中有山皆可
田雨足便已成豐年新秋昨夜涼風起樓閣都歸雨聲
裏君不見紅荷花開亦無幾接得稻花香十里

七月五日曉出南門三里至南嶽山下射圃校士回塗

小憇野人籬落偶成

數月不一出禾麻已盈疇炎暑曾幾時節序慨已秋離
離瓜田花黃朶露未收日出鷄尙鳴沿灘飲羣牛射圃
向北開南折路苦修旗門揭峯前東西兩高樓迤左百
尺墻觀者積上頭山鵲噪不停矢向巢上流馳道滄白
雲馬行亦遲留回途改西南偶作物外遊園扉映方塘
竹筍秋尚抽防驚幽人眠花裏停鳴騶

七夕四首示女紡孫

卷之四 三

一歲十二回回拜新月何事禮雙星一年惟一夕
牛女緣何摯天人路本殊何須借靈鵲月裏有蟾蜍
挈得書千卷樓頭曝不停分將小兒女樓下拜雙星
銀漢間紅墻迢迢理七襄天孫如果巧何事不成章

十六日姜廉使開陽招同馮巡撫光熊萬方伯寧吳超
尼堪什張繼辛三觀察暨徐太守日紀聽綠軒賞荷
卽席爲賦采蓮詞十二首并邀諸君同作

牂柯秋到雨如麻盼得新晴露已華我自看紅君聽綠

二月前余曾邀同人集紅香館賞荷參差一月賞名花

曉日華筵水上開瑣廳千尺接層臺笙歌小部雍容甚

都雜兒童竹馬來

門前赤棒肯攔遮齊放遊人入使衙
惟底鷺絲無立處壓波人影黑于鴉

鳴騶來處甫侵晨午榻橫排任欠伸
各占一亭陳百戲却忘資主是何人

束素腰纖黠屐高棍日給諸歌童子花非勺藥卽櫻桃

旁人錯認紅粧好十五吳姬刺錦篙

偶然擊楫趁波平也學津船打鼓行
消受小年無個事一花開處一飛觥

繚垣日午轉驕陽一例都將小織張
知有美人空處立好雲低爲護明璫

水心亭北接危城亭左先聞按玉笙且覓柳陰深處坐
暫停雜伎奏新聲

無端燈影欲迷星高挂檐牙下繞汀空裏忽驚添異采
晚霞黃入電光青

百重擔子愁墻陰小合高擎唱點心一樣酒帘花外颭
亂吹羌笛揚胡琴

薄暝遙看打漿迎紫微花點照波明若非萬里橋橫岸
轉側有尚認吳頭楚尾行

廿年前乏此花枝貴州近年有荷花小艇何由泛曲池此日黔
陽似江左當筵爲譜采蓮詞

十七日徐太守曰紀偕安順遵義思南石阡黎平銅仁

六太守威寧麻哈開州普安四刺史松桃丹江兩司
馬貴筑遵義及候補諸大令復邀集聽綠軒賞荷是
日馮巡撫萬方伯以事未至卽席戲柬諸君子

笙歌隊裏許閑行月黑簾櫳水自明鸚武亦知遊客意
此來看雨昨看晴

夜涼移席屋西頭燭跋都同笑語流怪底諸君興偏逸

座中有蟹少監州

是日始食蟹

鄭州倅錕自永豐寄近作百篇乞爲點定因率成長句

題後并寄張太守鳳枝

我從黔靈山望子萬峯底知君升黨嶺夢遠亦千里山
能隔面不隔心一月不斷瑤華音官閒一室開常早虎

跡訝多人跡少使君句好誰能謳高吟祇憑石點頭怪
來詩札霧如許道遠聞經普安雨我時宴客關華堂發
函先擲馮侍郎侍郎讀詩笑語我屈宋衙官何不可東
南賓從萃一時更拓北牖哦君詩八行莫訝詩牋皺入
坐荷香可同嗅三更客去益朗吟涼月正墮層波心倦
來復憶南荒守索米還家得之否書成燭跋贅一言巒

府參軍我詩友

時太守欲假日金歸
為兩親壽聞尚未歸

馮巡撫既作外臺讌集詩及見余采蓮詞十二章即日
復依韵見答其用韵之妙不減皮陸爰作此志謝

傳牋飛騎一何忙射虎將軍善挽強不特事功吾拜倒
辨香直欲到文章

新秋回憶早春時頻把餘閒付酒卮燈影兩層花幾朵

博公二十五篇詩

賞公元夕燈詞及兩次
賞荷詩共二十五首

吳司馬玉墀洗硯圖

瓶花齋中書有目不減鮑家知不足按羅各本元宋明
天一閣中無此精東方卅萬言南閣九千字盤般嗜占
三十年歲宴不知門外事忽然四十作漫郎騎馬遠復
來炎荒牙籤錦軸誰寄將書少乃珍硯一方蠻陬豈獨
無書假硯亦止馮縑素寫若未攜硯來所
見止有圖一世難耕慨
石田半生卒業思蒼雅可憐有硯不鈔書僅寫年來主
客圖開緘忽欲念良友讀書已覺忘朝餽因君我憶卷
施谷千本異書碑百束他時兩客各歸田硯北還從借

書讀

十四夜坐月

初三逮十四月止晴一宵差喜兔已圓清光徹層霄鄰
東歌吹聲舍北亦叫號豐歲庶有期中坐喧酒豪而我
亦甚閒銜杯飲陶陶一酌天宇開再酌雲氣消悠然到
三酌月采如鮫綃兒女集我前竟索梨與桃礎潤旣已
收房廊步周遭幸此徹夜光歡喜到汝曹他時返江南
水郭景倍饒結伴或采菱沿堤泛輕橈比舍攜密親相
將走谿橋此景汝勿忘興至我欲謠紅燭忽斂輝開簾

已崇朝

寫管下名山圖八幅寄富尚書綱

古人祝長年類取象岡阜我今頌尚書亦以山爲壽尚
書八州督惠澤及民久前時持節處閩海及陝右仁風
所丕播地力實雄厚每于奇絕處皆得未曾有中南從
東趨太白向西走武夷清映海華岳秀參斗尚書前按
部一一迎馬首飄然來萬里清夢憶之否雲奇嶺復奇
倏又落吾手碧阜出我前蒼山峙其後烟嵐日千變各
各入窗牖春秋多勝日時復挈賓友咸云享清福得此
葢非偶慙余課士暇秃筆有如帚翩然圖名山不敢雜
培塿圖成寄尚書應復開笑口倘有飛仙人同來獻春

酒

過隴首關

排空傑閣勢迢迢，百折才能及嶺腰。
只向密林深處轉，怕憑風力上層霄。

新安塘道中

橘柚叢中半里遙，秋雲如畫東林腰。
溪南欲訪閒親串，趁曉先支獨木橋。

村村都喜說豐年，板屋斜開擺椀邊。
飽飯芋魁無個事，盡收雞犬上樓眠。

廿二夜看殘月

團欒時節雨辛酸，待得如鉤轉耐看。
那識幽人有深意，五更樓閣坐高寒。

谷子塘

人行谷子塘林木始回互野花生東西葉葉悉垂露肩
輿欲東轉黃犢忽攔路旆影拂曙鴉驚飛四穿樹初陽
開谷口樓閣恍無數知有山僧居泠泠曉鐘度

九月偕署中同人至城南福泉山高真觀登高鄭大令

五典設筵于此相待卽席賦贈

纔經寒露辰已值題鮫節騎馬上城時暉暉半樓日
臘花紅菜甲黃夾道半里來山房主人開筵樂未央
琥珀作盞茶黃觴幽禽語琳琅清磬聲疎越騎馬下城時
輝輝半樓月仙人樓閣涼意生隔嶺遞響山泉聲爨光
如霞出山頂却壓萬家燈火影

九月十一日發平越至葛公橋作

平明天氣晴送者逾五里言尋葛公橋乃復居金底冷
冷江一綫絕壁插江汜嶺樹鬱百重凌晨露如洗危亭
崎林表初日出亭裏花朵映日紅晨扉竹中啓鄰春杆
相答童叟色俱喜白屋飯已香幽人睡難起

清平道中

四山茶花香黃白均可愛花苗聯袂出時折一枝戴秋
葵盈半畝野蓼色如醉危塗穿竹徑竹密出岡背險絕
天半程疲蹤屢思退前旌久延佇半晌甫及隊行及羅
仲塘山雲轉深晦

藍嶠至草塘關道中

藍嶠及草塘十里壁如削濛濛棘生刺左右難著腳回

崖野花艷谷口日西灼石窾嘘北風鷹驚馬頭掠人禽
爭一竇撲面險欲著東西缺盈丈道險藉畧約樹杪俯
石樓窗櫺望依約驚沙莽成陣馬走前後却半道聞語
聲長鏡劇山藥

過偏橋西三里上一陡坡

石黑雨亦黑行人向何處巉巖當面出欲往決無路蹊
斜非意想時隱復時露石罅逗一門奇花忽無數高低
盤百級樹杪作回互控客西北風洶洶有如怒頻于奇
絕處欲把生命置老樹猛攫人踉蹌敢回顧危疑行半
日深險已畢度出谷路轉平欣然下徒步

翁顧塘道中

半嶺昏雲積不開空山秋盡恍聞雷怪他百道山泉合
却詫藍輿飛渡來

翁頭塘北路尤賒屋脊橫看一徑斜誰向閑門訪秋色
夫容開徧野人家

自平貫塘至白巖汎道中

午餘都枕白雲眠兩兩飛泉出竈邊肯向淮南乞靈藥
本來雞犬只居天

馬頭濃綠間深紅半日全行複嶂中百轉千回抱村塢
江南無此好屏風

濛濛絲雨日千回夕照光中霧半開怪底樹頭山鵲噪
却驚天上筍輿來

秋來風味足山家深淺園林百種花先有人樓紅柿子
飽嘗聊可當谿茶

石阡城南溫泉

石罅空濛逗燭光訪泉亭上拂衣忙半生莫訝塵勞甚

已試人間第七湯

予所試溫泉直隸則盤山陝西則臨潼
江蘇則黃山蘇州則和州

向容換此而七矣

白石潭疑築釣磯流從壁隙漾依微形神釋後却危坐

蝙蝠嚇人頭上飛

自塘頭舟行至思南府城外

青山至塘頭南北忽中斷驚流適有幾葉舟一半舟行
半登岸帆影欲入地馬嘶驚上天高高下下行不歇馬

力反後帆居前雙江合處波流拓急溜平添水千斛高
低橋柚合一村五色石中魚比目風帆北轉飄雨絲馬
上戴笠知多時飛樓半晌酣清夢馬背人愁濕衣重江
流曲處城郭開岸上一騎驚先來船頭吹笳船尾鼓濕
霧驚開日剛午

出思南府遵化門道中

山方如筐一山圓若筍山真中繩尺雲亦就規矩偉
裁造化功幻此亦奚取奇零不能割嵌以數僧宇霞景
正欲升炊烟穿縷縷林紅初曙日澗綠昨宵甫誑闢天
半扉幽人正軒舉

至思南府城東七里校射作

三里出郭門七里至角場材官藝士已先待日乍破曙
雲蒼涼忽然對面誰能覩霧捲千人萬人去須臾一騎
來破空帽影正罩晴暉紅斗坡直下誇輕舉馬背白雲
飛縷縷山雲高高上接天萬綠倏現屏山前紅林蕭疎
噪山鵲屋後人家飛矢著

夜起至射堂看殘月

樓臺高下樹縱橫環郭峯巒不見城好是四更山月上
獨來亭裏聽灘聲

觀音閣

到來已覺上青天尚有人耕屋上田老樹綠零前夜雨
夕陽黃破半城烟江聲似恨山重疊鄉夢都迷路七千

且倚石闌閒啜茗半空靈果落僧肩

小厓關

足底先驚萬疊山半空樓閣自回環紅雲堆砌不知冷
白水繞門無用關日影鏡光偏照燿鳥聲人語合綿蠻
差憐送客殷勤甚七里岡前馬未還

將至掌溪塘道中

歷徧危岡陟淺沙沿江途細欲如麻蠻鄉秋盡饒春氣
十月猶黃菜甲花

客程難得片時閒穩卧藍輿出險關欲剩心情看江水
垂簾行過幾重山

將至石阡道中

水西林塢好迢遞隔東村偶跨水牛渡閒從石嶠蹲巖
穿疑有路雲定不知門清絕垂綸叟忘機坐竹根

重浴石阡溫泉

百里裝方卸孤亭馬獨來誰云此冬日聊比坐春臺磴
削穿巖竇屏虛障水隈奚童款扉入一綫夕陽開

曉發路瀨塘

離堂尚聞雞暗谷甫見日濛濛荆棘影披草至絕壁露
氣周一山秋衣冷侵骨回瞻驚後隊如蟻穴中出前旌
復穿雲石瘦路如髮風蘆聳清聽時墮隔林橘客倦欲
少休茅軒樹頭笑

將抵荆蓬塘

誠知山百折每折非意想飛瀑間一層冷冷愈神往
茅齋雲際逗絕壁倚仙掌十月花尚紅松濤落清響
山田欣倍入石因列三兩豈僅人事饒雞豚藉生長
兒童乘冬隙倚戶結絲網相約捕渚魚烹鮮佐樽盎

過思南塘道中

高下田如百衲衣人家初日啓雙扉
草中尚有閒胡蝶却恨蘆花作雪飛

轉覺空山氣候春冥濛花氣拂蕭辰
峯根獨石誰來坐時有松枝掃落塵

出鎮遠城南三里試射士

一半山雲雜水雲到來空裏草香薰
環墻人語覺清脆

曉日射堂紅一分

寥寥飛矢去如星惹得樵蘇跡暫停
天半午鷄啼不徹
東南樓閣爨烟青

沿流歸復誤西東出郭燈光映水紅
不信鳥巢皆戴屋
幾家樓貼半空中

送姜廉使開陽入都

相離真不忍且盡酒千壺每歲衝風雪
隣君在道途

言五年除夕皆在途中計應朝北闕且莫憶西湖好趁帆檣便行

過故里無

同官凡幾輩接跡成三邊謂歸王伯吾子能孤立

君恩僅左遷暫還諸季節行贈繞朝鞭他日金臺側相

思屢寄牋

冒雨訪諸葛洞

雨聲無時停天宇忽已黑與從空際下
照路有白石前行未及轉飛瀑已及額
蒼蒼兩層厓萬古積暝色懸流至三仞
雲出波下白排空列千竅難作老蛟宅
居人掩關坐屋上浪花織傾耳聽此聲
天空地疑拆

再度響琴峽

黃平州度玉虹

玉虹黃平州

峽

離青天飛下一白龍魚梁江度

琴峽十萬絃聲驚拉雜大聲疑宮小聲徵
激得山雲去如駛斷厓峻响石色紫厓上
沈沈日光死離波百步飛雨飄隨響曲折
經危橋溪風蕭蕭溪月靜疑有神魚出

波聽

黃花坪道中

連岡西去路千重竹色蕭蕭間嶺松照路野花然似火
出山流水活于龍風棱時掣當風燭雲朶驚飄隔院鐘
錯認脫綿時序近豈知寒序迫隆冬

再經隴首關

朝晴爽氣通胡蝶尚西東錯訝春花放平原野燒紅
掩關莫復朝香篆生林末孤客心易驚上樓雲欲活

雪意

試貴山書院諸生題得先字

嚴凝樓閣杳難眠是處林巒暝烟飛霰乍飄孤嶼外
重陰欲釀小寒先光埋高下三更月雲黯西南半壁天

不是官齋望偏切欲憑盈尺卜豐年

卷之三

三

卷施閣集卷第十四

陽湖洪亮吉著

黔中持節集

癸丑甲寅

初五日近山堂消寒一集分體詠秦宮人鏡鏡銘云天

思君王
八字

六王雖畢閭左空男行築城女入宮長城東西萬餘里
永巷迢迢亦無底宮中永巷邊長城內外結成冤苦聲
入宮詎識君王面三十六年曾不見轉思天上歲月閒
那識相見期仍難班班血淚銷難盡剩得團欒一方鏡
攜來照影影亦寒明月尚作秦時看非珍異物思垂鑒
背上千年土花艷君不見鏡銘八字誰所為篆體絕似

東封碑留伴斯刻千秋垂

家大人命同作

飴孫

祖龍一卧羣雄起三月阿房土花紫千年宮鏡出人
間往事分明亦如此玉容顧影人爭羨昔日紛華鏡
中見驪山明月夜梳頭竹宮歌舞朝勻面鏡能察面
難察心冷眼那及金銅人菱花徑尺青絲紐拂影都
誇好身手可憐三十六宮懸不辨興亡辨妍醜天上
迢迢望本奢昭陽銘後事如麻誰攜玉匣閨中物去
照宜春苑裏花

初十日漱石山房銷寒第二集題張太守鳳枝珠還圖
圖爲太守侍姬冉氏所作姬母無賴妾搆訟端姬由

是遣歸其母謀別嫁之姬剪髮自誓乃止同人感其
義勸太守復迎焉爰作是圖名曰珠還亦所以美太
守也

瑣廳圍坐燭如山本事詩成手自刪輸與清廉海南守
六旬傳說去珠還

自返蓬門百事非香雲和淚剪依微從茲百幅梅花帳
不覺蕭娘鬢影肥

兩條官燭影闌珊百詰初窮語抵譚絕勝河陽舊潘令
種花猶易護花難謂陳大令

暇日間窺青瑣旁玉山筵上未顏唐抵他一曲鸚風怨

只有銷魂淚兩行姬以訟事未結留貴陽守署匝月一
隨徐恭人觀劇偶窺坐客見棧齊

太守在席
不覺垂淚

輕車油碧許迎回
紈扇親拈出鏡臺
臨行徐恭人以二
紈扇贈之

不是求仙舊
童女肯隨徐福住蓬萊

垂老休嫌善賦愁
使君宗法本風流
他時九曲梁溪上

合與修成燕子樓

十五日藏春塢消寒三集題范巨卿碑額
卽送張州守

會塲南還

昨者黃少尹
此碑刻係成年夏
貽我金鄉碑摩天石
上友黃君仲則所贈

刻揭巨孝復有獨行名
孤垂洪流浩蕩豐碑
漫僅識青

龍舊年月八分徑寸
誰所書無乃山陽縣
君辟傳觀足

令友誼敦二千年來
八字存若言至性刊
金石不數王

貢兼雷陳一篇論愧朱公叔中世交期益翻覆賣友人
傳酈曲周面朋我恥蕭光祿史家創格非好奇欲與薄
俗貞心期不傳吏蹟傳友誼此意亦愁知者稀開緘淚
已垂言下恨不還君伴長夜匹馬招魂又一時荒阡種
樹知何暇百徧摩挲紙亦光含情重送郢君章他時北
上金鄉道酌酒應臨官道旁

家大人命同作

飴孫

烈士相交祇情性一千年來傳獨行偶從山縣拓此
碑姓氏偏教坐生敬卓哉山陽范使君獨抱古意超
倫羣豈其交誼足不朽乃寄金石垂斯文千秋一語
饒奇旨生死論交自君始始知友誼殊可珍交到重

泉合心死邳君章與殷子徵未識死友焉知生長沙
學生新野卒縱不生交亦心折巨卿好友不顧身落
落死後殊無人幻形誰復論爾我一徃直欲兼幽明
鄉民翟循縣君薛留得金鄉墓前碣篆文不特軼八
分好補酈元經注缺建安以來世俗澆慨然何止劉
孝標願將剝落數行字持贈世人同石交巒鄉刺史
殊今昔況值窮冬束裝日偶讀廬江太守碑一篇還
贈張元伯

張州守瀕行又以素冊索詩復成二絕句

風雪連晨偶滯留行蹤莫爲左遷愁君看判府威名重
絕勝西南領小州

紅塵十載鬢初班，却喜今因定省還。
欲借寒威暢離緒，留君十日住黔山。
時留作消寒第三集

二十日聽雨逢消寒第四集同詠諸葛燈

尚從遺製識英靈，五夜軍書肯暫停。
收燼未應忘火德，穴胸先已勒金銘。
虛疑絕徼留銅鼓，遠憶高原墮大星。
畢竟出師餘恨在，至今燈影作深青。

廿三日寫歲朝圖贈馮巡撫光熊並繫以二詩

如水臣門口，往還識公清。
節服諸蠻何妨饋，歲無長物自寫黔南幾尺山。

餉香粥鼓滿平疇，鬧得花香出樹頭。
都是蠻方小兒女，春風竹馬十三州。

二十五日思補齊消寒第五集卽題徐太守日紀陽春

有脚圖

何妨遣婢中閣聊爾充君下陳欲賜人間湯沐先回天

上陽春

蓮葢屏風凍雨梅花紙帳春雲待過消寒九九預防修

竹彈文

附

飴孫

溫和足底有春光着意直能識熱腸頓憶孤山林處
土梅花多處太淒涼

早從洗濯見風流一晌春華偶滯留不着人間閒冷
暖此鄉端合號溫柔

小除日消寒第六集招同張太守鳳枝孫刺史文煥陳

大令熙藩王參軍湛恩暨兒子飴孫卷施閣祭詩卽

席成六十韻

我方謀讀書俗事急除屏爆竹出我旁瞿然心始警起
來視林梢失喜發桃杏軒神花明明紅燭燄一歲去無
影因之思我友走僕急延請陳生疲案牘王子困簿領
孫郎耐繁劇張叟性剛慥窮冬居省會衣敝鞍不整居
然七千里聚此數萍梗豈無還鄉夢隔越萬重嶺蒼蒼
四邊山城郭若居井牛車行鼠穴一笑等蛙黽差欣合
并數未覺昏旦永規船作吟齋製小類舩艤獸炭紅一
爐先堪辟竒冷雙棚支鼓子弓弩嬾不檄捷門誰更出

一室樂恬靖房廊稍曲折衆詫若仙境堂阿鋪長筵蔬
脯雜饗麤霜螯搗初碎鮮鱒已剔鯁瀕榴蟹勻橘兼不
棄梨棊南方來百物圓螭長者蠹歲除饒食品一一列
盤皿非徒祀心神藉以壓灾昏明燈懸四角香炷紅耿
耿高杯羅數十文石及生礪雄黃鑄兕虎犀角刻菱荇
或如肘生柳或若瓠有瘦爭先誇大戶蓄意欲吞併盤
飧來陸續誰識夜已丙慙余少孤露敢說有殊秉時時
避詩債獨處心怲怲永豐才尤奇筆早露鋒穎創爲小
言賦剖析到句麗南籠年六十齒硬截春餅雖然能飽
啖不改顏瘦瘠惟愁酒杯寬苦語求減省參軍揮千言
尚說才未逞微知所宗法天問及哀郢浙西饒秀上遠

復勝汝頴宰官仁及物讞獄繼張郟心雖尚寬大酒政
獨嚴猛藏闔兼拇陣十九巽徼倖興酣開牖望繁麗富
星景倚齋潤西北隙地得一頃雖非二三月春樹已華
靚兒曹不入座窗隙屢延頸大兒粗有筆頗復愛習靜
年來通選學出語喜彪炳盤盤祭詩筵得預良已幸小
兒才十歲逃塾每遭打攔門喧畫鼓日轉益頑獷阿翁
防醉仆座外戲扶綆酣眠到童僕百問百不省皆言沐
餘歡沉湎誰可做窗檣頭互觸蠟炬險失柄更闌客碎
主失笑喉復哽肩輿北風大各各蔽笥管輿前馬居後
爛醉戒馳騁何須更持燎太白光罔罔

新正五日消寒第七集同人集陳大令熙藩雪溪吟舫

大令以盆栽素心蘭見贈卽席賦謝

此日何日窗櫺陰陰撫序不樂求我素心素心之人其
室如斗街南巷西爲約良友春酒旣熟園蔬雜陳雖未
投轄童先閉門離離光明一室四出重簾無人花影若
月坐客默坐咸披素襟所愧空谷楚然足音移花居前
移酒在左友知我心舉以贈我我家南頭一閣面山山
桃水仙位置其間人之素心花亦相肖言詮已忘靜不
索笑時或獨醉時還孤眠半窗冥冥香徹曙前

賀方伯長庚屬題其尊人蘭竹卷子

畫蘭不畫雨雨已飛晴空畫竹不畫風風已出榦中稜
稜數竿風卷此楚波白亭亭幾枝雨亦勝楚天碧先生

偶開門漢水滋水流無痕先生偶櫺戶蘭枝竹枝約同住卅年豈以畫得名轉借蘭竹抒幽情乃知氣味本無別與蘭同心竹同節一幅雪景一幅晴末幅皎月枝間明君不見蘭枝竹枝幅盈十并寫森森石林立展圖不及見先生奇石當前且長揖

人日消寒第八集同人登黔靈山復迂道訪聖泉歸飲
王參軍湛恩一角山房雜成三十二韻

兩載逢人日三年住鬼方路疑窮北首雨欲破南荒過臘飴簫緊初晴筍屐忙願尋何地勝咸指此山岡峻嶺回天外奇峯立斗旁浮青界滇粵濃綠壓城隍交壁松烟暝岐途栢榦擋幾回衝馬首百折走羊腸積霰鋪層

殿罡風響曲廊解鞍懸石磴易履坐繩床果向僧衣落
禽從佛面翔怪聲穿土穴仙掌拓巒鄉半郭巒光斂全
黔地勢張天龍煩說偈野鹿看傳觴更許陪開士憑誰
禮法王客方搜古蹟巘已下斜陽詎可辜清興仍須束
急裝澗幽留剝蘚寺僻富修篁毀廟神無火陰崖虎有
俛微黃辨樵徑睡黑墮漁梁聖水名終妄射人言激起
試之杯驗同人擬廉泉改未妨逸情嫌晝短回路覺川
長候騎依官柳宵鐘出女墻雙街籠燭樹一角訪山房
濁酒何能減逋篇久不償簪裾來淨域旗鼓集虛堂當
代爲長句羣公雅擅場俊才同鮑沈堅筆鬪班揚設榻
容孤卧行厨約徧嘗擁爐斟淺碧升閣望空蒼此會多

應羨他年誌勿忘靈山今夜月添影照詩狂

十五日五鼓起看雪

攔門語忽驚僮報四山晴巒地少冬雪逢人詫夜明冷
光飛列帳寒影淡孤檠幸有辛盤在聊將卯酒傾
陳大令熙藩屬題城南雅集卷子

茲方當九日撫序却三秋早陟高直觀格秋按賦評觀
證遙思甲秀樓果然逢大尹于此集名流愧未陪遊展
題詩最上頭

十六日消寒九集湛碧亭禪房看雪至二鼓乃返

及此初更後冥冥雪乍晴林巒互蕭瑟水月與空明兀
訝樓臺影寒流鳥雀聲倩誰圖作障一角傍山城

蠻方慙久駐豐歲喜頻仍一尺道旁雪萬家門外燈爆
從冰柱裂月共凍雷升幌杳馱羈此夕清虛景還應念
遠朋時除太守馮開

寒風送別圖送張太守鳳枝南歸

甲寅新正十二日太守遭外艱去任將于春杪奔喪
南歸同人欲作黔山折柳圖贈行余意有未安易爲
寒風送別蓋仿燕丹時白衣冠送荆卿之例攷白衣
冠本弔服非執喪者所衣吾輩與太守交厚于其行
故當素車白馬送之情事方稱爰賦三詩卽邀諸君
同作

名山人日記勾留乘興聊同麋鹿遊一度巷門重問訊

麻衣如雪感蟬蛸

歸及江鄉五月時北堂正好夢孤兒思君欲贈忘憂草
不向風前折柳枝

易水千年事已陳歌聲猶若繞梁塵何妨更舉前修例
皆白衣冠送此人

初春折柳圖送陳大令熙藩北上

前年來黔陽長官攝渡邑貴定城東南馬前驚一揖昨
年駐會城長官爲劇縣衙齋欣咫尺投謁乃無算長官
爲政甫及今大吏拭目民輸心琴堂悄悄靜撫琴暇復
伴我耽幽吟一行作吏何嘗廢赤棒森森墨胥避簿書
叢裏集賓朋撰得城南一篇記

謂所作城南雅集圖記

初春柳絲

黃及肩拂拭鞍馬行朝天蠻方百姓心難足官好更防
遷去速燒燈節過持瓣香私向山神社公祝十月種麥
四月秧官歸正好麥上場吏胥無權戶殷阜但祝官遷
此方守

出貴定城雨至高家塘稍止

今晨山氣寒呵凍集徒侶行穿石罅中濕霧黑如許蕭
蕭松竹徑馬首寒不舉前旌瞻後隊似隔烟萬縷忽然
衝山風捲去一層雨稍復見晴雲山樵喜相語

自蔣塘岡至谷洞塘

寒空時復捲風聲石削橋傾道未成忽訝禽巢落人語
山樓都向竹梢生

連山無際水無涯過嶺南來一徑斜不是數聲山犬吠
全邨都被雪花遮

早發谷洞塘

一峯雲一峯雪一峯冥冥影未開猶帶前溪夜深月須
與天平明月向雪峯墮冷光有道飛撲人穿得白雲如
縷破前山日欲出後山雨復來深谷隱隱喧輕雷君不
見蠻方氣候殊凌亂曉日須裘午須扇

落月西塘

馬首迢迢溯北風兩山青破酒顏紅我來似欲齊昏日
落月塘西日正中

將至都勻道中

一山途四出一水流百曲山奇方礙帽水冷復繁足途
危輿轉穩空處交竹木前行皆俯視一綫入山腹茅檐
無冬春濛濛土花綠花苗迎使節半嶺注紅燭十里戎
鼓鳴蘆笙響空谷

橋頭汎

過橋方數折正對石塘西却望來時路蒼蒼樹已迷野
蔬全上屋春水半吞堤莫厭山程緩才聽日午雞

初六日小雨至都勻府西門外試射士

半里冥濛霧山邨雨不成野雲隨地落春樹接天生白
訝懸泉影清流飛矢聲射堂寒較甚馬過亦驚鳴

初七日射堂試士畢登劍河橋登翠亭望西北諸山

沿流都有鷺絲飛空翠時時沁客衣
忽訝危厓笑人影似驚鳴鏑啟山扉

回潭西去綠沄沄一角樓臺上夕曛傾耳却聞空際響
入山雲門出山雲

勻陽書院春望

春波潤處春堤狹十二回塘滿浮鴨晴鳩催換袂衣忙
樓上人閒盡開篋半城花香裊若絲新綠對岸愁參差
銷魂別有東風柳絕似春人十五時

多結塘

多結塘邊雨似麻沿途風峭尙飛沙無人知道春將半
時有出牆紅杏花

晚度大登高小登高諸險

一山當面氣冥冥高下燈光接樹青不是雨絲飄左右
玲瓏猶認半天星

都江舟中

危厓春正半花氣欲薰天劇愛東風樹斜生北斗邊凌
空自樓閣絕壑澗雲烟一帶人家好簾垂飛瀑前

下陡坡渡鷄賈河

上征誠云難下達亦非易橫空旋若磨百折始及地藍
輿寧敢却頭上壓飛騎欲前仍縮足轟處石犀利胡蝶
忽一雙飛來立人臂厓窮坡復陡入隙途轉細平視雞
賈塘斜陽落巖際

羊忙塘

行徑羊忙塘奇石破空下壓雲排萬仞時裂一尺罅飛
泉頭上出光景相激射稜稜峯斷處欲往少憑藉馬首
卷北風孤桃向空謝杉林轉蒙密間亦露臺榭頗念北
山人幽棲若長夜

石檻灘

俗名石門檻

始棹發都江江干日初起鑼聲行不絕奮迅已百里蒼
蒼兩邊山厓斷石將圯驚校時一擲險欲浸潭底石脚
萬窾鳴時時出潛鯉前行經石檻舟子展然喜風暖日
亦晴沿邨數桃李

雷音灘

一舟挈一繩一繩長百尺繩頭持十輩畢力踞巖隙高
低懸半里觀者咸失色一瞥倏已過微驚眼光黑危崖
排石齒都向舵樓突我僕忽失聲頭低險遭噉長年欣
過險緩棹出厓側却望四邊山蒼蒼路仍塞

都江夜行

前山誠欲雨其奈後山晴澗水忽然暝李花無數明墨
鱗成隊出白鳥破空行卧聽花苗曲勞勞解送迎

古州登挹膝亭春望

山城二月花光足空處香飄萬家屋桃枝搖岸柳拂簷
花裏雨兩懸珠簾樓臺影外春陰薄試茗重登一層閣
日斜盤馬射堂西却送菜花黃出郭

抱膝亭望憇園花木甚盛欲往未果

小築烏巒地全家綠水灣數聲花外屐千尺雨中山午
倦童呼茗春閒鹿抱關上頭容展眺未肯說緣慳

渡溶江登五榕山兼謁諸葛祠作

溶江江頭石如磨五龍徘徊一龍卧排空一石支一樓
高榦四出扶樓頭一枝雅復高羣木樹腹空于百間屋
低枝欲雨高蓋晴臘雪尚向枝梢明年深樹古禽難宿
剩有一巢藏廟祝行人入廟火伴驚鳴鳴角聲巢上鳴
孫司馬鑑招同彭軍門廷棟書副將麇飲署西諸葛臺
並角射至二鼓乃返

闌干曲處林陰直官裏春閒試鳴鏑平坡十頃吹細香

日色侵裊垂鵝黃笛聲初停鼓聲警舫屋深深若居井
忽地排空雨作絲梨花白得春無影

八匡塘

一邨都不見全被李花遮澗水到門合山樓出樹斜露
光開梵剎雲影抱人家時有遠香至應知春事賒

夜宿寨麻有苗女年十三四者結隊來歌苗童吹蘆笙

和之

歌管初停舞袖忙燭花紅處勸飛觴前身合是梁間燕

猶着烏衣入畫堂

苗女衣裙皆黑故云

山中夜行

小雨乍三日梨花合一邨夜燈紅覆屋春樹綠當門卷

幕留禽影開扉驗水痕更殘月將出山氣尚昏昏

九朝塘

嘈嘈天半響笙簧雉尾排肩繡兩檔三百蠻姬擁前後
藍輿飛過九朝塘

大容塘值春分

薄寒初散酒初醺炊火斜連嶺上雲小閣兩層山四面
百花香裏度春分

宿路團行館

使節遙從柳外村一間茅屋侶鷄豚妖禽入樹花先顫
薄霧吞簾鏡亦昏吹夢夜風寒有影接天春水月無痕
柴扉莫謂誰來款宵半驚雷欲劈門

將抵黎平歷滾馬坡諸險

古州及黎平天黑少白日忽然雲際一閃紅天外雷驚
劈山出沿山巨石悉欲崩轉眼已失千家邨白雲茫茫
時吐吞陰厓束人疑鬼門一坡直下如注矢削壁稜稜
僅容趾輿夫歎息何至此呼吸真堪判生死峯形中斷
裂若溝鞭馬一躍愁回頭前峯行完後峯起上欲摩天
下無底眼前親切雲霧生足底忽已開山城君不見平
岡鱗鱗鋪萬瓦突起一峯名滾馬

出黎平南門

街衢南北嶺西東柳外高樓面面通一晌曉霞紅不定
前旌行入石花中

依然江水綠無邊不信離家道
七千絕似踏青南陌路
暖風晴日袂衣天

射堂卽事

出郭濛濛霧林鳥背客啼梨花三百樹
白到射堂西
隔岸坡陀好人希馬作羣過橋飛
矢急穿破一溪雲
極目望層城春融萬家屋祇覺遠天低
靡靡接新綠
山樓鼓角忙歸騎出橫塘無數春人影
斜陽落女墻

南泉山

今朝天氣晴靈鵲聲有喜言遵南泉山
異境乃獨啓喬
枝森上聳側出悟石理生翠幕一山空
青露如洗蹤疲
方問路絕頂尚三里裊裊石鼎香迎人入
亭裏天風盪

衣袂雲白欲緣履卑瞻窮萬仞微辨爨烟起却晒下方
人經旬居釜底

靈觀閣春望

千折泉出山百折人上嶺尋源至亭側石闕方若井禽
聲千百種蠻語本難省手掬石上流呼童試新茗郡齋
憐宥寂飛騎餉春餠幽人居絕壑構屋恍橫艇微風振
林杪斜日逗光景闌干飛百尺坐處據松頂半日衣袂
香濛濛逗花影

過少寨河橋

平蕪一雨春花謝濃綠樓臺若深夜雲陰如夢不逢人
澗水分從馬頭瀉波空若行明鏡中鷗鷺兩兩舒春容

危崖面水不濡水石脚到地仍懸空人家屋上山如活
石窾玲瓏牖邊突沿溪三里行半時細聽丁丁斧聲出
少寨河旁入一洞行半里許

一峯高疑帆缺處作堂奧前行石當額側足入岩窾玲
瓏千百隙曲折孕奇妙大石闢若扉稜稜縱森峭左途
右爲壑坐石儼可釣稍深阻天日飛瀑光已照支遁少
石牀稽康留鍛竈厓同豺虎伏水學龍鸞嘯削室驗孟
勞十人洞有蠟黠數藥籠驚伯約昏程不逾百閑客倘能
到來欣去悒快一步一回踏半里望始迷晴陽赤如燒

土人惜未窮其勝五六

早發新化塘

水田百級行方半，攔路野雲蹊。忽斷牽衣避，道歷少時。
大石如牛，復當岸行人欲歇，嘶馬催村店。正向雲頭開。
山坳石磴暫延佇，衣上綠綴寒莓。苔冥濛路向松梢破。
絕頂一山如石，瀝清泉落處。花朵妍山翠，壓樓人尚眠。

平江塘

晴鳩聲裏燕呢喃，高下藍輿睡乍酣。好向春波寄花片，
迢迢此水入江南。

春殘是處綠芊眠，十里平蕪盡帶烟。胡蝶欲言高不得，
野花黃已上青天。

出錦屏縣城上斗坡

一山綿一縣，高下里三十。高者仰如跂，下者俯如揖。愁

霖行撲面碎石險埋膝中途勢倉皇懸溜復飛及天風
下林莽石窾自呼吸蟠澗三兩松人禽亦爭集崖深羣
燎火盪此衣袂濕濛濛雲氣蔽却向空際立石罅忽啓
扉生苗下山汲

黃泥峽

馬蹄真已踏千峯上嶺叢杉下嶺松當午日光分顯晦
南山雲淡北山濃

誰將界石作橫梁上是黎陽下澗陽怪底廟門開向北
南行不炷嶺頭香

紫雲橋

春山一片疑無骨都作紫雲扶曉日馬頭隨意歷西南

無數樓臺復飛出沿溪一橋如一舟橋上三面開朱樓
前旌後隊何回緩似向長虹腹中轉橋心倒插十丈餘
飛蓋過處驚遊魚君不見一山前頭復如井却喜嫩晴
鋪十頃

師子厓

我行及雙溪大石黑半天人緣石隙中有若蛇蜿蜒危
巖何陰森行處正壓肩懸瀑復四飛時聞響濺濺藤蔓
百尺垂倒出花朵好空處突一亭簾垂裊青烟延回出
層厓萬頃鋪水田清絕半里程人家總疑仙沙鳥亦有
情飛躡筍輿前

早發叩水

早行出邛溪殘月溪上漾漾千樹花正寧邛溪上花
朶落盡巢禽不知遊魚吹花香氣若絲花光深萍色淺
襯出魚苗綠千點枕波樓閣三百家春夢正好驚啼鴉
橋東覓路才能出暗影溪頭自飄忽千林綠重曙不開
一樹梢紅甫迎日

瓦寨

宇程卅里走沙礫一寨四面圍松栝雄黃出穴百蟲伏
牡丹壓闌羣卉慙洞形如扉日韜采天頂若握雲拖藍
相攜活火欲烹茗却有死谷邀停驂

鬼鳥塘

石徑空濛露有光四山風刺袂衣涼杜鵑一樹紅于血

月黑愁過鬼烏塘

路瀨塘道中

路瀨塘西石逕適人家竹屋半臨流
低飛胡蝶高飛雨
百種花香出草頭

高下岡巒馬去遲
緩行剛及午晴時
山南一片波如掌
閑看兒童捉活師

雨夜至石阡溫泉浴

月黑雨聲愁穿林到嶺頭
似防湯谷沸飛瀑入池流
昨宵江水深沒却江干樹
老鶻無處棲從人屋檐住
延江兩生行示貴筑熊生煥章
思南安生嶼

延江水流千里一生居江頭
一生住江尾熊生十八貌

最癯自構竹屋臨江居一室窘乏文豐腴安生英英年
十九從宦三年住清口嶺人館落筆居然學劉柳我
前持節來衡文萬言日試童子軍惟二子者超倫羣雖
然日課文一篇不若日讀書一卷赤文綠字填方寸激
電驚虹注雙腕嗟余遲算猶勤學矧復生年甫當冠九
垓一瞬何難屈尺璧寸陰寧得換扶起三霄翮欲全遠
行百里程方半竹看子筆排風霰會見余言匪河漢君
不見蠻中一雨何綿連延江水流行拍天吾曹學術亦
如此努力來看有源水

袁太守純德招遊城南文昌閣並歸飲署齋卽席賦贈
并壽太守七十

我前遊秦中聞君宰米脂十年來荆襄君官擢同知盤
盤政績推尤異佐郡淹留賞心地尚書清節號知人我
作門生君屬吏昨慙持節來黔陽君亦五馬官思唐秦
中知名楚中見何似黔中日謀面春殘約客城南頭江
漲欲從城上流看花步幃遊山屐誰信使君年七十窗
櫺八面閣四層飛步早從高處立日斜回馬東南街轉
歷百級來官齋亭危正面延江口我飲一杯君一斗眼
中落落五老峯且挈浮邱爲君壽

兩發思南袁太守純德鄒遊戎寬率兵弁出小厓關相
送卽席賦贈一首

袁君揖我處絕壁立千丈藍輿方欲下飛瀑眼前滉竹

亭留少坐茶話覺清曠兩立三百人升頭致微悵愁霧
敢安坐急騎出厓上澗水奪路流巖門不能抗前行泥
滑滑黑霧馬前障五里甫出山晴光草頭放

發都勻日枉道過七星山入仙舟引洞

偈仄疑無路隨雲七里東水從深徑黑果向怪厓紅削
壁風徐下幽軒日乍中正憐書韻好鳥語復瓊瓏

其等續
書其續

名方集言卷之四

卷施閣詩卷第十五

陽湖洪亮吉著

關嶺衝寒集

八月十五夜

蠻方今夜月兒女集樽前迢遞思鄉國團圓藥敵客筵塔
光雲外隱菱角雨中牽不寐緣何事相將語昔年

十六夜雨

闌干沉不見都在雨聲中細霧吞簾白孤花隱幔紅半
街籠畫燭一笛引涼風正好臨流坐寥寥爽氣通

秋日登城南甲秀樓訪鄂文端公紀功鐵柱

層樓設重局事罕與俗接芳洲歷春夏送客偶陟躡節

序慨已移青林半黃葉雙橋通梵刹三面俯城堞攝履
偶上征褰裳畏深涉豐功緬疇曩往事稽故牒銷金清
四野立石表三捷勲名旣鷹揚文史復渙獵丹方初奠
定黃閣藉調燮俯仰跡已陳苗蠻志猶懾叢祠扉乍展
荒徑露還漑詎止攬勝心孤懷濟時業

九日偕富尚書綱馮侍郎光熊重至甲秀樓登高

菊已衰黃柳尚青更尋芳杜出前汀殊方再值重陽日
候館欣聯五使星醍却 謎點 坤諸葛廟旁開石觚伏波
灘畔訪金銘惟公志業差無愧十五年來邊徼寧富節

癸巳十
五年

徐太守日紀餉菊數十盆因結作花龕并邀同人共賞

卽席賦謝太守

丁日苦雨三日晴秋老已覺無歡情打門有客送花至
一笑紅紫紛相迎來鴻去燕無消息剩得山籬日啁晴
攤書堂北日猶長人與花枝共高格衝寒花性昔所諳
斗室合作藏花龕重重簾幕夜難放勾取殘月來花南
秋堂夢好偏能醒看足花窺抱花影寥寥風味許誰參
不稱醇醪稱清茗醒時看花倦卽眠人意花意交相憐
君不見紅塵十丈官道邊誰有清福來花前

沈太守丙招集寓齋賞菊

三間古屋如浮槎靜掃四壁懸秋花扃門不出究何事
却與此花商位置篔簹三寸截作瓶刳腹滿貯寒泉清

高低花色誰能省恍若銀河瀉星影一花前頭酒一盃
客若不飲花徘徊酒傾十斛花千朵醉倒倩花扶客坐
三更以後客較狂月影花影催浮觴君不見花前五客
皆濡首花意未知嫌客否從花乞假亦可憐明日閉門
須病酒

嘉杜軒公讌

嘉杜軒初構今看一再來叢從雲外落花向雨中開夜
已侵三漏狂猶酌百杯主人留客摯籠鳥亦徘徊

馮刺史克鞏招集七研齋

窗前葉葉芭蕉雨坐上沈沈簫管聲不是主人情較重
醉眠誰遣到三更

入坐先教飲百壺
簾鉤影裏燭花粗
狂來合被時苗罵
蔣濟頭銜是酒徒

題篇已擅沈休文
頌酒仍須劉伯倫
謂繼中沈賦題
日馬頭西北去
醉顏還剩十分春

自新鋪至永寧

馬上尤愁撲面風
坡陀百折誤西東
初晴也識朝陽淡
添得千堆野火紅

山南山北路嶙峋
只隔蘆花便絕塵
削壁四圍溪半折
野鷹盤處定無人

安南抵安姑作

幾日西風撲面吹
濛濛尚有柳絲垂
鳩方逐婦天偏霽

馬到安姑路轉危
渴思乍拈籬畔橘
閑心還讀道旁碑
山程紅燭誰相迓
却喜前邨月半規

將抵南籠道中作

羊場驛外千山亂
一郡如巢笑天半
藍輿百折入郭門
細水中分兩峯斷
高低半日坡難上
斜處却留行客館
尤愁馬瘦蹄應碎
不覺役疲肩屢換
居然一巷深如井
對面樓臺若居岸
如龍松柏競瞰城
幸有女牆高處判
已看日沒繁星景
難得雪天揮雨汗
雙旌早駐前山麓
一屋尤爲衆峯冠
排衙纔了且賦詩
百尺龍山作吟案
南籠試院卽事

衙齋高處逼浮屠
天半樓臺落日孤
靈氣大都紅似火

居人多半黑于烏城隅尚隔三層板樹杪驚看四出途也識博穠饒瘴厲怕從直北展輿圖

十八先生墓

按南籠府志明桂王由榔自廣西至貴州孫可望處之安籠所四年無人臣禮從臣吳貞毓張鐫周允吉楊忠徐極蔣乾昌李元開李順朱議晨鄭允元趙賡禹蔡縝易士佳胡士瑞朱東旦任斗墟等憤甚與內侍張福祿全爲國謀遣之滇南諭李定國共圖可望事洩皆爲可望所害時人哀之取遺骸葬于城外西山之麓題云明十八先生成仁處自是桂王復入于

滇蓋

國朝順治五年事也

七千里路接蠻鄉十八先生併命場絕勝瀛洲唐學士
就中寧有許高陽

黔中樂府十二首

賽神謠

山腰十數家屈指無百人樹頭營危巢云以祀土神前
門飄風後門雨偈仄半間神乏侶村女纔燒一辦香社
公腹內秋蛇語

打虎謠

斑斑猛虎文彎彎水牛角牧童騎牛來乘便虎欲撲虎
憑爪銳牛角尖兩兩轉門來山巖腥風沾林血粘草虎

卧病創俵出禱

起龍謠

黔中怪底淫霖注石腹龍藏不知數
問來龍穴看起龍頭大如瓮
聲疑鐘晴天亦覺風雷湧
百步龍堂陷如冢
排林牧馬茸不收日盼生駒得龍種

網魚謠

上山忙下山緩花深深波滿滿踏波不須郎
儂衣正將浣腰肢不怕春波濕
村樹陰邊裏衣脫沿回半晌卽出波
八幅裙拖鯉魚出

漏天謠

東黃平西普定十驛雨中行不竟
有時雲際露日光萬

卷之四
三
戶爭曝泥衣裳巒山萬疊愁霖透不說天荒說天漏老
翁自詫八十年生日未逢晴正晝

跳月謠

一年中好時節前中秋後元夕錦袜碧當胸羅裙紅染
血蘆笙吹徹人欲還眼波一瞥郎上山上山亦識儂心
切天際黑雲來罩月

摘蔬謠

厨中苦無鹽盤內久無肉幸喜一方田青青菜畦足山
家食料常如此瓜蒂深黃茄色紫筠藍挑滿手暫停牽
得樹梢红柿子

采茶謠

今晨儂獨來昨暮歡未遇製得憶歡歌
沿山採茶去春慵不嫌歸路遲
茶盞枕首眠少時村花滿頭紅未放胡
蝶一雙釘頰上

宴客謠

男行欲成婚女行欲出嫁團團茅柴筵纔把
生客迓石臺却有八尺長東西南北羅酒漿
座旁誰牽牛一隻黃犢離村亦爲客

嫁女謠

十五愁嫁遲十三欣嫁早嫁女雖十三偏愁歡已老
山羊十角米百擡嫁女不惜傾家財歡來牽儂儂不宿却
抱黃羊水邊哭

織錦謠

阿娘理紅絲阿妹理彩綫竹閣止一間織絲看四面眼
波時向郎邊瞥十指織織化工出春禽怪底齊上樓織
得一堤花欲活

曳纜謠

上官來役夫走百板雙繩齊在手上山居前下山後排
頭雨汗揮不停鬢上都插山花馨生苗出語真無緒官
好牽他上天去

自南籠至新城道中病酒

一程纔了日平西遠近岡巒望欲迷渴馬縱蹄尋野水
閒禽展翅曝山泥節臨長至猶餘燠天入南荒漸覺低

慙愧故人知病酒滿籃黃橘早封題

新城行館獨坐

獨坐竹軒內泠泠夜欲分半窗斜入月空徑靜生雲病
酒宵餐減拋書吏牘勤同儕知欲至隱隱馬嘶聞

小病

小病初除偶自思料應不及少年時酒能忤客先宜減
墨欲磨人漸不支婦解藥方參服食兒通選學付鈔詩
君親一例酬難盡閑處齋心憶四知

三昧塘道中

一帶坡隨馬首東記程今夜宿波中敲殘石虎尋雲母
見慣山羊類雨工傍屋種松憐地窄冠厓營閣與天通

寥寥橘柚今餘幾留伴楓林鬥晚紅

自高伍塘至安姑宿

高伍塘邊渡隙河緩程不覺夕陽過人疑夸父西追日
路識安姑北下坡白首僧從初地出茜裙茜憶仲家多
桑間三宿真成戀況復頻聞子夜歌

自安姑抵安南道中

界首塘東路復彎情懷真耐雨闌珊無魚偶作經旬客
多虎全荒一縣山捲地黑風迷鬼箐排天紅葉出禪關
安南令尹驚相訊走馬來備走馬還余往還此縣皆騎

諸險

范公子學敏讀書倉廩索題

伏波能聚米上蔡亦監倉移作攤書地真成避客方
水泉朝淪茗石鼎夜焚香落月諸峯好玲瓏影上床

自保甸塘望盤江對岸諸山半日行尚未到感而有作
半程誰識路途修百折巖坳尚未休只有鳥飛偏逕直
往來曾不礙雲頭

侵曉渡關嶺

之字山程卅字樓昨宵剛值月當頭一聲雞唱出門去
小市夜燈猶未收

松櫟爲屏石作壇罡風吹袖覺衣單相看即是青天上
莫更頻歌蜀道難

去歲三月自安順按試南籠道過安莊花事甚盛今復

經此則秋林盡搖落矣感而賦此

安莊汎北路頻又使節重來感歲華依舊野羊眠道左

半林紅葉替春花

歲暮懷人二十四首

袁大令枚

清福能消四十年老來仍作地行仙居然手筆空千古

隨分頭銜寫一編縣或頌或書陝西候補知縣不掄一名

士竟須依作主美人聞已放歸禪存亡舊例都參破生

輓詩鈔萬口傳

錢少詹大昕

燕吳楚越路偏長君官京師余在里中及君服闋友人延修浙中志余亦自楚中歸甫得相

見十載纔申一瓣香絕業竟傳齊稷下此翁何似魯靈
光奇搜秦漢碑無缺例校金元史獨詳我亦諳應參北
面淵源寧止丈人行

畢尚書師時緣事降撫山東

全湖南北節初移

聖主優容俾近畿五斗未能除薄俗兩旬聞已昧先幾

右才每構千間厦左宦仍披一品衣山東提督撫此日汲

公難卧治九州分半入封圻山東提督撫此日汲

處又兼有幽豫
三州地也

錢通判維喬

相識寧論行輩先爾來久已訂忘年早傳吏績人呼佛

晚避詩魔自學仙百種盡除留畫癖幾時重與枕書眠
勸君歸後余纔宦面目多應愧此賢

王侍郎昶

聞聲卅載苦相思孤露同看母作師
猿從軍憐早歲
尊鱸歸計惜衰遲眼前事業千頭
橘身後才名萬首詩
一卷苦爭君記否三條官燭校文時

盧學士文弼

文格蓬萊賦紫微罷官依舊苦長饑
六經校後真無誤
七十行來尚若飛雅苦俗儒嗤狗曲
閒謀隙地築漁磯
草元亭在雲溪上除却侯芭問字稀

若自言主講常州三年能請益者惟

臧鏞堂
一人

卻侍讀晉涵

苦憶餘姚卻夫子授徒却待勘經回
餽謙直即經國史二

殊師肯啖公羊餅糲煮絕業誰營爾雅臺憶共五陘

連榻住也同六郡校文來謂在朱簡黻鞞青山回首應

惆悵斷送高張幾許才謂海黃仲則諸人

屠刺史紳

案牘如山目已迷趁閒偏欲逞篇題縱官刺史無千石

却學君卿有十妻好友總拋蠻嶂外全家憶住小湖西

斲牯谿何時共泛南歸棹卧聽溪禽自在啼

李太守廷敬

五載欣看歷四州清郎出守最風流曾登祕省稱前輩

重到蘇臺感舊遊
愛客自拈金縷曲
迎人多上木蘭舟
吳閭風月梁溪酒
可憶人居天盡頭

法祭酒式善

翰林詩格冠詞場
屢改頭銜作漫郎
左手書應成絕技
苦心詩已入中唐
兩番胄監遷官速
百本名經選佛忙
詰時選同 我愧枚公賦
情拙莫將疎陋玷班揚

管侍御世銘

積歲機庭苦未閒
昨觀除目與開顏
青驄早避鮑司隸
溫樹難言孔博山
作賦廿年推老宿
爲郎十載冠清班
也應寫寄爭臣論
好待昌黎出使還

趙舍人懷玉并酬入直見懷之作

舍人入直題牋日馳馬南行按部時翎徽提學御史却
憶紫微廳北路聊吟紅杏驛中詩鄉園漸喜田除稅餘
圃君二頓入棘後借爲主者贖去兄弟都驚鬢有絲遮莫
善愁兼善病得閒須復強支持

王學博吉士

誰是南宗與北宗阿兄城北弟城東穿籬却有二間舫
入市頻驅五尺童產破中人憐沈駱宰迎上客說孫洪
瘦羊博士今何處薄宦聊應似轉蓬君尚未補缺
惟東西署事

楊大令倫及令弟焯

迎春橋北放生池猶憶平生訪舊時門巷一雙前進士
家風五葉老經師藏花席上看君醉君拙于酒令問字堂邊

待我遲翻龍城羯未封胡俱下世謂大舍煒伯兄燾及仲弟熾從弟熾

儲不愁君不鬢添絲

汪明經中

不敢隨車試大廷頭銜真許號明經人言蠶目同荆尹

自詡龍頭壓管寧喜讀楚書排釋氏慣餐劣藥異修齡

狂來更頌東陵跡君有狐父之盜頌一篇手劈蠶牋寫作屏

陳軍門大用

識字何須五石弓昇平儒將最謙冲爭看隨陸司兵籍

無復伊涼唱土風江國別來饒艷句海氛清後寡奇功

軍門只在千花內好買鱸魚鬥酒筒

汪助教端先

卅載閒情不自持，蕭疎今已鬢添絲。
纔看薄宦拘平子，多分揚州誤牧之。
我欲共參山水月，人傳三絕畫書詩。
年來苦憶梅花館，閒徧南枝到北枝。

孫比部星衍

早入承明侍從廬，爲郎莫更嘆紆徐。
經時偶斷船官獄，何日同乘使者車。
郭芍藥詩成本事，鄭櫻桃室作安居。
奇寒可憶茅山夜，兩客同驅一蹇驢。

張檢討問陶

西蜀奇人作冷官，青氈猶剩十分寒。
何妨日住蓬萊頂，不改常餐苜蓿盤。
子美數間吟舍窄，淳于一石酒腸寬。
金釵典盡眉常歛，欲畫仍須拂鏡看。

君篤于
仇儷

宦途階級漢諸馮射雉身手知還健射前中伏差城八

蜀詩篇詡最工我在黔中七千里寄書應趁石尤風

左大令輔

當時踪跡最清閒繞屋梅花自掩關千首早摹梅處士

一官今傍謝家山緣知小弟才尤捷可識袁宗客未還

謂黃仲剛子時在廣東余屬全君署中讀書應舉腸斷廿三年上事黃公墟在

白雲灣

莊公子遠吉

兩載何因滯故鄣一鞭聞已入咸陽多金結客家頻破

廣柳藏人事已忘狂甚竟聞呼彥國貧來先欲弃姬姜

何時魂壘澆應盡與築糟邱醉百場

續懷人詩十二首

紀尚書昀

子雲筆札君卿石當代無人可並論直閣新銜同掌院

文淵閣閣先生曲臺故事號專門研心十載雖皇覽快

首兼直閣事意千篇續瑣言謂近所著說部五六種只我最饒知已感下春官

第枉高軒先生主甲辰會試余試卷最為所賞欲首擢之為監試御史所阻而止于卷未題惜春詞

六首有云萬紫千紅號花冠春春畢竟讓槐黃徹棘後又枉道過訪

江布衣聲

家傍要離尺五墳布衣七十甫名聞因題刺字摹秦篆

君生平未嘗作楷書為愛尚書晉古文生世未嘗知鮑

鮑題刺亦皆篆字謝學徒差喜得芭茶君自少至老從未有授館者近忽

似閱音亭長今同調調機州一樣歛寄不人羣

家編修梧

機庭綸閣兼詞館十載勤趨朶殿東家世我慚稱大阮

制科人已比三洪中書兄弟三人皆以名試得全拋舊

業因廉史君伯兄樸出守順德清合譜新詞寄阿翁龔

人填詞兩樹櫻桃一樽酒風懷開日與誰同

管漕督幹珍

早歲清名滿石渠東南久已駐輶車漕巡江備數程不

異官鄉郡十省今看領國儲嚴檄早清飛輓路閒心

時復故人書堂開依舊塵凝坐為有耽吟習未除

方上舍正澍

家本新安客上元半生知已得隨園工愁五十偏無恙
避俗三旬竟不言手筆捷如錐脫穎肩輿行比鶴乘軒
梅花百本肩門住尚厭朝來鳥雀喧

徐太守大榕暨從弟縣丞書受

二十年前契最深鳴珂南巷酒時斟阿兄作吏能強項
小弟裁詩學嘔心七子才名虛擬議一家官爵竟升沉
篝燈倘憶初逢處只惜秦州宰木森

徐從弟
蘇州縣丞
讀書

吟州守聞
已下世

唐少府軼華

中河橋左廟溝西老屋三間戶最低蠟屐每思穿巷過
粉書時復到門題卑官已屈陶彭澤佞佛何如孟會稽

一事至今忘未了謝家園裏有鶯啼園後君

章進士學誠

鼻望居然耳復聾頭銜應署老龍鍾未妨障麓留錢癖
竟欲持刀抵舌鋒君與汪明經中議不合幾至揮刃獨識每欽王仲任
多容頗詈郭林宗安昌門下三年住一事何嘗肯曲從

君性剛鯁居梁文定相公寓
卯三年竄為相公所嚴禪

蔣少府廷耀暨令弟上舍馨

君增十歲稱齋長我後三人作學徒外家兄弟五人逃
齒居第五
塾早曾窺睥睨背燈時欲學呀唔樓扉敞覺書聲脆紙
仿描驚字跡粗重向講堂尋舊事桂花零落杏株枯

莊縣丞寶書

夢來阿嬖竟無徵從母生君兆五十驚看白髮增詩社早

參三健守了君詩集通守所唱與蔣太守能昌徐太守大塔及從

書名誰似兩簞丞君書法與蔣縣丞齊耀並名回車尚憶南皮飲

竹梯邪斷杏難登馮戶部敏昌北寺燈年錯疎荒徧外家廳畔路

馮戶部敏昌

早向長安門酒盃之秦之楚屢追陪一官止抵傳經席

五嶽都成避債臺君以避債出都此日最推長句好名

山曾步後塵來時君春余北上枉道遊王青松兩樹花

千本頓使先生笑口開注源寺看花

姜廉使開陽

姜廉使開陽

憶自鬻鄉入

帝都舊營池館日荒蕪三層閣上簾虛掩萬里橋邊水
亦枯鵲蹻榘搜篋雅知廉吏窘時道補謀捐持杯誰念酒
人孤何戡早逐西飛雁謂君謝兒善為問先生記得無
福公相康安自全蜀移節滇黔近聞已抵威寧寄呈四

首

烏撒山川界蜀滇遠勞上相復行邊拜公鄧禹年三八
鑿空張騫路萬千左道更須嚴折石偏鑑誰敢鑄浮錢

時辦理大寧那旁人莫羨頭仍黑教兼清釐錢法

國事辛勤已久肩

束髮爭傳命世才相門出相著風裁何妨早日登三省

已覺奇勲塞八垓兩度廣陽看飲至頻從絕域受降回
朱幡玉節雍容甚分野星明接上台

昨傳使節入秦關威望先馳壓百蠻三萬里踰星宿海
八千人上賀蘭山偏裨盡注通侯籍掌記猶分侍從班

方太常惟甸楊侍讀
揆近日昔曾隨幕府却笑燕然地猶近竇公容易勒銘

還

外臺何幸接班睽溫語頻番荷報牋一刺記授通德里

庚戌夏公自兩廣率安南國王入第十年久領大羅天欣
覲余時新入館曾謁公里

陪節鉞來荒微敢向蓬瀛說散仙幾度自慙文思拙欲

將簪筆頌凌烟

安平行館見梅

輕裘覺暖寒猶淺峻嶺初平路轉又獨坐小窗斜日裏
膽瓶風折一枝花

衙齋十詠

貴州學使公廨最湫隘乾隆癸巳今大學士孫公士
毅視學此方始于其後積土爲堂名曰近山然屋止
三楹不足以資燕息余抵任後復于堂西隙地築屋
十數楹或高而爲臺或曲而爲塢或因樹構屋或臨
溪製軒竇僚觴詠之暇昕夕讀書恒于此焉開歲將
報滿入都爰分詠十截句以貽後之來者云

官廨各占山

貴州官廨自巡撫

在平地此但與山近最

喜開北軒寥寥發松韻

堂後與東

尺

右近山堂

獨坐思話軒孤吟悵無侶幸有黃栗留時來伴人語

右思話軒

筑中山最高況復據山頂披香夜半開東西眺星景

右千葉蓮臺

春來樓檻外百卉盡抒紅欲別風花味香生第幾叢

右紅香館

屋仿江南船聊住江南客所苦一百旬孤篷雨如織

右聽雨篷

日坐此閣中著書愁未了窗櫺三面陰綠徧卷施草

右卷施閣

巖中金粟花三歲偶開一方牀夢醒時婆娑滿窗月

右金粟山房

惡木既已鋤篔簹植千个只有問字人時穿竹中過

右修竹廊

無日不讀書無日不晨起闢牖看啟明濛濛鵲聲喜

右曉讀書齋

天無一日晴地覺四時暖持此養寸心潏然春氣滿

右藏春塢


卷施閣詩卷第十六

陽湖洪亮吉著

蓮臺消暑集 乙卯

乙卯人日早登黔靈山

扶雲入山門一壁削天半青松三百樹直上寫曲榦危
厓嵌樓閣懸處鐵索斷開軒同客話響與禽雀亂窗紗
裂盈尺臘雪尚堆案僧延繙佛藏石匱鼠驚窺雲光開
半郭下視起烟爨東西萬家屋驛道復中貫一徑促下
山藤枯屢縈絆嶄巖生對面欲下削如岸風寒砭肌骨
坐處裘屢換忍凍舌本強輿丁尚揮汗
回途自郭外東轉至雪厓洞小憇



危橋背郭幾人家石徑東西路轉斜清淺溪山浮曉日
冥濛樓閣散棲雅閒身乍嬾非關病春氣原馨不繫花
一帶壁龕藏古佛幾回欲與論年華

十五日立春

元夕春百年少日月食皆逢卯鴉聲愁鵲聲喜兔申頭
虎曳尾雷憑憑電光掣春朝風元夜雪

二十日送客久懋圖寧關

黃塵飛百尺樓上馬蹄聲道古高于屋山奇逼若城闕
軒春睡足窺逕晚烟生莫更留行客勞勞尚半程

二月初六日偶成

春雲黯黯飛一城城角缺處花枝橫風吹折枝拱膽瓶

不向樹上賤其生烏鳥角聲吹不停憶昨夜過三千兵
山陰美酒貫百瓶傾耳欲聽苗蠻平時銅仁苗匪滋事
巡撫以下並檄兵
觀羣公花下來駐旌醉過寒食兼清明

初十日侵曉至龍場

銀燈影外星初落一山開雲矗樓閣冥濛花氣不知名
十里曉風浮絳萼花前鶯語聲猶澁花底春衫著疑薄
晴光艷艷鋪郊甸青氣茫茫注巖壑馬頭回處客亦驚
却值曉曦紅出郭

阿江汎道中

一山途四出曉日正當頭好鳥背人立清泉擇地流霧
歸僧閣暗雲出寺門浮半晌沿林走偏忘路阻修

杏花一絕

屈指好春惟二月稱心小閣却三層多應獨夜愁無侶
來向書窗惹客燈

十九日出城東門看花至芳杜洲作

只有尋芳興未闌閒排僻徑出層關淡紅十里杏花路
淺碧四圍楊柳山夢好尚憐春思冷塵飛時望捷書還
征東將士應無恙何日先平板楯蠻時糊棹首逆苗

曉發龍場

二月氣尚寒蟄蟲尙未啓冥濛菜甲花飄黃十餘里南
瞻黃盡處一綫日初起人家依竹木分半住坡底東風
灑然來綻此桃與李宵露濯滿枝浮香出垣裏寒鳩蹲

屋角兩兩鳴未已一晌雨復來高原忽如洗

延江道中

桃花已全紅李花未全白翩翩馬上人高比花逾尺初
陽才出樹紅紫相映射花梢度人影花底縈馬策西顧
殘月痕冥濛淡無色沿溪籬落好風定爨烟直香氣不
可名交飛蝶如織

早渡延江

蠻鄉居已久不復知蠻中蠻水一彎綠蠻花千樹紅蠻
人如飛禽舉足能踏空但覺雲四飛眼底青濛濛倏忽
下萬山驚流盪心胸青綠漬一堤撲此眉宇濃解纜語
未完舟已當水衝中渡驚語聲我僕留岸東蒼蒼鷓鴣

羣送客飛逆風

將至螺堰塘

白雲埋西山雲破花一谷花光接雲氣交處香斷續沿
山行十里稍覺展地軸高下極水出參差萬畦綠波流
縈折處臺榭亦回復溪魚能入市驚筍穿石腹口午飯
已香幽人候茅屋

養馬塘道中

延江及播州山勢忽平易坡陀騎馬入逼仄始見地衝
門兩下屋構製亦微异曲巷分數門平堤淦川氣連岡
西北展斜與碧天際居人汲溪泉百級盤石砌雲容問
梨杏稍覺天宇膩一頃黃花風牛羊下山細

曉發遵義四十里鋪

濛濛雨不停十里天尚黑春塘白鷺絲寒傍梨花立
沿溪數十家斜左窗並啓風遞人馬聲吹笳入雲裏
遵義試院

二月春光好幽尋使院西草迷僧室暗花壓步墻低馬
病離槽立禽閒擇樹啼樓前小家巷時聽屐衝泥

二月晦日使院小樓看桃花

長水捷書當可達

銅仁逆苗間記

進播州春雨不能晴

山圍城郭常時暗花發簾櫳徹夜明精舍未妨勤課士
麗官聊願與談兵如掾紅燭燒何事樓上閒來酒獨傾
試院小樓獨坐柬嵇太守承孟

風光多在小樓西無數山雲壓檻低與客生踈惟燕剪
背人開落有棠梨酒逢地主慙中戶駱鐘札報天兵過

五谿時得福公相書言已早晚捷書來郡閣春融併共

醉如泥

曉發遵義

深淺山坳內時浮一樹花白猶零露雨紅不見人家澗
水碧于玉雲光薄似紗面西樓閣好翻恨路東叉

八里水塘道次

十日雨始晴高原鬱春氣連山亘南北濃綠漲天地斷
嶺一以開花紅亦無際連綿芳艸合來路渺難記幽香
惹行客處處欲停轡竹屋三四家鳴泉響頽砌臨波亭

自好新筍大如臂窗櫺紅八扇花裏自開閉簫鼓知賽
神村厨爨煙膩

鴨谿行館

一巷黃鸝語多于雞犬聲酒邊人去住花裏徑縱橫
戎火上樓見山泉傷楊生居人最勤力月黑未歸耕

石壁塘道山

一程六十里昨午發蠻郡窮鄉不知途祇覺嶺奇峻坡
陀懸絕處十退乃九進人方驚失足頭上鳥飛迅敗葉
已隔年因風尚成陣輿夫行視地石削利如刃岐途仍
百出荒絕少人問冥濛山澗綠壓客眉宇潤一晌花氣
紅山村已知近

發半水塘

南原寡桃李桑樹圍成村桑葉尚未抽稍待春氣溫居
人數十家咸闢臨水門無事遠汲勞清泉繞山根山厨
豁然開餘瀝傾瓦盆斜左一徑寬呼聲集雞豚溪屋復
數重遠颺簾幕痕已有白髮人樓頭曝朝暎

度虹安橋

分半溪聲作雨飄暗風時復響
鴛簫百重花路行初透
又踏春紅過小橋

短篷風捲落花多却趁春晴曝雨簑
捉得鯉魚長一只
小舟如葉旋回波

宿沙溪行館

依然下馬厯重尙宛轉房廊屈曲屏添得蠻中一旬雨
屋頭山比去年青

風光都被亂雲遮水閣南頭路較賒看到小桃紅盡處
夕陽幾點着歸鴉

過三重堰上嶺

蠻方積煙霧日午氣始開梨桃搖天風引客上北臺衆
山西南趨中峯獨東回迤左削一厓俯瞰綠萬堆值此
春雨餘山泉響如雷飛旆過北林飢鳥已驚猜半道值
戎樓復有畫角催陰寒中人深屢別衣上苔稍休下前
山呼童剪蒿菜

渡渭水橋晚抵牛場塘

名方集言卷之四
一
厓東無暝色一谷李花明澗底水流響雲頭人語聲半
橋楊柳占獨徑鷺絲行正有衝寒意欣逢候火迎

黔西州解海棠一株大可半畝到日花正盛開喜而作
兩年心跡寄喬柯喜向花時整玉珂碧澗雨餘泉溜急
紅闌風定日華多山光著客濃于酒簾影隨雲逝若波
要與東皇再三約好留十日待重過

看牆外桃花

池臺斜占水波東無數繁枝壓砌紅醉裏似聞鶯燕語
桃花顏色稱春風

宿海棠庭院

牆頭香氣時飄忽騎馬入門絲雨歇春風亭外二分花

夜色簾前半規月梨桃杏李春事忙參差一畝橫海棠
三更窺徑花如活紅氣入窗蒸夢熱

自黔西州至新鋪道中

春陰何重重花外路如墨擡頭見鳴鳩咒雨一雙黑坡
陀過新鋪稍覺徑夷直高原三日雨千頃抽宿麥溪山
最雄奇大氣自闐闐森森松柏榦雲外挺怪特生苗饒
種類作屋厓畔匿年來厭追呼塞逕橫巨石居然判畦
畛遊騎停不得遙望一畝花沿波弄春色

寒食大定試院試威寧等三州童生竟日坐聽事作
日午臺前試袂衣柝聲清脆掩雙扉多應人氣烝如雨
惹得梁禽觸紙飛

十五日薄暮作

枕上紅燭攤書看貂裘壓被防晚寒離居誰信是寒食
檐外風雨來無端登樓試眺山南北薄暝窗櫺已無色
萬點歸鴉何處棲冥濛壓得桃花黑

清明

三年寒食住三州

前年在安順昨年在黎平並皆高院試上

一樣攤書據案

頭春半雨多頻臘屐蠻中花好不登樓高門鶯燕時來

覩出谷烽煙昨已收

時得馮巡撫知會初二日在嗅腦殺逆苗二千餘人正人營道路

却却笑青衿未知事漫思投筆佐軍籌

時前畢節附生熊瑤具呈欲移

送軍前効力余已諭却之

十七日晴使院後圃望遠

分半山城入畫中
炊煙都裊岸西東
房廊映水多時綠
衫袖承花一色紅
上冢船歸雅咒雨
築毬人去馬嘶風
年年桃塢春如許
辜負鄉園三兩叢

將抵西溪

欹斜石徑杏難通
來往輪蹄若蹈空
却好一村居谷底
爨烟開處萬花紅

冥濛曉露濕花心
欲到橋西路莫尋
三兩鷺絲明似雪
隔溪飛不破春陰

西溪汎卽事

蒼蒼山已深
森森流不止
無嫌鳥飛疾
撇浪魚若矢
稍休厓石上
四面聒流水
風勢聚一橋
驚看去雲駛
橋西

邨落好人語罷朝市紅白花萬堆中飛爨烟紫

重至黔西宿海棠庭院

闌干十二敞銀屏尤喜芳時此再經雙柳有情垂檻綠
萬山如夢壓簾青花邊惆悵尋前約葉底參差間曉星
依舊燕鶯飛不定可能重把夜窗扃

將抵鎮西衛

兩山離百步中挂一絕壁人攀厓樹上碎石傷馬膝穿
雲過溪澗飛露灑如雪高下千級田濛濛漾漾朝日房廊
臨水好雲向枕邊出茶樹花亦香迎人下山歇
偶寫荷花便面寄費方伯淳

小閣纔看暑雨過一拳奇石面層阿知君雅有鄉山念

爲寫錢唐一頃荷

端五日聞官兵捷音

是日夏至

今年節候竒元夜立春節如何日長至復值端午日榴
花紅處排兩筵却值露布來東邊興酣邀客共劈牋鏡
吹雅樂吟連篇官兵早破黃瓜砮賊勢愁亡椰木隘後
隊仍燒蘭艸坪前軍已逼花園界固知

廟篋無遺策遠近花苗更輸力臺築三層號受降詩歌
六月勞還役主將翩翩善出奇搜牢應遣種無遺還憐
春夏行軍人倘念西南民力疲

自春及夏淫雨連綿倉池荷花十減六七感賦一篇近
柬馮侍郎光熊張兵備繼辛銅仁尼堪巴圖魯臬使

思州並寄姜兵備開陽甘肅

前年築臺面池水昨歲花放池臺前朋來喚我作花主
日日樓上開賓筵今年霖雨無停刻水綠衝臺臺欲缺
三層閣上無一人花亦悄然如惜別征東軍容盛如火
憶昨出城來別我殘荷隔歲尙數莖臘雪初看出梅朶
城頭一別經廿旬轉眼已值看花辰豈徒花色減疇昔
把酒苦憶花前人幾年愧作單車使不獲荷戈先戰士
昨日軍符又發兵棘童捲甲東行駛此時花發不欲看
月裏閒却紅闌干已涼天氣纔幾日一任風雨搖無端
轉思萬里橋邊水多半樓臺雨中毀泉使署中荷花寂
盛今空署半年聞
樓閣半傾花兩地看花無一人寥寥壁上詩牋在藏春
亦憔悴非昔

塢北偶傍惶風急，猶聞遞遠香。莫更城東招小史，左官

先已抵伊涼。

謂姜臬使開陽時以事左遷平慶兵備道小史郭卽卽姜所眷者

何時一

輩重相聚，笑折花枝賦長句。屈指平苗露布來，主人亦欲辭花去。

平苗凱歌十章卽寄福康安公相行營

海宇年來慶謐寧，偶移旌節涖邊庭。鉤陳十二明如月，上相星聯上將星。

軍律嚴同細柳營，聲威先已懾蠻荆。橐鞬大將皆趨左，詔統川滇五路兵。

萬仞蒼厓一綫通，兜零火照馬頭紅。原知

廟算真無敵，先定黔中下楚中。

五姓花苗敢獼獨曾傳吳畢石雞娘烏羅地大如甌子
又見天兵下石梁

明史土司傳宣德五年石各野糾同石雞娘吳畢郎等擾亂銅仁亦會川

湖兵討平之

出險方看建鼓旗居然絳灌列偏裨前軍早報花連布

已解長圍入永綏

南出羅蒙北哨關十旬先定五溪蠻摩厓好壓中興頌

勒徧壺頭百尺山

閩外軍威敢自專

國恩重疊與傳宣勞來不用歌周雅六月王師已凱旋

黃旗植處許歸耕一半蚩氓慶更生神武聖仁原不殺

詔書先築受降城

五度殊方討不庭，凌烟圖上鬢猶青。
酬庸此日原無兩，耀首新頒三眼翎。

榴花紅徧四山梁，初度欣看日正長。
十萬貔貅齊下拜，凱歌聲裡慶傳觴。

揚兵備揆兩至黔中，皆不及見今得書。
知又抵軍營寄懷一首。

我生遊跡殊通達，禹貢九州今歷入。
雖然輸爾涉河源，遠度崑崙越哈察。
東西南北五萬里，頭上翠翎風細裊。
如拳大字如椽筆，先把天山石磨刮。
銘功紀德字五千，高比浮屠七層剎。
居然遠壓神邱頌，何日重煩墨工刷。
丈夫志業真難量，一半貔貅歸絃轄。
昨來雪嶺今炎山。

車不停輪况脂暈花門異種方稽顙五姓苗偏肆輕狎
盤陀斗絕隆棚險一半休誇地形北搜牢匝月肯暫停
山搏熊羆水擒獺滇黔楚蜀雖同勦神武聖仁非嗜殺
叔牙怪樹當山巔百歲根株一朝拔尚煩竒計參帷幄
頓使蠻方靖戈鋌讀君露布才益竒鬼膽先看破羅魑
寧知馬上殺賊手正復翩翩如俊鷲相思苦欲專人訊
道遠又愁泥滑滑重陰天氣發一槭霖雨應零八行札
聞銅仁日來復有賊警無辰水決城數丈馮侍郎光熊
率官弁晝夜堵禦寄懷一首

天乙虹梁暑雨交昨傳江水決城壕蠻中擺盪紅千頃
峽裏舟船綠半篙六月可能平板楫一軍聞尚駐松桃

蕭蕭白髮籌邊夜誰識馮唐志意勞

酷暑至蓮臺夜坐

六月六日天乍煦窄袖葛衫猶苦暑連房早厭人語稠
却曳襪被來樓頭蓮臺三面波光漾一榻居然最清曠
濛濛桃樹月西斜鳥影斜生紙窗上

自六月朔日移至蓮臺避暑聞兒子飴孫疾尙未愈書

示一首

經旬曾未涉南臺藥裹頻從禁滿開却笑兒曹未耽讀
燕痕纔去雁痕來

七夕陳大令熙藩邀集城南鳴玉山房卽席賦贈一首
感時青鬢欲如何初地聊從暇日過赤甲一軍爭渡久

時續調漢粵
兵甫過境紫微雙樹得秋多
陳邱已保思邛水
劉秩應嗤曳落河
莫向尊前問牛女
早憑天漢洗兵戈

中秋日曉望

城南未見烽煙歇
忘却秋中有佳節
陰寒霧雨迷
一旬纔見清涼此
宵月烹葵剥棗飲不休
逸興且上城南樓
忽然黃葉下如鳥笑
過三歲蠻中秋

秋海棠

一種嬌無那
新涼小院東
葉猶棲敗蝶根
已泣秋蟲艷
色偏嗟晚酸
心孰與同
昨宵鄉夢破
露冷一庭空

中秋夜坐

上弦及初圓
一夜輒三起
連廊南北抱
鞞履行未已
闌

干嫌露重空處聊徙倚衫袖葉葉風斜穿竹華裏樓臺
萬家夢燭影沉不起簷瓦弄月光空明忽如洗簾櫳中
外徹暗牖不須啓照水水亦空魚鱗逗波底蠻鄉三載
住良夜能有幾握管欲賦詩朝曦墮林尾

乙卯貴州揭曉會城書院生徒獲雋者二十七人回途
率成五百字志喜全用十四緝韻卽呈吳烜陳希曾
兩主試及許刺史學范諸同考

前年使者來冬仲月初拾奉

命宣化條窮經事尤急周行十三府日或不暇給苴蘭
及毋斂巨古屬蠻邑山坳嵌城郭俯視類蟲蟄無旬不
淫雨萬古地卑濕蠻生粗識字書不入行笈刪除到筆

硯所事者簞笠間歲試學官泥塗甫衣褶低眉對文卷

窘若遭縛繫四聲踈不講顛倒出篇什化俗具苦心庠

宮飭修葺陳書數十篋云以待溫習兼疏聲韻譜潤此

舌本澁峩峩講堂開一善皆引汲經句輒分俸俾得備

糧粒行之勤不懈多士志方輯貴山儲人才兩歲雋及

冊謂貴山書院生從解凡兩方忻讀書效私自理囊裏

昨歌鹿鳴來城府已麇集然聞聘同考頗復論階級旗

伯代監臨試考官以朱經歷朱雲名不預執卷每鳴喏

籠藻文為第一然不預內籤朱雲名不預執卷每鳴喏

朱構其擬里關門逢月朔雨霽路微曛監司迨州縣一

一連騎入堂深更高鑰門外植雙鋏朱墨卷二千兩吏

相對執名皆抗聲唱得失判呼吸換排衙欄楯頭上墨

淋汁聞書五經魁千百燭光煜紅箋名在手咸擬破鍵
宸白屋士較多屢聲沸如凜我行然炬返欣此輿論翕
酬

恩願粗了行且具舟楫三年飽看山大壘小者岌籠南
箐東北靡險不搜緝誰云鬼方惡直欲勝宣歙麻衣三
百輩門外時鵠立諄諄戒勤學士行尚謙挹紅苗前蠶
動論此嘗悒悒昨聞大芟勦不日兵可戢高低萬山田
耕者看佗佗頻年仍大有喜氣溢原隰持衡兩君子公
望庶諧諱筵排多士卷一一蒙訪及庶幾能相馬拔十
真得十翩然召陵許文不尚沿襲前時鎖廳見贈子先
一揖掄材盡如此願爲執羈馱談深嫌夜短時復飯薺

皂只借北郭生猶然向隅泣

時者生中知名者惟賀世清獨不售賀居北郭故云

十九日獨酌偶成

是日家累南回

不覺蕭蕭雨風聲徹戶涼又添新別恨獨對古重陽石

鏡花千朶琴臺酒一觴遙憐車騎遠凝睇此高岡

徐太守曰紀屬題桐廬申屠氏宗譜中山水畫冊八幅

雙婆澳

嶺頭時有窄徑江口皆通小河鄭姥宅連杜姥陳婆溪

繞楊婆

兩坂邨

爭傳上坂下坂邨界前村後村渙網陰邊小市稻香深

處衡門

黃山

名擬三天子嶂秀參五老人峯莫訝山田龜坼時瞻雲
氣如龍

范井

家移浙水平壤里本陳留外黃辨香我憶傭叟汲井人
傳堦鄉譜云申屠氏自漢代遷居富陽之屠山及宋時
有贅于范氏者又移居荻浦焉井即范氏之舊
也

慈濟寺

紅雲高閣初啓白鴿春田四飛待得孤僧入定鐘聲穿
出松扉

荻花溪

高低山合村塢南北江連渚沙消受九秋明月輸他千頃蘆花

鷄頭峯

欲賽社翁社姥相邀渙弟渙兄鷄頭峯頂晨雪鴨嘴船邊夜明

松濤浦

閣外蒼苔一片門前碧水三篙居屋不殊居艇松濤遠接江濤

屠二紳自尋甸州守擢判廣南道過貴陽留飲三日醉後賦贈

依綠亭邊識君日三十年來五回別一回握別一傾倒

我越壯年君未老天憐狂客愛遠遊遠宦皆出天南頭
君行斗大得一州我亦持節來邊郵囊空衣敝官初改
歷盡蠻山飲炎海北來驛使遞一箋驟閱反疑君左遷
人言宦廣勝宦滇俸入乃逾十萬錢平原坐上多良友
比日談君不容口忽然一客來欵門矯首徑入無寒溫
旁人驚看僕夫笑三十麴塵猶在帽卸裘先約欲促裘
爲爾南去程途長秋花黃處頻高會一日爲謀兩回醉
朋來尚未悉姓名脫口遽已聞歌聲我行一一爲分析
故態狂奴總如昔不爾先防欲逃席昨日醉外臺今日
醉縣中歌盡百曲傾千鐘新交有嵇陳舊交憶孫趙鄉
語連翩述難了君不見少歲瞥我去幸有少歲交紅闌

百尺挂酒瓢恍若醉我城北之山橋山橋邊卽鄉社我
距君家不三舍何日同歸醉橋下

喜代人將至率賦六詩留以志別并貽新學使談戶部

祖綬

我饒山水癖乃官山水鄉黎平及都勻靈秀之所藏大
山何峩峩長川亦洋洋五嶽四瀆外得此庶頡頏問歲
輒一遊奇蹤匹翱翔靈氣歸筆端奇矯得未嘗詩文及
千篇藉以壓客裘仲冬當北征念之尚傍俚約客頻出
遊時時陟高岡西郊松竹幽南郭蘭杜芳作詩別山靈
此景殊難忘

東從相見坡西去亦資孔茫茫三十驛鎮遠迄南籠疲

氓居要道百事實倥偬民夫徵不足搜剔到蠻洞負擔
行萬山心傷足俱腫衙胥不之卹而復相驚忍我

朝恩澤厚域外悉帡幪况茲梁楚界大吏所控總所期
仁及物役不到繁冗公廉率其下守宰自惶悚昨來馳
尺一荒戶給田種軍行所過郡秋不賦秸穗愚民縱無
知戴德已山重東南傳露布艸野悉躍踊聞宣寬大
詔却立手俱拱花苗旣輸誠吏勿輕煽動

雲山殊戀別忽作兩月晴自八月十四日至此已兩月
並無大風雨土人云爲數十

耕旣清晨來閣中霞采東南明連岡何蒼蒼修林亦英
英機事庶久忘物亦諒此情伴我日讀書不覺寒暑更
謝者尚未謝生者日以生愛此三載中日添雛鳥聲新

篁手所栽亦樂觀其成

洋柯及夜郎古乃列益部今茲十三州夔郢實門戶津
船通列貨間亦雜書賈流傳坊市本十竟不登五刪除
到羣經擢髮罪難數我行搜左塾見此赫然怒嗟蠻
嶠土化久隔鄒魯開篋出六經仍疏四聲譜口陳兼手
畫聽者若環堵精微難遽悉冀或得其粗餘閒陳列史
俾得究今古憶昨校部回書聲滿堂廡紛然陳藝暇畧
亦通訓詁明明尹荆州庶思能步武後漢書西南夷傳
梓潼郡人尹瑛傳

汝南許慎應泰受經書圖緯學成還鄉里教
授常璩華陽國志尹珍母敏人官荆州刺史

此方雖蠻方楚蜀粵上游延江及沅江其源一何修沉
埋唐采間地志苦不收前年使者來一一窮險幽豔水

既合溫黔江亦通涪盤南鎖鐵橋勻左剡木舟我行皆

乘之徧歷十二州

維銅仁府寄考鎮
灘樹部所不至

馬上作一書分此

楚蜀流芟除土俗名不使混固彪庶以示後來不貽茲

土羞

香榭南北廊修竹東西徑紅雲樓白芻白藕花千柄茲
廬寂閑適旁榭亦幽靚豈茲崇土木藉以適身性昨者
偶讀書欣聞有除

命前旌臨沅水當遣騶從迎周閭更修飾砌石拭如鏡
雖爲居者計客暫寄歌詠分番扶美植惡木久除屏以
此暹勉心庶幾貽後政

同里諸君子邀集蘇參軍鳳池解舍餞別卽席賦贈一

首

透迤徑折入琅玕巒
府參軍屣字寬已覺朔風傷
謝眺不妨微雨過蘇端
羣公雅稱芙蓉幕一老曾餐苜蓿盤

聞蘇太守曰拚得花前幾回醉馬蹄應又踏長安

卷施閣詩卷十七

陽湖洪亮吉著

回舟百嶠集

乙卯丙辰

白鎮遠舟行至常德雜詩

時正會勦銅仁沅州紅苗一路皆傳箭送舟僅乃得過亦

幸水程距札營處稍遠也

青溪及玉屏水程從此起飛夢入吳江迢迢七千里

兩關皆虎豹一棹若蜻蛉昨得軍門札傳烽送使星

孤猿攀危厓意思亦若懾仙人飛空行投杖手復接

一程復一程幸爾水流急山頭看花苗排刀向空立

水祇深三尺舟搖亦不妨來朝衫笠影隨月漾瀟湘

見慣卽不驚殘骸蔽江黑鷹隼何不仁抽腸作常食

楊柳千條巷巷夫容百尺樓可憐兵火後剩有夜烏愁

浦

甫經燒切
所見尤慘

空灘三百級一石一文羸更有莓苔影朱文漾錦波
殺聲喧落日何處可潛逃幸是昏黃月騰身附鵲巢
泊舟仙人房仙人遊無影我欲上帆竿延回瞰深井
楚女生來好凌晨掉小舟神魚知好色出水看梳頭
及到洪江口材官馬上迎蘆灘都有謀不敢點燈行
人頭及人脛一半出魚腹怪底帆不前荒灘鬼叢哭
凌晨坐清寒閉目養心性過盡千百灘都從雙耳聽
烽煙不到處幾樹發黃梅鵲語先傳喜雲光亦四開
六州兼十縣魚鳥竄紛紛只惜桃源洞難容爾許人

辰州謁畢尙書師出所定詩文集見示卽磨礪呈二首
一半戈船下瀨橫烽煙開處見山城天南縱置籌邊驛
研北仍聞擊鉢聲幕府盡稱詩弟子謂劉侍御錫嘏等虛窻閒
禮古先生軍容茶火由來盛未改臣門似水清

述作多應拜下風憐才如此復誰同諸生並致三霄上
五嶽分標各卷中歲月釀成無事福灾氛消盡未言功
殿頭第一人爭羨不負科名僅有公

常德胡同年文銓招飲郡齋卽席賦贈
十年前事重徘徊曾醉梁王百尺臺未覺壯懷輸少日
不妨閒裏鬥深杯掃除硯北橫經席料理城東小吏來
清興到今仍未減春風先爲斫疎梅

荆州喜晴錢上舍伯坰卽送南歸并寄令叔維喬

年時揖子清暉橋卷施閣中挂酒瓢沉沉醉後不能別

轉盼燭花明復滅彈絲戛竹夜未央節日笑我行何忙

一城春燈轉曲廊送者短趙兼髯莊謂舍人懷玉翩然

一別萬餘里凌亂雲山馬頭起尙書筵上說錢郎抵辰

尙書爲言君尙在荆臺未歸坐客半驚余失喜嘉平廿日來洛宮騎

馬直詣官衙中攔門握手久相視尙喜君貌非衰翁中

郎阿大欣俱在時令兄鉞亦在署詠絮詩成復誰對我官蠻府

已四年才劣恐難成一隊飄風三更入五更墻外羽檄

飛無停龍山殘雪落如掌頗念未息征苗兵萬言揮灑

仍如故此筆合移書露布不然手挽五石弓上馬殺賊

成奇功稜稜俠氣填胷抱可惜君偏著書老卅年知已

姜侍郎

姜巡撫晟

一見猶能一傾倒雖然此遊不可忘踏徧

七澤兼三湘零珠斷璧篋中字尙抵陸賈千金裝欲行

不行更搔首握別還思素心友君不見竹初菴內證無

生應笑勞人日奔走

荊州官廨借錢上舍餞令弟伯垌暨崔恭人作消寒七

集卽席有懷崔丈龍見

歎客荆臺苦致思舊遊重到酒難辭猶憐匹馬衝寒日

却值閑庭詠絮時久別未妨書代面故交多已鬢添絲

冰弦彈至傷心處

時話文敏舊事

不管花窻夜漏遲

一載軍書插羽飛人傳公瘦我寧肥路穿烽火驚身在

夢逐波濤入姊歸

時在宜昌一帶獄獄

會面未能忘息壤關心先

自理初衣

君時乞養病歸里未允

天南竹看苗氛淨好買蓉湖築

釣磯

題崔恭人秋山訪菊圖

幽窻雨過點青苔蠟屐曾從響屨回自覺向來秋氣少

不隨採菊祇探梅

丙午二月曾追陪鄧尉看梅

衫裳葉葉起雲霞簇蝶裙飄一徑斜却過小橋天路近

絕無人跡有飛鴉

飛瀑渾疑石上琴欲從何處更幽尋空明一點靈山月

與證迢迢世外心

雲裏紅闌曲折橫半秋時節出山城飛仙一個花千朶

都署頭銜太瘦生

閒從卷裏憶西州零落羊曇感舊遊
苦向尊前問癡叔
謂大令 渚宮殘雪不勝愁

少日談詩有性靈後堂延客眼先青
願營百本梅花屋
更展紗帷乞授經

酬錢上舍丙曜

舊時門巷判西東蠟屐常穿楊柳風
占得雲溪一灣淥
小樓都在水聲中

詞筆欣看萃一門比年風月共琴尊
龍華會上如相問
交到彭佺四葉孫
余幼時謁蕭山公卽蒙獎識及長受
尙書之知又與大令及伯垞兄弟並
稱莫逆

鄉園春半飲屠蘇，握別仍行萬里途。自笑遊蹤太遼濶，

更從北夢說西湖。前在西湖與君別

襄陽呈房師王觀察

遠宦迢迢各一方，馬頭真喜向襄陽。西南尙見烽煙赤，

師弟初驚鬢髮蒼。懷古池臺聊駐節，探春簾幕偶傳觴。

是日立春盈箱案牘須勤理，肯學山公醉百場。

立春日過襄陽謁羊杜二公祠，有懷孫觀察星衍山東

君爲東國諸侯長，我作南方多士師。竹馬共思逃塾歲，

土牛又見迓春時。酬

恩尙愧身無補，傳世先驚鬢有絲。至竟古人能及否，薄

醺閒謁二公祠。

元日南陽

幄殿趨朝夜向晨宛南春首淨無塵早聞內禪光唐宋
又見元年值丙辰全楚正欣秋再稔史官應奏日重輪
堯階未在追陪列尙愧西清侍從臣

人日抵鄭州巡撫景安遠遣人相迓書此報謝

握別梁園已八年憶君風味逼前賢大河南北頻經歎
好爲蒼生計息肩

人日聊登百尺樓繁臺東望久淹留破除舊例吾何敢
瘦馬羸童入鄭州

君清素如昔一切酬應送迎之禮皆絕今獨遣一介相及是以云

衙齋聯句記經時風雪甘涼苦致思

在甘肅籌邊最久

尙以書

生待開府逢人仍索憶山詩

君所著有憶山詩草

王大令復專人約遊偃師余以驛路迂回未果翊日從
岡里渡河半渡風發舟幾覆日晚僅得抵南岸因徒
步携從子兩門生至惠濟橋行館宿却寄大令一首
故人一別經歲時封書約我遊偃師把書沉吟復東走
塵土隨人已三斗津頭塵暗風尙微挂席如馬從風飛
忽驚風從半空旋長年大呼人語亂眼看北岸離纜尺
帆急欲收收不得一風吹舟舟轉輕樓檣盡訝凌空行
蕭然天末一使星河伯已遣鮫人迎盤渦欲下仍未下
惡浪幸從船後瀉舟人心定客始猜欲抵岸北偏南來
聳身一躍得平地觀者居然詫神異鄰舟望我竟若仙
餘艇尙在風中顛君不見故人此日遲高會客卧津亭

自顛沛瓦燈一盞土橋南且喚行童理生菜時覓食物無有僅得

生菜數把

葉縣道中雜詩

保安及昆陽一驛三十里奔馬逐歸鴉齊入黃塵裏

屠蘇酒乍傾簫鼓賽昇平爆竹聲何脆年頭年尾晴

卓午昆陽道溪橋細細風春衫紅一片併颺日華中

寄王夫令復

南來已是一旬馳真擬恁恁入偃師河外土風堪作宰

洛中人日偶題詩何因祖客筵前酒轉憶孫郎帳下兒

來書言及舊僕吳順已作孫郎帳下兒矣幾許笙歌兩行燭呢人魂夢憶多

時

黃河阻風却至惠濟橋行館晚携從子門生至橋東玩

月作

寂寥山館許停驂酒薄都憐興未酣多謝北風能款客
吹帆三日住河南

頽墻三折路參差拂樹先驚鵲踏枝艷殺野橋山店月
不妨人去立多時

過新鄉贈孫同年希元

籃輿薄晚過山莊飛騎驚看迂道旁一代相門傳縣譜
君爲文定公從孫千年古邑號新鄉采風近郭民謠肅話舊虛

窻月影涼更喜外臺條教密時景侍郎撫豫有善政又爲州縣設立科條甚周

兩河應可息痍傷

曉發湯陰

破曉趨南郭城荒竹木稠地爲今下邑山卽古中牟殘
雪明華表驚沙暗驛樓停驂吾不願昨已飯宜溝

將至安陽先東趙大令希璜二首

尋常三五團欒月自到牂柯見未曾料得鄴中元夜好
故人應爲剪春燈

爾許情懷漸不支屏除絲竹已多時還能與鬥筵前酒
可有孫郎帳下兒

壬子冬飲君署醉甚幾欲逃席值孫
兵備舊僕郭勺藥代飲數觥乃解

湯陰謁岳忠武祠

古木叢臺起怒風岳王祠倚堞樓東何因浣盡孤臣血
不祀前朝嵇侍中

埋骨西湖恨已多
小朝廷久厭兵戈
此方立廟非無意
尙爲君王障兩河

抵安陽境塵土撲人
戲東大令一首

主人尙厭客經過
故遣飛沙織似梭
休望琴堂門尊酒
元規塵已汚人多

十四日未刻抵安陽
趙大令爲招春燈社
火讌客海棠詩屋
至三鼓乃別翊日
更邀遊天寧禪寺
設百戲餞

別醉中賦贈

鄴中十萬戶一戶
排雙燈城東城西
徑十里萬影礙月
難東升安陽大令
我素知飛書約我
停少時排門燈影
看不足中有戛竹
兼吹絲紅塵障天
綠波掣馬尾搖風

馬頭月鼓樓街北蕭寺東齊捲珠簾看飛雪昨日醉幾

場好友為我招張王

皆幕中賓客

海棠詩屋圍社火夜半更

約傾千觴今晨別何地更遣聾丞控飛騎佛樓開處面

廣場闕戶為余陳百戲此回元夕無不有月影燈光與

杯酒董生董生惜前走

謂上舍達章時已入都

說與王郎應如否

謂大令復

更排石級上石亭一城華燈尙若星摩挲金石百

回步

寺有元至元十二年鐘銘及至正中石刻

足力倦處閒僧扁念君官事

忙如許眾裏離觴復頰舉一晌歌聲壓彩雲梅花山館

飛如雨君持手板輿前立我瓣心香馬頭揖

時以所刊近者見贈

別袂猶餘燭燼光離亭已暗風沙色

晚發安陽至磁州行館一路燈火甚盛喜而有作

十里平沙柳數層漳河橋上月初升何因爛醉安陽酒
來看磁州郭外燈

李舍人鼎元登岱圖

平生心力瘁躋攀五岳遊完鬢未班肯待向禽婚嫁畢
僅留老眼看青山

欲捫星斗挹穹蒼杖策仍須辟穀方我是上春君早伏
入山先已異炎涼

戲題秦人種桃采芝圖

童男童女五百桃實桃花萬千何不成鄉里婚男嫁
女耕田

毛女忽然大笑惹他四皓顏開商洛山連太華大家飛

去飛來

馮給諫培竹鶴圖

意中我有閒樓閣閣下亭亭立雙崔崔徑時看一花落
曾中我有奇峯巒此外彌處皆琅玕六月更有松風寒
乘軒豪此君直開徑居然得三益門開無人崔亦應門
叢竹兩兩爲除行塵門闕無人竹亦索笑仙禽翩翩自
詡同調先生此圖實得我心崔既有侶修篁成陰尙恨
竹外無月崔邊無雲石牀無積書竹几無清尊客來不
醉相對何以能追古人君不見今人不來古人往崔步
空庭竹森爽畫中山好不可居何不歸爲五湖長
寒食早得家書偶題二絕寄南中小兒女

莫怪尋常鶯燕猜，踏青時節未花開。
鉤簾欲訪春消息，却值江南驛使來。

平堤一色綠初鋪，四月江鄉畫不如。
遙憶風前小兒女，紫藤花下讀家書。

奉酬邵學士晉涵病中見寄之作

與君卜鄰意非好，欲拉酒徒時。醉倒牆西望，汝一樹花
君病未瘳，春遽老。賤云日噉半甌粥，頗厭牆東酒徒擾。
墻東酒徒非得已，匝月行完七千里。轟天礮火衝身出，
弔影驚魂可知矣。昨來偶自窺青鏡，不覺二毛填鬢底。
期君醉我君辭疾，反作新詩惱行客。酒逋我縱盈門索，
藥券知君亦山積。君如戒藥我戒酒，一日顛毛恐俱白。

李公子存厚梅窩圖 羅兩峯畫

橫斜影百枝坡陀石千尺不知是我不得來或是君家
不招客花遮簾櫺柳藏榻空裏似飛鶴一隻有魚千頭
禽百翼幽人一一與之數晨夕兩峯畫石如屈鐵兩峯
畫梅如值戟披圖我忽念疇昔三十載前携蠟屐余未弱冠
時從叔爲崑山尉一峯如頽一峯劈更上一峯吹竹笛
會過訪留居旬日
此時不知梅窩在南復在北但見高低屋橫脊屋上殘
冬雪花積百年君居此山側孫時看梅祖所植幸我淵
源盡相識不然何以揮灑千言有餘力詩成對卷仍嘆
息兩峯老嬾殊可惜君不見玉峯前頭湖水碧咫尺應
須望鄉國倘使餘賤更有一丈長直接吾家水西宅

却扇詩爲吳孝廉鼐賦

譽婦詩成百口傳可知標格本天然青綾步帳曾相識

我是張子友謝子

吳所娶爲孫
兵備從妹

半臂新裁蜀錦鮮薄寒聊與壓吟肩馬頭明月如團扇
偏照怱怱惜別筵

耳語臨岐記可真回頭生怕阿兄憎看花遲早尋常事
莫作蓬瀛第二人

怔忡鞭馬出金臺失意偏教笑口開我憶堦鄉風日好
紅荷百頃待郎回

白髮詩爲胡上舍唐作

鄰東胡生昨叫絕白髮忽然衝帽出大呼擲帽理髮未

幸喜根株惟有一胡生胡生意若失走馬索詩兼口述
我爲生語生勿怵此事何闕存與歿古來賢聖半天折
顏賈頭中無此物矧生飾貌有不屑從此何妨罷梳頭
平生品與陸展別無子未聞收側室鉗之鑷之可不必
生聞我語笑兀兀二三子者粗有筆爲我責頭須痛切
我聞生言意亦豁一毛雖小慎勿拔或者明朝生七八
疾呼奚僮馳急札朋來盍簪賀白髮茅柴之筵咄嗟設
生今上坐非忝竊燕毛之禮誰敢忽雖然生不可不察
此物上頭急作達從茲陸行乘驢水乘筏面垢莫除塵
莫刮衛玠弗愁人看殺

題王太守宸仿董北苑瀟湘圖爲徐孝廉嵩賦

此卷長三尺零陵老守圖居然斐几側陴落洞庭湖山

水情今古荒唐夢有無卧遊吾尚記千里下黔巫予自黔中

還朝取道洞庭

四月廿日與胡公子稷會飲金光祿孝繼宅被酒醉甚

歸途于馬上得五百字即送南歸兼柬莊上舍達吉

陸秀才繼輅

今年絕代才皆下考功第注端王芭孫徐嵩趙懷玉張問尤

苦不得意王生除學博賣字作歸計趙生居僻巷忽爾

開車騎無端長鬚奴失笑復垂涕揭曉前一日汪生將誤報中式

外擢以助教當畢力此一試寅初聞揭曉側立門隙伺

猛聞敲扉聲妻子雜沓至寧知非報捷有客誤投刺徐

生病支離一夜屢登厠先期啞病鶴

君甫作病鶴賦

識已兆垂

翅蒙頭聞報罷急起理囊笥張生已獲售黜落爲奇字

欲歸東西川柰此楚氛熾相邀避人跡戚戚聚蕭寺吳

生

備示不屑類日酒筵肆監厨得驚坐

謂假陳肖生宅燕客

有饌

悉精緻酒徒七八輩痛飲日三四我慚居下位不克挽

風氣尚書名知人

紀宗伯

本可愜羣議微嫌心有主意在

急防弊遂令中材升杞梓或被棄几茲數君子一一洵

國器中年饒底蘊詎止文藻麗沉淪致顛蹶此事亦匪

細今晨聞剝啄君又理歸轡君才希數子靡不夙投契

况茲年尚少拭目盼遭際嗟貧兼歎老與衆不一例感

君行計速飲餞爲粗備不愁分袂早反恨遲把臂君歸

過庭暇勤學戶嘗閉吾州衙署廠古檜陰拂地側聞賢

太守一歲興百廢瓌瓏疏曲河構閣臨睥睨春闈兩人

捷

吾鄉獲
售二人

已獲毀橋利

形家言吾鄉成墅堰及城中白
雲渡橋皆與縣學有礙太守今

已折

其餘懲薄俗悉力整凋敝侯賢實棗梓

予與太守
本從歛徒

東望舉足企明春當乞假官閣倘可詣蒙莊雖從甥風

昔視猶弟知君過從數一語煩遠寄逋錢三百萬土木

苦煩費圍成諸債集何不築臺避陸生才筆健竟欲逾

老驥

陸生嘗
從予遊

昨來觀近作好句我能計吾鄉茲數子得

不詳尤異相思不相見發念時一堯遊山我防嬾日在

室中肄所欣腰脚健百里走尚易一羸聊負篋一僕持

絮被預思重握手不得到春季倘及三月三春江可修

襖

五月初八日方比部體吳孝廉稟邀同人出西直門小
集金氏園亭卽席賦贈並送桂大令馥之官雲南

雨絲踈不斷一路出西城日閃塢頭影雷轟澗底聲草
高飛騎入花滿露舟橫清絕尙書塢當門杞已生

幾許關心客無多賣賦錢暫拋官裏事來趁酒家眠岸
柳陰三面溪雲白四邊遥程愁更數西去萬三千

城南雅集圖

城南雅集圖凡八人法祭酒式善李編修如筠張檢
討問陶劉舍人錫五何戶部元煇水部道生兄弟王
廣文芑孫徐孝廉嵩圖成屬亮吉跋之云爾

城南百萬家屈指無幾人匪繁果無人下直常閉門幾年我苦居天末閉煞城南好風月側聞我友興尙豪把卷呼之齊欲出法祭酒王廣文近來作詩稱雅馴徐孝廉張檢討倔強自誇長句好介休詩老偏改官貧甚不厭居長安稜稜弱冠才尤異難得何家好兄弟我交短李惜已遲觀面却值居憂時八人所貴忘形久不問圖中貌妍醜昨日作一篇今日作一篇城南屋舍不數里時有飛騎馳吟箋流傳俗口殊難耐只說羣兒自相貴

豈知

帝京景物本冠十七州賴有數子晨夕成清遊不然東西紅塵日如織何以使春花生輝月饒色一奴前行不

著鞭八騎矯首皆如仙穿行古刹及荒墅日永或借閒
齋眠數君才調皆經世所喜昇平無一事木天粉署官
本閑欲以琴尊消壯志徐生忽然策蹇驢時下第南歸王子
亦欲登牛車時赴華亭教諭任遂令七客忙不已分日載酒延
王徐還君斯圖三太息勝會如今亦難得卷圖水竹自
生涼差信此中無熱客

法祭酒雪窻課讀圖

堂中一寸書門外三尺雪孤兒讀未完慈母心若結朝
行課讀書暮行課讀書孤兒業甫成慈母年先徂衰親
無百齡積雪不逾月所以人子心常思事親日感君與
我孤露同六歲七歲稱孤童君以七歲孤余甫六歲貧家無師讀

不得卒業皆在紗帷中雖然我與君稍異憂患餘生復

難記五雅三蒼業縱同經句九食談何易白雲前頭一

曲谿

余昨繪機聲燈影卷子亦圖太安人課讀時事

昔者我友曾分題長檠無

光短檠繼持較此卷殊依稀我家茅三層君家竹千箇
我家屋比君家破雪朶盡從頭上墮君家門向左我家
門向右我家雪比君家厚徹夜有光飛甕牖可憐遲暮
猶耽讀只惜春暉杳難續每值窮冬風雪辰攤書時向
茅檐哭吁嗟乎今年之雪非去年今日之景非從前安
得衰親常存雪不化兒寧讀書終老茅檐下

少宗伯鐵保暨少宰玉保繪聯床聽雨圖屬題率賦一

篇

散人步入蓬萊遲大暮小茅皆本師天門不敢與鈞禮

却憶抗手同行時余與少宰同舉京兆鄉試祇疑未換仙人骨閑掃

落花消白日忽聞天上落吟聲矯首不禁狂興發披圖

乃仿迢遙堂下直兩兩登匡牀置身高處莫忘却但見

揚畔左右竹柏搖青蒼誰言天上清閑極一例苦吟能

入癖他時竹杖或敲門慎莫移牀先遠客

送桂大令馥之官永平

汪錢盧邵汪明經中錢教授塘暨盧文弼邵晉涵兩學士相繼作海內故人今

益稀洪生終日塊然坐欲哭不哭常歔歔數君豈止傷

天折汪錢邵年皆僅五十五左右六藝微言亦將絕閭投篋底出手箋

精義猶堪補殘缺桂生亦是今儒者六十肩門校蒼雅

遠官萬里無一錢手抱遺經尙難捨君不見許君弟子
有尹珍首以小學傳蠻人二千年來師授絕得毋待爾
一一重敷陳君不見蠻方志乘尤踈畧若水蘭滄考須
確博南倘許宦三年他日應傳畦君學

題陳布衣嵩畫梅冊子

君前築屋臨江屯老梅一株香一村泠泠江水半彎綠
更向花下開橫門幾年作客思家切手寫一枝如鐵屈
猶嫌比屋多塵氛不遣虬枝四邊出一花中閭綴一星
空處掩映天光青嚴寒百鳥絕無影間有老鶴來梳翎
客來時立梅花側是客是花渾不識三更月淡雨又來
清冷獨抱花魂回

題陳同年慶槐借樹山房

人生天地間百物無不借日受天地恩不向天地謝況乎百年內偶復賃傳舍何人開此巷此屋又誰架主人名誰何何日得閒暇因而覓奇樹一一種如稼何年高出屋清影相激射自從有樹來人事疊交卸前者有因依後者得憑藉冬有以爲冬夏有以爲夏時而蔭清晝時而響長夜賒此千尺陰無須一金價居人不之德鄰亦不之訝我今爲評量不得不枉駕知非乞諸鄰造物者所貴君如思報德日日羅酒炙邀此一世相與酣樹下狂來鋪席卧林密已無罅倘問身所來亦從天地假

七月七夕吳侍講錫麒招集澄懷園賞荷卽席賦贈

居然秋雨餘邀客集深徑何止盈眸花葉聲清可聽槐

黃堆北牖香氣一窻迸奇書隨手讀兼復展明鏡婉婉

越客謠沉沉洛生詠雖無鸞鳳翮雅有麋鹿性蒙莊方

任達管輅苦言命

坐中趣味辛舍人談命不已

莫負佳節歡移樽酌

波暝

酒半移酌池上與張同年問陶皆失足墮水戲作一篇

並呈

西頭萬葉戰秋雨東岸百花明夕陽夕陽紅退遜花色

秋雨綠淨逾溪光張郎酒行冠已側笑道一年惟此夕

携觴約客臨北池指點塘坳欲鋪席影先入水身誤從

影沒反訝身凌空一花驚從足底紅轉眼荷葉迷西東
誰云直下真無地幸踏纖纖藕如臂玩波一晌不出波
濃綠溪光若衣被忽然一躍波已開分手亂擘青莓苔
吾曹不死亦可哈多謝花朵擎魂回

初九日早舊僕朱祿忽遘危疾卒將以是夕歛于旁舍
余不忍視之因出巷至胡文學唐寓齋索飲醉甚至

二詩始歸率賦一首

凌晨欲出門一僕隕西牖念其久追隨不忍視棺匱驅
車出巷西復東訪友十輩九不逢雨聲蕭蕭促歸去日
晚方欣與君遇主人不在客亦豪
胡時主程吏部振甲舍程前已出使呼
酒半日辭無肴充腸且復啖生果幸有凌粟兼梨桃我

前與君同里井三十六峯懸倒景烏聊山頭筍堪煮更

摘鄉園雨前茗

時吳上舍文桂出問政山筍及松蘿茶啖客

千杯百杯酒不

辭簾角月已來
絲絲排頭生客座
旁聽鄉語拉雜愁難
知鼓聲隆隆街北響
我醉欲歸神忽愴
馬嘶聲苦步亦
慵瘦馬轉若憐疲
童君不見魂燈已
出門藥帳猶在舍
世間百事皆代謝
新僕逡巡候檐下

初十日吳上舍文桂邀津門李生爲余寫管領九秋圖

爰贅以二絕句

管領秋花事可知
姚黃魏紫不同時
算來也被仙人妒
東海新教月上遲

籬前薄薄有花陰
小立居然爽客襟
一曲紅欄天萬里

是誰能識九秋心

桂大令馥戴花騎象圖

與其北方騎橐佗不若跨象踰牂柯與其東中餐苜蓿
不若簪花撫蠻服我官蠻服諸土風民戴長吏同家翁
車前何必八騶列象鼻舒卷如長虹花枝紅紅罩官帽
六十使君猶若少有時象背唵欲顛惹得幼姬開口笑
祝君官滿無一錢堆鬢花好垂吟肩君不見三年政成
歸亦好吃象北來耕海島

趙大令希璜雲車飛步圖

我昔至盤谷欲登王屋山馬疲僕嬾不能到日晚僅訪
靈源還是時閑雲逐歸鳥天半夕陽紅不了空林飛瀑

影間之襯得四山青裊裊我亦欲乘雲中車天門旁邊
學步趨舉頭見君忽大笑已被怪風吹裂帽

張同年問陶夢月卷子

我夢久已闌君夢乃方兆斜月照天西迢迢石牛道
此客支離極隨人棄道旁蓬蒿三五尺中有竹匡牀
陳布衣嵩詠篔簹軒卷子

深淺篔簹內能今日氣青四山飛瀑布百道下巖扃欲
制安心法聊難種樹經何人伴幽獨螢火兩三星
卷施閣久坐

園林千萬葉如雨落漫漫秋燕已無影夜窻殊覺寒小
眠琴榻潤閑步竹廊寬只有西軒月無人徹曙看

送張孝廉問安歸蜀

朝看東籬花暮折北提柳人生無根株安得不奔走張
生年四十抱道苦不偶西顧有老親曰歸覓升斗窮秋
霜霰集戚戚聚儕耦相對慘不歡惟應市筍酒君家難
弟好縱飲日濡首長飢資薄俸未足餬兄口我意亦勸
歸名山關窻牖沉潛三十載庶可冀不朽努力盡一尊
西行寡良友

邵進士葆祺邀集寓齋餞張孝廉卽席賦贈

邵生不特詩才逸兼買黃花醉行客就中行客我素知
西蜀才人張玄白十餘年來詩道乖正論往往參俳諧
汪孫端光星衍近亦輟吟詠欲覓長句誰能佳張郎令弟才

如虎酒後千言氣頗粗只惜奇書束不觀沉酣自欲成
千古生成進士方少年乃復憔悴長安眠郎官上可應
列宿何必蓬島方神仙聯吟快得閨中友艷體疊成三
百首璧人居處亦不凡蟬螻裁屏月爲牖花前揖客屢
舉杯客醉欲別花徘徊攔門殘月向東逗興發尙能騎
馬回君不見醉中歲月偏無據落葉紛紛訝飛絮東頭
言八 朝標 折柬來明日酒人須復聚

寓中獨坐

荒園倚古井三折遠市塵傍屋十數株鳥巢多于人蕭
然一徑東南好豈止無花且無草堆檐黃葉一尺深下
有著書人不老

廿三日雪邵進士葆祺餉酒并約張同年問陶邁卷施
閣小飲別後復獨酌池上讀亡友黃景仁悔存軒集
至二鼓作

酒人携酒來賞我庭畔雪我時方讀史一卷粗已畢掃
茲盈尺地相與坐林樾風爐依土鏗隨意雜陳設閒官
兩移居皆喜境孤絕當時沉醉處依約記庚戌倏忽六
七年雲煙事生滅橫街南北路好友半天折

謂邵學士
楊比部

如何不耐飲坐待生白髮君看空中花真如電光掣
淺醉不出門送客竹籬畔酒人從此去蒼鼠亦隨窺前
車方越巷後騎忽聲喚俄頃人語希來塗雪飄斷移尊
酌池上看此冰欲泮舊友隄上心遂令爵無算沉酣到

中夜空自忽欲暗正好殘月來光華與凌亂

題黃上舍恩長印譜

雅覺一拳堅繳尙須八體摩描試問誰工此技山農谷

口三橋

叔孫不朽三事江夏無雙一人文苑儒林藝術恐君難以分身

送黃戶部鉞乞假還蕪湖

黃生通籍久而乏仕進意郎官才半歲堅欲潔歸計乞閒書旣允偃卧無一事歸日萬斛濤空明洗胷次

築屋古鳩茲于焉可終老苦無江上田可刈霜前稻仍

然携襖被遠復客江島時將遊一世無相知何人識飢

飽

十一月十四夜卷施閣待月適蔣表弟良書以惠泉酒
索售因留飲至醉作

所居偏西南十日寡良友今夜明月圓清輝殊膩手蔣
生叩門入半日俯其首索我助急裝餉我一尊酒開尊
與酬酢鄉味汝知否移坐石屋中清談亦云久苦言辭
我去相送出門走夜半西北風泠泠吹笑口

十六夜獨坐玩月至四鼓月食詣太常寺隨班行禮
全家旣南歸一婢携向北欣聞月當頭爲我具肴核軒
墀開左右雲向瑣窻白古木十數株居然富泉石携壺
隨處坐淺醉不終夕官閑乏塵事敢尙曠厥職三更驅

羸車入寺救月食

感舊

忍向三生石畔過此情除有劫能磨愁中花月催人老
夢後樓臺易主多紫燕已聞移舊棟白雲猶是宿層阿
惟將一掬東風淚和雨和煙逐逝波

胡上舍唐屬題夢李昌谷圖卽戲效昌谷體

古錦裁作囊時嘔心中血古錦裁作被時縈夢中結江
南仙客夢隴西魂氣上覺南山低左耳黃河聲右耳瀉
滄海塵飛接黃雲如鈎月沉采闌干十二行不前轉眼
已及三千年玉京路向瑤池直金虎玉龍攔不得却怪
仙人酒面紅映天天作桃花色清虛帝所宅何有白玉

樓一語道破天應愁天公愁山鬼笑神雞亂嚼星斗完
飛上燭龍頭上叫夢中授受詩百篇只借東壁爲長箋
從茲投溷詩仍須出人間來何翩翩去何遽出戶有光
團若絮長爪纖纖破天去

東錢三維喬

竹初庵主近如何習靜翻憐歲月磨到枕水雲清夢適
應門汀鶴道心多黃金久已欺中壘白璧誰能剖卞和
君前幸鄞縣爲接任者 一片五湖千頃月收帆擬共著
所累大爲上官白眼

漁簑

夢入從舅氏白雲溪舊宅感賦長句

一半軒窗面水隈已涼頻奉板輿來簾從碧月光中捲

花向紅雲影裏開分砌紙燈搜蟋蟀過汀蠟屐點莓苔
歡場總被風吹散贏得春宵夢百回

張烈婦詩

烈婦王氏余友人張大令景運之子婦文學慧裕之
妻也慧裕以勤學得療疾氏刲肱療之不愈卒後一
月氏繪夫像于壁維經其側以殉

張烈婦交河人年二十歸所天所天勤讀書氏亦助攻
苦朝聞雞嘒嘒暮聽統如鼓所天學成病轉危夢裏血
淚時時垂誰言色如花匝月成死灰叩天乞緩須臾死
割肉如丸啖夫子臂創未合髻已髻柰此出腹兒呱呱
嗟嗟一塊肉敢累翁與姑長跪向保母願乞存遺孤捐

軀却憶前三日心事曾爲小姑說翁姑有叔兒有母地

下良人待余久神完志定反不忙却掃東壁如銀光七

尺軀牆上植烈婦善繪事先畫良人像于壁乃就旁縊三尺繩梁上直墨光

血光相對射形影不離夫一尺君不見婦先兒兒童烏

阿翁復作鬼董狐大令近作述異記數種一家奇行皆堪圖

偶成

哀樂中年詎可支未衰恐已鬢添絲遭讒真悔知名早

投隙方嫌見性遲乍識面人偏入夢不關心事忽沉思

平生學行吾能審豈待悠悠論定時

百種芟除癖尙留閉門索句出門遊研摩未及唐餘史

蹤跡粗窮禹九州胥次漸能忘寵辱舌鋒從不快恩讐

白雲溪畔三間屋畧有頭銜好乞休

閒來屈指溯從前孤露餘生我自憐平輩半皆成老宿
故人多已學神仙難忘硯北三私業却有城南二頃田
一事冷官差可慰趨朝常得弟隨肩

亘亘平生一寸心不同朝士競升沉憑誰可解胷中結
倩客時彈海上琴乞與藥鑪希駐景肯從塵網索知音
南舟北馬頻來往坐使勞勞變古今

廿五日雪

蓬門且喜絕將迎繞砌南頭自在行一片廣場三畝雪
好同心地證空明

十二月十九日卷施閣招同人祀蘇文忠公卽席賦一

章並邀諸人同作

七百年來彈指過又隨裙屐壽東坡生天至竟誰能免
傳世如公庶不磨香篆裊時詩思入風簾開處雪花多

狂吟痛飲君休惜不見勞人鬢已皤

謝吳侍讀錫麒時以病未至

小除日邀同吳侍讀錫麒戴吉士殿泗趙舍人懷玉温

舍人汝能方比部體劉舍人錫五伊比部秉綬葉

人繼雯張檢討問陶彭明經蕙交戴禮部敦元集卷

施閣祭詩作

洪生除日築兩臺舖糟避債人俱來客來不來豈須速
先注滿堂銀蠟燭歲聿云暮興轉高分半債帥兼詩豪
卷施之門如鐵立百輩中頭不容入側聞門外客暗數

堂中人九州仙客萃一門休嫌坐上賓僚少閩粵楚吳

兼蜀趙

坐中十二人凡四川湖北廣東福建山西浙江安徽江蘇共八省

無端聚飲衆

或啜轉假舊例稱祭詩多逾二百篇少乃十數首吾曹
自有傳世資不藉詩篇成不朽燭花分從肩上飛蠟淚
滿滿堆春衣忽驚屋後雷聲墮四面紙窗齊欲破山雌
水母并入肴遠有吳峯貽車螯百壺不嫌多一觴不言
寡夜半清談振檐瓦肉拌貂酒汚茵脫畧極處無人嗔
明宵莫守庚申歲後日早朝纔破醉

偶成

客來半不知名姓到卽隨堂住幾時醉後忽然長揖去
主人不問僕難知

破工夫把蜀茶煎一枕新涼乍欲眠不合約他在道士
騎驢直到竹林前

卷施閣詩卷十八

陽湖洪亮吉著

侍學三天集 丁巳

正月十四日雪霽溫舍人汝能招飲分韻得兼字

且插梅花壓帽檐乍來香氣欲衝簾籠街月與燈光合
繞砌霜將雪色兼縱飲未妨朝客罵朗吟生怕夜烏嫌
千言一例輕揮灑已有春華上筆尖

十五夜琉璃廠步月

一市人如海塵從隙處穿帷車排巷窄社火壓場圓濁
酒呼朋飲奇聞藉客傳欲尋容足地飛爆向肩然
元夕有懷四首

半生思紀外家聞朱文公有外家紀聞清淚時時滴典墳十六人

中留上壽舅氏再從兄弟共十六人惟舅氏屈八十七千里外寄奇文予典學貴

州時舅氏將生平所述作寄存余處難忘閣上三更月只占溪南一塢雲

莫晒霸陵亭醉尉阿誰能識李將軍憶州倅舅氏

一居闌闔一居鄉零落年來姊妹行少賤每教通世故

長貧時與話家常封書寄弟箋曾濕對鏡梳頭髮已蒼

腸斷邦溝東去路適汪氏二姊下世已及十六年所居天井巷小樓屢過之不忍登也

樓空鎖月昏黃憶姊

晴暉橋北學場東竹屋時時與夢通砌繞石泉三寸碧

窻分梅蕊一株紅已將複閣樓嬌女可有新詞寄阿翁

猶憶北行牽袂處萬家燈火五更風憶女余以庚戌元夕北上

故人生子我生孫世執還應擬弟昆

趙舍人得子最遲
僅長示孫一歲

竹馬跨時纔識路紙鳶放處定當門攤書已分傳家業

學語差憐具夙根遲汝長安來繞膝看翁日日倒金尊

憶孫

吳上舍文桂倚梅圖

黔南冀北走紅塵昨夢江鄉正好春何不石旁添畫我

承明同作憶梅人

纔過燒燈無幾日誤書穀雨我心驚

來札雨水日多應
誤書穀雨

仙客思家切預想踏青人出城

劉刺史大觀為亡友黃二景仁刊悔存軒集八卷工竣

感賦一首即柬刺史

一瓣心香契獨神此公高義出風塵應憐少日齊名者

已作千秋傳世人檢點溪山餘笠屐刪除花月少精神

詩為翁學士方綱所刪凡稍涉綺語及飲酒諸詩皆不錄入向平婚嫁為君畢君一

女皆君沒後為之婚嫁亦擬穿雲訪列真

題蕭照所繪宋高宗瑞應圖六幅

剩得東南半壁天忍將奇瑞說從前何曾楚璧能歸趙

轉使吳州又姓錢朝野雜記徽宗夢錢武肅王入宮而生光堯內殿早教販

繡佛小朝真欲泣金僊蕭郎落墨非無意只畫樓臺夕

照邊

不少當時命世雄橐鞬都覺有儒風誰令密計參張愨

却以中原付杜充垂手燕雲時已異傷心懷愨事將同

茫茫一局全輸却轉悔飛棋入九宮

天水南流讖不成臨安城異汴州城到來捷縱誇三矢
從此寒應在六更未覺赤龍能踐夢好防白鴈欲渝盟
冰天雪窖吾家事坐使披圖百感生

三月三日作

不妨衣冷更裝綿十里衝寒籠玉鞭到處雨猶零昨日

別來人乍入三天

是日入直上書房

情懷已分難成夢消息緣

知欲禁烟只有御河橋畔柳臨風裊裊試初眠

送吳文學文桂旋里

我從黔中來共子客京邸君今新安去是我舊鄉里旄
頭星落白虎傾屈指井絡當銷兵二千石吏倘奉法五

斗米賊何難平金門索米空年載無補于時亦思退黃
花半頃麥一畦努力同輸太平稅

送郭同年淳乞假還里

春秋三榜悉同年入直同趨 朶殿偏手版竟思參俗

吏

時同
年外
任者
頗衆

頭銜莫更說神仙著書我續容齋筆述祖

君牋爾雅篇他日講堂來問訊胥臺側畔越溪邊

古意十首貽晉齋應教同作

魚遊濁水中鳥宅高枝上托身雖不同遙遙亦相望連
枝新月出鳥影波上漾魚樂我自知沿流擘輕浪

晨興必資餐夕寢必資被一身雖無多物物無不備從
茲百年內殊覺太繁費當前欣各足安用事心計微名

在身後亦以付天地惟時把書讀掩卷輒垂涕持此一
寸心寥寥欲誰寄

莫辭家出門出門路卽岐處旣誰可借出亦誰可依身
非我之身父母之所遺敢學陳孟公一世隨高低

松筠及桃李羣焉托春風先時及後凋命意乃不同桃
李方華滋松筠亦青葱共結青帝知幽芳閒香叢榮悴
任所操不居造化功所以深識人澄觀悟初終

五日一澣衣十日一沐沐衆中常緩步敢逞絕塵足齋
糧時告匱祇復購薪束不知何奇書然火樓上讀

昨者卧復起忽然心憂煎前古與後古一身居其間責
備之所歸安得不懼焉何以貽後來何以承昔賢當食

老庄真言卷之二
三歎嗟高懷惜徂年反美行路人逐便可息肩

繁星與望舒晨夕麗天闕司存各有在取道亦殊別如
何百星光難補員景缺北斗亦自知光輝不如月

我不爲神仙非徒厭荒渺亦恐過百年事能生意表閑
居偶然夢列闕事幽討洪厓與浮丘容顏那能好微聞
田橫客近尙住仙島畢竟忠義人後天而不老

人言記誦佳不必炫文采寧知華與實兩兩實相待生
爲行祕書一死究何在何如能涉筆自命可千載

締交數十年夜夢隔魂魄忽然來同心半面成素識神
明苟相契不在今與昔孔程乍傾蓋華管久分席君看

曹平陽方延掃門客

送鮑郎中之乞假南歸

五年不復同簪筆，忽向東華語將別。高齋學士我自慙，長慶老郎君第一。廿年前憶夫容，城君官我尙爲書生。一篇君賦初月影，我把君卷時縱橫。十年前過昆陽驛，君作使星吾尙客。八句君嘲退院僧，僧把君詩倍珍惜。驛旁僧有娶妻生子者，君作詩嘲之，僧每舉以示客。榻來同宦曾幾時，君復僦屋鄰曹司衙杯。每苦暮鐘動一僕，一馬趨城遲。君寓內城。此回別君真草草，道遠飯君須及早。練塘湖北蒜山西，他日訪君應未老。

西爽村雅集應教

平波三十頃樓閣，總如浮聽雨來檐隙。穿雲歷樹頭竹

稍時礙鹿花點欲驚鷗不是春光滿還疑雪苑遊

三雍開秘笈萬畢述奇辭古樂河間獻新碑丞相斯人

工小篆時觀所樵嶧山碑

阜同分陝陌水軼定昆池喜值端居暇賓

筵酒不辭

清明日同人各携酒至陶然亭餞吳侍讀錫麒分韻得

郭字

今晨值清明淺步不出郭言登西南亭稍覺筍鞋拓窻

櫺無用掩空翠四垂幕天半遞遠風輕雲落如鶴梨棠

間桃花花暗一層閣春蔬羅數十所喜新意各泥飲苦

不豪停觴歎離索東瞻暨吳會西念及商洛

時聞賊匪竄入魯山

如何遲露布顧望期屢錯吾子又告歸心期渺誰託中

年富筋力敢退事耕鑿無容籌去住且復視寥廓客去
酒忽醒泠泠憂車鐸

閉門見花落有感

塵勞擾擾復紛紛却掩重門杜見聞入世早推能慮事
到頭何止僅工文閒花積地驚三寸薄酒澆愁祇一分
欲搆草元亭未就暫將奇字課劉棻

晚坐

草花艷紫林花紅胡蝶五色飛當中刺梅黃更出墻角
白玉一樹嬌春風藤床坐久春陰薄香氣冥濛合成幕
忽地吹來雨脚斜梨花樹上桃花落

四月十一日綺春園雅集應教

名園一棹水云泫柳正披香草乍薰畫舫已教延碧月

紫藤偏欲上青雲欣傳檄報秦關捷不礙顏從魯酒醺

雅有剡溪賤百幅時觀成親王所書堂額亦乞寫卷施閣榜醉餘書許乞羊

欣

昆明湖水接天流揖客都從冰上頭正好柳陰三弄笛

未妨花裏一登樓迂踈尙荷賢王禮擾攘誰分

聖主憂殘盜莫矜盤踞穩早看飛將下神州

趙忠毅鐵如意歌

三尺鐵作如意誰其握之趙忠毅惜哉公生明已季委

鬼茄花吹滿地恨不擊王孟津門生有此真亂羣恨不

擊烏程魏故人子已成敗類半生所遇總如此悼歎公

生不如死鐵兮別主二百年
倔強宛若公生前君不見
我雖不見公幸見公遺物
稜稜一方硯凜凜三尺鐵
嗚呼二物偶流傳想見公
心如鐵石

米圖南鐵笛歌

一聲遲一聲疾雲將穿石
欲裂不知何人製頑鐵百鍊
鋼成三弄笛空園初春
窅其無人水際一曲蛟龍
欠伸排清風出明月樓
高高聲不絕三更已還
客興闌百舌軟語花開顏

望雨作

朝望雨雨不來烏鵲聲
裏紅雲開幕望雨雨不下
柝聲茫茫星影瀉五陁
山十日不出雲赤日炙
窟牛羊羣昆

明湖一勺水，滅尺青草欲生魚。鼈窟東西紫陌飛，麩塵
祈禱日頰。

兩聖人君不見，安得檐頭雨如注。更望驛西傳露布，時望

陝西捷音甚切

廿六日新雨後作

燕歸梁雀歸，牖雅巢左邊。鵲巢右延回，只有雙老鳥無
樹無巢向空門。先生看雨出屋頭，破暝復聞呼婦鳩。風
聲蕭蕭葉聲亂，一尺鯉魚飛上岸。

頻夜起看殘月有作

少歲如新月初三，及上弦最憐光滿夜。亦似客中年齒
髮，今如此情懷愈黯。然回回過宵半判與看殘蟾。

偶成

殘月出半宵殘客扶半醉月從門外入披牖與之對客
行既不前月影亦不退何如鋪桃笙就此月中睡

澄懷園卽事十首

讀書樓上一燈紅穿破疎簾入水中隔牖乍驚錢庶子

誤疑殘夜月升東

所居與錢庶子榮相接

雨濕溪光畫不成平堤百尺水雲生過橋時有琤琤響

學士廳前落子聲

張學士運暹與王侍講綬裴編修謙暇輒對局

直廬遙對寺門開

童大理鳳三寓廬獨在澄懷園外

分得西山一角來

載酒欲過童大理十年重與話繁臺

十年前會同客開封

八分日影上堦除

張檢討綬出入每刻日影為度

風動簾紋自卷舒携

待剡溪藤十幅成王書罷定王書

嫩涼時節雨初過格子千行墨數螺却笑病餘陳贊善

萬全

索書人比索逋多

屈指風光五月前蛙聲閣閣草綿綿宮紗

賜罷頒宮扇日午傳宣集後天

偶向花前共舉觴自慙小戶遜三張

謂學士及檢討餽綬

花豬

肉好梅蘇熟更憶西頭達侍郎

達侍郎楮飲饌兼人

破曙同看入左門金爐宿火尙餘温傳經不愧真司業

分課

皇家五代孫

邵司業玉清督課嚴時分授皇元孫經

洗馬清談昔擅名說經祭酒亦鏗鏗闌干日午天風起

吹徹南來笑語聲

謂王學士坦修
汪祭酒廷珍

閒屋一畝富莓苔正值花時借榻來架却紫藤扶住竹

清陰仍待主人回

予應居西頭小樓以墻宇盡圯
暫假寓萬侍講承風直廬

夜起

塔頭明月來長徑一千尺非比青松枝欹斜不能直

天中節近有懷里中景物并望家累入都

梅仁如豆杏如丸桃實成拳砌滿盤昨夜江船來海口

鱔魚三尺勸加餐

薔薇一架後先開不向墻根問蜀葵襯得石榴紅更好

野鴛桃與土玫瑰

睡覺西窗雨氣腥戲將采線繫蜻蜓聚頭扇子無多摺

自寫黃庭內景經

石首江瑤總遜渠品高入市故徐徐銀鱗玉頰疑無骨
喚作人間團扇魚

新篳白酒透簾香冰齒還嘗薜荔醬却謝水鄉三尺雨
楊梅深紫枇杷黃

約伴同遊西瀟湖梳頭先費睡工夫倦來不怕春魂魔
新貼紅梅閣上符

蜀山鞭筍出林長紫莧黃瓜取次嘗兔麥上場蠶豆老
便乘舴艋醉新涼

枕波樓閣止三椽簫鼓盈盈咽一川已是苧衣涼沁骨
更扶殘酒上燈船

初三已是學堂空競渡爭看出郭東六角蒲葵三角黍
采絲穿就過天中
不見津門信使回小亭遲汝獨銜杯船頭醉蟹船窻酒
可噉而翁消夏來

山行雜詠

人從窻裏卧塔向門外立忽然塔上人欲與窻間揖檐
鈴吹笑語高下勢不及無由寄真意飄此頭上笠一晌
乘便風翩然墮階級
空園半畝花左右交虎迹清晨客初來怪鳥啼屋脊心
空忘喜懼卽此鋪尺席鳥亦竟遠飛虎亦不前逼始知
忘機人物外有真適

船從西岸行馬向岸東走魚從急溜下三者勢若湊中
流微約畧十步拒前後魚沉倏無影馬倦亦難驟客意
正苦吟沿流一篇就

山樵本無家隨意向山宿忽于鴉巢外突出半間屋上
窺鷗與鷗下復走麋鹿樵薪堆一岸意倦亦託足縷縷
飛爨煙應知飯初熟

斜陽半天紅雨氣半天黑冥冥紅黑交蟬竦橫百尺仍
然雨難下依舊幻晴色須臾雲黑處透出星漢白野老
涕不休低頭對原麥

一塢寄塵外謂有田堪耕豺狼多于人見慣亦不驚客
至主染疴閉戶絕送迎連呼強之出先把門扉撐荒寒

信難居滿頰莓苔生

出谷雨聲碎入谷雲光肥一出一入中蝴蝶雜客飛疲
蹤欲誰投暫借雲所棲一川饒怪蛇百鳥噤不啼何因
知宵昏庶賴警曙鷄

橋東與橋西破曙一招手前行殊未覩隔此水楊柳荒
荒行半日月落斷山口居人方啟戶行者倦奔走勸客
盍早餐山桃實如斗

四望悉無見松杉與檐齊亂石黑半天壓此矧曉低石
竅出一門何能辨東西居人耕山田盡向屋脊騎勸客
早出山雲生路當迷

迷途忘高低蠟屐向空墮濛濛倒生竹衣袂牽向左欲

尋人跡問半里斷烟火沿流聊徙倚缺處雲落朶古廟
無神靈牛羊占高坐

午日拜紉葛香藥之

賜紀

恩一首

弱冠爲人師逮今幾卅年人言紳佩榮簪毫入中天經
傳

聖人孫戍削甫及肩朝朝食 天厨齏鹽夢仍牽日午
宣

賜來鵠立 朶殿邊纈紛香藥丸紉葛欣有聯纔出
內左門傳宣復連翩俯念節物佳當食更

賜鮮

是日並蒙賜克食

我苦無母遺承

恩涕淪漣會當家祭時持此告寢筵

偏側行同金秀才學蓮作題亡友黃二悔存詩集後

偏側復偏側住世纔幾日朝吟山頭魂暮委泉下骨偏
側行歌黃郎黃郎五歲始識字十五十六能文章十七
試冠軍十八登詞場十九客浙東二十遊瀟湘當其興
發欲賦詩寒暑昏旦皆忘之山行麋鹿憎水行蛟龍噓
有時沿林覓句不知遠前飛鷗鵝後狺犬我疑蒼蒼位
置皆得宜獨出此人天不管春非我春秋非我秋一世
出不得延回歷九州大兒小兒亦何有忽向燕臺訪屠
狗形疲骨瘦志已灰偶爾一官頭上來驅車入解梁誓

將涉咸陽避責未築臺塊然身遽亡三十既已逾四十

澗難得赴君之喪哭君切伶仃一棺詩數冊此時偏側

復偏側巫咸岡雲四結昆侖河濤百折炎風蕭蕭雨聲

急又疑天爲詩人泣詩人亡後十五年新鬼故鬼圍墳

前君亡後君配與太夫人皆相繼卒錦州刺史劉大觀獨抱一卷來長

安奉錢三百千一一爲校刊姓名一日長安市交口誦

君如未死我頃聞之淚難止却憶石交疑隔世楊大令

趙舍人里中昔年稱等倫此時憔悴百僚底轉羨君名

日邊起偏側行誰所爲金子亦豈人間才浮名身後總

如此不若未死常銜杯一杯復一杯偏側歌偏側却憶

虞山山頭論詩夕夜半神祠火雲赤茲遊何期死生隔

嗚呼茲遊真成死生隔

送楊大令倫之官粵西

儒流誰說不知兵躍馬提戈萬里行猿鶴已堪成一隊

時以粵西軍務檢發知縣八人皆先後同行苗蠻從此乞餘生愁經百驛先

頭白官比雙江徹底清莫忘鵝籠舊時事夜寒風細擁

孤檠

南行飛雨北飛沙三十年來事若麻笑我尙難忘輩行

羨君先已富才華論詩未欲輸餘子破涕先聞說外家

姊弟數人天末住

君從洛中赴粵時蔣表兄鴻三久客洛陽表姊適繆氏者全家留滯粵西

子君爲從舅氏及從母故并及之

幾時商畧泛歸槎

戲簡陳侍講萬全四首

時陳新納姬人作詩索和

填門索字比催租頗覺仙郎暇日無添與玉人書紙仿
者番須破睡工夫

偶然一語尙嬌羞說到雙眠着意愁比似早朝還起早
怕人簾底看梳頭

昆明湖左路偏賒下直偷歸日已斜好事却同錢庶子

五更雙巷響雷車錢庶子築直澄懷園每三日必一歸
即于次日五鼓趨海淀入直常以爲

例君寓居相
近故戲及之

倦來鸚鵡替呼茶不掩窻櫺看月華我屬司香好調護

東風纔放二分花姬年
十四

立秋前一日偕顏大令崇渠趙舍人懷玉侵曉詣 太

液池觀荷便訪法祭酒式善遂自德勝門徒步至西

直門五里長河花事甚盛並過極樂寺勺亭久憩乃
返

北斗未落天冥濛騎馬獨入蕭齋中夢醒拉客事遊覽
曉日未透觚棱東三亭二十有四面所喜面面花香通
豈惟花色艷如錦魚尾亦閃明霞紅此時夜色未全散
樓閣不受驕陽烘石闌干落一千丈月影星影穿玲瓏
斜枝面水結巢穩鵲夢未破花香濃荷盤承露亦殊好
珠光細碎磨鏡銅偶然興發欲出郭三里已至官河衝
背城人語太岑寂繞砌百級喧鳴蟲劉家亭子足清賞
細路曲折諮老農斜行距水不三步仄徑尙被蛛絲封
黃塵車馬鬧如織閑處鷗鷺何從容西山咫尺不容見

花挺高榦遮雙瞳乍紅乍白乍深色裁出片段非人功
環橋石勢鬥清削花亦旋轉如長虹池寬不放水波展
風蒲獵獵交水菘迷行半晌始得路歷盡豕柵兼牛宮
花前吟客果下馬一一瘦步行偏工寺門斜對御園

闢當午紅氣酣房櫳釵環塞戶不容入

是日國花堂為遊女所占僻

巷走避衝斜風瓜花斷路蓼橫徑紫艷映水黃浮空吐
絲蟲碧轉丸黑堆地棘刺仍叢叢何來驟響刮客耳別
出水脈穿青松僧房盡處避人坐瓜果一任僧雛供開
窻望雨不能得雷鼓隱隱聲隆隆冰盤磊落高數尺蠅
蚋半日潛無蹤良朋屢約期屢誤世事何苦填心胷團
蕉卧久僕夫促來趁斜月歸聞鐘回車頓覺有秋意一

葉正墮青梧桐

二十日早章大令學濂邀遊積水潭看荷同人分韻得

光字

十里長河匯作塘馬嘶人語看花忙能閑客總神仙侶

當曉潭交日月光斷札幾行留黯淡

時展舊遊長卷見亡友王友亮通副

所作看荷詩

喬松千尺揖青蒼惟應薄醉牽船好消受荷花

面面涼

跋方布衣薰所作春水居長卷後

方居士性本孤畫水不畫舟畫岸不畫廬縱然畫屋僅

結茅前後左右皆禽巢一身居其間意態何嚶嚶縱然

畫舟僅一葉四面風聲水聲接掉船何所之似欲出六

合春林綠重煙濛濛初日淡作臙脂紅杜門百事不挂
意闢牖自與天光通方居士富有千頃波貴作五湖伯
朝吟晚吟同蟋蟀夜窻無人電光擲人立大魚時揖客
不爾前灘訪鴻鴻偶然興發作此圖一筆卽已環全湖
全湖盡處青無數知是君家冢前樹我與居士交恨未
及往還手訂居士詩不識居士顏他時我訪湖西宅爲
補四圍松與柏君不見飛去飛來寒鷺絲渾疑弔客衣
冠白

七月朔日雨竟日夜不止作此排悶

一夜蕭蕭雨開門水倒流亂雲穿斗杵野鳥宿簾鉤兵
甲真堪洗櫂槍尙未收似聞宵旰慮仍在益梁州

苦雨待客不至戲成

五更雨急檐頭衝壞垣倒屋聲洶洶起尋蠟屐出門看
半里曳入塗泥中西家床頭索瓦瓶東巷歷歷排牆聲
重來輦轂又逾歲天漏似向黔中行吾家老屋常掩關
壁倒已覺無遮攔獨愁苦霧翳天半咫尺不見西頭山
冷官百事皆相左折柬偏言此晨可齋厨無蔬爨無火
拒客先將巷門鎖寧知客念亦早灰侵曉誰肯衝泥來
厥橋西門水三尺到亦叱馭車回水聲泠泠沒及髀
掩書無聊酒時把一杯未已復一杯忽爾風狂墮飛瓦
君不見天公此意知者寡要向西南洗兵馬

哭愍孫

爾病真難起吾衰久矣夫猶應阿兄在

次子盼孫于壬子秋殤于京邸

莫嘆夜臺孤世業憑誰振重慈藉汝扶傷心厝棺地夕

照滿平蕪

盼孫棺厝于城西夕照寺今亦當同

詩冢詩

無錫顧兵備光旭選刻同縣人詩爲一集其剩稿賈

上舍崧乞得之爲卜地瘞于梁溪之側三伏日走數

千里爲索詩可云好事矣爰爲賦四絕句

側栢踈梅插滿塋三千里路走燕京不知何預先生事

肯爲詩人觸熱行

身後浮名定有無尙餘清淚灑平蕪他年地下傳文苑

此事真推鬼董孤

少日齋名顧虎頭老來吳質倍工愁

顧進士敏恒吳明經龔仙于梁溪詩

人爲最九原珠玉終難瘞合置中郎與發丘

不結詩人結酒人邇來麴蘖更沉淪潘張陸左誰能識

有鍾須埋劉伯倫

女貞行爲俞貞女作

無錫俞貞女許字高郵金明經蘭未幾明經病卒貞

女誓以身殉母兄防之苦貞女畫女貞花一枝題詩

于上以見意不半歲終以瘵疾卒其兄孝廉坊爲索

詩爰賦此篇

花莫作斷腸花草莫作拔心草拔心草死尤可憐誰識

斷腸花色好俞貞女字金明經二十待年仍未行明經

亡貞女病口不欲言心已定寫得一枝祈絕命不繫尺
五組不赴清泠淵兒身雖可捐母意殊拳拳十句百藥
終無効兒雖死貞不傷孝英女貞樹鬱鬱冬青枝上
有六出花下有五色芝君不見斷腸可續死可生不若
此木尤堅貞良人無年妾命促手握此花方瞑目萬古
貞心托貞木

同人約七夕卷施閣小集先作此代柬

紅燭千條酒百瓶石闌干外雨初停人間未必輸天上
此夕虛堂聚德星

七夕詞

今歲風波惡濤衝星斗邊

時大雨連日永定河決口

鴛鴦三十六險

欲上青天

茅垣排東西土室圯前後只有天漢邊
紙牆尙依舊
別夜雲輶歛凌晨絳節移年年當此夕真可說瓜期

十一日同人集卷施行閣醉後作

十日無一客客至必滿堂十日無一樽客來必千觴
主人愛客客亦知皆競來早無來遲鞭絲影拂稜稜瓦洗
手花前客停馬淵魚林鳥盡不猜客到先已穿池臺茶
爐聲喧話不足失喜一林新果熟雛童攀樹鳥啄枝一
徑先入紅參差果中開筵忘爾我上坐主人無不可忽
然客句矜速成滿屋盡變爲吟聲歡呼座中人歷亂屋
頭雨驚雷掣電總不聞銀燭如椽客圍語須臾雨歇月

滿廳蠟屐攢響來窺楹半廳人歸半廳坐別掃一廳留

客卧

金手山等皆留宿閣中

三更門索誰更牽知是驚烏夜飛過

鳳仙

砌下亭亭立應呼侍女花綠須扶徑草紅欲睨窻紗逸
榦零朝雨芳心待月華窺籬兩三種因爾倍思家

鷄冠

爾亦知時者忘言得久安未應憐鍛羽空自揭高冠秋
實寧同味幽花不並看劉琨思起舞側耳聽無端

秋葵

八尺檐楹峻枝高尙出楹孤懷終自揭仙掌曉來擎似
愧凌霜質徒矜向日名寧隨鮑莊子別足有餘榮

紅蓼

秋花雖自好未比水花妍紅紫分三徑江湖別十年舞
風踈竹外弄影夕陽前不聽吳孃曲從茲別夢牽

秋海棠

何事腸俱斷傾城色尙誇春人兩行淚秋雨一叢花恨
繞江郎筆愁生蘇小家蟲聲漫鳴咽心緒正如麻

玉簪花

秦闕誰種玉楚國尙亡簪泣露寃難剖埋蒿冷欲尋淡
宜涼月曉閒稱古墻陰似有泠泠響風前荅素琴

十七日驚聞畢尙書師楚南之赴翌日于卷施閣中爲
位而哭哀定賦詩六章卽寄莊邠州忻錢乾州拈陝

西毛簡州大瀛四川孫兵備星衍山東楊靈州芳燦
甘肅方伯揆貴州楊大令倫廣西王大令復河南

三十年來事都憑信史編此生誰念我九死欲呼天
出朝班上魂歸夕照邊報公惟砥節方不負名賢

死不爲公恨傷公未盡才潢池仍待勦衡嶽遠先頽諸
葛中年隕文淵半道摧世儒真淺識猶望歷三台

由來三楚事終始一人支微管功寧泯亡彭讖獨奇
時術士言公官楚南日卽當謝世蓋合公姓名爲讖也夜星驚櫪馬秋霧濕牙旗

千百孤寒淚從今灑路岐

遺大投艱後羣疑衆謗中萬言陳至計
公去歲請撤湖南兵專勦朔北

疏入上嘉其盡誠一死遂孤忠分野旄頭落盤門羽檄通蠻民

商配食先在伏波宮

老每思巖壑

君恩未賜環回天心獨苦匝月鬢都班

公體素強自籌楚事旬日鬢

皆白事與元勳勒封同五等頒傷心別時語

乙卯冬余自黔中報滿入

都公留話三日方別

原不計生還

同人凡幾輩白髮半應飄訝絕全家計

半年以來公仲弟夫婦及冢媳

房老皆相繼卒

哀騰八月潮

公以潮生日生故小名潮生

枕鞍書耿耿歸櫬

雨瀟瀟他日虛堂宿仍歌楚大招

會都轉燠以六月廿一日集平山堂為宋歐陽文忠生

日設祀同人賦詩成帙并索亮吉詩因賦此

臨安祀東坡邦上祀水叔兩公政績猶在人 不特高名

輩流服異哉平山堂乃祀和仲忘歐陽

子以癸巳甲午客揚州榕著臘

月十九日曾兩隨衆于平山堂為蘇文忠設祀

門生風義古無匹誰敢僭食來

堂皇千秋此論誰折衷乃在七百年後曾南豐雖然文

章節義謚並同配食六一庶得看山翁此後君倘接武

雙文忠宿筵開酒人滿太守風流逮都轉昔時門生今

里閉誰知誕日尤奇絕君後公生纔兩日陳公塘接邵

伯湖荷花世界昔所無不羨奏樂章不羨祝嘏詞只羨

蜀岡岡頭三日讌正直千朶萬朶紅白花參差古來文

福能兼少况復身持節旄早一輩才人座上多二分

月揚州好君不見我亦平生感舊遊吟魂多在庾公樓

大星昨報前軍墮

昨得舟山尚書赴

清淚揮殘天盡頭君思歐

公我思畢同是龍門異今昔十輩門生宦九州譚莊似撰錢獻

之孫淵如楊蓉裳荔裳諸同學感恩一日頭俱白王南寧少林太守陳博士

禮堂學博我所思兮二三子却憶征南幕下人一篇並寄吳

江史冊厓文學

重哭尙書師

三日愁霖漲滿池打門消息到偏遲南來蕙苒冤方白

北渡瓊瑰夢已知無淚哭公惟有血此身閱世詎多時

平原賓客消沉盡誰共筵前奠一卮謂邵學士諸人

七夕夜坐戲擬古別離詞寄孫大山東

中歲念師友懼或成晨星晨星今亦稀惟剩一啟明啟

明之東我則西天末回首常淒迷一回思君一回切願

滅光明作殘月一月相隨得旬日不然此滅彼復生君
爲啟明我長庚昏旦相代東西行我持此語思上告織
女黃姑愁未報南極老人先大笑

苦雨

十日雨不停莓苔綠斗棋虛堂蒸毒霧梁燕欲移棟居
鄰斷煙爨欵戶求火種爲言墻半圯床榻陷成冢填街
三尺水決竇不旋踵憂來展書坐蟲喙集窻孔心切望
曉晴偏驚橫蠅蝻

贈楊州倅廷煥卽題其傳硯堂卷子

難兄薄宦久蹉跎

時令兄倫檢發廣西軍營

萬里新從馬伏波小別

最憐饒涕淚半程相送越滹沱傳家硯比兼金重賣字

錢無落葉多我是孔融交兩世一回展卷一摩挲

八月廿二日侵曉出西便門抵海淀約任軍門承恩共

遊西山因小憇官廨待法祭酒式善何水部道生作

我行月初升甫到月未落初日亦已輝星光尙回薄濛

濛開濕霧纒止巷南柝官齋野花艷隙地日開拓早飯

及射堂紛然具羹臠年豐饒稻蟹且喜鱸新斫傳觴休

更緩有約在巖壑斜行車屢陷溝水仍未涸周廬欣在

望便道一省度園林甫修葺昨已飾丹牖笑指雲外樓

今成草元閣

時新修澄懷園余已移居
逆光樓下因便道入視

循青龍橋北入山

高原無人居千頃堆白日前行驚眯眼沿道飛石屑流

雲勢洶洶意欲礙車轍萬葉鼓北風斜衝一門出騎行
既回互徒步徑尤劣絕險度一岡同行儼相失璫瓏諸
石竅往往野花茁秋蟲與相開竹徑亦幽絕到覺萬仞
湖孤懸石樓末

久憇龍神殿觀泉源并喜春海棠復開

墮薪天半落知復有樵人及此林花放幽巖忽覺春稍
稍開宿雨黯黯及蕭辰三時金鑑影五色莓苔文土囊
風既迅石竇泉初分松陰灑危殿嵐光度寒門層層凌
曲磴步步絕流塵禪扇雲欲活初地鳥尤馴百念此時
寂齋鐘亦不聞

登蒼雪菴小軒望安定平則諸門并見白塔

松陰甫迎人，柳葉忽拒轍。土垣從東頹，了了露佛闕。旋
螺方數轉，足險入石穴。欹斜臻層軒，眼界始突兀。窻櫺
寧待啟，雲怒已飛出。重岡莽回環，幸有北口缺。奔流從
此注，百里只一瞥。濛濛煙盡處，時逗人馬跡。心空無窒
碍，木葉半俱脫。誰云飛鳥迅，詎若隙駒疾。危瞻七層塔，
天際白如雪。斜日下九門，丹樓亦齊矣。

題羅山人聘爲周編修厚轅所作移居圖

人生安得如淮酒，更載奇書及嘉耦。書完一卷酒一杯，
鶯燕一一飛前來。倦餘卽卧書函下，酒得美人斟較雅。
我疑醉鄉日月不可遊，何意復戀鄉溫柔。或云藉銷奇
氣，憑萬卷。否則佐此情話，須千甌。周郎舊乞金門假，重

到蓬萊已三夏，偶然聚得薄笨車。家具如此方移家，酸
寒頓改儒生素。玉軸金釵照衢路，遂令畫鬼羅兩峯。描
繪人物仍能工，馬嘶塞路車填轍。一笑敵君如有術，以
劍抵君書以琴。抵君妾惟餘酒癖，未盡忘醉裏狂譚。磨
齒頰雖然此客，尤可防倚酒或恐登君堂。書能目十行，
酒亦吸一斗。把君奇書覆君甌，惹得美人開笑口。

八月廿九日抵澄懷園成親王枉騎過訪并辱贈詩謹
賦此報謝

偶廁談經席，頻勞問字車。過汀喧列騎，入室噪棲鴉。土
籠茶難熟，丹林日易斜。不因鄰

禁籟，猶認野人家。

中秋日何民部元煨水部道生招同法祭 式善伊比
部秉綬趙舍人懷玉遊法源寺竟日

慈仁荒敗崇效遠禪窟此間稱最古維摩立地有丈六
傑閣去天纔尺五三門乍啟通松徑百步相連有花圃
虛堂僧健老復丁靜夜人歸月亭午

澄懷園九日

荒園秋盡景蕭騷一半松林起怒濤是處岡巒行已徧
破除今日不登高

澄懷園夜起看月

卷簾列宿已全收是處天光接水流剩得一星隨一月
憑欄看到五更頭

周廬三面麴塵清風起雲生與地平百步樓臺少人影
馬嘶聲和客吟聲

管夫人墨竹

石徑空濛翠欲流琅玕影裏雨初收何緣不寫王孫草
多恐人饒故國愁

澄懷園卽事

橫塘萬頃荷花死蓮葉蓮根泣秋水參差鴛瓦鋪新霜
螢火一夕收清光枯楊半掩窻前卧抱葉寒蟬向空墮
湖東明月湖西來綠窻此事開未開

晚步

荒岡南去徑縱橫半里斜飛落葉聲惹得暮鴉成陣噪

夕陽人影樹頭生

夜起

落葉驚人起開軒月露迷却從行馬外斜度濯龍西萬
樹風聲肅千門燭焰低勞勞我何意默坐聽荒鷄

築屋

築屋臨官道郵書鎮日馳水寒雲去駛天迥月來遲劍
閣初聞捷荆門尙出師南征諸將士知否抵恩施

澄懷園偕同人晚步

歸鴉已入林未礙客幽尋風遞千門響雲飄四野陰訪
經蕭寺冷照水石梁深不是逢搖落誰知天地心

袁大令枚寄示擬戊午己未重宴鹿鳴瓊林詩二十首

率成十二絕奉簡

唐代詩人推李杜何曾雁塔得追陪
先生要吐前賢氣兩向慈恩頂上來

也逐遊塵上六街不知早已脫芒屨
賓筵開處啣啣鹿定帶長生苑內牌

白首研摩事可憐從來一第比登天
名經千佛雙番寫始悟公真劫外仙

三月春光暖已回五雲多處綺筵開
劉郎前度誰能識錯認耆年賜第來

一輩人皆上玉京獨留老眼識羣英
先生遊戲蓬萊日多恐諸賢盡未生

憶昔追陪聞喜筵記同上相說齊年

謂庚戌登第日稿文恭公重赴禮部

宴

不知此老來春宴更有何人步謫仙

却笑從前向子平苦留婚嫁晚經營先生五岳書名徧

游戲重題雁塔名

老去重登選佛場此翁何似魯靈光斷無門下門生在

有亦居然大父行

宴罷瓊林走壁車珠簾十里影橫斜當時玉貌誰能識

只有宜春苑裏花

短筇秋到倍精神無數羣賢逐後塵畢竟姮娥愛蒼老

桂枝全借白頭人

屢枉山公問訊檄林泉歲月一何淹

公與文成公阿桂同舉鄉試今文成

已辭 少微不隕中台隕始信公真文福兼

王母蟠桃歲月長
搗來屢見竊東方
曲江杏比瑤池實
也要先生三度嘗

十月初六日同人集積善大令晚香精舍看菊并出古
琴十六相示卽乞主人與何水部道生于花下撫琴
率成長句

琴琴不同聲花花不同色
琴標六代元宋唐
花放百枝黃赤白
古琴泠泠一十六
其外蕭疎盡叢菊
琴囊滿墻花滿屋
一本花開彈一曲
主人豈止能愛琴
愛琴兼賞琴知音
何郎三十妙指法
花下一見先題襟
主人豈止能愛菊
尤愛看花人不俗
爲花築屋亦殊雅
別自扃門

不煩僕我生嗜古癖未忘舊物先撫澄心堂

主人蓄唐琴二其一

即澄心堂物也

題名元祐三十字洗以菊水逾清光灌花初完

撫琴好猶有春泥在長瓜琴聲惜惜花裊裊花韻都浮
七絃表客彈一回主一回千朵萬朵花徘徊罷琴置酒
客不去花下促坐傾千杯琴停既無聲菊暝亦無影主
人離披客酌酌明月入來窺藻井

輓王大令復二首

昨得安陽札

安陽趙大令希瓚札來始得凶耗

連篇悼偃師更憐交友

少已愧哭君遲涕上猶相訊

孫大昨來札尚詢君近狀

函闕定未期

錢州

作地茫茫揮老淚西向酌親知

謂畢尚書師及君

中州民力竭防賊又防河屢處凋殘地偏能惠愛多敢

期膺上計終自拙催科一卷新詩在明明勞者歌

李大令符清濮陽跨驢卷子

琴堂三月別獨跨一驢來面目都非是衙胥各浪猜詎
知行役苦安怪壯顏摧他日傳循吏推君利濟才

乞友人作歲朝圖貽詒晉齋主人并綴四截句

窈窕房櫺水一彎早春偶得著書閒休嫌屋後峯巒峻
此是淮南大小山

沿街都爲歲除忙清絕城西半里坊却憶諸王勤問字
未妨門有束脩羊

詒晉齋中一事無幾聲爆竹歲將除兒童簫鼓轟前後
不碍閑堂讀道書

日晚天街跨馬回小疲聊復舉深杯
房廊迤左休教掩
要盼西山臘雪來

小除日章大令學濂遣人餉酒時適寫歲朝圖却寄并

附以詩

故人念我寒餉我酒一尊闔門不致應恐是催租人催

租人不來送酒人踵至時郭大令亦遣人餉酒及食物開顏對使人汝

亦大解事主人官赤縣騎馬日出城百事逼歲除猶能

念友生銜杯對盆梅前數日承餉盆梅四種此意何可報聊寫春

風圖博君元日笑

卷施閣詩卷十九

陽湖洪亮吉著

全家南下集

戊午

偶成

黃埃飛百尺難辨馬頭人只有雲生處都無一點塵
三冬及半春雪白不蓋地遂令牆頭蒿枯黃刺天際
欲留不留歌贈張太守鳳枝

欲留不留厥橋西頭欲坐不坐橫街斜左攔門一人龍
鍾可憐千里萬里將戍極邊念爲置酒勸之加餐酒沾
衣裳淚落食柶高高三天下者九地一身居中生死不
易白骨不朽行當長征冤心不剖誰能暫生風吹車帷

高至屋脊三更出門聊與訣別

人日讌客薄醉聞韓孝廉崧及令弟觀察對招諸同人
作消寒四集因闌入痛飲醉後孝廉兄弟屬題聽雨
圖率筆作長句應命

一杯人日酒醉我至元夕君家兄弟皆可人肯放非時
欸門客欸門客豈真酒狂或者以醉韜其光孝廉說我
詩名好比部訂交愁不早滿堂華燈滿堂客半不相知
半相識長安人海宦十年屈指鴈政皆居先閑坊冷巷
行還坐酒媪酒翁都識我卽如今宵痛飲亦偶然坐客
握手一一稱前緣忽然牛腰巨卷擲我前屬我醉後放
筆題長篇繪圖伊誰馬秋葯趙詩舍人懷玉頗詳盛詩畧侍御

惇崇兄弟畫中兩人顏戍削分案讀書分盞酌聽雨木牀三
隻脚君不見長安八月無雨聲屋脊祇有蓬蒿橫愁君
欲聽不得聽此景令我思江城吾家令弟昔抱闕昨者
共我趨朝還蓴羹鱸膾興莫過先我一載還鄉山觀君
斯圖意相觸我家亦有雲溪之老屋雨聲琳琳如曼玉
不爾共泛吳船之百斛聽雨層湖亦酣足梁溪之酒傾
百鍾此樂豈與長安同君今四十當建功伯也亦是人
中龍縱饒有宅江水東何暇聽雨眠孤篷昏燈一盞簷
漏重千里百里雲頭濃蕭蕭瑟瑟聲灑空韻事合讓歸
田翁卷圖一笑生長風

將乞假南歸仍于行寓種芍蒔藕以貽來者戲題壁一

首

雙橋口栽新柳乞歸未遽歸更種橫塘藕寥寥春風不
過短墻團團明月剛滿曲廊桃花蹊李花隄海棠一株
香絕奇黃薔薇紅郁李紫藤花牽北窻裏君不見月月
花開主人喜種花人隔三千里

澄懷園夜起作

前宵風昨宵雨一花初開鵲傳語樓高榻冷夜不眠紅
燭艷艷光簾前長安道上車輪駛只有半宵聲暫止三
更向盡橫門開枕上馬蹄聲已來

卽事

一屋都無壁禽聲四面穿斷崖冰柱瘦高樹日光圓便

作攤書舫愁無載酒船
幽眠正酣處促起聽傳宣
十九日綺春園觀燈卽席應教

一燈迎人過橋去忽有千燈萬燈聚水中燈影乃益奇
百影已化千虹蜺爆聲飛林鵲墮巢火艷燭水魚驚逃
樹頭彎環燈若橋赤焰儼欲烘三霄玻璃屏風八窻列
一房燈光疑入月持燈作街上石梁歷徧十二空中廊
稍餘一角天光白太乙星芒大逾尺斜飛燈影復百枝
碧月欲升升不得三更熾火列帳旁酒人鬥酒嫌酒涼
開窻意欲待殘月不覺幕底飛新霜廣場棱棱千步拓
大聲如雷轟爆竹前行低頭穿壑谷百仞冰山穴其腹
裁冰爲鏡雪作燈高下社火飛千層禽蟲飛揚獸馳突

一半銀花穴中出此生此樂安得忘
好客況似陳思王
黃金堆盤一宵擲昇平樂事寧
易得鄙人歸田有時日
欲與田間老農說乘船甫了復據鞍
歸路黑霰仍漫漫
昏燈入門僕驚瞬蠟淚積冠高一寸

花朝日作

橫塘燕鶯相見今日百花朝
花香無一片塵暗地愁漫
天鶯聲不來殊可憐風連旬霧連曉
半春豈止無花鳥
踏青又恐無青草

春日遊昆明湖

車輪遲馬蹄遽十騎斜穿碧雲去
山雲穿罷入水雲鶉
鳩天半飛成羣闌干窈窕回廊復
山作屏風亦千曲朝

陽一縷透遠紅却被松杉罩深綠牽牛亭北環橋東八
窻齊開迎八風回途咫尺春波漲燕剪都從馬頭颺
清明日侵曉自南城抵澄懷園道中作

幽人春夢方迷曉催客鴉聲出林早持燈夜待門闕開
一片曉霞城上來橫門西來卅餘里泥滑馬蹄聲不起
揩眼春光忽逼人五雲樓閣桃花裏

澄懷園早起

主人枕上眠方起百種禽聲入窻裏西飛殘月東飛星
花香此時偏杳冥平明畧徇誰同過一隻鷺絲人一箇
千門萬戶交春風日影已射金鋪東

三月初四日驚聞舍弟南中之訃因準古人期功之喪

去官例乞假南回書此志痛卽留別京邸同人

往昔暮功例去官聞喪何忍更盤桓斯人詎料中年賈
異事偏留老眼看肯學右軍先誓墓欲同元伯一憑棺
鴿原已抱無窮戚况聽荒鷄感萬端

廿年彈指別親闈此日初衣願已違敢詡入山成遠志
轉傷無母寄當歸餐螻縱後張長史化鶴將隨了令威
聞說草堂親購就祇應分半貯斜暉

西厓詩爲法式善祭酒賦

昨者法祭酒索我西厓詩西厓以人重不在水一陂寂
寥今昔人斷續往來水流波照居人前後差濟美相公
居前朝文作一代雄祭酒生

盛世詩有三唐風遂令東逝波疊鑑苦吟影厓前通長
河厓後冠西嶺昨聞西厓上別立雙梧門非云堦級高
藉表壇坫尊六月紅荷花清光徹天地高低千坡陀口
有百遊騎君餐層湖藕我飯北江稻西厓去人遠疑在
五雲表流波日以深積土日以高他時西厓名與嶽爭
峒堯

周孝廉邵蓮屬題羅山人聘所仿董北苑瀟湘卷子

屢題瀟湘圖一詰瀟湘境瀟湘人不見獨雁時相警揭

來得遇湘浦人紙上瑟瑟秋將分山樓幽風亭楚頌余

秋帆宮保節署八年其題北苑瀟湘圖時在秦中回望

及題王蓬心太守仿本則在湖北今宮保已下世
瀟湘轉增慟萬事尋思縱如夢

瀕行詣韓城座師話別兼憶舊遊卽席賦呈一首

汪于劉李

汪明經矧于文學
汝讀李刺史瑞岡向並在幕府

劉編修

並蹉跎歲月

真隨東逝波如許少年成老輩記曾賓坐縱狂歌憂時

早見扶鳩杖

賜第都堪設雀羅

與諸城相公隔巷清節亦同

差喜鄉闕馳露布元

戎新已剪么磨

時姚之輔齊王氏皆在陝西授首

湛懷園留別諸藩邸

草元亭外水粼粼日晚軒車載酒頻自覺漫郎饒意味

不妨要路絕依因半春我約隨歸雁一疏人傳批逆鱗

詎敢便尋忘世侶報

恩終擬剩閒身

臨行張刺史鳳枝走送書此志別

蠻鄉血戰經三昔慷慨故人多廟食

謂軍門彭延棟花連布諸人

南

籠老守僅脫身亦作西垂戍邊客臨行握別淚不流荷

校送我城南頭東飛黃塵西掣電不死他時會相見

東方朔故里題壁

敢言竟比汲直巧宦何如馬安漢家自有法度先生游

戲無端

抵兗州日適孫大星衍自濟寧回署即日邀遊南樓席

上賦贈

東武城南古兗州暫停歸騎一登樓奔鯨駭浪方迷目

時河決野雀閒雲偶掉頭林壑總留他日約

時約遊濟寧諸名勝

口未合以行促未果神仙應妒此宵遊試看百里賢人集

時王石華張止原畢

恬溪楊雲三王景桓
劉霞裳皆不期而集會見祥光燭斗牛

臨別戲贈孫大并索和章
時河臣以孫未詣河務奏離本任候補

少日齊名孫與洪即今相對儼衰翁
疏渠君苦桃花汛

蕩漿吾欣柳絮風津吏幾時沉白馬
時决口尚未合詞臣有客

避青驄
自余征邪教疏出每有京邸讎集居諫垣者必引避十年其挂神仙籍劫

外居然勝劫中

錢少詹大听林屋夜遊圖

我携鐵杖遊林屋此事如今及卅春
蝙蝠窟中時見日

蛟龍堆裏不逢人竹籠貯火驚穿穴
石墨留名記隔塵

便欲辦鞵三百兩徑從山脅上昆侖

萬頃湖環三大州飄然一葉忽西浮
要尋委宛奇書讀

直向嶙峋古洞遊，百里未妨通地肺。一拳先欲壓人頭，先生何事臨厓返。却惹靈威笑不休，時同人皆至，隔凡惟先生以足力不

及中

靈巖謁畢尚書師墓，墓即水木明瑟閣

奇勲久勒凌煙閣，遺愛猶留墮淚碑。公與古人爭不朽，

我思前事感無涯。篋中章奏千篇富，屋後峯巒百尺垂。

便擬一年來一度，野花村酒奠江潛。

虎丘謁白公祠，即呈同年任太守兆炯。祠即太守所建

大歷才人剩此翁，百篇稍已變唐風。因思白傅談詩好，

雅與生公說法同。言外自然參妙悟，箇中兼可喻童蒙。

西昆詞格西江派，只惜彫鐫語太工。

同攀仙桂無多日得蔭甘棠已十年差喜故人皆守郡
時魏君成憲亦擢守揚州可容傲吏早歸田租船卽繫祠邊樹築屋
都模池上篇何止政清詞筆麗望君心跡繼前賢

上海權署與李兵備廷敬夜話卽席賦贈

八載重來訪素知訝公頭白我添絲樽前萬里投荒客

時牛太守稔文在坐卽當赴雲南激江任篋底千篇萬興詩激電入樓飛

瞬怪風吹海立多時更闌急遞書何數只覺樓船出浦

遲時崇明狼山二鎮會勤洋匪久未出海

偕牛太守稔文范孝廉至砲臺望海

涉江太守老能奇邀我同來陟翠微人與魚龍爭奮迅

帆從鷗鷺各紛飛天光澄碧遮斜宇海色青紅上袂衣

便欲乘風向東去空濛一點著魚磯

將發上海寄王博士芭孫

我乘松江潮欲泊松江郭殍人連日酒酒醒潮已落仙
人海上忽見招要看六月飛寒濤搜巖剔壑匪無事窟

穴恐有潛蛟逃時正獲捕洋匪閒中賔從閒臺榭難得羣公政

多暇李兵備連日邀客遊吳淞砲臺及葉氏園溪南笑指白雲生別有故人

廬此下

砲臺觀海歌

平生頗耽奇欲出天地間飛行忽履北閣巔下已無地
高惟天目光遙遙百餘里直送青天入波底天波合處
界畫明一縷黃霧分空青漫天重疊魚龍色夕照沉沉

不能赤驚雷出海聲已收似怯惡浪先回頭忽然激電
來如箭一點微茫著洋面海中黑子人盡驚十萬煙火
崇明城更從此外尋源委上已無天下無水冥然孤坐
閣上頭靜攝耳目從天遊鷺絲窺客久不去或者疑我
同眠鷗客行將歸客不樂自覺身心杳無托回瀾萬里
生遠風一笠飛從海中落

李兵備邀集葉氏園小集待客久不至贈楚僧鐵舟

一千章木生回風邀我早集斯亭中客來不來勞久待
閣外飛樓有僧在我不待客先揖僧僧握客臂從東升
僧言與客成三友身外一琴年代久橫琴在膝欲摘絃
忽有鼓吹來門前

吳淞江道中雜詩

前山已挂龍尺尺雨當到危橋面西北曲處可停棹長
年知燥濕語每得其要驚雷衝小暑所慮伏秋潦樵人
驅牛羊亦下山北道

所居雲水鄉鷗鷺共生長全家生計足一屋一魚網門
前雖有路屋後別通舫還因粗識字不斷客來往日昨
雨沒竿池寬鴨堪養

海居饜海鮮日日市江鱖江魚餐亦厭復把野蔬擷商
量釀村酒知近插秧月日午餉北田雷喧雨飄忽村女
花滿頭因之感時節

一村據高阜去海不千步兒童忽驚傳龍蟠廟中樹遂

令羊與犬奔走出門戶莓苔蒙塑像久已斷香炷日晚
吹北風前溪雨如注

曲處排石林欲把海潮捍地形西漸下人盡住東岸西
溪形製好曲折故山館漁人網魚至各各出門喚再轉
忽已迷坡陀樹遮斷

生死不相遠十屋間一墳街衢與丘隴畛域無由分連
盧爨煙稀燐火飛出門客行阻風潮繫艇枯樹根牛亭
月白時鬼語時時聞

感舊

往事只如昨回頭已卅年瑣窗曾瞰客白髮遽垂肩薛
月冷無恙花溪清可憐傷心石橋立南北數人煙

九峯園感舊

一雨園林足泉聲百道來夕陽明蟬螿高閣暗莓苔燕
繞橫塘楫魚窺曲水杯古藤應識我親見五回開

慧山酌第二泉

自來茲泉側水厄乃不避竹爐煎松明靜聽蟹眼沸一
椀至百椀走卒苦急遞清涼生齒頰兼復沁心肺童奴
皆竊笑已破往時例先生語童奴汝太不解意我重在
山泉兼之故鄉味神清不思睡偃仰借初地

村居卽事

對面魚梭擲回頭鵲羽驚貪看過橋影錯應隔墻聲徑
小穿林入村斜割澗成乍涼思午睡隨意拂桃笙

跋陳方伯奉茲敦拙堂詩後

杜陵叟作前輩栗里翁真替人我從東浦酌蠡不向西

江問津

門前彭蠡九派屋後匡廬數峯先生擲筆而起章水貢
水朝宗

累我長吟短諷知君後樂先憂所爲五字七字不減嘉
州道州

力厚欲蟠崧華氣奇直薄星辰眼空前古後古膽破千
人萬人

後湖觀打魚歌

橫街一雨水急流擔夫爭道趨湖頭漁人挾其來尤早

背上一舟蓮葉小舟輕入水若踏空一一漾出波心中
大魚蹴浪高于屋尾急觸舟舟欲覆一舟一漿去不停
倏爾舟散如浮萍魚多網重收難住笑有一魚飛上樹
風聲離離水聲怒半空鳥與魚爭路跳波不已復擲波
來往倏忽疑穿梭忽然脫網逃偏急水面居然學人立
須臾風急帆亦收千頭百頭齊入舟鳴榔港口聲何數
泊岸舟多水先濁舟人停舟魚赴壑我縱非魚識魚樂
晚靜閣聽山僧鏡澄彈琴

冥冥復濛濛簾外雨絲小移來烏木几屈作琴牀好先
有剪刀聲枯僧削長爪

一松覆一庭空外怒濤集寥寥琴韵起松響時參入風

名媛詩歸卷之九
十一
遞三兩聲禽驚出巢立

快園雅集

雨餘蠟屐集南城竹樹蕭疎古意生一徑野雲疑雀影
半廊人語雜蟲聲聞中花氣穿簾入坐上詩篇刻燭成
莫怪比來歡讌數承明容易得歸耕

水閣

秦淮一雨水初通昨日江潮到閣東妾自拜星魚拜浪
夜涼同宿電光中

白秋海棠

墻角離離殿衆芳空濛影不上斜陽孤花忘到色香味
一洗俗名稱斷腸

題金文學捧闔客窗續筆後

蹤迹山巔及水涯齊梁久客不思家移居誰似先生便
頰上時懸鬼一車

正是華年賦壯遊靈奇都藉筆端收小閒欲乞談天口
海外重繙大九州

瓠巴鼓瑟伯牙琴弦外泠泠得賞音不譜詠奇譜淳行
就中尤識揀時心

屋後回環西小湖談空時覓北街屠

謂屠刺史紳時亦著瑣帖雜記等書

比鄰各逞如椽筆爭作人間鬼董狐

涕上相逢眼乍青白門仍約共揚舫空江夜靜煩揮塵
要使魚龍出水聽

老方集卷十九
桃花洲歌贈王文學豫

北江入海我所家從岸北望迷津涯
焦山金山兩回抱中有百里洲
欹斜南阡北阡路不賒天遠水遠雲難遮
平明日射三山脚突出一洲如木杓
樓臺空濛樹依約樓中居人益纖削
恍似連林鳥巢着春江綠淨磨青銅
黃雀九子排屏風桃花開時天地紅
桃花魚漾波玲瓏下觀十里黃花叢
其外綠柳煙濛濛花朵盡處雲光濃
京江西北瓜步東奇氣不盡歸魚龍
乃有逸士生其中春來放棹春江側
載酒兩頭隨所適看海看山兼看客
船屋奚童飭吹笛船後箏琶亦時摘
江神江神本相識爲我春江展如席

小西湖雅集

舫屋三兩間門外立一塔天風塔上來泠泠語相答
頭青綠堆浮屠腳下十頃環靈湖靈湖盡處大魚集一

一網出供山厨眼前百輩奇人集海外羈孤亦闌入歸

塗星黑雨欲來空裏塔光飛九級

時座中有安南國遣戍人

八月初七日秦司業承業招同座師劉少宰暨戴學使

均元張侍講燾茅學士元銘李兵備廷敬許太守北

樵集隱仙菴看桂并聽王樸山道士彈琴丙夜乃返

平明欲出門一巷忽飛雨前行及山店雲白穿縷縷衫

裳半日嵐氣濃不覺已入雲當中雲中道士爭相揖天

半一亭如斗笠秋林蕭蕭冠蓋集林外馬蹄盤百級樓

臺旣參差老桂復兩三前身金粟本不凡逸榦四出陵
松杉花梢稜稜度遠帆花底客並能清談側聞千年枝
化作兩童子倏忽十數年此生彼卽死爲花爲人偶然
耳游戲人間乃如此天風吹客不得休忽然招我百尺
之飛樓樓房盡處繙書坐宿露時從竹梢墮瓊臺貝闕
驚早寒琴韻雜雨來無端一聲遲回一聲疾百鳥飛集
紅闌干紅闌干外零星地認是臨春兼結綺五條弦上
六朝山一夕分明感秋氣天低月黑江怒潮過嶺艸木
聲蕭蕭琴彈一曲續一曲坐使江月復白江天高樸山
道士翻新譜能令人歡令人苦我願頑仙住世間眼空
不復知今古琴聲欲畢滿進觴琴韻復入杯中涼鳴蛩

百種隄然絕飛雨瑟瑟鳴空廊三更歸路誰能見下嶺
水波明一綫衝泥正欲尋冶城如雨秋螢撲人面

蔡明經元春天花亂落長卷

我從皇初平曾詣蔡經宅麻姑長爪亦出迎啖以松花
及桃實翩然一別三十年此老白髮都垂肩半時挈我

堂北語苦詢雲中舊時侶雲中舊侶散八州

時問楊蓉裳孫淵如

近宦海出沒歸無舟
匡仙人格較優許脫手板東南
遊坐君天花齋臥看天花落
漏躑對影兩不俗門內一

翁門外雀

螻磯夫人像爲方廉使昂賦

廟門斜對石磯開一日靈潮兩度來好屬錦鱗三十六

劉郎浦口寄書回

識力居然軼輩羣卷中依約說三分二喬莫更誇夫壻
天下英雄只使君

一舸翩翩下武昌歸寧以後史難詳惠陵松栢如南指
尚認江東作壻鄉

越羅猶認嫁時衣花艸吳宮事已非只有杜鵑啼血夜
江聲如哭撼危磯

吳頭楚尾路迢迢家國多年恨未銷咫尺望夫山上石
一般心事付江湖

一賦驚鴻謗議騰寓言詞客本難憑洛川終古留遺恨
不及江波徹底澄

蔣上舍徵蔚雨窗讀史圖

三百六十日日日可讀書晴日客苦多不若雨斷途堂
東堂西檐漏徹堂裏讀書盈一尺朝研羣經算諸子其
外六時皆讀史先生用目不用耳一目驚看十行駛客
來百喚百不應靜裏目光時透紙驚雷掃戶雨瀉盆何
法可使先生聞先生此時只閉門但怪昏黑無朝暎我
今用耳不用目目力雖衰尚耽讀買山何不與君鄰君
日讀書吾耳熟

友人屬題春山覓句圖

借得仙人屨鞭轡不知曾徧九州無我慙結習除難盡
一岳遊成繪一圖

名苑詩卷十九
三
疊嶂連峯春到遲
江南山淺好尋詩
野猿相見不相識
跳上月明松樹枝

初九日侵曉至攝山待劉少宰座師李兵備同年共遊
叢高峯及紫峯谷白鹿泉諸勝竟日乃返

別山二十年夢寐松色古松濤已出關迎人至江滸江
雲欲上山雲下紅紫壁間相激射泠泠清楚雲中出五
色樓臺不知夜藍輿過嶺夢始醒海日甫上天鷄鳴山
僧揖我樓前坐無數馬嘶知客過齋堂小憇路轉東崔
蓋共歷高高峯背峯乃識峯奇狀百轉千回不容上齋
心旣久身世空峯頂飯罷聞疎鐘綠雲庵紫峯谷一石
一雲看不足桃花澗白鹿泉一僧一客來偶然

謂許地
君兆桂

及僧
默庵
秋風吹山秋氣深座上別念時時侵東南良會有
如此屈指何日重幽尋醉中飛觴益何急怪石扶人向
空立出山南北不復知松下頽然一長揖

八月十五日晚聯舫邀方上舍正澍儲廣文潤書汪文
學文錦暨諸名士至青溪泛月遂暢飲達旦醉中作
隔岸先有月隔舫先招呼樓頭一燈淡欲無月裏啼殺
城頭烏欲浮秦淮潮雙鯉告潮歇城烏約客東北行去
弄青溪古時月一船送酒一舫迎約客未至杯先傾前
舟阻淺勅勿停抗手菱葦叢中行橋高百尺樓千丈紅
袖居然出天上三更已盡復四更天上人聲雜鷄唱水
色飛上檻月采飛上梁平堤南北亘無極水月盡處交

天光荒荒城南隅
柝聲知欲盡
月照小姑祠
團團尙如鏡
我今欲問城上烏
青溪小姑汝識乎
六朝人物本如海
可有一客狂如吾
涼風吹水水拂衣
雙漿始復分頭
飛陸行爭輿水爭渡
送客未完天已曙

廿九日邀同人至陳渡艸堂小集

陸行四里餘水行乃三倍
登樓望江城正與郭門背
西蠡河外通西瀆引水入橋
高數尺秋林八月山果紅
山鳥啄墮溪流中風吹欲出
橋門鎖鳥口啄殘魚腹果園
扉陰陰當晝開主人不約客
亦來君不見滿堂花香客
酌酌網得一魚長似艇

冒雨至錫山作

冥濛竹樹交成片炊煙和雲不能辨溪光淨處豁一橋
泉水下注聲如簫山腰一抹人家少山不能深徑偏杳
擡頭正喜山果肥已有黃葉林間飛

阮大令升基約遊陽羨山水先寄一首

五岳尋都徧鄉山獨未遊偶逢賢令尹約共小句留天
外峯初現雲邊翠欲收年豐萬民樂冠蓋亦探幽

龍池寺

蒼蒼山已深古木復回互冥濛松樹杪一綫日華吐嶙
峒盤百級石碎馬蹄怒危瞻斜壁外飛瀑影微露蓬蒿
深十尺已斷采樵路雲光偶然開石屋突無數厨煙生
勝下岸仄窘回步枯僧迎客遠約共石梁渡東西排梵

篋丹白別經注盥手禮法壇山精瞰庭戶

善權洞

靈奇信無端顯晦各一窟高征摩蝠竅俯視入蟲穴攀
枝禽共迅履險螻同屈峯峯環如螺厯厯墮若蟄樽疊
亦奇古甕蓋別凹凸危橋中偶斷巨釜下先缺導騎忽
失聲行童屢迷轍微明空際下怪響壁中出石牀延客
坐了了察顛末半晌出石樓松梢已新月

善權寺訪祝英臺讀書處及三生堂故址

百折溪流斷藍輿束急裝碧山迎客遠紅樹導人忙道
旻侵官柳臺荒倚女桑三生益何渺茶話此閒堂

偶成

一度相思一舉杯
昨宵書到手難開
鬱鬱竹徑濛濛月
記得人來夢亦來

偶向山中度歲華
浹旬春事已如麻
世情怪底闌珊甚
又報東風嫁杏花

初八日斷橋晚步

閒從獨雀行
偶與孤僧遇
落葉忽驚飛
衝人入林去
南高峯上月徐度
北高峯坐使全湖綠
都飛匣鏡中
偶成

纔飲湖頭酒
百杯笳聲已向堞樓催
船船都載夕陽去
卻讓後湖新月來

與陸七稽三游湖卽送入城

諸公虎嘯我龍蹲
踏遍松杉竹栢根
但祈兩日作一日
不放夕陽紅對門

城門不夜已吹笳
陸七稽三盞到家
誰共湖頭飲春酒
德生菴裏華秋槎

湖上作

朝看湖上山一一雲中出
暮看湖上山一一煙中沒
雲煙出沒不可常
雨後滿郭生青光
離離雲動山疑活
城縱界山山勢越山腰
樓閣一萬家
天半炊火紅如霞
山中望湖頭一水明
子鏡紅樹千條罩
鏡中寥寥更落招提磬
窮冬十日湖上居
日飲湖水烹湖魚
人說客貌清而腴
客行時醉還時醒
卻愛看山復酩酊
城扉闔處興

轉孤飛出一城燈火影

莫歸

湖頭淺醉歸來日竹裏軒窗自在眠不怕幽人夢難醒
夕陽紅到枕函邊

余 內直日與胡總憲高望直廬咫尺總憲沒及半年
適余假歸以事至武陵與總憲遺櫬同日抵湖上厝
屋又甚逼近不勝存沒今昔之感爰賦一詩哭之卽
寄謝方伯啟昆馮鴻臚應榴二君皆總憲同年生也
彈指人生歲月遷感公歸骨我歸田并無華屋樓恒榦
自有清名過昔賢魂魄詎應淪九地班聯曾共直

三天何因舟旒飄搖日又結居鄰水榭邊

時以無居第
灌厝湖上

龍井小憇

山已深百折水亦曲百回怪哉茲山巔石石如飛來石
腹中偶虛歛斜寺門開憇我雲中亭悍石立萬堆側坐
不敢安石恐頭上顛所幸機事忘魚鳥不我猜深山十
月中香已逗古梅冥坐厯片時泉聲殷如雷

靈隱山房浴

雲林信幽奇古木互盤曲到門途逼仄忽復展地軸嶙
峴非意想一石戴一屋山僧穿飛廊迅疾乃逾鹿山房
留客夢山寺招客浴詎止清我心兼堪濯雙足窮冬天
地閉水尙作春綠浴罷望始驚危樓挂深谷

蘇文忠公祠二首卽呈秦同年瀛

祠卽秦所創

長篇千首恨雷同

近時學公詩者極多不無流弊

不敢師公祇慕公畧

有瓣香歸栗里久因竒節說文忠祠前蘋藻三時潔屋

外梅花一頃紅擬作蜀遊仍未果好移清夢入湖中

只我重遊日湖淤已歷時倘尋良吏傳并建白公祠花

發來時路官饒去後思他年商俎豆到汝汝應知

秦在浙中

極有政聲

秦同年瀛觀察浙江重新淮海先生祠落成索賦

君子淮海稱初祖我距忠宣亦未孫各有祠堂留浙嶺

互將詩筆溯淵源廿年何愧蘇持節百首先嗤陳閉門

今日莫公吾自忝掃廳擬更潔清尊

春溪垂釣圖爲秦同年賦

名
好向波心築釣磯
溪風吹鬢水滌衣
不妨分作江湖夢
魚已忘機客息機

文書堆案鬢添絲
忙裏能閒樂不支
三兩桃花一雙燕
伴渠垂釣覺多時

春濃魚不厭波寒
清切真如鏡裏看
知否太湖三萬頃
得歸隨爾把魚竿

五柳居食魚

夢憶湖頭雙鯉魚
十年重向此幽居
溪童拍手還相識
卻繞紅闌引客裾

文窗窈窕夕陽鮮
一樣湖光落榻前
添得柳絲長百尺
隨風與客拂吟肩

十一日待蔣大齊耀昆仲不至因買舟往御教場聖果寺

船船都不是偏復到門前別鼓尋幽艇仍攜買酒錢半湖搖落日一棹破輕煙到晚休相訪山公醉欲眠

是日晚蔣裕之攜歌者相訪遂至湖心亭及蘇公祠痛飲醉中作

偶攜春酒至湖頭難得春人鏡裏遊半舫賓朋誰是主一隄風月尚疑秋禽魚雅識閑中趣絲竹都飄水上樓爛醉莫辭歸去晚斷橋掃榻待淹留

月夜自湧金門泛湖至漱石居

城頭吹角促客行客醉尚戀茶香清關門持鑰不敢下

一燈遙遙出門罈舟斜欲趁北岸風月影已落南高峯
高低出沒十餘里水面飄忽南屏鐘湖心跳浪聲何急
魚厭波寒出波立三更歸路月已昏剩得一星明斗笠
壑菴訪破迷和尚不值題壁

壑菴一石塞一壑桂子石邊無數落

菴有香桂數
種絕奇

我餐

松子石上眠初日正墮山窗前山窗四面黏吟句挂壁
木魚搖不住松花飯熟僧不歸聞說南屏訪師去

十三夜自花神廟夜歸

南屏鐘未歇且復小遲留月黑花王殿春生酒幄樓朗
吟驚病鳥緩步逐眠鷗忽有千燈出冥濛水盡頭

鳳皇山頂望江海及裏外湖作

瀾水緣江波黃海氣五色浮空蒼山形抱湖江抱山大
海東北仍回環峯形南走連閩廣百轉千回勢蒼澗回
頭一望歎絕奇十萬煙火山城低南峯雄奇北峯峭中
有孤峯復回抱茅菴煮茗厯少時海口潮上聲如馳閒
穿石罅玲瓏走一半磨厓大如斗前吳越後建炎王氣
落落東南延祇憐老樹心空早欲問前朝竟誰曉朔風
吹客下頂峯峯面尚挂斜陽紅君不見南遷怪底營作
宮上有十二巫山峯

山頂有巨石十二大皆數十
圍吳越時呼爲排衙石卽此

長至日攜酒至葛嶺訪初陽臺半閑堂故址

昨訪閱古泉今來半閑堂小朝廷事碎如火蘚石剝落
誰能詳初陽臺上初陽出可惜蓬蒿沒山骨仙翁祠屋

亦已歛黠鼠都從石龕穴神仙畢竟不可爲化霍或恐
仍歸來試問葛稚川何似丁令威荒荒昔人臺落落今
日酒城中招客不得開地下寥寥呼死友

由華津洞登蓮花峯

直石立作龕橫石臥作廡尤奇穿石樹宛與石形肖巉
巖理斜出阻客入深奧彈碁形畧具伊昔誰所造擾擾
此暫停茫茫發孤嘯陰崖落蟲篆絕壁出烏道擡頭礙
峯頂側足限石竅寧知雲路滑欲下心尚掉齋心無妄
念平地冀可到洗眼看北山參差入斜照

山鳳皇山半至勝果寺復從寺後尋石門及仙姑洞郭

公泉升天梯諸勝

幽人欲移筇石石先下嶺前行三兩客一一如墮窅峯
奇非意想欲去屢延頸玲瓏穿石罅時漏夕陽影飛樓
當山腰屋古極修整升臺雖百級坐處尚如井搜奇興
尤劇屋後豁異境雙扉斗然落一水過清冷迤西峯雜
逕欲往迫短景空處忽有梯延緣望山頂

月夜從六橋歸

欲訪漁師舊釣磯鐘聲沉水月光微六橋行遍無人跡
楊柳居然挽客衣

雲棲寺望五雲山并訪蓮池大師塔院

到來一谷雲空白濕朝露披雲尋絕磴生翠落無數濛
濛萬竿竹中有接天路谷禽飛不透怒欲攫雲住巔岫

正迷目塔院忽回步緇流吾豈識重此本儒素遺規尚
堪仰百代守其故引泉來山門飛雨屋上注齋厨隨粥
飯不更闢堂戶衆生皆簡默勞客久延佇清磬出石房
悠然發靈悟

向晚由徐家村至理安寺

理安萬株松雲棲萬竿竹理安較雲棲山徑益深複高
低萬綠冥濛聚攔住夕陽飛不去歸鴉招客入一林山
鳥喚人復相拒千回百折上石臺嵐翠颯屋扉難開山
僧總覺睂宇綠古佛亦臥青莓苔隄然一片山風惡綴
壁萬松搖欲落厓危石峭路亦窮松頂偶着支一閣林
梢一抹野火然手拾松子煎山泉紅杏花開臘梅破繞

屋異香延客坐

下石屋嶺徧遊石屋水樂諸洞

風聲遞水聲松影接天影千盤青雲梯百折白石嶺孤
禽前若導嘶馬後如警危驚天半石截若水中艇東西
列尊髻高下別畦町莊嚴三百輩襴袂悉修整恍疑泛
滄溟一一咸引領潏然水聲出古樂誰更省齋心讀銅
篆洗眼摩石鼎欲發僧苦留遲歸僕頻請

表忠觀拜錢武肅王像

不爲東帝只稱臣江左眞王僅此人故里錦衣殊赫奕
中原棋局太紛綸州排十四疑無敵弩射三千若有神
依舊吳宮好花月遺民從未識煙塵

躍馬提戈海上回，儒風早喜被江恢。
年名不改唐天祐，國士能容羅秀才。
使宅例皆除艸創，陌頭歌已報花開。
門材百世猶全盛，時有文孫握節來。

靈巖山重展畢尚書墓感賦

江左方傳箭，天南佇洗兵。
時聞川更馳新露布，無復舊

書生丘壑心。
徒戀公屢欲遂初不果巖巒氣未平，松杉識人意。

都作怒濤聲。

石湖戈氏園訪戈上舍襄復不值

一程趨水國，百折走巖扃。
欲雪地先白，過雲峯轉青。
怪禽摩絕壁，老雀啄空汀。
訪客仍難遇，空題石上銘。

禽摩絕壁老雀啄空汀訪客仍難遇空題石上銘

小除日城東晚步

百事拋殘歲欲終得閑聊復步城東念沉清磬一聲外
影入歸鴉萬點中疊港乍添新雨綠小樓斜帶夕陽紅
道人正把雙扉闢知要堂西訪寓公

崑山道中阻雨

時吳門友人
已有書相促

野禽飛不透雲氣十分濃夕照昏如此前山路復重遠
煩馳越使昨已發吳淞到恐難拘日遙槭莫早封

臘月二十九日澹香斜月西堂告成招陸秀才繼輅等

及兒子祭詩

年除百事費支持檢點閒情付酒后卻約比鄰三陸到
掃廳同與祭新詩

瓣香同奉此清才百樣春醪百種杯要與先生洗寒瘦

迎神歌裏報花開

卷之四 言老

二十一

受業 譚正 培校字

卷施閣詩卷二十

陽湖洪亮吉著

單車北上集 已未

初九日楓橋訪袁上舍廷禱

挂帆東南行百里祇瞬息非徒訪疎梅兼詣幽人宅
幽人宅傍寒山住臘雪在門曾一顧三條水涸今復通
依約門前繫舟樹洞庭山人約客遊鼓浪擬到湖東頭
吳船屈指須三宿好插疎梅滿船屋

三鼓自木瀆放舟至胥口

濛濛露未收黯黯月方墮三更欲渡湖先此理征梅幽
人眠正熟估客浪先破微茫接天水厯落綴星顥感此

一葉微驚濤屢掀簸披衣看曙色早向柁櫓坐穿黑旅
雁飛聲從半空過

自胥口渡湖

看山三十年甫欲遂初服閒居又經歲人事苦拘束竭
來湖東頭藉洗塵百斛伸眉視初日紅展鏡中綠湖寬
三萬頃差足養心目潛鱗方俯視飛鳥忽高矚物物各
有天忻忻遂其欲空明無障碍高下不局促我亦心志
怡終朝坐船屋何來南下客苦欲附童僕中坐忽告言
西南尚蠻觸

湖心遇風

偶向篷窗臥誰傳風色顛情懷消短夢身命付長年浪

已高千尺衣纔濕半邊奚童休股栗險未及從前講矣

月

將至東山作

沿山半日行欣此巖壑美微覺風北來千帆皆貼水濛濛鷗鷺影一半出蘆葦亦有蚱蜢舟船沿坐烏鬼篷窗展衾枕客倦臥移晷神澹夢亦清經時絕塵累

暫憇東山麓

一塔高千丈魚龍氣尚浮灑空松柏暗陟險鬼神愁古佛依人臥馴禽導客遊面西窗莫啟兀自濺驚流

翠微禪院

東山白雲起欲與西山接寧知飛鳥路亦向浮雲貼蒼

蒼幾重岡一寺出山齋登樓半無見蔽此松栢葉軒窗
何玲瓏橘柚貯重疊回廊斜北啟庶足展睂睫穿牖出
一燈枯僧理經笈

客夏孫總戎廷璧約遊東山以事未果新正八日訪梅
鄧尉因便詣衙齋值他出不遇兩公子留住信宿意
甚勤摯爰留別二首并呈總戎

爲有將軍約來隨估客槎半帆懸雪月百里走風沙公
子欣除舍疎梅正作花夜闌銀燭裏留與鬥新茶
憶昨吳淞浦樓船出海遲枕戈時待旦橫槩偶題詩豈
意萑苻澤頻煩組練師報

恩知有在莫惜鬢如絲

同孫公子錦暨令弟鑲至翠峯枕流閣訪梅

昨留漱石居客冬寓西湖漱石居半月今訪枕流閣川程逾十驛勝

地乃交錯青松千丈接水隈十步五步梅花開僧房盡

處一株好榦古錯落青莓苔山凹石屋何鱗次五騎如

龍後先至門開正值東北風笑語吹入雲當中客倦倚

石牀馬亦繫天井一亭稜稜據山頂主人敲詩僕烹茗

窗隙太湖三萬頃

卽席贈程司理師樂

清絕程司理官貧日課詩心香原有屬手返不曾持肯

作通方吏寧爲多士師時以課徒自給梅花三百首風味耐尋

思

鄭司馬時泰招飲賦贈一首

剖符殊不俗分領此山中屬吏如梅福謂程司理通家得孔

融孫總戎父子快談當世事饒有古人風臨別仍相約同來

訪石公約夏半遊西山

渡湖與鈕布衣樹玉同舟因出其所著說文新附考見

示賦贈一首卽東錢少詹大昕王給事念孫段明府

若膺孫兵備星衍

東山三萬戶僅止一儒者童年耽竹素暇復討蒼疋說

文五百部寢食不暫捨蠅頭排細字時把心得寫茅檐

兩三層住乃近橋社家貧長物少書反盈兩厦扁舟偶

相訪坐久燭屢灺口陳六書失如水向盆瀉維時四座

客耳口若聾啞二徐生唐末不甚曉通假諧聲兼會意
一一多苟且強編新附字合者蓋已寡惟生糾厥失證
以毛鄭馬隋音庶劉曹唐疏陋孔賈陵夷南北宋棄置
若土苴長編侈稱引又出張郭下方今富儒術小學亦
媿雅王錢暨孫段見爾手定把倚梳贈一篇飄風忽飛

五

十三日鄧尉訪梅憶昔遊寄錢太令維喬蔣文學陳尊
昔遊錢蔣殊不閒獨我近自山中還連宵清夢屢飛越
聞說梅放西山灣西山灣中萬樹花古榦鬱勃枝交叉
山中猿雀盡無恙豈識世事紛如麻艸元亭圮季重亡
謂楊比部夢符天末回首思崔郎景侃閒心檢點壁閒
吳上舍祖健

句蝸篆剝蝕無偏旁湖亭三面交遠風香氣擾入湖光
中看花歲月苦難駐花亦憔悴無歡容君不見看花背
花立少時別有會意誰能知忽然大笑出山去峯頂落
落雲分馳

光福鎮哭徐處士堅

魂歸萬樹梅花內家在三更崔嵬中我欲哭君無處所
半山殘月滿湖風

過鄧尉感舊

首春來吳門訪客入雲榭相邀攜蠟屐告我苦無暇寧
知人事改歲月屢代謝別來山中客已葬山花下摩挲
墳上樹一半梅枝亞花光縱奇麗未肯照長夜念寂獨

舉杯初陽出林罅

元墓小憇

穿林十里只一鞭花影灑地松浮天松濤覆屋客眠穩
夢覺香氣來無邊波流到戶聲先約花影入波魚誤噉
松間客倦欲少休且汲寒泉斟木杓

香雪海久坐

下方蠟屐聲何急卻惹山禽出巢立山禽欲下客徑登
相與覓此岡三層風吹花氣入遠空一半上接山雲紅
君不見人間清福消未易幸是玉皇香案吏

北行

三月束裘歸二月束裘發出門才十稔抵家無百日昨

爲弟喪歸今爲

國喪出我勞何敢憚我淚忽鳴咽揮淚北向行程程冒
風雪

已爲還山雲復作出山水看雲心尚戀照水色增愧親
朋苦留餞臨發期敢改前行誰與共一僕瘦如鬼初日
上蒜山回頭望東海

過沂水橋柬族孫梧

二月十二日

沂河之水清且徐先二十日來潑除風光春半尚未足
鶯燕見客猶生疎參差流水兼修竹綠映橋南萬家屋
橫流昨歲喜乍平數郡創痍漸將復

時以曹縣河決
鄰郡皆助工作

路

人爲言太守賢貪吏昨已褫歸田君不見吾宗兩守皆

稱職記否趙人思順德

君兄撰于順德有惠政

別教陽鎮二日敖山尚可見因題壁

茲山雖一拳青出天外連晨走三驛路已及新泰瞻
山仍在目風尚送清籟迤南方數武蒙嶺亘如帶再轉
望始迷翻嫌去程快

羊流店望岱

精誠與山通百里覺迅速夜半岱頂雲飛來冒車屋冥
濛雲皺處顧視炫心目月出斗柄東森然衆山綠青松
一千丈霞采時斷續想有飛仙人排空走如鹿

夜半忽大風雪驚雷徹曉

三更驚雷奔忽復雪沒滕神區信靈異寒暑一夕出狂

卷之二十一
六
颶來若怒激電去如掣稜稜檐瓦落歷歷冰柱折思沾
山後酒屢斷門外轍遙程瞻尤驚一白色突兀
將至泰安于崔莊驛壁敬讀

太上皇遺誥泣賦一首

平明欲出門青氣已四布崔莊行廿里木末天始曙驚
傳

上皇誥涕泣滿行路黃縑曳三丈急遞頒鎮戍山崩川
復潰此事關氣數茲方當孔道八見

翠華駐成功告天地神亦被休祚今來山色改慘戚若
蒙霧時當春仲後急雪匪無故神人哀痛切井邑先縞
素微臣等蟻蝨風昔感

恩顧俄焉驚過密旬日急奔赴山靈鑿微誠恍若導前
步百里行不休橫流馬驚渡

山雲

濛濛四山雲欲出不敢出回瞻岱宗上白練飛一匹一
匹白練當空馳四山出雲圍繞之君不見出山爲霖未
可知何日更是歸山時

泰山道中五首

茲山亘東方鬱勃截生氣虛輪扇風海空腹入天地其
高無端倪一半植空際滃滃雲出始臬若絲髮細俄焉
分道騁寰宇悉衣被洪荒迨今日年代渺誰記登封壇
數尺藉以驗興替允哉神明區心精默相契

山人渡海來告我山勢尊波面日出時與山相吐吞遙
看不知山謂是天有根峯稜破空垂倒挂日月輪青冥
一氣中高下固不分伊誰啟鴻濛當有主者存雙厓劃
然開截作天東門

一山戴一山重戴至谷口遵山視重戴高僅及社首方
知衆高積拔勢乃得陁山坳環數郡元氣蒸澤藪中虛
蘊靈寶萬古誰敢剖天閭雖已逼地軸亦孔厚七十二
代君貞符藏北斗

山形非徒高遠莫測所屆滄溟三萬里石脈透海外當
其勢奔騰顯越齊魯界低瞻饒岳瀆並此析支派巍巍
兼蕩蕩克配天體大其標難正視萬象怵光怪支峯皆

整肅畧不涉奇態風遞滄海濤山前作清籟

三更望茲峯月出石腹內雲容方欲展雷雨已在背
明神所宅乃復邁陰晦冰柱十丈長驚看石厓戴居然
神斧落厓半亦奔潰回颺搜激電雪月光迸碎遂令登
陟客倏忽迷向背清遊雖暫阻未敢遽思退終當攜松
明絕壁掃蕪穢

雪霽

日昨大冰雪地寒天宇陰今晨已晴和冰雪在我心在
地或可消在心終不忘庶幾炎暑時胷次餘清涼

二鼓抵鄭州故城宿南關

居人時向女墻耕一片東風百艸生忽地樓臺空裏現

三更月上鄭州城

重抵蘆溝橋有懷亡弟

橋下層冰積雪寒春明重到感無端
白鬚老吏當車立猶是歛歔說故官

跋金文學學蓮悼亡詩冊後

春花紅美人結屋花當中秋艸碧美人悽然立
花側花艸艸無一年含淚永訣梅枝前梅枝陰陰滿天雪
豈止燕歸雛亦失巢空難居隻燕欲回一日百匝飛鳴徘徊
燕行思雛復思偶況值主人亡未久明朝雪霽花欲
開忍覩新燕巢中來

蘆溝折柳圖送金文學至大梁

東西南北人皆向長安走蘆溝橋上往復來便折橋頭
一枝柳蘆溝橋柳年年禿折盡柔條剩枯木幽燕客罷
客大梁楊柳作絮飛何忙莫作道旁枝莫作道旁客道
旁枝手易折道旁客頭易白

萍梗篇爲友人作

不作天上星乃爲地下萍星宿有定位萍梗流無停一
風吹從西一風吹從東萍面作艸綠萍背疑花紅紅旣
不如花綠亦不若艸我送浮萍歸頗思故鄉好

哭任軍門承恩

槐里朱雲本最狂藉公時復語通方同遊愛詠新題句
分道爲收舊奏章

予去歲大考後卽以弟喪乞假歸都下盛傳予疏競相傳寫間有失真者

公恐又成僞稿之事死友誼真逾骨肉殤兒疾已入膏

百計為購而焚之公六十後甫得子不厝屢何止時來唁一事相思莫

一觴

法源寺看花即送言八朝標至夔州任

卷施一谷中花好無不有主人緣獨慳花發出門走黃

沙撲面三千里待得看花已春尾花前既少雙鶉鳩花

下更有誰提壺櫓聲呶啞花外斷白日馬足塵模糊花

光何似江南好花氣薰人亦難倒君不見看花偏值別

花辰走馬從戎趁好春會看白帝城頭立卻笑黃金臺

下人

春盡日夢入卷施谷看花

窗前十餘株窺牖復窺衙高低拂牀榻紅紫疊壓夢幽
人眠正熟壓夢識春重伊誰伴清宋新燕昨巢棟波光
猛飛越春半已消凍綠階栽綠竹一碧欲無縫奇書堆
面面正此酌春甕一晌魂已飛南鄰笛三弄

題左大令輔葛嶺蒿廬圖

北江至西湖五百里而遠一歲上冢忙春分及秋晚十
年遠宦嗟何及丙舍蒿先沒階級魚殮麥飯遠莫將友
使孤兒抱圖泣孤山葛嶺西南開我昨詣君先冢來摩
挲松栢一回首拜石爲洗青莓苔虔心豈獨私吾友雅
聆南陵政聲从君不見孤兒倘思親欲親傳不朽豐碑
百尺亦何有不若好官碑在口

四月二日法祭酒式善邀同人至極樂寺小憩分韻得
月字

我前遊莫釐正值早春月濤聲猶在耳迫促詣京闕
凡花幾開謝月祇兩圓缺船頭經花朝馬背閱佳節我
病何敢辭我勞誰可述風沙眯人目紅紫色不別雷車
時聒耳塵土鼻仍窒蝸廬甫能定春去已飄忽花開思
走避俗愁砭肌骨偶得學士槭邀我敘契濶賓朋集三
五飯罷強之出前遊雖隔歲門徑亦粗別桃李七八叢
紛披倚禪窟縱談當世事喜罷或鳴噎側聞秦隴蜀兵
苦不得歇

至尊憂黎元御殿每日昃時時思讜論何異飢與渴開

誠布條教欲使黎庶活奈何諸大吏敷告尚不實民猶
困科歛吏不奉法律文書巧相抵百變難致詰居然貪
欺成不復畏斧鑕兩湖全陝地事變可臚列因循及弛
廢百事待剛決倒懸誠已久水火救宐切我官非諫諍
詎敢肆筆舌幸多同志友肝膽素鬱勃能言固堪貴尤
在通治術敷陳政之要置彼事纖屑雖爭焚諫艸道路
有傳說吾儕究多幸貯見盪平日花前時時來一醉百

憂豁

送同年祝兵備曾至陝西軍營卽題其山寺讀書卷子
男兒少日貧如此四面亂山如破紙仍無一屋可蓋頭
暫借僧房作棲止僧房似寶排山麓夜半雲奇欲穿屋

林空無人竄驚鹿山鬼依微伴宵讀扁門不出眼界空
意見不與時雷同丈夫豈肯忘世事四海九域環胷中
一朝山雲破空去人亦公然得奇遇山深幸喜住十年
不爾何來濟時具君不見殷深源房次律畢竟讀書無
本末君今上馬能殺賊下馬檄書成頃刻亦知平生饒

素識

召對尤蒙賜顏色散關峩峩去天尺一賊不除歸不得
露布期君在朝夕濟時已了倘欲還仍作山中讀書客
偶成二十首

我聞荀生言善惡皆有性忍于殺人者乃反惜物命此
非性之真轉展惑報應仍緣薄滋味可自託清淨百偽

寡一真吾心湛明鏡

我昨謁達官先有後堂客思陳天下事四坐皆簡默移

牀前復卻日影去階尺寧惟言不省反欲斥狂惑朔風

吹橫門檐瓦響歷歷中有揮塵人豐貂饒菜色近時士大夫蔬

食者十有六七

廣場三十頃乃在池以南近移居西華門外南池關帝廟自非土偶

居卽作木佛菴土功何煌煌香火積一龕日與神鬼居

禍福念不參陰陽縱回翔柰性所不諳攤書梵篋旁相

與同沉酣

一身雖不貴事有大于此何因賢與哲僅自許生死端

居勤學道人物寧可恃驅馬出北街殷然念朝市八紘

誠已廣所見乃尺咫欲貢出位言愁呼妄男子

千金構亭臺百金施繪采天公矜物力不使成遽毀前
門方逮訊後戶已遷賄複壁不懼人惟應穴金在主人
雖已易朱戶仍不改春半燕子來啁啾舊時壘

男兒不出門出門路四岐對面卽太行途危不透迤裏
糧思長征白日忽已西揮汗走不停百里或庶幾我寧
遭豺狼不逐狐與狸

承平百餘載風俗漸喜誇物力苦不多踵事而增華我
頃讀風詩頗願刪木瓜苞苴之所興禮節日以奢君子
慎厥初百事除萌芽

遊魚性喜沉林鳥性喜浮人生居其中渺不克自由迴

颺吹飛蓬旋轉何日休自非金石性皆逐流波流東海
雖已廣何能積沉憂庶幾三神山可與逸客遊

人生一世間駒隙影易度飲食與衣服詎云皆細故所
惜士大夫視同經世務不然營土木樓閣極回互平生
名好客惟見揖樓護落落張伯松望門先卻步

束髮事結交相知本難得馳驅三十載已寡素心客稍
能知大義半死刀劍側精魂歸大漠時向夢中識昨得
插羽書憂仍在西北沉酣非我志藉以遣晨夕

縛茅作一亭正面微向東四壁盡斥除依傍庶一空侵
晨卽披衣陡覺曙色紅社日旣已過徧野饒春農攜編
省芸鉏勤苦理則同倦憇亭北隅引領眺澤宮他時開

入窗藉以通八風

師臣者三王友臣者五伯逮茲秦漢後視下比厮役長
孺前正論天子輒變色惜哉公孫宏其性本便辟庸儒
司國柄何事足裨益田蚡暨衛霍半又起外戚當日嚴
憚人庶幾惟汲直

寒暑飲食中所獲本微恙忌醫兼諱疾自恃一身壯天
時日乘除精采忽不王陰寒入筋絡危至莫名狀遂令
皮毛疾惡乃攻府臟和緩失色啼庸醫又何況

孔明相巴蜀貴在飭綱紀斷獄斬幼常時時面流涕古
來真將軍親愛法不廢所以百萬師常若身使臂桓桓
司馬法無事出奇計恩多不能勸用法乃始勵莊賈後

卽誅庶乎知此意

依艸而附木自信不如此平生戒受恩盍自賢者始伊
余少迤邐本不盼榮仕遭逢況逾格業已被驅使兼之
凜慈訓詎敢背尺咫吹律暖不回其人已心死

平生何所慕所慕在同調三川恣沿洄五岳寄歌嘯青
雲忽緣履白日斜壓帽側聞唐太尉勳業繼周召功雖
積山阜事往何足道只惜平泉莊生時不重到

疾風走空谷奔此霆與雷鬱鬱松杉姿高幹罔不摧一
朝營華居悼歎無良材良材本無多大匠意不回我欲
從唐虞先借皋與夔開誠而布公一世識所歸君者參
天枝夫豈旦夕栽

操持本不優又欲守成例遂令一世才受制幾胥吏危
疑偶相值苦乏經遠計盈庭皆雷同誰肯獨立異雷同
心始愜獨立遭所忌根矩兀傲人英英動心氣

鷹隼善搏物尚懼鳳鳥嗔豺狼欲噬人道恐逢麒麟今
乃知不然麟鳳性益馴積骸如山委以不見聞轉于
水火中救此至不仁或云西方法祇乞見在身羣生究
何辜冤痛杳莫伸

少年頗耽奇氣欲吞名山有時驅樓船入海不願還倏
忽三十年塵土冒鬢顏顯晦亦偶然山水興未闌著書
高于身準待同志刪要皆真氣存足訂懦與頑興至欲
舉盃天風響禪關

送陳太守熙藩至貴州卽寄馮侍郎光熊吳兵備超暨
程太守國璽諸人

五年我已別南雲又向金門見此君幾許故人皆抗節
謂彭延棟花連布兩軍門無多健吏亦從軍
張太守鳳枝近工愁吳

質官先罷垂老馮唐力尚勤珍重雪厓亭畔月好封書
札慰離羣

爲法祭酒式善題漢晉人畫象

東國奇男子重瞳是故人偶然歛一足天上動星辰

右嚴子陵

百千儔類中乞食亦一等我欲拜督郵琴心先不肯

右陶淵明

書事

憶昨倉皇際防生肘腋憂何嘗動聲色先已決機謀訊
鞠歸藩邸傳呼出殿頭縞冠纔幾日褫服作纍囚

斂怨知何似茫茫入極中干戈兆秦楚珠玉罄南東逼
迫歸邪教搜求過正供明明祖宗法百計壞淳風

全家俱內侍甥舅暨婚姻推轂歸予季分符引所親病
仍升鼎鼐敗亦繪麒麟日晚塵如織高門接要津

尺五城南第經時締構崇閣摹元武闥人出上陽宮金
屋參天半銅山穴地中是誰搜複壁珍蓄頓教空

漢廷誰巧宦賣友得呈身不是懷中奏難成坐上賓商
量窳高秩汲引幾私人附傳他時好崔倪倘後塵

怙寵眞逾昔，辜恩遽若斯。小車穿殿過，隻騎繞廊馳。地
密誰能舉，天高倘未知。監奴益無忌，通籍上軒墀。
屈指承恩盼，南頭一侍郎。祇緣新歲近，催送侍姬忙。粉
墨乖清議，銀黃奪舊章。浪傳收騎過，失足墮匡牀。
火城三十步，煙燄欲薰天。故相揮門外，眞王拜轎前。幾
人容接膝，同列敢隨肩。一事尤奇絕，酋豪願執鞭。
金字書恩地，由來在賜廛。憑人說鷄狗，堅自乞貂蟬。詞
筆慙三榜，圖書冠一船。直廬清切處，莫謂少流傳。
誰說台司重，眞憐骨相輕。上公偏下視，直級亦斜行。偶
舉遺忘事，時矜聰察名。猶應勝齊虜，五鼎食非烹。
單車催上道，特敕不隨人。奏艸除元惡，爰書比叛臣。脅

從先股栗判吏乍眉伸畢竟能行詐題篇炫鬼神
賜盡圖扉日無聊舉百觴攀龍知己後牽犬歎偏長西
市鳴鉦急東原赦土忙恨無朱椽在親葬董雲陽

爲法祭酒題移竹圖

一竹綠一窗十竹綠一牖尋常百竿竹能使雲水皺雖
然竹性北不宜榦葉縱具清蔥稀先生愛竹識竹性先
引活水周堵畦豈惟竹下流泉迸竹裏白雲圍半頃穿
廊戛牖響不停嫩綠都浮碧天影廣文先生苜蓿盤京
俸苦薄無餘餐長飢婢僕尚林立一一瘦若青琅玕先
生暇日繙僮約婢未裹頭奴赤腳擔土汲泉前復卻一
亭誅茅泉一勺亭外更須營畧約一壻一兒顏戎削隄

取筵前侍杯酌君不見何時新筍出一林我欲載酒來
相尋

哭管侍御世銘

半生每自誇龍尾晚節憎人說鳳毛獨有上書心事在
不教風節並錢曹

聞先生客秋欲上封事屬艸已定遽卒莊刺史所尚及見之錢曹爲錢南

園曹劍亭

兩侍御

哭董太守思駟

玉杯珠柱書難著鳳髓龍筋辨獨傳記得白雲溪水漲

凌晨送上溯江船

君回里中匝月由浙江水程赴潯州在到官甫七日而謝世

自勵

寧作不才木不願爲桔槔桔槔亦何辜頰仰隨汝曹杈

老方日言卷二
一
枵適當時旋轉如風濤高原多低枝感汝汲引勞一朝
時雨行棄置眠蓬蒿

寧作無知禽不願爲反舌衆鳥皆啁啾反舌聲不出豈
繫果無聲無乃事容悅依依檐宇下飲啄安且吉何忍
視蜀鷓啼完口流血

涼夜

艸蟲忽無聲人倦鳴亦倦疎螢夜不飛悄立蒲葵扇
長廊不燒燈夜久行殘月秋風驀地來十二簾齊揭
三更涼意多蒲葉響回波斜界龍樓影游魚不敢過
暑氣夜不收移牀入林隙帳頂明一星森森知太白

牧牛詞

門前黃牛老牧兒甫襁褓兒年四五卽飼牛牛轉情兒
年過小六七歲甫交兒肩及牛膏昨年上書兒入歲兒
足居然跨牛背飼牛已了仍牧牛牛知兒心喜出遊登
隴涉水無時休半年送兒入村塾半歲書從牛背讀兒
思阿耶牛憶犢卻鼓長鞭入牛屋牛背下來書爛熟

種魚詞

祖遺十頃田乃在城門邊低窪不堪耕卻引河水流濺
濺一船淤泥兩船重肥土出魚何必種南邊菰蒲北菱
葑更灑浮萍作魚俸波面旣養鴨波底復種螺昨宵一
雨通北河隊鴨更挈成羣鵝小時魚苗怕鵝鴨魚大竟
同鵝鴨狎掉尾時時欲相壓賣魚歲入得萬錢不羨鄰

舍耕原田君不見原田遭荒無六穀豈若魚池歲常熟
畜鴿詞

老翁誅茅作一堂東西南北皆鴿房老翁無妻有女郎
引鴿入室還穿廊朝來糴得新春稻鴿剩方令女郎飽
鴿欲出房先卻掃老翁呼鴿皆以名好在一一能承迎
翁倦鴿亦眠無聲休嫌養鴿形神敝與鴿居能助精氣
聞上翁衣立翁臂君不見老翁龍鍾女遠適死仗鴿羣
爲弔客

養蠶詞

飼牛須小兒飼蠶須小女小女纔上頭靈明已如許堂
中一筐復一筐屋左屋右皆柔桑挑桑作蠶衾挑桑作

蠶褥蠶食蠶衣無不足閒來習靜深閨裏一種心情更
堪喜與蠶同眠復同起蠶行作繭女嫁夫栽繭作女身
上襦君不見養蠶雖勞得蠶效拜得馬頭孃上轎

寄石太守韞玉

聞說東川守騎驢過百城書仍寄旁午地未塞夷庚啟

事人先悚

君以川匪曲折成親王王卽以

啟事致上聞

登壇衆盡驚巴渝

兵火地何以慰疲氓

雨歇

高下窗櫺竹栢生南池雨歇近三更夜涼殘月清無寐

聽到秋蟲第一聲

卽事

攜尊訪幽客三至不一遇門前秋樹好樹下石堪據涼
風西南來竟爾挈衾具近刪詩不作頗復減思慮惟于
人事外時得少佳趣白鳥笑客狂翩翩入林去

朝陽出偏遲昨夜路仍濕車行三里外已有暗香襲幽
人邀客住一屋大如笠平鋪波萬頃高下見堦級居然
空色相顧視尚難入萬朶白藕花鷺絲何處立

讀書倦後偶題齋壁

蕭齋賃三間長日渺何事因無用世心益堅傳世志行
衰本無幾并疊陳篋笥所居幸深遠熱客無一至中年
驚已過盍扣囊底智不見七十翁辭官課奇字

時正奇
書錢少

詹大昕索
所著聲類

遣興

千杯百杯皆已空
昨者醉夢殊怔忡
承天之高豈一柱
受地之命惟孤松
孤松流青栢流翠
冷眼看人百年內
當前何事尚營營
入後有人思潰潰

堅持一念皆可傳
瓦硯木榻驚齊穿
丈夫自信不役物
方寸以內嘗湛然
性靈自足供抒寫
美醜都看入陶冶
三千里外賦歸與
十九年來忘兀者

後遊仙詩

地在天中見可眞
半從高處望紅塵
冥濛似蟻還如豆
都是三千世界人

誰打泠泠澗底鐘
月明人宿第三峯
朱符夜半催行雨

臥聽天龍喚地龍

詔集周秦漢宋儒寓言曲筆勅刪除修成三十三天史
一字都無梵釋書

月午濤聲響怒雷滄溟盡處覺扉開誰憐天外花如海
只我騎鯨一再來

雨雨風風春事休誰言上界總無愁可憐清淺銀塘水
不穀天孫日飲牛

碧虛景色太蒼蒼日月從無背面光乞取火珠三百顆
凌晨先與挂明堂

爾許遊蹤向客誇偶隨漢使泛星槎九天九地行都徧
輸與仙人萼綠華

作賦何須定馬枚
偶按淹滯出塵埃
詞人下第文人老
流落都歸天上來

天田近亦種乘麻
畧遣仙人識歲華
偷住碧虛三十載
日紅從不到窗紗

可是東皇意見殊
上方日日有遷除
神仙自恐無才思
偷讀人間未見書

清虛一別事茫然
消息誰從下界傳
聞說白榆天上樹
夜涼時亦噪秋蟬

呼吸疑通下界潮
天孫機畔水迢迢
月中仙桂如堪斫
先與裁成獨木橋

不用爐峯向上薰
四邊香氣自氤氳
生來著色屏風好

檢取嵩高岱頂雪

神仙多半是中年白髮從無挂兩肩更與種桃園裏異
天街行徧少厨煙

天河迢遞隔天關露氣雲光日往還不放雙魚住天上
怕傳消息到塵寰

踏得星光顆顆青撥雲時坐白沙汀天街一事徧惆悵
可惜從無疎雨聽

獨構茅齋靜見閨年來四氣總難分偶扃北牖開南牖
已覺漫天盡火雲

百年一瞬夢何曾超劫先居最上層飛下九天三萬里
卻驚足底日華升

欲踏雲梯第一層生驚石礎潤難登冥濛下界三句雨
引得靈河氣上蒸

雲生雲滅望初窳知隔黃塵幾萬重獨占一天誰與其
兩三蝙蝠數株松

閒來多是坐忘時不讀丹經不賦詩怪底東南雲似墨
書仙半日偶臨池

昨宵騎雀下蓉城一舉千杯醉未成蒼狗白衣都不管
隨他足底亂雲生

要從天上捉迷藏銀漢紅牆界畫方粗服亂頭編一隊
董雙成與杜蘭香

誅茅都在白雲巔學道心清自不眠抽得地坪三四尺

倒呼明月到床前

白楊種不到天門自詡飛仙萬劫存
要向天公破陳例
凌虛高築醉人墳

雲林一到一徘徊
選勝頻同逸客來
構得山亭要奇古
剝殘星斗種莓苔

天邊甲子記依稀
宵半晴光已四飛
齊向玉虛稱賀朔
曉霞紅作上朝衣

北出雲門磴數盤
天風時一凭闌干
因看太白峯頭雪
始識稜稜下界寒

東南一抹是揚州
天外山排十二樓
欲趁新涼看滄海
月高吹笛下雲頭

偶得東皇食料單烹龍魚鳳亦全刪清虛自有餐霞法
東海靈芝進一山

玉軸牙籤散不收偶逢閒日亦勾留名心畢竟銷難盡
檢得奇書作枕頭

疎星三兩逗河津新月如船欲載人便擬裁帆向東去
麻姑傳說海揚塵

行童一輩隨徐福避世千年住武陵華嶽峯頭毛女笑
一般鄉里各飛升

白雀峯頭到偶遲三生一笑本難支何妨背面仍分手
萬歲千秋見有時

天然顏色勝吳娃住近西池阿母家養得靈蠶大如虎

也應喫盡佛桑花

偷將暇日闖華筵一輩誰如張老顛只自愛看塵世界
倒騎驢子上青天

玉皇香案住多時慧業偏教上界知惹得洞天三十六
都來乞我作新詩

雲腳微黃雨腳青望中日腳復瓏玲前頭去海無多路
且借天腰作暫停

七夕偶題寄女紡孫

匝月都居水上頭夜涼雲向竹間流輸他百鳥啼春徧
一箇吟蟲欲占秋

層層暝色上閒廳簾底繙書手暫停買得一瓜如斗大

豆花棚底祀雙星

花氣衝廊竹塞門全家應復坐雲根
閑將故事從頭說
壓倒符孫與胙孫

佳辰偏要耐心腸
曝過奇書曝盡忙
第一莫將花染指
預防紅色汗青箱

宗崔月令手全鈔
誰似吾家幼女嬌
莫證瓜期是初六

怕他烏鵲再填橋

江南人皆以初六夜爲七夕

神魚曲

大魚立水長一丈
昂頭看船不相讓
船撐欲近魚忽飛
白浪濕盡舟人衣
抽帆追魚魚不及
夜夢大魚波外立
明朝風浪急
護持咫尺看我雙龍時

神狐曲

狐強神弱爭一星狐悍操兵穴神腹神逃荆棘不敢言
白晝狐枕神龕眠遊神訴天狐始悔爲神不終願爲鬼
君不見重新社屋迎故神畢竟狐尚居承塵

有饋蟹者戲答

萬羊太尉唐代萬鴨詞林 本朝若許各從所好願烹

十萬霜螯

偶成

眼冷心空日長安始易居三更池閣上眼對白芙渠

受業

呂培

校字

附鮪軒詩目錄

卷一

機聲燈影集

古今體詩一百一首

卷二

采石敬亭集

古今體詩八十七首

卷三

黃山白嶽集

古今體詩五十三首

卷四

長淮清潁集

古今體詩四十一首

卷五

桐廬林屋集

古今體詩五十九首

卷六

鍾阜蜀岡集

古今體詩八十五首

卷七

茅峰攝山集

古今體詩八十二首

卷八

天台雁蕩集

古今體詩六十一首



附鮫軒詩卷第一



陽湖洪亮吉著

機聲鐙影集

十三至二十一歲作

元夕侍母坐命作



阿姊邀題句慈親偶破顏十年風雪裏始覺有春還
附塾篇

送爾書堂六窗疎尚見星母勤三歲績兒受一年經影

小扶簾入聲長隔院聽敝衣經數補莫訝未純青

驅兒篇 補癸酉歲作

余八歲自塾中遣歸吾母抱余泣云云及稍長有知

遂作驅兒篇以記母語

東家驅兒不使讀書兒跽告母母驚兒呼西家驅兒不
使人塾兒跽告師兒已受扑入告母出告師孤兒不食
淚告絲牧羣羊牧羣豕孤兒寧願讀書死君不見三尺
孤兒亦人子

歲歉篇

十三知歲歉十四忍朝饑母病逋師俸兒長著父衣瘦
憐親串識貧覺館僮譏冷巷歸來晚書聲出破扉

精衛

精衛精衛生於海東朝銜西山石算投東海中力不自
度凡禽笑之精衛精衛勞无已時心雖勞志不改塵飛
揚在東海

正月十三夜至前橋訪妙二鼓始棹舟還

月午都將歸路迷蜻蜒舟小住前谿夢回三處尋蹤跡

影落水南蒐水西

夜起

不寐三更後孤行衆竹中夜光非借月暗響不因風影
逐棲樓燕有差倚井桐絲囊私鼻句未敢付奚童

詠史篇

運去矣籍若何八千人散漢一歌時至矣勝亦武百二
關亡楚三戶噫吁嘻秦明月漢大風恨有豎子無英雄
母命詠月

乍覺冰蟾透下方旋聞花漏入三商此時金粟欲無影

徹夜玉繩微有光，眼底樓臺空浩渺。秋中節物自清涼，
翩翩歸妹西行好。莫更拈著怨有黃。

遣僕篇

先君遣一僕以歲款遣去作此送之

影小如余瘦，形疲覺汝饑。青蒿憐故食，黃葉補秋衣。炊
冷泉通竈，眠遲露入扉。舊巢猶苦戀，清淚滴依依。

同蔣十二阿定登太平寺浮屠

君從城北來，覓我城東路。松花一枝折，尚新知是卜家。
墳上樹東門，橋邊七層塔。君上一層心，轉恠羸顏紅。坐
綠蒲團，怪我偏將塔鈴踏。

閨思同蔣十二賦

昇花字

簾明知夜起，閣敞看朝霞。影瘦只疑烏，顏春欲誤花。情

尤耽諷詠意解惜年華墨瀋留唵頰牋紋印指义庭隅
垂竹實墻隙隱匏瓜穿樹鶯何急巢梁燕乍譁都嫌漏
消息不放入窗紗

郭北篇

辛巳歲洪子讀書郭北鄒翁家翁憐其貧欲以女妻
之聞有所聘乃止洪子感其意作郭北篇

兒家城東偏翁家郭北隅附翁錢一千伴翁兒讀書讀
書書何多翁言兒大好枉有七八男無如此兒矯翁言
欲婿兒設此堂上尊十三名家息十五廉吏孫兒言苦
濡澁座客顧告翁強自致一詞柰此兩頰紅兒宗實蕭
蕭母淚復縷縷前織一匹縑已聘貧室女門前田十雙

屋內錦十箱翁言雖至誠厚意固不當

清明後一日得蔣十二阿定江西計

惜別河干尚縱談蜻蜓舟小水拖藍春光乍到一百五
慧質肯過十二三髮綠挂窗留鳥愛顏紅入鏡識花慙
明晨哭爾西郊去酒滿銅瓶筍滿籃

南樓夜宿

後牖穿明月前樓看曙星水分三面綠天入一隅青影
暗藏書幌鬼驚貼畫屏眠遲偏易醒警夢有檐鈴

母命口占送從母歸芳茂山故宅

巢成好挈狐雛去美盡難依邛媵居裁帛寄親千里外
時外官胡未躡簪蒿隨姊十年餘谿田此日通漁舫鄉

夢入家上鹿車只有諸甥偏戀母櫻桃花下遞牽裾

初三

初三花發檻初五月窺門樓小難藏影簾重不隔蒐蛛
絲黏鏡濕鼠淚滴鏡昏笛憶參差響書摩宛轉痕

病中作

病怕春光到眼前未尋鐙火已孤眠裏中自有空明月
身外都成浩渺天偶憶紅顏思覽鏡慵梳綠髮任垂肩
顏生衰早終生天誰向黃塵羨永年

樓居

只覺樓居好簾鈎靜裏斜頰墻只三尺春影過人家
破曉

破曉簾前望園荒綠欲齊春知來路濶天覺過墻低驚
筍有時折野鶯九數啼萋萋一坡草踏僮過橋西

中井鄉歌爲鄒翁賦

山花只入房山燕只棲梁一春綠竹不過墻一生遊魚
不出塘誰來丈人家北郭瘦李西谿楊誰和丈人詩南
巷狂沈東頭王丈人十雙田歲得千斛糧丈人一陂澤
歲牧千尾羊嫁女不插花娶婦但識桑人間有此太古
方丈人不出中井鄉

擬古艷詞

夜翳開幽影春燈卸別輝林花送愁去棲燕抱魂歸坐
久風添陣更闌月有圍剩寒回繡幕選夢入孤幃

寄大興朱編修筠

壬午冬在友人處讀公古賦數首愛不忍釋又聞公

愛

之

昭陽歲涂月公文傳手鈔聞公學昌黎興極乃欲號昌
黎善爲文乃不識李翱昌黎善爲詩乃不值孟郊我生
十年學刺嘈慈母訓我窮風誼哦詩切雅賦切騷世哂
才士如秋毫君不見公文足戴北斗杓我筆亦傾東海

濤

省蔣十二墳

爲種一枝栢流青入夜臺攀條盡西向記爾未生回

芳茂山省從母

小築谿深處都憐補葺蘿亂山開戶遠秋月閉門多衣
冷親添繭燈昏乍拂蛾遲眠貪久語不覺夜全過
二月十三日夜乘月出城至小東門橋迷路三鼓始反
橋南未有人橋北盡春墳轉向危橋立聽鍾別夜分橋
心暉暉月華滿魚影過驚人影短三更倦立倚孤桃燕
子識人來處遠

藥裏

藥裏猶餘病裏身三層閣小住幽辰風簾白墮棲鬼燕
花徑紅遮入夢人往事雨昏勞把燭此間天遠定無塵
蕭郎指爪愁都落莫向閒中說好春

午睡

一樹藤花六尺牀，飴簫聲遠繞空墻。
幽眠乍起渾無事，新月在天春晝長。

題阿房宮圖

一百萬卒長城中，四十萬卒新安東。
咸陽間左已盡發，餘者內築阿房宮。
小刑鞭笞大刑族，趣就咸陽萬間屋。
連城跨渭百里餘，日月光窮許然燭。
秦家築宮連百區，雄心一世至萬世。
束縛黔首常安居，可憐絹粉今淒瑟。
焦土星星野螢出，版屋祠荒賽百蟲。
阿房賦冷吟殘，蝨噫吁嘻，慙儒鄉火。
一日咸陽宮火三月，君不見楚人灰紅。
秦燼黑，漢家龍興由火德。

芳茂山夜宿

節物無端五月前
喧聲徹夜擾幽眠
雷穿石壁都成窟
雨挾谿魚欲上天
溪洞三時寒地氣
斷山十里接人烟
清閒不復營餘事
靜把元經曉夕研

樓高

樓高笑語輕飄樹
復驚鷺衫袖
春風轉房櫳
曙色明禽
迷窺鏡影竹
隱上梯聲
幾日園梅發
踈窗綠綺橫

過潘二振煥故居
書示其猶子尚基

傷春曾記欵朱門
一樹桃花一酒尊
苦憶君家狂阮籍
幾回花落與招魂

園居

十里巢禽樹
春溪客到初
上樓人影瘦
滅燭雨聲踈
隔

歲書猶讀齊年髮共梳庾郎貧正甚同此食園蔬

杏花樓春望

把書時復上層梯愛看春濃柳覆隄不惜工夫待殘月
藤床移向曲闌西

初生十五六

初生十五六如犢甫離乳車旁隨母走相距不數武誠
知芻秣好未識誰是主忽報上齒生勞勞駕車苦

初生十五六如鳥始出巢毛翮雖未強氣已凌碧霄一
母將衆雛飛處不欲高朝出暮共還稍知念劬勞

初生十五六如水初離源到海尚有時流聲已喧喧洪
織悉包羅意欲長百川冰夷倘相唾何況鮪與鱣

初生十五六如月始離海彎彎雖無多九野譏光采延
回到中天河漢色已改大白出較遲何能久相待

小池春漲

昨宵驚波來漂去所著屐下牀方欲索摸得一雙鯽

雲谿春詞

欹枕蓬窗聽雨眠記來前事當遊仙銷魂一曲雲谿水
坐閱春光十九年

憶別城西爾許時強邀相見出偏遲生疎樓閣生疎意
却耐渠儂百日思

樓上紅燈影接天更闌催擺賞花筵半酣只說沉沉醉
吹笛聲中自在眠

踈窗三面縱薔薇乍暖欣看試袂衣忽地絃聲落元半
趙家樓上紙鳶飛

銀燈影裏說元宵踏月欣從女伴招攜得合歡何處放
半坡春水葛仙橋

短短踈楊綠未成溪流濶處有波聲臨河亭北開圓牖
買得銀鱗便放生

相逢剛及上頭時百種聰明不自知憶向瑣窗談故事
比來都已入新詩

方書繙徧日偏長四月陰濃葉亦香正是日來垂手處
滿欄梅子一齊黃

尋常鏡匣傍簾鉤筆硯拋來懶不取却恐被人窺楷法

附錄軍中詩卷一
故掾牋紙擲床頭

新開池館曲廊邊
拜月人來月抱肩
一度逢人作莊語
偷開笑靨百花前

錄罷仙人肘後方
小疲時復倚回廊
學來百種瓌瓏語
反覺鸚哥舌本強

約伴同遊出獨遲
半宵偷謁社公祠
王孫古巷行將到
記得嘉名在楚詞

城東烟景劇參差
玉局堂前花百枝
行到硯池剛欲歇
暗中扶柳立多時

一度登樓望若仙
忽驚帆影逼吟肩
有生來不識天涯路
却問春江在那邊

石徑玲瓏漬古苔
堂扉斜對小池開
花磚南北皆知數
立盡三更夜月來

山莊春半踏青無
處處危橋藉柳扶
獨向回廊看新月
任他女伴隔河呼

平頭艇子櫂雙枝
畫板平鋪上岸遲
却訝海棠陰覆屋
六年不到晏公祠

幾日西頭戶懶開
却從仄徑上層臺
無端一片落花過
兜起昨宵春夢來

把書時復到吟堂
病久應愁學殖荒
一事乍教開笑口
親聞家舅譽韓康

比來多分識春愁
不遣雙鬟上小樓
只有畫廊雙燕子

飛來飛去看梳頭

愛向閑亭自煮茶
壞牆北去路交叉
鄰姬怪底時來往
籬角先開姊妹花

水明樓上晚涼多
摘得新橙手自搓
閒倚石闌談往事
忽驚天眼裂如梭

閒愁誰復理衫裳
書籍拋殘滿曲廊
只有畫箱親自鎖
不知何事費提防

八字分明記肯差
盈盈十五說年華
無端欲索生辰禮
一盒秋窗染指花

兩株仙桂倚閒廳
幾日迷藏捉未停
同是曲欄何處躲
欲將纖影貼門屏

朝來小婢却頻催曉日三竿戶乍開一把鬢絲梳未得
傳呼阿母過房來

苦雨連宵夢不成臨街樓上盼朝晴春泥一巷深三尺
偏認東來蠟屐聲

居然板屋仿浮槎六六文窗刷絳紗何事五更簾已捲
欲乘殘月看踈花

尋常不肯歛書樓却爲花香少滯留猶憶兩重門內事
一聲靈鵲惹回頭

小閣新懸蛺蝶圖年除不更貼桃符宜春帖子催書過
好代堂前拜紫姑

商量誰可伴青春二月花枝二十人攜得鏡臺何處去

杏花樓上度生辰

園扉東去闢書堂不遣簾櫳透日光奇福却教消受盡
百花香裏貯匡牀

病來仍不廢吟哦紙做閒教小婢摹欲向人前詡師法
強將難字課鸚哥

一句纔歇雨廉纖臨水家家喚卷簾剛是日西勻面了
龍舟已到白雲尖

詩社年來不暫停秋蟬吟後詠春星憑他百首堆吟案
只許蕭郎有性靈

識字先憂命不辰頻推甲子恨臬神羨他阿姊生來福
已遣羊車嫁璧人

別來相見較矜莊一卷華嚴禮法王添種碧桃三兩樹
攔他春夢入閒房

攔街報喜有紅箋返棹匆匆泊岸邊却被校官傳釋菜
替簪花朵出筵前

清修只有燕鶯知背客從無一語私我本學仙卿學佛
十年端愧說相思

一春心事訴花枝猶恐花枝笑客癡誰向樽前按檀板
聲聲譜出惱春詞

獨酌謠

獨酌謠獨酌無所好生來菖蒲花不解向人笑阿三爲
我提壺阿二爲我行沽風吹門開胡蝶自來揮之不去

落我酒杯一杯邀春風一杯待明月
嘒嘒嘈嘈聲不歇
市上人催酒錢切

獨酌謠獨酌無所知離離春心開飄飄若遊絲
山風爲我披襟百舌爲我行吟樓高三層月不得升
燐火飛出光明若鐙上樓鐘聲三下樓鼓聲四冥冥濛濛飛雨至
蝙蝠嚇人還展翅

獨酌謠獨酌無所憂天邊開八門地上列九州三江昨
餉鯨鮪百粵復饋離支何曾開筵日食萬錢邊令之腹
無其便便一石亦不多一斗亦可已琳琳瑯瑯樂聲起
勸客高眠洞房裏

獨酌謠獨酌無所待劉伶及杜康倏忽渺千載北斗爲

我持杓列宿爲我舖糟花開如盤勸客盡歡出飲市上
萬人圍觀牛醫既可招狗屠亦難捨朝朝夜夜心自寫
狂藥醉人無死者

亦園卽事

名園都枕郭西頭乘興聊爲三日留銀燭樹寒人病酒
紫薇花發月當樓閒禽自欲當軒下秋水居然奪戶流
小坐石闌聽一曲謝郎含笑李郎愁

雙船行

大姊命賦送楊氏表姊歸芳茂山

儂家住橫山生長山橋東昨日出賽神忘却拜社公來
時船頭雨去時船頭風儂家住雲溪生小繡古佛歸寧
無一程返棹不終日來時半帆風去時半帆月雙船遙

遙何處分得出小溪當水門
姊行持香妹持燭同向晏
公祠內祝

將至崑山訪從叔縣尉

百里初看束急衰白家橋左
趁船忙春山一路題詩好
阿姊先爲製錦囊

崑山登文筆峯

山風昨夜穿窗破落月一峯床
上墮起來失喜闌北扉
雲氣縷縷穿人衣林梢四面天
光出破曙看山始親切
牀頭拉客客不應乘興攜屐還
孤登褰衣只向山岡上
峯勢離人忽千丈前行百折出
樹梢平視正對中峯腰
誰言峯勢高疑絕一塔從空復
飛出峯臻一層塔七層

僧老爲別長明燈坐來足底雲生滅萬瓦鱗鱗恍居穴
樓頭酒人知尚眠詎識客已臻山巔君不見十年平地
居局促此日登山願粗足西南一抹欲望家却值海上
生紅霞

虎邱

七里塘邊路幾又到來爭欲詡繁華萬家燈火千人石
一帶樓臺五色花別有名園貯聲伎愁無隙地種桑麻
龐翁書客蕭閒甚只檢踈闌自煮茶

無錫道中

漁舟還趁峭風開臨水梳頭照百回却過望亭三五步
九龍山影上帆來

飲第二泉

第二泉邊過無人約客遊
野花催上岸山鳥喚登樓
別路月初好全湖雨乍收
更殘到家早先慰倚閭愁

放歌行

梟不入曾參居棘不生孔子林
借問棘與梟寧知聖賢
心伐檀削跡見惡世人禽獸草木
知識獨真魯東門訪
爰居弔戎夷海鳥饗太牢
國士無一衣仰天出門忽大笑
誰是至人誰不肖

春日贈鄰東王叟

屈指經旬桃李辰
貧家巷裏不知春
三間老屋四圍水
兩面毀垣千尺塵
結客孔融先下世
破家張儉尚依人

惟應宋莫墻東叟甕牖前頭許結鄰

贈唐上舍鵬

五年頗有三友齋
陳錫一巷分居兩頭六時梵唄雙

刻皆陳錫半夜書聲小樓

來從求仲羊仲交到元方季方陳留兼有小阮蜀郡本

少他楊君爾從子皆能文除家

偶成

曲曲房廊映水隈魚苗五色上波來當窗正欲鑑春影

一樹好花頭上開

曉起

日光搖不定窗外有桃花漠漠分紅影冥冥逼絳紗露

笙鋪幾日風笛起誰家只有閒鶯燕猶能識歲華

鵓鳩詞

西鄰有葉婦者感而賦此

春朝晴鵓鳩喚婦如有情春暮雨鵓鳩回皇逐其侶陰
晴一日寧有期鳩今逐婦何處棲用急祇繞雄巢飛人
之無良後禽異險阻不離安樂棄忽構一巢居別地西
鄰葉婦真無辜入門拜姑出拜夫臨別復聞啼鵓鳩君
不見禽雖不言對以臆逐婦歸須有時刻不若人行死
生隔

春盡日騰光館賞牡丹

谿上誰開舊草堂春殘先爲賞花忙調脂金鼎儼同味

承露玉盤饒異香百計可能留艷質萬錢爭與買年光
寧知別有關心客倚徧東風幾曲廊

行雲

行雲欲升天流泉欲注地同馬出一山中來心跡異高
高下下一日中水氣轉絲雲光紅朝雲升天莫歸嶺只
有流泉去無影君不見作霖他日徧九州努力倘逢東
海頭

偶成

闌干高下飛胡蝶花影都從紙窗貼樹頭接雨青數層
魚尾閃波紅一拾春慵畫永誰相省幾陣簾前笛聲
鏡面屏風八曲垂玲瓏照見茶甌影

附鮎軒詩卷第二

陽湖洪亮吉著

采石敬亭集

巳丑至壬辰

依綠亭得句

雨止修竹間微風起天末呼童卷疎簾面面看山月

汪生彥和出元人畫二十幅分賦其五

君不見竹冠布衣位至尊漢家丞相非高門驪山罪徒
滿闕下黥面盜首王皆真當時入關佐天子三傑首數
韓王孫留侯儒者固益上詎與刀筆同時論秦凶竟從
趙高匿冠虐幸有項伯恩英雄歸漢有本末丹青照水
顏疑神平生折節黃石公我懷歎有滄海君咸陽原爭

附錄三言老角三
剛豎子冥冥者鴻竟離羣始知高視出一世四皓未免
趨風塵留侯功成卽乞身心所師者真其人赤松黃石
何足云

右留侯歸漢圖

漢家龍興及三世高論六籍搜根株濟南碩儒老猶在
遐算未斷神疑輪誰何作圖貌竒古牙齒剝落身須扶
當時秦王厭章句生也幸得逃其誅乾坤非常災燔禍
灰燼尚欲生真儒峩峩執經門大夫太常子弟秀者儲
尚書大傳世有本乃謂口授勞咕嚙千年此論出安國
夏以隸佐亡蠟書我襄不呂紫奪朱兀兀起坐重披圖
還憐真本生已易斷篇何止將蒲姑

右伏生授書圖

君不見輻涼夜半離法宮豪桀擾擾黃塵中原嘗春陵
有家法殺人亂世非英雄誰何要間佩剛龍短裘駿馬
羞雷同報仇結客盡一世末路顧與瞽邱通我裏嗤此
田舍翁兀兀一飲還千鐘於虜男兒不種東陵瓜有酒
亦澆劇孟家勲名生在死卽盡姓氏肯使餘人誅披圖
憐君重然諾廣柳車來容束縛一生幸免兩頭蟲令人
千載悲丁公

右季布任俠圖

挈壺失官晦朔忙閨位不復歸明堂專家厯象棄灰燼
日角月齒憑荒唐伊誰守官柱下史兀兀不語悲張蒼

緣知威水復不久早奉定歷歸興王披圖黍米繪極細
如彙六歷分低昂百年星紀互得失譚天口屈猶能張
扶風著書首堯典禘晝益夜差五商銅壺筭復減高密
迫促日馭無輝光我從太初引之長稍減陰歷還歸陽
誰推北辰定天紀復需南正司總章天人當日理本一
古幾至德來鴻荒君官柱下得幾載聞見猶勝落下黃
何人更論五德定漢興可以追軒皇

右張蒼治歷圖

洛陽少年真可喜長沙上書思治安致君堯舜固盛事
不問宰相皆材官霸陵思治讓復再德薄何能四三代
此時一官次鄧通憔悴日值甘泉宮無端鴟鳳引作侶

坐使譖謫來南中君不見南中還留屈原宅千古萬古
傷卑濕斜陽何必鵬鳥飛弔古寧同楚囚泣季文重道
不重儒孝武重儒誰上書可憐牧豕亦作相殿上挾策
羞吾徒如公季命關世數經術寧同太常錯卷圖不忍
見橫流中有沉湘一篇賦

右賈誼上書圖

山行

巖腹藏月華幽房露虛白山雞識天曙過嶺噪林隙斜
輝不沾衣十步見履跡回瞻怯叢莽頰視出泉脉暗水
復百重微茫下岡脊天光被原野星景定川澤宵露此
一時秋陰萬家宅征衣冒幽險居人昧昕夕荒荒邛犬

鳴勞勞感行役

對月

銅鋪蝕月月不流
曉星對戶如凝眸
此時鐙影薄於紙
金鴨爐中瑞烟死
東家西家夢蝴蝶
孤客夜長聞落葉
何當反影入潭底
喚起老龍吟海水

時已三月不雨

秋分同黃大景仁賦

晨光初次角林木
總合商感爾淒然
意能令秋氣揚竹
廊雙燕引石磴
百蟲涼此日單衣
客行看怯曉霜
聞黃大景仁自湖南歸阻雨不見卻寄

纔把征帆卸
落暉谿南谿北
悵暎違無端
一夜瀟湘客
帶得蠻烟瘴雨歸

初十夜雲谿憶蔣肇新舅弟

薄暑不成寐寂寥踏谿路疎鐘出林幽銀蟾約波素曾
從三徑客白袷愜幽步勝景不可追夕汀滿涼露

獸坐

荷盤帶露傾年光晚螢照客愁舉觴此時不飲亦不醉
水面葉觸波聲涼圓針初拈唾絲滑五花無聲蝕羅襪
文奩妝罷知幾時一綫蟾光上華髮吳謳越謠不得長
网网起舞難成行此身萬事不可待明日有酒誰能狂
遊顯慶寺次韻

晴鳩聲裏度危亭平遠風吹酒面醒古寺踏歌春黯黯
亂山入夢晝冥冥林泉未改幽人素雨露偏滋小草青

爲語藥闌消息近好攜蠟屐叩禪扃

勸學篇

秦颺蕩六合詩書死灰色蠹魚頻窺人下載不一值後
來羣師儒沿流逞逆億微言旣中絕古義墮井黑大雅
卓不羣小人儒道墨我裏鷓鷯志遭此蟾蜍蝕聖學苟
不頽行將何致力

蔣青曜齋頭掘地得古棺索賦

江濤翻沙作平陸又剗離宮築城郭城郭千年有廢興
茫茫別夜初歸鶴鶴歸幽怨尋人徧古屋經旬動雷電
怪事曾傳出漆鐙羣公暇日誰經見主人花發不敢看
主人掘地得古棺望之卻走不得近古物出土光流九

向我秋齋小奇字謂我頗觀前史志篆鼎苔文不可分
百劫記得蕭梁事冢破空令舊苔補落月陰寒動裏古
紫燕重逢識舊人白楊旣死依黃土豈惟坯土愁難保
建陵一一生秋草野燒曾傷寢殿基摸叩便發蕭陵道
六代相看祇算朝美人金粉亦應銷鶯花古巷初歸樸
土木平時罷作妖留傳遺物誰能識把玩空增後來惑
梁苑螢飛又幾年蕭家麥飯虛寒食樂游原畔客初回
何處西風少劫灰齒冷玉魚歸市上心傷銅翟出蒿萊
書來索我題詩急齊諧志怪誰能襲露井秋桃正作花
蕭蕭莫向閒庭立

暇日搜篋中得楊毓舒所贈詩卻寄

閒搜篋中十幅字先生作論尤激昂銅鞮伯華不可見
遺直一語歸今楊十年家隣市橋口憔悴誰憐貌衰醜
虬須苦隨童子試破帽襤衫縣中走先生功名亦知止
先生貧賤能有恥當時準經三十娶已見哦詩出才子
蓬萊觀中宿儒在經術還看棟梁待先生著論空萬言
幾見微名上邑宰乃知古人真可師授徒築舍非無爲
秦延師說有長處尚欲從君定指歸

題畫

高人策杖來何早一徑綠陰門巷曉時見幽禽下上飛
落花滿地多於草

雲谿步月同蔣三星曜

故人喜相見攜手同幽尋
蒼茫隔谿月早墮桃花林
不到遠公寺誰知春草深
徘徊弄清影君去雙孤吟

雲谿泛舟憶蔣氏舅仲

憶昨春星大如斗置酒花前夜搔首
餞春筵上一歸來君亦江鄉客
行久我棹吳興舫艤舟夜深重過水
明樓傷春何似悲秋好一夜涼颼落
葉愁

江口見月

騎鯨江上客曾憶謝將軍
江月長如此青山不見君
偶來欹短棹長嘯激秋雲
薄葭葭外哀鴻不可聞

青山謁太白墓

騎鯨醉月不肯留
死後却葬青山頭
青山無人幾千載

薛月松風苦相待我欲發語驚渾濠詩成還翰白也工
笑謂先生安得死明星在天月在水直須痛飲齊悲歡
大地何似杯中寬調羹著袍未必喜知公不死長安市
夜郎去去愁瘴烟知公不死南荒天公乎公乎死亦達
不見世人皆欲殺胸羅文字不博餐下筆神鬼誰解看
公乎坎壈有若是我輩自合號饑寒君不見杜陵叟亦
太寂寞死塋騷鄉掩詩鬼未陽屬甫此屬君不信名山
會成錯臨江畧試犀角然水族不足窮奇觀此間地下
真五色謝眺文章謫僊筆湯湯日夜流無窮當年爾去
波濤中波濤瀕洞一千丈怯爾文濶不能上噫吁嘻滄
桑陵谷今古愁太白入月江西流安知千秋而萬歲浮

者不沉沉者浮君不見江流逼岸無三里會見青山沒
江底一杯酬爾倘有靈捉月仍從水中起

歸安陳上舍文川餉甘鞠并索詩

竹柝葉大松風幽曉雲如山積不流空齋十日禪意寂
老鶴舒掌似有求連朝茗椀太無色江水苦渾荼苦澁
傾盤惠我鞠百枝煎向甌中作深碧此時卻憶吳儂家
高閣日烹顧渚茶江頭作客不歸去山雨開徧棋盤花
雜詩

太虛積雲氣高與嵩華平天風吹其間幻象指顧呈土
生鮮實學何苦爭時名寒螿值深秋三兩參疎星前生
是腐草顧影矜微明

人生無百歲百歲亦電威風前矜華姿愁中抱枯骨本
無松栢性旦旦斤斧伐中虛鬼氣深內實人理歇不見
嵇中散養生昧真訣

黃雲蔽四野中有孤飛鴻行行不敢下怯此虞人弓三
日不得食憂心常忡忡道逢蒼鷹使分食悲其窮聞言
鷗鷺肉三歎不敢充雲霞作羽衣冰雪爲心胸饑當啄
寒蟲渴當飲朔風

立譚卽相契勿頸酬生平男兒處身世恩重命亦輕所
苦張陳交言言誓神明失意一杯酒禍兆五鼎烹縞紵
何足樂吾喪湖晨星

積憂思舉頭積響思傾喉士生本歌哭何以啞幽憂工

容瑾先獻作苦瑕易求我行別鄉閭親友牽車留旣知
不可挽一語贈遠遊旨哉百鍊鋼不若繞指柔
黃雲如車輪吹墮郭北門霜蹄與短轂碾作十丈塵塵
飛值浮雲莫過東歸心東歸亦何意咫尺願作霖作霖
會相保棲汝在弱草

人生處貧賤譬若星夜行雖無迷途憂終苦無光明夜
長何耿耿中有蟋蟀鳴蟲鳴愁宵涼客行愁途長途長
有如纒淚下沾衣裳誰持明星歸化月生光輝

百季不長在君誤亦已再少日師神僊黃庭肘間佩繼
復學擊劍頗思厲鋒銳精神如懸毫用之穎稍漫微明
不自惜行見月逢晦將持養生篇吾以習吾味

浮蘋從東流桃櫻從西浮
剛心苟不渝終會大海頭
所苦對面間有若萬里
修愛君屋上烏彈君林中鳩
嗟予寡兄弟隻影吟風前
亦解耒與耜恨無南山田
饑來出門去舉足任所履
高堂盼遊子有若農占季
浮雲闔須開一望東南天

南昌亭

報德何因此獨輕嘗時思
怨愧難半沛中亭長須臾起
會見王孫五鼎烹

下馬亭邊夕照低英雄身世
本卑棲陳平糠覈還憎媵
尚說南昌亭長妻

古檜行

在太平使院古莊子城上

城頭古樹記以百非宋非元李唐植森森古檜幡空蒼
奇氣矯作百夫特黃昏過樹雷雨青白晝擎人爪牙黑
眼經百歲若飛電身閱四朝猶過客霜磨雨洗遺蹟盡
剩有創藏餘徑尺子城峩峩樹厯厯建炎季中惡氛逼
建炎中將軍陳淬死此一呼落日兵四登百戰孤雲氣逾直將軍

白馬當樹立砍劍劍摧砍刀澁風雲此日總削平穴腹
猶容怪蛇蟄主人愛樹識樹性不遺虬枝兩相擊南枝
使南北使北以松歸松栢歸栢先是古栢壓松上幾折至是為剪其旁橫枝
樹老枝柯總有神時清冰雪昔生色余生好奇奇不屈
陡然見之意亦嚇摩挲撫樹三歎息此樹心空壽金石
立春日訪蔣大壻新

問訊諸中表浮雲作客頻欣逢此時月猶憶未歸人予亦昔懷減君應白髮新夜闌茅屋裏爐火坐生春

雲溪卽事

酒場吟地幾季留鐵笛曾邀清夜遊今日風光總無恙水西明月水南樓

蕭瑟秋光滿畫圖幾株風柳水平鋪他時賀監歸來日祇向君王乞鏡湖

夜坐憶舍弟清廸

弟出嗣季父後季父亡餬口于人

九原吾叔不可作汝更弱齡如我長饑驅別家不得意十步九蹶呼高堂人言渠面若兄面黃犢初生虎爭健寄食韓康命已窮靜煥躡屣承家阿買人爭賤居無一

椽食無繼窮冬出門布袍替汝行年少何足憂寧知母
也傷予季在昔吾祖居新邨百季古歛稱高門倉庾豈
獸富親族徒隸亦感吾家恩十載并州政聲起窮邊民
富家如洗先曾祖守大同有德政里民建生祠以祀遺愛空留君子津傳家
惟剩先生履貧來親串何足多昔時受恩今反戈朱門
大第亘山立短褐欲進遭其訶飄然一身謝家未識字
還憂不能活殘衫破帽驅出門手把遺書爲嗚咽幸壬
癸甲遭鞠凶統父王母暨諸生者更瘁饑寒中啓孫
不死亦天幸覓食自此無西東豈意飄零涉江沚執友
還憐故人子負米聊容庶下春傭書俾住城南市當年
兩小跳躍同兄也讀書無汝聰蓬窗經史空滿眼使汝

廢學傷哉窮君不見六棺未塋將誰俟
兩兩衰宗老孫子一寄兄肥弟瘦書黃昏淚落悲難止

初月

牆頭開薄暝樓上試新黃乍闌簾鉤影微生匣鏡光
水程紅燭暗天路碧雲長欲拜風差勁添衣下北堂

殘月

啼鳥頻訴我纖月又如鉤霧慘欲沉水光微不上樓
誰同前夜看行引盛年愁客感不成寐蕭蕭竹露流

古風

朝行看蟻鬥夜夢入虎穴微中一爲緣歎處神已泄
細火燒枯腸中虛不知熱匪伊金石固要恐肝肺裂百態

罔敢呈至人味生戚

鬥雞行

灌園老人食無穀家留一雞啄人粟呼兒飼雞雞苦飽
飽食雞飛兒受撲灌園老人住無屋秋雨穿墻漏床足
墻傾日引隣雞來矮屋疎籬看爭逐家雞飛鳴羽蕭蕭
采不外馳精在目隣雞據地有死心陰血四周冠怒束
微生偶然亦當局顧禍翻憐殺機伏屋上啼鳩看欲癡
草間螻蟻驕雞捉家雞飛鳴衆雞怒歸引羣雌要呼族
雄來成隊雌挈尾爭磔雞毛洞雞腹人生快意縱一觀
寧知強者弱之肉老人呼兒掩蓬戶雙淚階前抱雞哭
得失應知感塞翁安危何事看蠻觸君不見屋外連郵

菜甲黃年來雞啄菜多荒衰齡爾亦忘機好卧看青山

下夕陽

洪烈婦詩

夫爲洪妾爲葉夫名志達妾家歙夫何爲書在篋妾何
爲絲在匣郎前還顧妾眉行不離睫一朝夢破金鼓聲
鏡中弔影花中泣妾行不下堂下堂死生隔十步十不
忍一行一嗚咽兵言欲生不欲殺白刃差差繞三匝夫
死乎刀在頰妾免乎兵在靨不死溝渠死山峽碎身示
汝全軀法郎竟歸年十七妾竟歸年十七霞冠羽衣竟
欲活里人作祠歛神鬼神告汝貞蕙汝節客死淳安家
歙州九原竟竟悲難越於堞皇天構難猶未歇有田不

耕走倉卒妾死因夫夫死兵一門大節差堪匹人生忠
義寧有激蹉跎失身恨難說他時重過里門看後人無
愧前人烈

歲暮雜憶

盛處士聰

問訊先生疾相逢涕淚頻言將告良友及見汝成人先
君舒交風雪遲眠夜須眉入夢真應憐猶子遠誰更尉

長貧

盛處士曜

先生能嗜義破產未爲貧樂志陳離坎傳書愧甲寅先

無子開齋

酒人朱亥近高士井丹隣一訪西頭市匆匆

肆於市

又浹旬

侍御舅氏

爲定依人計當筵不舉樽一書貽日下百里走師門親
老原難別途窮易感恩白頭期望意豈歎在高軒

大令舅氏

半里雲灣水波光映閣東儵然讀書鳩清絕使君風夢
繞渡驢外春殘竹馬中誰言甥似舅行跡共飄蓬

十一叔縣尉

四十須眉富臣家叔不癡更尊輕縣尉俸薄比經師數
口拋三地微官轉四時相黜黜文尉謝吳江南芳草路及

此賦新詩

楊大統舒

百里澄江路波清見汝心貧無一椽隱交到十季深臨
別曾沽酒牽衣欲賣琴與君門巷近爲慰倚閭吟
分題蕭士雲所繪離騷幃子

筆頭蕭蕭如有聲水勢忽壓巴陵城湘花豔心覺春重
楚女照水知波晴神雅晝飛日沉采騷人不來魂已在
餘紈更乞理心神珍重秋屏寫山鬼

元夕詞寄里中諸子

月出春城霧氣消客中情緒是元宵沉沉一樣尊前月
不及谿南挂柳梢

兩條門巷對谿流百舌春來噪不休劃斷雲溪春一曲

蔣家明月趙家樓

趙大懷王蔣二青曜皆居雲谿

路入楊園春正賒風光多被女牆遮一條芳草玉孫巷

綠到橋南是董家

董秀才沅居玉梅橋

留客橋南縱茗譚滿谿谿水碧於藍罨殘不放春城鎖

吹角還知待左三

左天治兄弟居城東

除夕

漫天霜雪朔風涼客久驚看鬢亦蒼逝者如斯誰惜別
酒行以札總思鄉無多苦語憑南雁不盡名心爲北堂
猶有天涯知己淚緘書欲寄更旁皇

元夕觀舞榭

魯酒客不醉吳歌聲漸沕如何當筵上絲竹轉幽鬱傳

呼雙吳兒階下立屹屹舞態猶逶迤歌塵尚全拂一呼
心鬼蕩壯士膝俱屈雙矛白差差巨刃峙屹屹圍場一
何徑先標里中勿霜銛試心刃神理不問悲隄然鶻初
起譬若泉始沸千奇悟一正轉展不見詘四座爲低昂
兩軍信奇崛彼龍睡初穩此龍領更拂雷驚偶呈半蜺
欲不見訖奇成鰲足斷快比鯨首荆行爲水崩注止作
山岫吻方驚堅城摧詎料殺機歛擇術匠亦然傷人唯
恐不鼓進氣不落金鳴陣猶偶技終作楚歌座客顏色
艸燭燼暗不光朱圍看成蔽萬物理獨至千夫勇難乞
終坐欲措詞神癡口共吃

觀魚亭

縱壑原多事誰云江海寬宵殘數驚起只自厭波寒

桂樹行寄大令舅氏

君家桂樹蔭數畝雷火銷鑠枯其半幹老猶穿闔闔雲
花開直到堂東畔曾聞此樹二百年時衰時盛皆其天
窮冬有時亦作盡異事往往人流傳南省歸來氣灼赫

為外從
祖芳洲

白玉堂開置賓客星欹月落客不眠露重時聞

花歎息阿新鞞親十齡索梨棗花下憐余猶在抱摩頂
相看意歎深寧知轉眼成年少殘冬遠宦趣束裝鐵鎖
卻合平泉莊舅氏令花時偶向古塘過復柳猶作兒時
香甲申相傳此花白卻值銀城罷官日堂開驗取看花
人阿新作須予十七爾日相看尤跌宕文章孝綽波瀾

壯酒酣顧我久不言指樹爲公作宅相隨花北開怡老
堂彌甥出入咸奉觴深秋驛使嶺南至荔枝紅傲巖花
黃六七年來事非昔桂老香殘土花蝕一作招魂楚些
歌蕭蕭大樹悲無色外王母饌太人生幾何花滿眼對
此唯嫌酒杯淺三度摩挲已白頭使君堂上生秋蘚
時羣從六七輩阿新別我客江館秋到偏吟招隱詩花
開翻讓遊人看此樹經年生計微重來樹亦关人非何
時更向花前醉一訴君家全盛時

古栢

太平使院分賦園中草木

不知何年樹尋根不能到枝低獸鵲借心空百蟲開物
性謀安居催君路旁倒

斑竹

春來爆竹聲災及松與竹寧知枝柯上斑斑總成玉莫
待春雷鳴龍孫先徙族

薺菜

食薺味苦酸食藿饑苦併青青一畦菜味與蘿蔔永愁
看三月三挑殘不留影

池草

離離千百種種種出池沼深知造化心無名爾偏好一
與春風緣還應作小草

尋三元洞因登妙遠閣題壁

老僧竹屋臨空嵌隼影不動蛟龍饒鐘魚一聲夢初覺

能使風聲水聲約陰房夜冷石骨青神靈帶雨來聽經
卽看岸勢高于屋春水生時手堪掬我行涉險愁無梁
老僧穩坐江中光終嫌禪性滯江性目所觸處無空蒼
名山結廬此弟一脫有風濤百不失消沉閱盡往來帆
總覺輸他一磐石

壬辰元日立春

羲和鞭日一何駛帝恐崆峒移甲子天門夜半奏厯元
以龍紀年德在水東龍不銜北陸尾三百六旬從此起
僊人一关春初蘇當春開筵名燕喜百季所見亦僅此
元日立春書太史

春日

白日看雲坐小齋
閒無一事入幽懷
林禽告我春無恙
小樹依人影亦佳
病酒心情愁栢葉
看花消息到芒鞋
離居一倍風光好
閒煞城南十字街

與黃大景仁夜話

已識牛衣賤還驚馬齒加
新春同作客多病歎思家
山色連晨雨江聲入暮笳
吳鉤三撫罷相對惜年華

偶成

客行持鉛刀利乃勝金鐵
持之十數載慄慄懾虹霓
匪伊鋒刃良所欣不能折
心空聽螻蟻萬牛齊鬪穴
末俗爭雄心聖人抱雌節

送陽羨萬應馨歸里兼寄趙大襄玉一百韻

束髮事結納所交蓋老醜茫茫視六合投刺頗不苟閒
身薄監厨借面寧哭輒街西翁八十先揚笠雲重我似瓊
改爲言君子交種苗先去莠我時感其語背誦不徹口
平生交屈指三人數成耦趙生紀丁亞楊生紀乙丑毓
黃生己巳歲景論年處其後與之三子交登堂俱拜母
楊生棄經史謂欲處養牖經歲不一出戶外狸跡凡生
平重天倫家庭樂斯厚德曜識大義聘至職箕帚晨昏
偶過從足跣面嘗垢我時規生失捫蝨衣始釦與生里
閨問重生比瑩琇時時道予病語語皆壓鈕蕪能新機
闢不使故習徂出門望雅巢知生宅邊柳趙生處羅綺
不解事矯揉豪門苦屏跡偏欲結屠狗窮經辯亥豕讀

書究蝌蚪有時四座上譚空氣爲繆挹生汪洋度百川
總能受狂奴禮法脫藉子作關紐憶昨設廣讌酒陣肅
刁斗生宰季氏費我司孟孫邱忘形三齋後劇陣屢勝
拇快若敵王愾巨鬯錫一卣又如玉斗讌惠一生氣肘
壯哉秦雖雄爲趙王擊瓠生詩夏近道水清魚櫛櫛五
言築長城不遣戎馬蹂如升岱宗立一覽关蠓培造物
忌同調分遣南北走窮遊困逆旅作書抵太守沈太守業富
猥將片長揭至此覓升籩窮冬憶親串恍若兒戀毅於
虜黃公覆亦復遭衆掎狂來入酒肆夏遣紅粉詎因饑
聚師門朱荷河先生吐珠作才藪天涯知已樂頓改顏色慙
譚言偶抵梧南東別其畝繼還出肝肺持刀欲親剖生

時作一篇恒畢勢偏隄偉哉古錦囊十年心血嘔生才
富集腋我才慙傲苟微嫌神太雋理或不能壽嗟嗟三
子交離合無不有貧病予總同踈狂爾皆不頗羞儒生
酸意學勇夫趙此歌彼卽哭我唱子能喁緣啣火牛縛
俗訝雪獅糝有時發大言忘身在杵臼趙生體微弱楊
生色微黝依依寸草心爲隣結薜荔君從何方至一見
氣抖樓鵝籠處已慣新詠成一簣黃鐘在東序焉能寸
莛扣如陳光明鏡刮日到矇眊終當兕出柙暫見龍在
湫劣魔競摩壘藉子作扞極貢之入玉堂謂足俾我

后抑聞韋布樂何必結纓綬凜君意氣盛訝君昏算叩
君言昔尊人才名重山阜

君先人舉丁巳鴻博弟一官翰林

衰年早見

背零落成不偶惟餘貯書富四厨逾二酉蘇頲風有父

無忌酷似舅若先為鑿我意終勸君歸家理葱韭前堂

種松鞠後池插菱滿土風山名茶勝境湖結茆閒身一

聳立快若脫械杻相期臘雪前來遊備乾糗山蔬及邛

芋一醉酌濁醖君謂僕言善向我覓良友我敦古處交

為一數基某君歸倘過郡先揖趙生否予登峯六六時

借學使聖子在庭廡君言春山青稱此笠伊科我愁博

徒去撇我飲春酒春盤鯉堪煮春蔬麩堪溲人生數樂

事寧復焙此石恨不從子歸悲哉魚麗留季布恥作髡

食其人晉鯁無糧乞仁祖有酒貫武偵悠悠薄俗交咸

工上其手謂我衣垢敝曷不少忸忸幸師金人銘括囊

尚無咎君時聽縷縷歸心已先誘君嫌識予遲我曾耳
君久新交雖可樂故交尙回首書疎憶楊趙客愁慮黃
九生平友作命嬌婉不到煩因君寄新詠俾若覆醬瓿
爲言苦著書欲以傳不朽離然見結構或尚少糴溲終
當致全力十絲成一縷傳之使後世知山有培塿兼期
遞消息一爲慰黃耆定知屢空悲無米實瓿甌

憶城東元妙觀古松

城東古院計以七靈境歸僊不歸佛院中喬柯計以百
古意歸松不歸栢眈然七尺橫路岐細看疑蛻蒼龍皮
左家兄弟皆好奇淺醉來坐雙狻猊我行來遊日嘗再
對酒看松有深會十年學得種樹經草木蠹朽咸乞靈

籬頭小試苦無驗無乃欲速戕其形松根老人識真意
草木相持此生氣半死桐心苦鵲巢全虛檜腹因螻蟻
此松得土氣最先偃卧猶足支百年握苗助長古或有
異事慎弗陳吾前枯不見筆架山前響春雨謾謾時聞
作人語輸爾支頤道上眠斧斤不到棲神宇

送江都江中歸里

汪生手攜萬言策賣書橋下曾相值公然出語爭錙銖
白眼逢人百不識爾來對策何豐腴紅綾本寫君唾餘
君言此事本偶爾三載一至慰倚閭撐腸拄腹苦無驗
手把奇書易長劍去歲君盡以書簞寄仲則處易長劍去報道將酬國士
恩不逢知己才猶斂官書堆案日不移君昔樂此言不

疲裙備書詠乾坤一身任驅策親在詎敢言非宜我今
勸君歸計速樂土何如反邦俗他時好結竹西隣白晝
從君借書讀

牆上蒿

牆上蒿一旬高一尺回身視根株知君不能直
牆上蒿三春歎綿延若非年命促那不愁刺天
牆上蒿結根當白日寧待霜與霰節枯由觸熱
牆上蒿乃界東西隣成陰苦無多兩處欲市息

青山紀遊

曉日挂絕壁沿谿溯松聲流泉合諸山下向百畝傾茅
籬八九家麥隴左右橫足知賦稅外尚有闕田耕老翁

七十餘手足尚喜輕頗感造化功一雨亦久晴東巖有
化日聊以終吾生

造物無棄壤山險作雁田陰蘆風蕭蕭繳入雲水天荆
棘穿我衣草露滴我肩一念昧素機百態逞所便明明
人子身忍墮豺虎前披衣偶忡忡心如月初絃

豁回日亭午崖轉天去尺浮雲態紛馳千里一改色各
襄東西志微願不克適心空半潭綠漾此峯影碧宿羽
不可追巖花关行役

空山節候晚桃李初舒芽流泉清淺中祇惜無桑麻墓
古子姓盡生意并作花顏光入永夜顏色誰解誇人事
總如此歸途溯平沙

四山合一澗中有毒霧黑回飈蕩深徑松子積一尺陰
崖走妖氛絕頂結晦宅造物自隱忍阻險俾養慝自非
光燄竟雷火不敢蝕巖空少留雲林深渺停翮我行憂
境阻欲假神鬼力晏景不可停咄哉蕩心鳧

當禽道中

稍稍雨灑塵微微轉春氣平原三月中穠花豔天地間
雲霧東至春空亦微膩游蜂與蛺蝶後時識真意所居
異鄉國微覺風土異郊原計尺寸物力多所棄遙遙東
歸心欣看麥成穗

日出廬井喧流光照虛晨山田極柔桑尚有無衣人孩
提率牽袂苦語出性真我哀道旁辭感激爲重陳造物

內魚車
息百年未補一日貧慘舒各殊抱何以歸真醇桑榆苟
堪耕此輩非游民

南陵道中

卅里南陵路藍輿古道閒怒雲生怪樹濃綠門層山麥
氣松衫入禪心鳥雀爛還因去程急未及訪予關

遊水西登烟雨亭

一水阻洄勞送迎一石隱伏岡巒形穠花遮馬不得過
駐馬下數山花行十里復五里乃至烟雨亭是時尺五
堆春陰咫尺不放春山青頽然倒影暎虛壁不再常覺
烟冥冥風光千百季濶遠無近情逢山問山百不識蒼
翠複處難知名吟聲落水開青萍清切倒喚遊魚聽謝

公吟詩景猶在好句剝落如殘星沙洲芳草晴沙岸桃
花明人生好景不久駐遠夢忽送風塵醒

三月十五日楞山道中

青草都愁石路幽馬行真與雁行儔百年親在還行役
三月春歸感去留好景總思前路轉名花行抱盛年憂
此身作客初千里鄉夢依然共水流

文家宗祠看牡丹待同人不至

文家宗祠在何處三十里爲停驂來官厨待客久不至
下馬淺步尋蒿萊桃枝剛行綠成隊細數猶憐牡丹在
野人屋外出不窮不看花枝看旌旆晴鳩一鳴春更長
刚刚點入花枝旁閒雲白日偶然失相與屋角愁年光

憑闌坐深客初至草草看花畢春事斜陽官道閒無人
重夢谿南白雲寺

休寧道中

郊原四月雨麥氣生微涼蔬花與來牟千里混遠黃父
老亦有言孟夏刈耨忙晨光赴東菑晏景來鹵莊茅籬
出烟火飯熟待早嘗計往望始奢取今願初償兒童讀
書歸拱立伺道旁青青隴頭梅裏衣試取將懸未會有
時與子休驕陽

附鮎軒詩卷第三

陽湖洪亮吉著

黃山白嶽集 壬辰癸巳

齊雲山阻雨

客心已馳黃海雲天意還留石門霧
信知幽壑夜難涉無乃山神期欲誤
香爐峯低五老高十里雨腳嘗周遭
禪心入石孕奇理虎氣逼夜森秋毫
名山遙遙數佳客佳客曾經舊題壁
黃大年題壁詩有戲院茶香隔座許
暗探事冷他年費重憶連宵官鼓破
客眠對此那不思久淹吾轡行止匪
所料咫尺自有神明監明當出山訪
行蹟瀑布珠簾淨如拭後隊還吹羽
客筌前旌欲宿幽人宅

將止小谿遇雨

晨陰連衆象雨勢薄炎方絕巘風雷合高原草木長
荒依斥堠馬病厭津梁一夢藍輿足山花美客忙

葉嶺

獸峯峩峩百尺身刻削極處歸真淳地靈草木識山性
石骨自瘦膚仍春摧朽星辰動陰魄元氣冥然室生白
信知太古縱森峭那得良工恕斤尺

唐塢

我行出谷常背日荷葉如錢繞田出苗荒不及野草青
穩望秋收老蓮實野人無事愁日長簑笠出戶鋤懸墻
出家生事尚如此安得愁風復愁水

由中溫沉痾亦當捐滌煩庶歸淳

文殊洞

履危信千殊積駭非一狀晨遊藉僧侶夕止託神貺孤
生寄危磴一轉一翠幃諸峯漸莊嚴雲霞從奇相千繩
束一綬步窈不得放差無虺茲懼已見星緯上束炬入
巖竇捫壁類古壙聞呼歎前踵怯響屢後望峯形覆空
釜口缺人遠亮翻疑造化力至此斷心匠留茲胚胎質
攻鑿至久曠陰泉滴虛房乳香流佛藏持梯抑何晚升
陟固不讓憑崖步初憚中竇神始王回瞻北斗光空濛
永相向

文殊臺望天都峯

茲峯九百仞積厚撼地軸青冥阻元氣久視眩羣日危
峯閃虛聲冥雨隨所觸回飈蕩遙紫倒影虛衆綠東南
此分際層累不厭復元黃彙江海一氣轉澗谷云茲出
雲霧藉以被塲黷虔表合神符忽值峯頂沐連陰阻卑
眺展昧引高矚我尋輿地志藥物此取足明霞積松膚
華星綴芝因遊輓契元木居人餉黃馘陰晦理鬱盤宵
分展幽燭靈區尚能駐徒侶不更速終當上孤雲冥心
碧亭毒

夜宿文殊院

客行無朝昏百里相芒屨違阿詎成厭履崇信非遽名
標恣屢盼歎妙寡衆翼詎少一寸陰界生諒難據枯蓬

山坑

山根竹雞啼向晨催客遠夢舜風塵采采霧邨出朝日
春水對戶思幽人山川西來忽平曠錦石都隨亂流漾
三家飛雨屋上鳴四月桃花谷邊放

雷津

東行出險常左顧如夢谿山忽無路炎天徑有黃葉飛
春水人知白魚數薜蘿深門帶濕開似訝空谷喧驚雷
山深徃徃厭車馬日午誰看官長來

從焦邨入黃山至慈光寺宿

歌晨雨無極淡晦火旣濟登壑有戒心違原陟危理巖
紆氣森森谷虛水瀾瀾同茲登陟志難令僕夫喜青冥

林猿嘯嘯黑踏虎屐山川夜氣足素景沉不起感往詎
有窮陟今遂難已瞻峯僅前路人寺或數里勞生苦無
暇明復戒行李客感一飯蒲門荒百年祀

自慈光寺下山二里浴硃砂泉

南郊鬱炎理黍谷紅涼氛真疑造化力不足齊冬春何
茲坎離交振此水火原法良自不流集渙罔測源屬洵
理固殊覆釜狀亦全互疑百神居湯沐錫自尊留茲北
戶積盪彼南風董含氛不停扇轉垢詎止輪尋源有同
愛勞賤固不分流香沐幽叢積潤歸山根調停果誰司
頗感涼燠均我觀寒暑途陰陽積勞薪晨曦不停阿夕
馭詎息津頰光燭流膏元氣固不存明明鑑止水外爍

迤東轉陽烏慘西馭歎鵲不一鳴孤雲總成去犇湍響
初雜嶮巖觸成仆居人持火照洞黑訝虎踞回崖出深
林冥坐悄衆慮峯明佛鐙見院古菽黍具歎寐不敢言
晨將戒徒御

夜起登蓬萊島看日出不見一名倦掌峯

成此歎徃心孤猿屢窺戶聞鐘念初覺出寺僅數武沉
沉壑光斷荒荒白雲阻昏晦持一鐙幽林變溽暑流星
掌邊下宿羽巖際數朝霞信清華殘晷虛卓午坡回屢
心掉峯中始軒舉盪此衣袂雲還成吳會雨沿輓草抽
蔓絕壑風振緒亦感筋力疲孤筇設迎拒誰行深谷中
泠泠出踈語

蓮華洞避雨

雷鳴山幽幽電轉谷爛爛
峯前十里雨引勢殊未散
輓餘烏道喘路豈猿穴憚
棧巖此其一盤礴理孕萬
頗疑雨工居陰晦若未旦
流雲聳虛聽交枝阻幽盼
詎寡向日心愁霖已成慣
昏霾悅山性淫泥積神歎
去惜蕙草衰留成白雲綰
單衣念徒侶空谷屢薜窺
中峯雨稍微攀條上狐幔

冒雨登蓮華峯

薄蘿無天風積氣晦
一山鳴泉不知方出步
冒險艱去景炫谷中留
猿響松間稍霽即復蒙
但覺草露環流去
合山崩激電與谷還
中峯束語標呼吸
競一關驚枝不

留禽振翮響已殘回崖雨初昏絕頂日復殷荒荒阻東
南沉沉盼區寰名都以歸天帝命不敢盼止壑內景虛
出表外象殫羣生有芟除芝草簡不繁回瞻鬱千盤徑
絕不得攀櫟升信堪憂勇逞誠知難

自文殊院下雲谷寺別休寧戴霖

臧巖渺流光出壑寡積陰涼暗本難齊草木各有心峯
明炫朝芝道濕茂紫葭感此向背途感欣頓殊襟不惜
巖岫回成此灌莽森十里達深湍引領望遠岑余裹鬱
紆多吾子饑渴深積瘳已浹旬寒暑詎不侵君其表藥
物贈遠余所欽途長入雲荒景慘帶谷沉明發各異馳
誰可慰積枕遙遙寺門鐘沉歎勞相尋

發雲谷寺

豈不願積淹離陽不停晷君看密葉上陰陰候禽改朝
 霞綴春鮮夕景被夏采深茲襄哉念復恐後者悔觀魚
 入幽垌看鳥擇爽塏峯離自成獄川斷不入海以此望
 遠心山川庶能待前門戒五兩慘戚僕夫殆奇標信觀
 止孤懷有專美

慈光寺觀明鄭貴妃所製袈裟

老僧破衲生春風禴禩如雲降九重九重鬼神識真意
 監織萬縷霞光紅霞光紅逾出川日內府珍奇此其一
 三番宮女催繡遲一騎中官入雲疾萬人集福歸一人
 神器已曳空中陳祖宗朝庶自有法欲假佛力回明神

嗚呼乾寧宮中職何曠天地兵戈開甲帳東南織造苦
不支一半今歸法王藏當時恩重慙孤僧諷經朝夕啟
大乘披衣入座祈冥福日月已暗長明燈滄桑一百季
遺物猶久存黃封鄭重貯匣底尚謂此出深宮恩我謂
陰謀本無用玉合銷殘字龍鳳建業山川不出雲洛陽
宮殿今如夢劫後袈裟未作灰嶺雲窺戶野猿猜長生
枉向空王乞不見秋風思子臺

黃山松歌和黃二韻

於虜越匠不可逢擁腫拳曲無春容乾坤一氣轉巽艮
斯石爲石松爲松松華不承霜雪餘石妙欲出膚腴中
中臧元氣蘊雷電火土木石皆從同神祇千年愛護一

介則集吉剝則凶吁嗟靈境與世異太古本遣丸泥封
地靈藥物溢丹井帝憫黎庶遭鞠訕中橫巨石忽裂一
精液已涸無由縫卑枝無言入樵斧合榦已破纏交蹤
流傳世人不解愛詎有蒼翠蟠心胸裁枝屈盆恣糅矯
輦石劓骨工磨礪山川一朝物性失光怪已去神不從
其餘巨者庶免刳肌理入石無初終山花分紅極窈窕
幽草判綠何蒙茸含苞不虞神鬼洩落實分遣猿猱供
我知畫筆不得到只有顯晦無春冬驅除極感造化力
早以魑魅投寒空陰崖點入勢益陡南北向背皆從峯
根株偏能孕靈藥牙爪誰識非真龍我行十步卽一憇
樹亦接引如朋從理奇終恐化作石轉運始信非人工

軌偶相值遭此震電馮嗟嗟百季餘其道若土崩列宿
爭天躔蟲飛更膏膏餘姚暨四明月晦置一燈作論偶
抵括厯今無殊稱志乖理則合于穗彙一睦後來羣師
儒厄言競鈔謄私爲一家說遑辯淄與澠宗規旣守株
勦義若裂繒不逢朱絃彈瓦鼓還磬磬逮今遇吾子匪
伊異人勝乾坤師儒席位置理亦應憶予甫成童授書
邦顏曾平生師友誼誨語常兢兢因端吏推委所苦常
無徵如星列諸說誰作旭日昇惟茲兩夫子平時亟聲
傳欲恃意氣隆作論擬闢僧蘆蒲及菰蔣妒此獸角淺
終嫌毅力薄十載少所澆抑聞爲山卑道在如月恒寒
蟲晒陽雁晦羽悲辟蠅啾啾覩百鳥斥此垂天鵬君子

審所自不懼世俗憎俗宗從東來群山失峻嶒途長有
如年詎敢跬步凌我寰一篲土欲補邱與陵使彼後世
言淮水支分凌逢君記前時還若無一能汪汪千頃波
久之不改澄人言大羅天羨子健筆凌君時一回首引
領瞻觚稜回帆擬著書鈔殘剝豁藤枝條千百年貫之
以巨繩有時一傾吐譬若火上騰童牯競癡點俱欲麾
以肱聞言舌不下几在詎敢凭回知誘誠善連少間可
乘謂宜藏名山後有作者與我欲書緒言愧乏一束箋
不然別君時置之在行滕蓊蕪日以深見此觸石鮫炎
臆日以酷見此鳴秋蟻風裁此吾師敢云誼則朋相期
事邇勉道統開雲仍我觀古師儒好修管受祊後來咸

同邵進士晉涵尋益然大師塔不得

大師裹足褊襤衣佛手曾殺千熊羆飄然來歸竹牕下
野鳥入掌呼晨饑浮雲白日忽一轉粥魚聲長鬢毛短
緣牀鼠怯劍氣腥隔竹猿窺箭瘢滿旄頭星落白虎傾
亘亘宇宙當銷兵海濱招魯豈同調午日弔屈斯平生
於虜男兒生爲冤禽死作佛生憶名山死歸骨天都成
雲濫胸熱上升爲星下作石枯殘姓氏何足惜自與此
山同始卒

贈邵進士晉涵八十韻

伊余少遭疾廓焉昧趨承聞言善可師百里欣瞻登天
子導前路簡河饑起摩秋鷹陳編始相習衆義恣轢較

迷津不逢混浩海愁難溯夫子謂我言師友善者登予
時學括囊賢勸惡則懲所欣君子交循階竟堪升窮冬
遇霜雪百物志已凝君乎遽唯唯賤子慙僂僂專家愧
墨守昧埋咨疑丞沿流築卑堤引梯導初層譚言偶微
中譬若矢射弰貫珠何累累古義若引繩頗感四座中
百問亦百應我裏其如何易炭更置冰自從熹平來經
史毒霧蒸新蕪暨陳莽誰薙千畝芳鄒愚竟闕魯薛恥
欲長滕秦氛更臨晉宋虐竟用鄙推之興廢源楚失齊
亦曾觚亡不存醴鼎廢空留齊尋源昧先河識小紆于
登堆甸富陳言得一卽自矜爲儒競綿叢守官味徹蒸
不審涓滴微遽謂滄溟增如聽十五絃小絕由人拒殊

醜正規負競磨棱含沙旣沉骨切膚詎知藤引獸俾決
籬負魚致亡晉終當憂迷途曷不大道陞我欲家置喙
苦裏誰共悵一綫苟有在誓當廓之宏君子有贈言鄙
人謹服膺

次韻

邵晉涵

亶安月在塞辰輪三角承我初來姑孰夜解雙縉簾
是時月生霸霜氣搏翼鷹見君廣座中風纛幘車轆
詞源沛溟漲汴却海可淵探裏出歌詩古樂三階登
用咳棧以間克壯鼓得懲異才獸挺出軒鶴從朝升
因緣比舍居朽著占合凝予方病些羸旅鳧愁僕僕
縱有鏗鉉音不得喧聳丞君持五色筆解贈三花層

引綸貫史事往若矢決弼繹徽準經義古訓相糾繩
聞言自跡俯瞪目不敢鷹徐觀謙謙裏舒卷一幅冰
矯然秀楚質不遺薪與蒸吁嗟瓜園後大道理榛芳
火燎勢中裂川沸氣上騰淹中迹游夏棘下保杞鄆
枕膝授芟滋祕義得未曾粟階不泄事誰辯菹醢脊
張圖昧東西水豆雜瓦登秦延廣師說煩言亦可矜
敷陳若稽古志豈邀祠蒸高密景羣言屹若堂墻增
中聲定律呂候氣得互扼誰傳聖證論異議相削馮
清言繼颺起防涖俄驚崩冥心從臆決蠶語終嘗嘗
蠓老自纏繭蛾昧欲撲燈班生譏祿利揚子嗤名稱
變本彌加厲一決頽馮胙陳言強皮傳百手爭鈔騰

汲古資深源曷不泝淮澗飲必戎菽稷寒賴裘葛繒
六經出土直絲竹綿清鑿百心挽之東馱力健者勝
束身絃誦間摺理亦應遐躔正昧朔圭絜傳高曾
旦亡利牯脫夕惕懷冰兢不逢澹雅才微言誰與徵
閭闔春風來朝日丹霞昇江南山水窟烟蘿被盤偈
青山破風雨暝色延枯僧西峯屬東阜分簇尖尖蔭
跣足踏流泉蟠木曲作馮續窮蹊轉仄石仆徑絕恒
長松落鳥嗉草潔無棲蠅援摻跨長脊巨狻拔海鷗
歸攜素石一獸愛人所憎去作黃山遊氣欲超峻嶒
黑雲屨素練深澗一木凌山花大如拱俯引松拔陵
縣霑穿青崖別竇通陰凌躡空隻手易繩險一躍能

夕陽開天都灝氣浮蒼澄諸峯梳合沓爬剔瘦骨凌
別尋蓮華邃華應峭出稜敲枝下勾曲絆足疑藟藤
急雨侵回巒瀑卷版斷絙沿溝下雲谷迅甚快馬騰
悔不老巖岫枕石拳其肱逝將遊十嶽志在力可凭
知君兼人勇果決超先乘願以嗜學心望古迥然興
與君結綯繆投貯報以綾今君賦歸省殘暑收絲滕
吟篇溢篋衍光彩輝文鮫江蘆繞紅芰岸柳嘶涼蟪
秋風已可裊矧此別友朋川衢慎起居執祛語頻仍
恭聞慙人言好學爲祉祢山川豈云遠吳越一葉棧
伊余踈檢律結體多疚癘遺文思網羅慘漏張缺罨
期子事箴規引我從善陞在遠諒日篤內鑒同祇悵

泰岑積土埤基鞏業自宏物恒垂典訓君其縷厥膺
十九日遊齊山偕同幕諸子

吳牛頭蓬髮偏寡五旬一出如犇馬厭煩不隨朱履客
逸興早弄僊壇瓦東郊堤長竟三里列騎傳餐走其下
須臾合隊簫鼓鳴濃綠山光淨郊野群公翩翩盛誕展
賤子悠悠愧都雅青山正銜郭三面當杯不言我心寫
半坡盡隨巒氣入高閣總與湖雲瀉沿谿草暖展齒回
出屋花濃袖香惹茶杯當窗客思靜我行看山願求假
捫碑自同蟻升木伏險人驚鼠憑社愛山山亦識真意
合影回光向松楸山僧勸客顧不停獸木瓢傾復難捨
瞻西白日忽不駐古栢含蒼谷流赭歸路誰憐匹馬遲

一堤楊柳風灑灑

遊九華止一宿莽

西沛百里江東照十里郭巖光溢郊野黛色轉澗壑侵
暝走山店馬首青欲落羣峯勢中斷深竹補翠幙石頂
一寸光離雲自噴薄愁霖甫歸澗山月已在閣草香間
鳴蟲松聲契歸鶴心期東走岱誓欲南赴霍愁無裏糧
具十載空宿諾茲山暨黃海數郡秀盤錯對此石骨適
危峯憶蓮鍔歡游念旬日久與猿狖搏孤筇半生事寧
勞四禪縛齋遲殿前磬暝憂巖際鐸撫枕不得眠雷聲
殷遙嶠

自一宿莽至中峯

踈鐘動蘭若日華在朱樓
睠言視吾徒明發不與儔
出屋始見山啟戶礙碧流
延緣上層阿竹密阻且修
寧知高峯雲出處尚未謀
回瞻及林泉一一金碧稠
居人香火心列屋無平疇
雲仍五百家晨鐘炊烟浮
朝餐欸伊蒲一飽未易酬
五月山氣涼江聲拍林陬
誰能持回光照此絕壑舟
僧卧不復言長廊繪滄洲

天臺

中峯抗佛殿累累數百級
人攀鐵鑠竟千尺復起立飛
泉走巖竇龍卧未敢汲初
程事牽衣猿猱步難入同儕
去百步顧視不可集履石石
欲下犇瀑勢踵及勞生幸
出險直復眺原隰人言天都
雲百里光可吸支筇暫思

憩復與孤僧揖山月出白扉盤猿幸粗給僧雛資半被
骨冷起虜粒林深巖氣重蒸此簷宇濕空山五月中水
寒蟲尚蟄挑燈夜難寐窗戶坐補茸聞鐘百年心披衣
出遊急

東巖

拔勢飛鳥外形奇覆樽巒肩輿折層梯客到花亦開僧
房壁流泉石屋架古梅回瞻百尺餘乃動隱隱雷諸峯
漸沉西巖雲怒飛回一洞不獲升千佛合講臺山僧諷
餘經流霞燭深杯驚看爆竹光百丈飛紙灰巖花與之
俱飄飄蕩林隈餘景綴北窗激電復苦催卽欲東下險
看雲尚徘徊間蹤倘能留把卷親石苔

九華道中

近郭郭亦青山光雨難晦征衣山翠厚顏色飛鳥愛肩
輿入深林餘陽復曖曖炎天異昏霽高阜互向背升中
忌前顧折級戒勇退行李復載途勞勞感負戴平生夢
五杖十載始晤對偶與閒僧俱孤吟出流輩

半畝

半畝園前松竹虛憶從江上慰離居僊人閣冷棲靈鵲
遠道書來落蠹魚卧病九秋勞問字薰香三座惜牽裾
窗深不貯能言鳥枉自傳牋及小胥

曉泊當塗

曉色入深港停橈問古原人稀楊柳密邨僻鸛鵝喧不

雨思祈社無年學灌園朝歌爾何意隱隱度崇垣
塗行遇雨因止白馬山

不信龍山雨還隨轍跡東怒雷奔白馬急景亂殘虹天
意成嘉穀農心契晚風匆匆駐征騎與飯芰荷中

八月十四夜病起看月寄趙大襄玉及里中諸子

憶從出谷攀楊柳匹馬西行渡江口半月羈人白板扉
三季作客黃藤酒涼秋八月庭草荒山月映面凝顏黃
堂深咫尺不敢過時復蒼鼠窺長廊客有吹簫間擊鼓
中座聽歌氣如虎紅燭如山月不流花枝照眼方亭午
夫君自昔擅佳名謝家賓從羣有聲暖風遂起蕭王里
夜火人歸泰伯城城頭戍鼓催殘漏漏盡還應續清書

置酒堂前縱客譁題詩扇底矜篇秀五夜江聲擾客眠
烏啼歸夢自年年途窮久遭鬼數齒室靜那得狐憑肩
西隣刻燭嫌宵短我惜寒蟾夜行緩千里誰回落月光
一壺且遣深杯滿

中秋病甚借黃二景仁飲

白駒抵隙先回戈蝦蟆食影騰巖阿銀輪椽斧聲未絕
破碎光欲含山河星衢無雲極韜采列闕四遣新霜磨
人間華燭不留影天戶乃輸金作波餘光延綠照深室
顧視清切捐煩苛巡檐乾鵲噪空闌挂壁葛蔓纏交柯
頽山忽落一片影絡緯滿樹秋聲多檀槽拍板夜不足
幾不誰聽勞人歌金陵酒通重山積兩歲過訪頻遭訶

塢來江北復逾月寒鳥徙木蟲離窠承君攜壺尉離疾
飲卽不醉心先荷挑燈對君飲君酒酒半惜我遭沉痾
人生少季不足慮遠夢幾夕勞穿梭長歌聲煩短歌促
對影起復三摩挲江頭銀浪飛昨夜信使咫尺愁難過
高堂加餐問未得不寐輾轉遑知佗感君興發猶吟哦
新詩百篇韻不謫東方欲明奈爾何努力且試金叵羅
十六夜歎坐

我胡不樂入復出無酒空辜少年日張燈博塞無一錢
日入祇聽江聲眠狂蹤還憐舊濡首十年萬事無不有
自謂聞歌已後時誰憐不飲過重九中座倉遑窺朱屨
客不逢時同鵲起遠道裏人索鯉魚經旬多病餐荆杞

歌聲不長客不豪東面月出牆頭高巡檐幾雙白蝙蝠
喚眼尺五黃蓬蒿於虜歌成客何悄月入空林照歸鳥
夜火城頭戍鼓鳴寒潮江北行人少須臾起舞光娑娑
百季此夕當奈何人生會見金樽滿只憶中年哀樂多

江上寄遠

苦憶澄江赤鯉魚北風吹浪夜徐徐驚秋簾外覘辰角
惜別河梁指斗車天遠幾州樓堞見潮荒千畝菽蘆虛
愁心黃鞠離前酒不爲征人致蟬胥

出郭園亭數畝寬芙蓉照水若爲看檐虛鐵馬當風檻
淚爲銅人卸露盤飄泊梗思齊土偶蒼皇橘化楚枝官
心知未卜瓊瑰夢幾日堂前減客餐

登八卦城樓懷古

海客秋驚病眼蘇，江城西上眺平蕪。
頻年蘆荻生高壘，往日旌旗入小孤。
天險幾曾供飲馬，山形依舊繞飛鳥。
遺文地鳥誰相識，落日征人按昔圖。

登大觀亭憶蔣大筆新

北斗照大江，江回斗杓轉。
蒼蒼沙岸淨，落落長雲展。
海客驚氣秋，踈簾夜難卷。
哀哉念羈躅，泐矣良會鮮。
離居隔年月，吾黨念狂狷。
飲水共一江，誰知道途舛。
君愁鄉曲譽，我愧賓座選。
千里對客燈，寒光耿苔蘚。
華年事文史，獸處非所善。
風潮警靈烏，夜析吠邨犬。
何當山月輝，裹人淚初泣。

安慶清水塘弔余忠宣

野人告我清水塘曰
葺塘邊屢回步
雉堞丹樓不見人
坊祠碧瓦同寒戍
殘碑無文首函鐵
傳有中書舊時血
報道潮聲入小孤
靈風夜火紅旗掣
烏虜江潮翻黃海
灑紫海上琴隨伯牙死

秦不華姓伯牙吾台
他家僅抱琴從死

愛子同歸

北闕蒐老臣尚曳東華履
當日承明踵後塵
和州遷謫感羈臣
崇碑欲紀先軀烈
簪筆誰歸後死人
自集賢里至大龍山寄別邵五晉涵

集賢里中何所候
忽憶吟聲越都市
秋光照眼炫客行
驚馬欲墮寒塘水
大龍山高不出雲
小龍山北侵斜曛
人生道路不成別
明日饑寒解念君

舒城九日贈黃大

少賤猶能役親衰不近名避人來九日爲客起新正土俗寒偏壽天心雨亦晴無嗟村落酒一醉感秋情

題練潭館秋月樓

野鷹圍場徑十里野鷹落處飛樓起長川如練不能回動送征帆越江汜臨波館前行客集嘶馬渡波人尚立樓高擬眺月初升幽輝正與斜陽及

歸燕曲

浮雲急景須臾變江水南頭送歸燕燕燕辭家北向飛客行猶是滯征衣幸全毛羽非人力得傍關山便息機飛飛訴客飄零苦近海樓臺三易主御史空堂夜鵲棲

將軍大樹樵人斧重來空館雨廉纖子弟江南白髮添
尋徧念橋歌舞地幾家恩重爲開簾開簾入幔誰相識
莫更淒涼說寒食黃土成雲葬美人青袍似草憐孤客
感今歎息重依舊侶梁園亦半非尋常歌館侵花館
落日簾衣間舞衣當時相見張公子自謂平生總如此
百徧歡呼射獵場崇朝走馬城西市重門六月降嚴霜
鬼瞰空庭鼠嘯牀輸他野雀全冰雪記否征鴻有稻梁
一季一度還相見顧影梁間自生羨詎料悲秋識者稀
傷心久客逢人賤聚散無端感昔緣短書憔悴倩誰傳
應知桃梗流無定海外相逢更黯然

臯陶祠三十韻

黃屋衣裳古朱軒日月中九共誰第一四岳譽僉同大
澤思神降元臣翊運隆陳謨歸至道弼教本和衷職亦
勤虛聽心期闢聖聰曰稽符二典欽若佐司空永執刑
無赦羣推法至公瘖丞初立禁瞽瞍願持躬爪削看孤
立蠱強敢內訌兩朝天屢薦三殺帝無功父子許謀合
君臣精一通神方歆石紐禪已謝諸馮雲鳥搜官紀山
龍仰法宮趨庭原震肅網俗自恢洪唐傳留吁咈羲篇
續旅豐勲將十世宥律本累朝崇六蓼亡何忽蕭曹創
豈工遂令常叙失已見簿書叢漢典頻傳赦流民屢致
恫以威能克愛惟獄始興戎世系差僊李家聲混伯蟲
甄衰封未續布起跡猶雄禮樂雲孫守墳祠木德終荒

原餘廟貌古壁繪青紅揖讓熊罷虎森嚴松栢桐詠方
夔一足業比隣重瞳厯殿思成績瞻筵沐古風居人信
宿火行客薦新體氣已殊光嶽聲還振賸龔徘徊有餘
歎五百見知窮

六舒道中裏古

駐馬誰傳英布鄉連雲古冢接層岡將軍下策虛歸冕
亭長高臺早進觴三戶遺民悲義帝中原羣盜竊真王

時危莫自矜皮骨隆準相看只據牀儒學東岡舊傳有九江王英布墓按

漢書英布死鄱陽茲鄉史記正義曰布墓在鄱陽縣北百二十五里十三步則不在此明矣睨關州志英山復

有布墓蓋好古者爲之也志載有樊噲墓亦非

移家豐沛識真龍龍起先看荷盾從禮樂悔令元子嗣

四庫全書卷之三
河山初改仲甄封興王恩怨餘羹頰土俗謳吟尺布縫
猶有藻蘋堪薦處荒岡車馬自從容

胡廉使季堂貤封兄嫂詩

皇帝御宇叶睿圖季治天下光風敷

慈寧壽考依古無

聖德及嶽嵩山呼乾闥坤圉歌載塗轉轉殿殿仰

聖模臣職欽恤臣官吳沐浴頓首陳烏烏

帝曰俞哉倫紀扶父官宗伯臣幼孤三兄罔嫂逝忽諸
臣孤無兄嫂是舖四齡鞠育難未紓孤來跳梁鬼嘯除
嫂前勸之讀父書蒲筵在南服北酖一束五罔早夜儲
臣宗無人日荒蕪新鬼故鬼小大殊爰以松栢規以廡

猿鳴三聲淚俱枯曾言事翁未事姑醴醢酒醴黍稷
茅桂薜蕭輦莧蒲擘畫漏浴兼庖厨暢白以櫛杆以梧
十黍爲紮十紮銖內則瑣息晨夕需其甘如薺詎苦荼
百年女史乏董狐彤管有煒思賢姝伊前得姓早嬪胡
中道奄忽天無辜卅季守節節不污予手拮据口卒磨
憂能傷人恤恤乎貞鳧渺矣六載徂臣有身體有髮膚
臣不報德臣愧孥粵稽在昔禮守株不撫不問行路如
爲位而哭君子儒罷舉制服真吾徒以德報德始合符
恭逢

錫典慶有孚赫赫奕奕光泉途榮以翟第佐以孺臣媵
瞑目臣心舒臣官外臺奉職踈蒙

帝錫類報厥初王言如綸金石楨臣職三復臯陶謨
贈湯大令大奎卽題吟秋圖卷子

使君四十年正強六年令尹官大梁哦詩先按舞文弊
折獄早擅譚經長吟聲滿堂意超忽小吏抄詩腕幾脫
忽然好句落袖間猶飽羊脾口流沫圖中使君詩思揚
杲杲白日明秋陽寒蟬抱枝思同永歎鶴咽露聲俱涼
長身修髯美無度松下非君置身處老屋谿山北望深
栢城士女南歸慕我謂使君德在人滿意何不圖陽春
商聲近殺古所戒疑似無乃傷吾民使君軒然意殊俗
春凝于秋志初肅詠罷寒桃露柳詩秋光偏向衣裳綠

雜詩

晨風集悲鳥朝日鳴哀琴哀琴曲難和君子有逝心不
惜反覆彈所悲非好音停觴仰天歌浮雲晝生陰廐馬
振鬣號資徒各沾襟明明喬松枝化爲枯樹林明明朱
絲絃徽之以黃金

積思登高樓樓高亦無見北陸慘積陰浮雲生四面所
思在鄉邑何處屬吳甸遊子忘歲時誰知屢遷變閒居
數儔侶詎無所深眷我友亦不違仲冬在異縣

曰余寡時慕將子欽前修邂逅風塵中匪爲一世籌壯
志皎若霜言遲睇吳鉤垂聲結長虹撫裏映清流君持
醜醜節無乃兒女羞我無區區心何以賦遠遊

今人匪至愚古人匪天豈憂思徒匆匆胡爲損餐飯君

看西馳日去者當復反後有萬世來誰云我生晚

陽春二三月桃李當華滋離居撫然悲何以處盛時衆
芳各爭妍前路安可知諒非殊尤質造物寧歎私回麟
集空房中有憔悴姿盛年不自惜日暮將何之


昔余慕清華未嘗廢犇走聞言京雒客年命亦有偶一
自罹風塵棲棲笑生歎致身苦未遂預恐成老醜落日
窮巷中流光照虛牖持編映簷隙妻孥晒其後朝壟不
盈餐夕枕詎貼首苦覓後世名其人骨先朽

讀宋寶祐四年進士錄作訂

核年在魏山徐克莊家見之

徐生手攜一幅紙遠望字色昏如夢爲言上有信國名
指畫摩挲出鸞鳳淳熙以後西日淹得士乃復如吳潛

百身欲贖汪制置一語可羞留夢炎公時策名數尤異
落筆居然有天意已辨厓山後死臣趙家塊肉初投地
祖宗當日稱得人五色雲見尤非真史家譌謬固不改
坐使咎祲誣名臣公名首傳集英殿玉哲豐姿衆尤羨
蛟螭誰幸踵後塵姓氏皆能以公見名傳不亡紙不亡
至寶示世無珍藏轉憐易置匪偶爾自天題處猶含霜
陵谷滄桑代皆有黃冠更夢傳龍首二十餘年世事非
一名天地寧相負白髮簾前舊考官慶元歸去亦泥蟠
江南求士無人薦不愧門生傳裏看



附鮎軒詩卷第四

陽湖洪亮吉著

長淮清潁集 壬辰巳巳

自潯水入淮半日至潁口

潯水流不歸長淮極天靜我行發舒六十月至清潁潁
尾清我心潁歌行復警嚴霜岸頭重積勢落潁井古樹
啼鷓鴣聞聲不知影稍稍上初月戚戚聚浮梗曠野無
人居揚沙極千頃中原此開闢寥廓少翳屏行當苦寒
月棲歛寡實潁星辰肅中宵行客畏短景踟躕冰雪意
兆始心已領百里不可休客程同獸挺

泊舟潁上縣見月

蒼蒼邨樹合月出釵腳斷古屋儼覆甑昏帆迫頽岸長
淮影猶及清潁波始亂照此千里心淒涼視星漢寒沙
聚人語徒侶或犇竄稍苦擊析疲嚴程詎更換霜寒衣
袂重百里寡薪爨孤客起夜吟寒光亘幽幔波流去不
反音響助淒惋歌長竟誰聽夢醒各已半

昭靈宮祈雨詞

阜陽水國當河衝潁汝作會淮作宗肥茨渦滅柳湍从
六水濶絕流成壅二水頊洞聲洶洶導水與水合則深
多時狂飈捲老葑轉曳毳尾牛身鱗射官鮓鮪文胥鱗
三足六眼趨繩纒蝦須倒垂尺五濃張鱗奮沫敢肆縱
淮神怠職耄且燹俾鯀治水竟罔庸祠官屢沉圭璧琮

帝怒下遣電目睽命截左耳投荒凶青冥赫焉念鞫
割壤千里頒龍封龍君甲族匪出對戴以虬角紅綃籠
前身作令儒者容宮中九男立而升魚鱗著身爪縛胸
龍服被體何雍雍髯翁守州德望顛作碑刻石謬致恭
心知其竒不欲攻春享秋享陳鼓鐘瓊殮玉饗酒百甕
三歲特間一歲縱云官敬神神惠農沙漬澣流俱淙淙
頽焱鹿羸瞠雩震神實有術能彌縫當年闕宮豎榘樅
越六百載猶崇墉披圖竭來值杪奧怪事咄咄欲起訟
無何靈宮鼓逢逢神欲索食馮里藎側聞災荒懼尤兇
麥枯而腓樹乾於其雨其雨思靈零神縱有食慙磳饑
我來龍穴追龍蹤將巫祝辭里具供有禱而應斯真龍

歲暮急葬歸里率倣迹抒情詩一百十韻呈大興朱
學士

歎客星回紀長歌漏轉宵巢將辭越燕跡本類吳藻草
木心寧死山川境屢遙躊躇寒暑易承疊宿離昭月令
先嘗稻園官已薙菽回瞻將集霰頗怯已涼躡生計憑
緣未游輓諷荷蓀未從箴尹戒先向兆人悲惜別當茲
夕銘心匪一朝輪還開省爽獄首覩峒堯姓識南離曜
名隨北斗杓無雙才已擅第五譽尤標早著金門籍遂

趨

紫禁朝黃鐘八風正玉律四時調內苑親書敕中官屢
賜餽門聯兄弟戟葉擅祖孫貂職本司青瑣班皆近碧

霄衡持分五雀鵠設中雙雕暫輟詞臣筆來登使者輅
載書聯十軫導節建重喬首以專家學同賡盛世韶經
猶疑漢壁論欲出秦燒積器歸鎔冶儲才任琢珮人文
原冠絕土俗懼輕輿力將持鼎中聲屢辯馨篇留三
殿壁禮議百庭燎六籍資根柢羣儒彙穆侶叔孫終拜
雅季子願觀簡漢運開文景周興啟誦釗門闈欣集胄
廟寢更懸弭已有同聲應咸回捷徑趨好奇寧破冢著
論述園橋義切旒垂瑱言繁袂侈綃蟲魚徂闕畧蚪蚪
孰摩描識字愁皆誤遺經欲並彫文當增栞橙職敢獻
芻蕘時秦刊經議黜孫炎黼功旌向栩幪楮梨原雜識來
棗待精敕洪範寧詳圉輪人未注掣音非離跡象言或

誤風謠滇慎源思正閩平寵詎邀書亡傷木簡韻失亂
言簫釋草偏驚蘇持衣欲澣禴工師難教巧心匠盍深
樵禮曲毋嗤狗辰嘉幸捕梟斬因庠序重俗恐姓名剽
志豈思求祀功還著不祧天從牛宿兆川向尾閭澆聽
匪無充耳言當置視瞭商榷阿閣鳳未假泮林鴉夫子
方垂矩諸生各建幟才原掄上下質本辯莊佻繼禘全
蒸巖明堂半體察界心同故牖高會幾升庠史筆難參
夏書篇或受是鼃何期翔鷺鸞亦俾寓鷓鷯卧病心難守
恒饑面苦鰓九三林卽鹿十二草衰蕭本乏當胸鑑甘
成折足寮程能唯粥粥出語任曉曉亦感飛而食時還
歌且繇中江縈咫尺南嶽望周繚虎節愁逢魅犀鎗或

照蟪野花顏種種邨果實鹵鹵語愧能言鵲行遲備足
飴齋糧惟飯木采藥尚名蕎徑窄唯容屐峯升更製禡
屢陪登陟險私喜勝遊饒駕每憐騏驎車寧載歇橋年
光看電轉爲客匪蘋飄邑小絃歌古途長旌節搖名區
饒杞梓多士比瓊瑤有象將趨古無方可止躡里流烏
鰲券鄉有墨尿驕谷信愚公徙山疑衆煦漂飛蓬根豈
直佳種穗先刈一再風初警紛紜俗屢刁師門雖戀棧
畏路敢揚鑣重以高堂疾蕪之予羽噍行將捶瘦蹇歸
卽趁輕橈去住皆承澤裴回尚致怡感深徒惘惘湖別
自迢迢已卜先人壤當還舊宅僑蒿萊仍待剪松栢懼
先凋痛切周虞殯歌聞楚大招冢中銘自古

曾爲先人誌墓

底蠹難銷書卷終歸兆衣裳欲設喪移家從地歛置塚
傍湖洮蓬室先孤范蘭臺未受超遺籬封始就君子澤
寧消繳羽猶存鬪離弦乍反矧人爲推甲子運或值元
枵眇矣孤生蒂悲茲未秀苗師恩營飲啄色養遂篋瓢
苦志憐張逸名篇送應劭敢幾堂闢與先認樹爲栢止
日窺全乘覃思獲數條余襄方若戚衆口抑何哨總覺
蜷輸捷寧同雀競越夏牕橫蠓螬寒牖挂蠨蛸永守三
季艾忘稽四月蔓盡期心出窾不愛斗無料養志龔陳
坎酬思劍出禱行須懲畫虎歸及見迎貓傳有膏百守
言還肺腑要臨流無玩水大海願分蘄

山行

昔我不樂思幽眠名山讀書歲月遷明明此言挂人耳
皎日作誓心神鑄山靈有約故不爽春夢吹我來谿邊
名花歎憐後時至光景已覺非新鮮空山沉沉集徃意
白日杲杲愁百季人生買山安有日僻壤棄處皆堪田
還思親在不克遂欲徒雞犬來晴阡看山一言願相約
吾誓與爾無間焉

夾山館

明洪武中設戍于此以衛鳳陽

鐵鎖亘地維金臺固山鑰雄瞻淮服奠秀攬江入川錯絕
險此一隅巖形恣鏡鑿幽扃旣重置繡壤始平拓附蟻
徑已升棲猿樹難托泉靈蘊直苞澗響撼虛縈維社南峙
天險立表著神畧起脉引伏流陰林阻炎爍危其谷神

徙險絕戍壘削文成計苞桑英謀尚依約理垣斷兵氣

篝火警棲鵲遲回下平岡暮天吹雨脚

寄鉛山蔣編修士銓

時主揚州講席

我年十五知讀書廓然二十東出遊東遊見君壁間句
一室偃卧三旬留當時止識詩句好欲訊君名識君少
客有傳言姓字真生今恨不知名早君辭承明徂識幾載
我復饑驅客江表先人薄宦空數州愛客囊傾空主難飽
相知敢謂異存沒屋冷烏啼跡疑掃門徑猶紅手識植花
賓宮自綠心傷草一生豈識劉系標岸然為著庶絕交
芒屨引入使者署獸破世論容蕭騷生吾徒零落有
誰語豈意逢君復相許病馬投閒感牧芻哀禽入夜傷

毛羽君詩軒闔非一體君貌蒼然具憂喜貧賤相看總
路人途窮歸命緣知己離堂夜半酒乍傾我暫身世非
忘情譚深不盡百年意努力尚期身後名握手相知各
草草明日饑寒復難保百計終慙奉母踈一生忍謂依
劉好憶昨高堂念客寒蹇驢風雪勸加餐羊裘奚奴復
付質去冬余急葬歸里太雞黍拜母欣承歡識君三代
總好客才調諸郎復超忽有日重尋竹徑人無情不問
揚州月剛度書來問塞鴻故人踈節爲飄蓬應從秋月
思元度更向青山夢謝公

附原贈作

蔣士銓

鐵崖樂府容齋筆萬口爭傳洪亮吉誰知二十五年

身一領藍衫尚垂翼尚書五世爲清門幾人眼識司
空孫三冬足用信天稟四歲早孤稱稚存訪我蕪城
說經釋地開閣延君感君意夜留黃海萬峯雲篋守冬
官一篇記新詩光恠森寒芒萬鈞人手能挽強月斧
雲斤鏤肝腎出入韓杜爭軒昂卷軸填胸字難煮學
士愛才心獨苦謂竹均爲憐松柏少青邱特贈泉刀
買其土堯夫元振誰與儔戴暨丁廣難復求悠悠富
貴豈足齒寒潮欲打空城流酒波亘亘射眸子風雪
殘年渡江始明朝馬鬣寫新阡別酒三巡君可起

次韻

彭元瑞

以相爲田耕以筆先得隨人歲凶吉男兒貧賤慎所

因莫假俗流生羽翼洪生投試欵我門甲二肯陞榜

末孫

補考例附三等
茲特置一等

手持半減一刺字主人罷去留

書存

謂竹均使者堦前幾尺地吐盡胸中千古意落

筆根源篆籀文滿胸堆塞鄉嬛記哦詩作作更有芒

寧失不工句必彊殘脂剩粉此間習得之足令氣激

昂畫地作餅那可羨何人下士知其苦我嫌令甲不

敢留食汝安得乾淨土袁二標格今無儔

謂春意氣

鍼芥知相求必能為汝讀書供此士詎比錐刀流作

詩代簡蔣夫子介紹其間自君始兩君不能致一客

故人可以三歎起

次韻

錢維喬

附錄卷之三 老翁四
丈夫家貧一投筆豈曰無衣安且吉誰能窺眼出雙
丸立使登天生八翼故人陋巷席作門窮經有若維
誦孫頻年奔走挾書策歸來寸舌誇猶存大江左右
掄才地使者憐才發真意中緣三徑作曹邱各寫長
歌當奏記我昨夜見春星芒頭顱加長學不強東風
打窗氣淅瀝曉電墮瓦聲低昂故山黃獸不可煮命
託蒲颿敢言苦亦知雞肋是人情便得猪肝豈吾土
與君負米爲朋儔劍氣何意識者求人生磨礮在手
秋富貴真作閔雲流作詩西江剛才子愛君拔君自
君始邗溝烟水暮潮生聽子清唸鷗鷺起

自潁水入淮

我爲潁川謠，忽與潁尾別。君歌月映清淮流，不識孤蓬
已飄雪。長淮岸頭邨，樹斜短棹繫。岸驚棲鴉可憐人，鳥
共淒絕天水濶。處難爲家，操舟者誰北風勁十五吳姬
寄身命風波，到眼不識愁。妝罷只照長淮鏡。

淮口阻風戲贈吳二蘭亭

同行十舟總值風，風吹一舟住南岸。草頭白浪高接天，
反使驚禽入舟窺。五更顛風吹向晨，吳子作詩寄餞人。
僮饑僕瘦不敢語，賦命本薄人何憎。我舟如山集官渡，
倉卒誰能更相顧。始知生也善諷嘲，昨者偶值蛟龍怒。
渡淮

長淮千里何湖洄，遠自桐栢之山來。洪纖巨細絡諸水，

彙此四瀆通八埭東南巨浸古所說原野氣盡巖巒回
傍淮田下賦亦下生計恃水無餘財長年挈舟送行客
楚女擊楫中流哀雲浮三時蚌開合水結五色龍胚胎
陽嘘陰吸有至理水上白晝層宮開要令幽險各有所
造物大矣何容猜全淮得失繫吳楚宵濟萬馬曾銜枚
王公設險古不廢硤石置守高崔嵬牛羊在野牧馬散
淮水蕭瑟山童咳下流河勢苦相奪二水若合坤輿頽
支祈力屈匪至此河伯好事同臺駘至人視世本一轍
險絕不異坳堂杯朝帆開寒雨迷浦莫雁憂水陰成堆
順風明日送舟疾可至禹廟傾尊罍

秋詞

禹都安邑今有墟亦越五載來省徐南巡重瞳兆權輿
衡嶽濶遠非人居嶽山作國淮所豬會水爲溪戴石岨
乾坤赫焉集衣裾帛纁黃元玉璠璣四岳九牧行衙衙
我稽職方及州閭九千六百數已餘要荒名夙感化潛
亦職玉帛同趨起來同翩翩合萬旛曙若朝日輝瓊瑤
明德遠矣衆所愬夏小正刊月後余實集萬國太史書
予嘉乃功有獎譽享以嚴衛以周廬誰何牧豎矜智譎
掘強溝壑同籩籩終沔其邦作厲虛汪芒大人跡迂俱
天軒地闔行步趨帝資其血成川渠崇崇者陵骨難昇
尼山讀書樂只且千年能詳骨尊車博物詎止知夔魍
峩峩鼎成誰敢舉惶惑百怪行人唳夷堅誌之亦欬歔

白日屏息異子寤侈哉黃熊三足挈好事河伯煩吹噓
稍恥刻畫來鯨吐男丁女壬生剋除頽然空山夢其初
一首九尾勞卷舒服妖德聖顏則好留之三日非躊躇
呱呱者生實國儲狐鳴涉波牽子祛後此一紀能歸予
白魚身長倩懊憹偃行而前若遽條晝界白壁夜揭瓊
三來闕家俗都祛太室卽立神人胥民顛子巢下則漁
予口卒瘖手拮据燻燻赫赫天地爐十日照野枯櫟楮
滔滔者流其涸諸鰲輸其首難始紆龍軒其頰不足屠
神知逃誅值孟涂女媧華星綴衣袂束縛烏腳羈蟾蜍
佐子木德相誅鉏淮流湯湯未澱淤台桑猥積而崎嶇
豐年厥惟黍稷與登高瞻瞻寰古墟大水作瀆小水瀆

快如挈餅注泥濶酬功欲陳水土苴大哉非禹吾其魚
擬唐塞下曲分賦

鐵騎三千夜不停郵亭歷盡始邊亭沙場明月光如雪
上馬都看大將星

回鶻潛師夜襲唐軍中歌舞走倉皇健兒狎客身都死
誰向臺前辨國殤

將軍二箭有威名詔統偏師出右營昨夜凱歌齊唱捷
中原萬里馬西平

算鼓轅門尚未開撥糧三路羽書催軍中博局休輕戲
恐有兵從地道來

從軍十五戍三關卽次君恩重若山昨日使回口口語

寒閨不許盼生還

射獵原南久不歸邊城昨夜有霜飛微寒索取狐裘著
一半征人未授衣

戰鼓沉沉戰卒傷營門羯鼓更催觴三更宴罷餘梁肉
反使烏鳶食國殤

屯田詔下少人家白骨皚皚萬里沙誰遣春風迴塞北
十季戰地盡桑麻

射虎翩翩右北平生來李廣殉功名將軍屠食任人喜
躍馬原頭伺賊兵

玉門關外曉霜寒白草黃沙路鬱盤有詔征人皆解甲
狼山祇取地圖看

陳生漢暘自楚南歸以卧雲僊子圖索題

陳生昨來客北衙楚語對客常嗟呀飄然六合無室家
遠夢忽幻雲爲車顏枯想寂夢則賒白晝歎死窮幽遐
瀟湘沉沉月交加十季夢斷楚水涯愛而不見古所嗟
繪爾靈匹餐朝霞按圖以索願恐奢洛妃楚女來些些
美人南國訟鼠牙誰爲閒情璧微瑕歌詩一篇須拜嘉
彤管有煒詩無邪

全椒宿江氏園亭

到來芳草芽梁燕語前期朱門風雨黯南樓晦朔移寧
知遙夜酒復此酌前堦蠟淚紅暉永芳尊綠意離塵封
夢猶澁波響意如疑莫下聞歌淚吾生亦已疲

署齋東隣

夜長漫漫星爛爛老嫗哭子常及旦尋聲隔竹慘不窮
原野蕭條若絲散喉枯入夜不得高對此三夕爲憂焦
哀音慘理壁間火尸氣亂薄墻頭蒿我行齋居理不休
亦覺陰森動心鼻城頭鼓罷荒雞鳴荒翳還遲日東出
嗚呼哀樂理本均安得對此無酸辛編書堆案勿復陳
東壁倒置新死人

遊醉翁亭

一成坯再成英一再曲折山以名注川曰谿注谿曰谷
谿行谷行水聲復蓋輿背山始入山水聲已往何時還
未登醉翁亭先繙醉翁操山禽飛還水禽噪言尋醉翁

石更誦醉翁文醉翁賓客不可見山石欲雨谿生雲咄
哉文字亦有靈能使此山此水無餘情我觀翁時植梅
喜且驚猶復天矯屈曲如龍形春風蕭蕭壁間琴脫千
百載無知音吾知山悽欲謝巖桂色水咽復斷蛟龍吟
醉翁琴琴喑喑乃知醉翁待我成古今我歌一篇翁賞
心滁山高絕滁水深

贈吳秀才蘭亭

吳興四十無良朋讀書千卷羞名僞上官知名詢邑宰
一語偶及先生憎雲谿谿頭尺深水忽然長羞別妻子
把書數麓躬苦辛低頭作客事世人世人聞言共相侮
先生于俗未言苦求友三時感寂寥縱譚一夕窮今古

衡齋日出多髮眼先生著屐賦詩箋人歌匏材與爲隱
我誦葛屨箴其偏歷陽南來其旬日數見明珠筆端出
私門總欲輕腐儒公誦誰能賤經術先生雖偏意豁如
前路謂我休躊躇心低於身何日舒努力得閒還著書
黃大景仁過訪作

十日不束帶束帶爲故人艾家橋下騎馬別過眼已覺
無餘春男兒在世空作客把臂兀兀羞儒巾我爲書記
纔一月已被青霜減顏色興來解髮還讀書肯學兒童
事修飾朱門沉沉酒肉堆枉殺落花埋古苔墻邊靈轍
三日餓一語不出防嗟來君知我愁憐我病走語倉皇
不能竟雀鼠山花本合巢螿蟮井李還回命長安少年

君弗嘆一生富貴能幾旬看雲已見白日辰照鏡自覺
朱顏新江東風光復遲遲江東櫻筍行可思吾徒行樂
有終始莫恨不及春風時春風春草梁園改全盛應貽
後時悔勸客休嫌夜漏遲埋君尚有青山在綠鬢婆娑
照眼萌花枝須看酒須傾杜陵忘情任榮辱李白與爾
同死一生送君歸視君影烏帽欹斜玉鞭整客裏爲歡事
莫遲之高堂白髮行應省我客南州無世名故園有夢且
歸耕男兒終自戀知己手把君詩縱復橫

寧國使院望敬亭山

曩遊不可追茲山亦秋雨郡城復蕭瑟悽碧照簷宇理
賞感鬱陶塵遊詎矜謝萋萋值時卉晰晰警羈羽久客

中路違襄人獸行跡微衷匪無願緬此前愆矩登陟理
有窮淹留念誰取歡塵旣星散愁蹤匪蘋聚朝吟眺孤
雲暮烟瞻斷縷徒倚佇後來孤衷酌邛醪

題南樓

東山罷絲竹南樓起文讌風雅嗣哲孫謳吟滿芳甸郡
齋固清暇相賞有羣彥守寂境已淹忘遊跡欣便陰陰
藤蔓阻鬱鬱芳杜薦香草彌可思賢蹤苦成羨淹留文
酒會幾微哲人見存浸感世殊陰暉識朝變心空山水
性神驚去來電風檣散秋光踈英落成片誰能知傷心
更殘入簾燕

欲至北樓不果兼憶黃二

謙公樓上月復此愁中敞春蟾已抱肩秋輝復盈盞手磨
城倚危構聳嶂結幽幌露檻夕已迷風軒杳難上非無
千載慕後至已倘恍絃踈調疑沉屏虛夢成曩移碑識
前影吹塵續餘想松竹一徑深烟泉四時賞徒勞五英
躅復此念吾黨幽區旣神契靈蹤亦虛往

自涇縣至旌德道中作

井隘山左旋鬼門日西伏犇壑無徑波危途有欵軸緣
邪枉矢注蹈險脫輿腹草暗夕已成雲荒渺難宿前暉
尚傾樹後響忽犇谷車馬此寂喧山花厭更僕清加發
山半戍火候茅屋曩逢春雨深茲來夜程蹙悽泉道山
果驚羽集巖竹履坦亦有期遵途愧難速

度輦嶺

西陸謝日威南行厚坤軸積勢亦有基尋蹤戒沿麓人
隨候蟲至氣與秋澗肅寒暑理不岐犇馳念常速華心
入秋陽慘序臨晦谷炎衰委時卉露澹逗巖腹以此持
贈心傷茲遠遊日黥峯阻中眺歛嶺斷平陸迅羽祗弱
飛棲猿訝昇宿雲迷去峯迴翠阻來岫復履盛跡已虞
升中勢猶蓄顏光尚綠徑驟響匪習水蒼然見山城藍
輿下巖腹

題錢文敏墨竹

琅玕之竹三尺長繪圖蕭蕭天雨霜秋官下筆直筆泣
刻削幸有生機藏半幅陰雲互回合半幅長風振

老蛟玉骨本凝重怪龍三須倒生頰筆端天璣不自持
入夜細響生折枝我時相思每一訪屋北卷簾欣見之
蕭齋索句題公畫我已題詩壁間挂我詩公畫俱憔悴
腹痛思公昔年話於虜執事非足稱公也累累垂英聲
平時儒者負經濟上馬殺賊來邊城邊城堦莽尤無極
成功繪圖呈

帝側三時旣見獄訟平旬日更致苗民格男兒功成氣
軒豁顧盼萬里流華日歸鞍兀兀賦新詩襟袖翩翩藎
奇術十季爪削據濃堂郎吏屏息趨公旁西臺赦下額
手慶始知公力回穹蒼公恩於人若山重章疏流傳入
歌誦栢棟深憐一世才鳳麟未竟平生用得公粉本猶

可誇憶昨

御題金盞花雲霄天語偶惆悵水墨拂拭生光華我觀
公畫頻回首愛士如公復何有君不見渭濱千畝富奇
材尺寸恨不成公手

登郟齋南樓裏黃二景仁作

分韻得覽字

如何久行役值此時序慘寒雨亦淒其山城復昏闇窗
虛頽宿列樓高夜潮撼歡緒悵景淹華季怯波閃非無
襄哉志念子猶未敢憶昨江上亭徘徊祛重摻徒深三
載約撫志驚冉冉迢遙別鄉國抑鬱避讒諂秋至候雁
鳴隆冬雪霜糝百物皆裹居勞人自衒感雖餘文史富
心跡倦披覽獸客途路艱獸愁衣帶減我行仲冬月別

子執鉛槧千里何蕭條平原極葭茨狂飈振肌骨凜冽
清曉犯身謀既難遂榮名亦俱澹君如念朋儕清修以
爲範允矣君子心臨風歎流學

歲暮歸里別沈太守業富李六令廷颺

陽冰篆當螽容齋帖姑孰是州山水鄉往事賢慙牧幽
垆繫華組元林映丹轂秋雨鶴抱關春暄吏持牘微吟
或緣樹靈響尚傾谷遙余憶前徽惟君繼英躅遂追物
外賞屢念塵中築游聲固淹雅勝景本殊俗始節餌相
松初心喻麋鹿頻留迹成戀欲去情匪速偶作勝地謠
瑤華悵誰續

臨發沈生在廷以詩贈行賦此志別

歲既不我與，明當復遄征。浮雲欲何之，且指東南程。倏忽三載淹，遲回念前盟。矯首桓公臺，引領眺北城。野景肅以淒，四序各告成。嗟哉游子心，愧勿同蚩氓。卽欲從此辭，感子送意誠。吾曹勤讀書，亦猶農之耕。復恐耒耜銛損此，草木萌陰陽。蓄諸土，冒櫛理則榮。臨別贈一篇，子以貽友生。

寄汪孝廉端光

我昔約遊湖上山，值君此時復不閒。采菱雙漿送君返，裊裊碧波紅日晚。回船欲向湖頭居，得錢日買湖上魚。嘉興白酒亦供醉，興至輒曳侯門裾。踟躕此意何可得，我奉親言始爲客。寥廓君饒芋栗田，風塵我祗蓬蒿宅。

我慙短翮常失羣別袂與君不忍分君歸我復不歸去

去訪橋南揚子雲

謂揚秀才芳燦

立春日

頻悲寒序促那復值茲辰人意憐遲日吾生重早春
川原看氣始草木辨根陳白髮還多病踟躕強飭身
江陰遇邵大辰煥

念與酒徒別勞勞車馬間風塵嗟鬢短夙昔夢身閒我
意賤投閣君才學閉關從茲著書息無復出名山

題朱子久邨居圖

君家山田圍綠池蹲鴟千畝富不啻夕陽野影散籬落
細細却受東風吹君家牧牛奴不識後與前牛犇十里

或五里尋著只在君家田綠池水澆紅芙蓉綠池水生
紅鯉魚池邊茅屋主人出短褐暇日周田廬君踰千億
猶能儉我得百錢應自斂雖分菽麥未云智得食糲糶
亦嫌忝憶昨嚴寒久絕薪長饑高卧門常掩祇令妻子
識厨荒不使高堂知歲歉君儲千斛欲相贈恐我貧來
益持檢寒窗聊復手君圖坐對水田波瀲瀲男兒心計
亦最工恨少黃犢趨春風

除夕無米適族人饋薪炭至

囊空無復計饔飧白髮相看有淚痕漸典葛衣知歲冷
遠勞薪炭起春溫風塵多事留吟骨涼煖關情感折眉
慙愧饑烏隔林住十年啼不近朱門

附鮫軒詩卷第五

陽湖洪亮吉著

桐廬林屋集 日巳甲午

頂生詩 生名森

項生居雖在城邑土室讀書常畏濕一念癡隨蠹魚化
百歲昏同候蟲蟄平生經籍笑充牣妻子饑寒坐啼泣
無田耕硯亦已窮生徒資糧復難給隣烏三日訝烟爨
雞犬眠階寡餘粒風霜入屋秋已凍窗戶尚少茅荏苒
生時萬古恣冥搜絮被中宵或僵立著書雖自窮迹象
雅志不復工篇什方今經學大昌盛已闢四庫搜遺集
諸生濟濟七百輩各付陳編日抄輯朝廷大儒坐石渠

天下羣彥皆引汲翁卿經樂次君禮謂節會元晉手執
專經後先入生今著迹非一家萬象盤回互收拾名卿
知生薦將及努力蓬窗勤講習

廟東災

廟東災戒工作也

小兒攔街言火雞飛上天紅星兩丸墮火雞復生卵燭
燭燂燂神祠火廟令夜呼神擊我一石水半石泥救火
來升天梯縣官救火急救人里巫救火先救神救神遲
神臂落剝膚之慘神所樂前季神語致廟祝前堂後寢
匪我福有茨有萑築茅屋君不見西頭之廟尚斲椽北
廟買盡城南甄烏虜一方甄一尺椽愚民姓氏寫未完

典衣三處輸神緣

蜡祭失

蜡祭失正淫祀也俗尚五通祀以爲蜡

迎猫復迎虎紈如太平鼓妖巫坐堂中八蜡變五通迎神幡不須長高插燭低插香神居矮屋臨水旁有時雞來啄周遭犬來坐堂皇兒童擲甌高過牆巫前致詞神自貶損人不知福女祿女無暇營其私華堂五間列五筵東西南北及屋前拉拉雜雜鳴神絃此樂與君同百年百年長一夕短神留總角尚未綰金爐吹灰墮銀盞洪源謁祖墓

五世還支子全家問愍孫野花生墓闕古栢及祠門樸

塞吾寧忝淵源系覺尊所親欣絮語燈火入前村
白首吾宗叔黃眉入室姑未嫌新禮簡記取舊名呼歷
寢書留几開筵酒在壺爲言居處僻燒筍出山厨
書堂三十楹列坐盡橫經樸學傳家久鄉山照眼青
磬池栽石筍裂幔出風霆絕憶陰厓北春濃霰亦零
重來攜弱弟此別念衰親山果紛相贈谿茶采尚新
封書因問叔勸食爲依人儻復移家返應知未厭貧

發新安江

帆走百里風收帆日初午檣隨山翠轉清絕數聲櫓江
蘋雖可拾清鯽已厭數自行新安江罷思瀟湘浦瞻峯
百回仰看水終日頻舵樓起清簫深村出漁鼓林紅匪

楓柏草香過蘭杜卽景情已欣思家念稍阻崖窮樹猶
復川盡烟復補寄語新安人江行未爲苦

七里瀧阻風

我行發新安三日挂帆幅南風吹急雨蕭條傍東麓東
麓祇百家舟檣共棲宿魚蝦成小市禽羽來棲竹朝飲
顏不歡鼻歌聲復促遠思嚴陵隱近憶臯羽哭斯人旣
徂謝遺者唯石屋遙遙東西臺樵夫自爭逐江山感幽
顯風物互淒肅解纜候轉風還看去舟速

富春郭

富春城樓樓跨橋曉日已入錢塘潮罟師張網集橋外
寸鯽尺鯉來迢迢人來縣中不識塗乘船進縣輪官祖

城門朝開出鴨鳧綠水蕩漾遊菰蒲宰官舟船泊江口
昨日隔江迎太守行僮烏帽倚舵樓候吏黃須立沙阜
收帆入郭聞打衙驚起白鷺飛蒼雅平鋪萬瓦不得見
樓角矗處知人家眼中楓樹十餘里白石參差隱還起
停舟沽酒復遠行之字江流去如駛富春城郭天下無
富春邑宰舊識吾作詩却寄君莫出宰邑知君未旬日

潤
縣人注

泛湖至五柳居小憩

西湖湖水清且泚吳儂顏色湖波似我愛回塘三百家
開門只飲西湖水吳儂飲水復食魚客來欲傍吳儂居
南屏山色波中綠傍水尋山策蹇驢

湖心亭看月借汪大端光

汪生東來詩愈美只惜遊山非性喜湖心亭上三更時
一雙青瞳解看水湖水綠欲愁載君向西洲扁舟來往
二十里君與明月同沉浮

萬花樓看芙蓉

萬花樓底花無數白玉闌干紫簫度回塘歸燕已驚飛
卷幕輕鴻忽回顧海棠春花不及秋新月自遙殘時幽
簾空一畝芙蓉色日暮踈香上曲樓

孤山

日日狂吟不知足林逋祠旁一間屋處士當時只種梅
先生去後誰栽竹苦心傳世欲誰知尚有橫斜七字詩

千載園林休斧鑿世人作亭同放鶴一亭頗碍觀眺

寄楊秀才芳燦翥仲

十五二十不可當羨君一門雙鳳皇
卽看骨相已深穩坐覺毛羽生輝光
去年前年識君再今年看山復同載
喜君交友絕畛畦共道狂歌越流輩
儷青妃白世亦工眼底長句唯汪中
近刪諷詠事經訓只有黃子稱人雄
君兼二者或未暇兀兀孤軍已方駕
龍阿出匣競門鋒雷電繞身猶角射
比肩令弟真奇童白日跳躍青兩瞳
朗吟已解獻康樂著集那肯偷江東
檀楠杞梓期成用造物于材自珍重
枯朽寧無入世心干霄未識何年種
少年筆力尚排偶前路饑寒復殊衆
著述湖山願豈償

犇馳歲月愁相送各有慈幃白髮新
狂唵負米向酸辛
誰回南北東西轍見爾欽崑厯落人

包山寺

沿流息疲蹤出谷轉清瞬林長旣丰容
寺古復幽鎮延
回橘柚色淒颯松栢韻餐翠禽鳥腴墮紅谿澗澗山僧
移室火行客戀香燼止宿黍未陳絕糧顏豈愠金幢擗
蟲篆石級陷蟻陣古佛驗始龕洪鐘試初覺僧修具清
刻禪行孰精進拾果竹几盈汲泉山井近眠遲虛梵滃
寒早識霜信明發臨孤潭殘蟾復深印

林屋洞

石脉引丹砂巖形露元壤幽奇徵道錄
倘悅絕鹿賣盤

渦旣深入覆釜不獲仰微腥
怵來蹤捫黑撼虛象憑湍
同矢注轉徑識虵枉不惜口耳濡怯此腹背響行童持
火照驚我落千丈萬竅爭鬱盤幽聲盪虛漿巢溫盡冬
蟄跡巨或修鱗金庭玉柱間風輪自森爽昏崖通地肺
靈跡拓仙掌至此阻屐筇微窺見几杖非無悠往志轉
惜牽世網呼吸靜有聲陰陽孰能想泥塗久昏翳谷口
始虛朗勝景未可窮鐫名繼疇曩湖口有順治六年人題名

大風自包山放舟至石公山遊畢渡湖抵莫釐峯僧寺宿

湖波連日吹黑風雨意已在西高峯狂蹤大笑出溪洞
挂席欲至東山東同行篙師不習船乃以性命輕重泉

布帆三幅破兩幅縷縷看向風中穿石公山色落我眼
笑我咫尺何不遊舟人苦辭日曛黑不語攜屐登沙洲
石公山居石樓未頻視青蒼莽遼濶扁舟徑欲乘宵去
一葉真如向風脫虔心禮佛禱塔燈九級照見波千層
我生譏嘲匪同調歡喜只任同舟僧同舟之僧來複山
半生冰雪鍊玉顏禪心定山不定水指顛失色狂風間
趙生新來左耳聾目瞪不覺翻蛟龍祇愁雪片濕衣袂
欲假酒力將寒衝命輕舟小危一髮港轉風收上寒月
傍山十里枯菡萏幽境清涼照魚窟湖山夙業尚淹留
蹤跡平生學渚鷗兩日風狂三日醉四更月出五更遊

石公山

放舟來孤峯展眺陟林杪金鑑無陰晴山雞味昏曉孤
生疲竹杖沉想入烟篠視此一徑雲遙遙去窮島坤輿
此微缺石理側生巧悟彼積勢奇還看出林矯危峯墮
鴻翅怒石刻鷹爪履險跡屢傾遵途意猶掉莊生世緣
淨向子息機早闕館樹橘橙移舟販杭稻園林尙堪宅
雞犬移自好心賞撫碧苔離蹤戀紅蓼頗裹著書願暇
卽事搜討此意孰與償名山鑿幽抱

莫釐峯

賞心殊不借清晨登茲峯晴景開遠林嚴冬自春容入
寺尚履霜及巔聞曉鐘駭浪昨暮消平波鑿千重遙睇
縹緲烟近瞻東麓松寓興無累懷振跡鮮蹤蹤波平出

湖田千畝橫亦縱沙戶復茲頓茅籬間山農詎必風土
優山水秀所鐘頰仰六合間類拓萬頃胸念隨飛鳥沈
思與湖雲濃顧視待道流佳景竟不從茅齋樂羣憇山
果紛客供稍留下蒼厓視此玉檢封

租舍

踈籬插棘護霜筠租舍聊應絕市塵稍喜歲時容坐客
未淳風俗愧居人鄰童汲井窺南牖老母梳頭拜北辰
粟米價騰生計少笑看八口未憂貧

雜詩

馬卿窮買賦邢邵老作牋丈夫非爲貧肯作無用言馬
周客常何封事草數篇一朝天子知不復歸窮軒遇合

附錄 言卷之三
八
固有期賓主亦大賢持此語世人多謝俗子憐

流波終無停征禽詎知閒欲以志念疲矯此木石頑夙
抱一世心壯歲復阻艱東瞻纒阿生西征落霞殷蹤跡
千里餘塵土犯鬢顏我友亦告勞去冬歸雪山心跡各
相審勞勞寄塵寰

憂來非區區白日忽匿采一葉墮素波遙遙亦歸海感
此去志堅驚濤庶能待丈夫櫻世務百折不詒悔立念
非一時沉吟自年載瞻焉念儔侶耕也任饑餒屢空跡
縱疲邁征業寧怠

陰陽迭回環四序猶鱗差草木各未萌何歎苦後時才
短而志長是用世所喚孤松託巖阿成棟斧未施結根

百代前詎炫一世姿當其隱顯周造物爲求知智者尚
邊觀愚者空爾疑

前車揚薦牘後軫載謗書丈夫名知人何以朝莫殊留
如握中珍去若濁水珠識趣固不堅因人以步趨掩抑
達士懷尺寸詎可拘賢者尚復然何況一世愚

一裘值千金毛羽豈足供一食累萬錢珍錯亦易空履
盛不自持何以處勢窮俗奢示之儉卽始訓有終誰爲
生民謀一矯吳楚風

客有雍門琴未逢鍾期生不審託業卑獸欲操正聲合
樂而殊歌哀音而激鳴一彈賞音稀再鼓里耳驚持謝
一世人辛苦難自明琴聲誠未諧藉洗笛與箏

古賢樂簞瓢昔聖廉一介信哉百世師取與夙所戒清
修既不飭多藏以爲快陳平節尤累戴聖儒復敗人慕
莊周適吾師伯夷隘

陽氣發不收桃李冬猶花窮辰雨雪稀麥隴未出芽側
聞溪村民生計資魚蝦何能待來春米價已踵加客子
念歲時顏色不復華憂來本無方非歎爲室家
落葉不還樹流波不還源只有同袍人千里識本根念
我蹤跡疲問我衣裳寒感子珍重心昨一傾肺肝久客
頻兩眉顏色爲不歡冬窮春復萌與子歸江干

初泊揚州

作客頻爲江上行寒城鼓角聽淒清星躔已見妖氛歇

謠俗欣傳米價平
南下舳艫思就熟
東來盜賊敢偷生
邗谿谿畔經年住
寂寞愁聞歌舞聲

送汪秀才中至寧波度歲兼寄馮兵備廷丞

宵從董相祠前別
酒向歐公堂上醒
南去租船愁短景
東行倚劍看踈星
眼中吾子容千輩
肘後奇書繫六經
聞說馮唐更招客
爲言王粲正飄萍

寄大興朱學士三十韻

海內朱公叔名篇著絕交
幾人猶按劍俗黨翼投膠
惜別句時久傷貧歲月消
封書曾懇懇待遠尚警警
夙者蟬無翳茲來鵲有巢
殘編依甕牖舊寢貼堂坳
徑喜蓬蒿隱門從薜荔敲
經營心屢折生計手頻抄
幕府稍陳

乞資僚解獻嘲信知供刻畫誰可避喧呶官食嗟尤窘
儒經欲漸拋艱難思一第往昔夢三爻旅館魚彈鋏朱
門肉委庖延回凝望眼去住憶同胞時舍弟欲淮堰聞
防汎潢池已就勦祇須歸未招不必事鞭鞘祝祭虛沉
馬驅鋤竟斬蛟流民咸返室新宅記誅茅世總欣仁宇
吾真感樂郊撫膺同季路行腳類申包客思飛蓬未鄉
心挂柳梢住應謀粟米行欲理芻蕘戚戚能廉虬依依
久繫匏鐻銖寧世嗇溝壑竟天教運蹇鹽車驥才輪織
室鮫賦詩憑雁鯉懷舊詠蠨蛸夫子勤編緝諸生賤斗
筭更旬分薄奉浹日厭嘉肴官舍梅垂葦寒冬竹有苞
固窮歸未得衆口尚嚶嚶

由江口泛舟至焦山

人言金山屋包山焦山山高復包屋舵樓清切望疎林
風急何容傍山麓扁舟半日始接灘山僧驚喜開禪關
排灘松檜一千樹內有榴火猶含丹此生得到清淨地
垢髮未洗停躋攀齋厨粥飯客粗飽石磴千級臻回環
佛樓梵塔構雄傑下視了了徵君壇衆生大垢積有地
雀污不遣歸名山對面一峯雀噪唯積峯頂數凡爲白澄心一鏡旣全寂
碍眉兩株行可刪反思去水不干步耳寂已不聞潺湲
海門初日孤照我寒沁肌骨愁衣單吾生窮眺祇百里
八荒縱望目力殫譬如鷹隼視天地力薄道遠猶知還
江流入海會有定萍梗蹤跡苦未閒魚鱗雲起欲飛雨

雅背風黑當狂瀾東南一徑尚蒙密有景不歷知緣慳
山僧約客復來此我笑此行非可止登舟解纜忽疾風
驚魂欲墮一江水

冬夜不寐追念亡友率成十律其前後以死之日月詮
次不繫輩行也

蔣表弟定熙

憶昨僑居久親知冷煖殊曾爲秦贅婿未齒魯諸儒公
子尤憐姊姬宗孰問姑童烏真義重三復贈羅襦

董公子書圖

垂堂曾未戒痛絕下帷生我友能爲厲如君尚可生讞
疑成鷺黑冤孰辨魚頰花院冷冷雨猶聞咽佛聲

潘上舍振煥

卧病潘公子秋來尚一編
參苓欺命薄其豆感時煎
服缺從殤禮囊充靳藥錢
空餘抱琴妾愁絕總帷邊

蔣表兄寶善

何來車載鬼已見室憑狐
店本緣思婦山應化望夫
枕棺麻經在入夢羽衣無
好擇諸舅子行將任撫孤
婦道土服歟所聘孫氏隨

道土服歟所聘孫氏
死後守節不嫁

錢進士璟

早著錢神論難期駐景方
蓋棺家難起入室舊巢傷
屬有嵇康戮門餘戴聖賜
衰親直命蹇頭白哭諸郎

唐公子肇文

內山詩十首卷第五
十一
小築邗谿上尤愁逼歲除田荒還賣券力薄更藏書世
澤應歸汝才名孰可如塵封舊留贈石硯贅蟾蜍

楊處士笠雲

欲識先人事翁真大父行快譚三世過飽食一身強後
起憐余在衰年覺慮長詩編付誰手零落感孫殤
天寧寺僧智能

先襯歸禪室靈堂寄弱孤苴麻參佛座粥飯乞僧厨北
寺鐘同聽東園菜早輸前鹿猶可憶刻徧誦經珠
盛處士龍光

人爲奇士目說爾是孫斌我讀先賢傳知君邁法真授
徒租舍北行藥住江濱獸有遺言在碑文付託頻

楊秀才煥

弱歲矜通達相知誼早敦累年傷惡疾遷室竟亡蒐燕
燕篇中警星星曙後存素交恩義重歸日哭私門

登樓

出郭登樓客思多啟窗三面俯江沱下流未可依終古
中策頻誰障大河堂北雪深容病卧淮南歲歉尚高歌
虛愁薄俗透迤久欲挂征帆次弟過

贈孫秀才星衍

孫郎少日備兒戲一室狂言及曩季詩句終能向我誇
姓名真不勞人記嚴君四十官廣文衙齋苜蓿連寒雲
窗開了了見絕壁邂逅異遇茅山君茅山僊人不可學

時復讀書升屋角醉舞堦前海鶴看狂吟樹底山猿覺
醉後登蜀岡野望

歲晚狂吟急樓高莫景俱燒原災野鵲葬地入谿魚樸
塞天心苦飛騰人事虛眼中生計足欲傍此村居

慰汪孝廉端光悼亡

尺五薔薇一徑陰孝廉亡婦正愁吟緣知舊侶偏同命
轉讀新詩爲撫心室靜有聲飄故紙夜寒無寐對重衾
蕭郎衣薄裝綿少不怕冰花結素襟

與楊秀才倫夜話作卽寄其尊人詩南上舍

君家昔有江上田歲租百斛輸豐年官糧入倉穀積廩
蜡蠟時復開賓筵十年遷移不常好有兒讀書田已少

朝供因醢不足餐，莫食魚殮未能飽。生男娶婦女締姻，
看君已作無田人。空倉穴鼠噪終夕，老屋巢鷓翻清晨。
君今擁書不復出，令子相逢在天末。兩世翻嫌識面疎，
幾旬欲使狂蹤密。朗吟一篇避舍三，雛鳳不語饑鸞慙。
置牀客舍容我住，喜我興發能狂譎。試看萬事東流水，
貧賤于今莫深恥。矧君家貧有才子，穀田初荒硯田始。
贈木蘭院僧誦茗

相逢同著軟紅塵，誰認前身與後身。我信西來本無佛，
茅庵還坐苦吟人。

謀餐曾費寫經錢，遲客猶留炊後烟。一樣揚州木蘭院，
山僧煮筍廿年前。

樓上

樓上踈鐙徹夜明營前擊柝斷人行宵嚴都尉親巡柵
歲歉村農罕入城睨首一書愁未報淮南十月吏孤征
霜寒不是無衣苦淒瑟難為負米情

春間彭少宗伯元瑞和蔣編修韵見贈未及裁報茲當
還朝輒敘述德抒情詩一首五十韻奉上

濶絕諸生禮淒其勞者歌新春謁轅下湖雪湖江沓將
母能毋亟傷貧未可訶憐儒曾降格擢士本殊科託業
嗟萍梗封書救坎軻頻言才作記俾以禮為羅幕府勤
箋奏時薦入維揚關署生徒藉以磋長饑資莞爾卒業誦猗那
雅喜朋簪益徒成側弁俄資餘輕贖訟旅舍值常何積

瘁消篇詠更旬費揣摹躊躇短翮曲折始修蛾警匪
羊公鶴嘲因仲子鵝有時逃座客轉或泛瀾波歎處心
期永茲邦習尚頗儒纔分菽麥俗總壞鹹齷駭浪崇朝
積征帆竟夕過省闈愁屢試匣硯怕重磨月桂依无忌
天花感曼陀虬鏡虛照影鵲語記傳譌雅意將雕朽微
名等棄梭情常關去住請詎厭煩苛使節經時滿潮聲
昨夜多暫容停越席旋卽理征舸學爲膠庠式心尤下
士荷羣星咸識漢衆水合宗河愧比尋源鯉真同測澗
螺書紳言縷縷箴佩色瑳瑳鼎鼐調羹切笙簧問瑟龢
行將膺玉簡去卽侍金坡已返春官赦還鳴學士珂傳
呼過淮甸消息近東阿海燕巢初徙河魚疾已瘥閭閻

思集木城郭彙盤渦一再頻加賑流移詎有佗早歡平
墊仄誰復肆么磨風霰初回旆萑苻正倒戈奏應

天聽喜歸及

聖情和禁院趨青瑣名廳做綠莎譙譚欣乍接昔酒驗
微醅遠訊裁鴻雁陳編究蚪蚪總期襄化理寧敢罷透
迢別夢牽襟袖垂情念笠簑潛鱗驚失餌倦鳥欲離窠
客館金先罄高堂鬢已皤涼風吹閣瓦生意撫庭柯室
豈饒麤糲門猶閉薜蘿兩岐空頌穀三百恥無禾覓食
悲諸弟言愁紹九哥匪公推肺腑孰肯念蹉跎燭向孤
舟跋詩成五字哦感恩兼佩德將紙復摩挲

清泉白石圖爲余芑貽先生賦

清泉何淙淙白石何盤紆先生六十味道腴頰端新拈
白髭須貌之玉立微有軀雙肩山聳步復趨枕流坐石
樂有餘談說仁義顏非迂憶昔一載登師門寒廳聚首
十一人二三子者章與秦題難韵險藝畢陳各脫束縛
愁難馴我成數藝甫及晨頗恥刻燭來宵分就中數子
業最醇乃猷譽我稱能文風狂雪暗短景臻作詩送別
邁等倫我慙貧賤敬未伸十載念此空銜恩先生五子
一子才早掇芹藻身猶孩作詩曹謝賦馬枚椀榦枯柏
看呈材先生師法妙化裁門墻百株手自栽披圖春風
坐中來泉石已老堪徘徊我雖蒙鑄慙顏回朗吟一篇
獻濁醅

段上舍達和修竹吾廬圖

我家城東南數日過城北馬家池頭竹樹幽破曉來看
雨中色我思移竹先移居近乞數筍栽東隅待其榦老
筍復茁影覆一室真吾廬君于此意亦三復筆底森森
繪寒玉夜闌題竹復贈君驚筍出我牆東屋

折桃行當西洲曲

折桃訊妝樓咏桃寄蕭寺咏桃人十三折桃人十四十
四復翩翩郎年羨妾年摩書爭睹腕聽講得隨肩隨肩
誰復見只有書堂燕種得百叢花隔窗紅四面妾處接
郎家門前石徑斜來年不相見知道鬢垂鴉垂鴉年復
幾只住深閨裏南陌踏青時眼光還碍姊別姊下庭除

尋郎問素書還將奇字睹試把玉釵輸釵分情自急去
已低頭泣遠水帶殘陽爲郎幾時立去住復匆匆帆吹
幾尺風年年臨七夕只自淚珠紅指尖空自長腰瘦難
如曩昨夜又重陽夢郎名在榜去夢復悠悠來竟值陌
頭東風吹夢合一夜上妝樓

瘦影疎香圖

簾前露色垂空白屋底鏡光搖慘黑三更窗外發古煤
瘦步行來月華直寒雅窺人爭一枝却視人影何參差
雛顏小妹愁不知處姊十五應相思

寒窗幽夢圖

二首爲孫大賦

日紅不到谿光濕風折黃墻蘇燕墊園扉清冷未經春

薄暝初銜淚痕入銀衫貼石手腕涼病餘支頰銷頰黃
幽裏沉沉夢難破竟小還從竹梢墜

附鮒軒詩卷第六

陽湖洪亮吉著

鍾阜蜀岡集 乙未

詠史十首

項羽欲入關沛公無如何神明所都會日復尋干戈咸
陽宮殿中流血遂成河哀哉青門瓜乃比人頭多

神理有代謝杜伯齊城陽峩峩蔣子文晚復出建康一
朝無神靈毀廟升牧羊何似三戶民常禋楚懷王

晉家府庫災三日火未已所藏希世珍灰燼收不起神
奸與至聖寧止相倍蓰如何王莽頭得配孔子履

廢興非無端今古若一轍亡隋視亡秦皆至二世失才

非不兼人志乃在玩物雷塘一斛螢竟以天下易
吾欽韓張良吾愛越范蠡穀城山下石笠澤湖中水退
哉兩先生千古常不死徒學辟穀方真成妄男子
荆山鼎既成卞和王亦剖如何希世珍俱爲楚人有江
流合漢處萍實大如斗我欲剖食之甘芳溢人口
燕丹欲圖秦旣殺樊于期咄哉淮陰侯不能活鍾離求
存反速亾賣友仍貽譏虞卿真丈夫棄印隨魏齊
鬱儀旣織人恒娥亦悖婦干戈生曠林弟傲兄不友如
聞天上樂乃復分道走昭昭日月星竟作逋逃藪
我思蓋世豪實惟楚重瞳其事雖不成氣已吞域中男
兒頭可斷不惜歸江東始知孫伯符未足稱英雄

顛頂出上代伊尹生殷商
巍巍龍躡聖誕降徵奇祥
讀書撫然疑史說恐未詳
如何三聖人類皆出空桑

送黃大景仁至都門

弱冠心期誓始終故人江夏有黃童
數行書札來春半一夕舟檣出雨中
雀鼠幾時仍共穴馬牛誰信不同風
應憐楚越依都徧更向燕臺試轉蓬

姑谿夜雨剪春蔬歸計頻番說荷鋤
放眼關河斜日永驚心歲月二毛初
生涯未解營巢急妻子都嗤涉世疎
此日北堂應有夢疑塵黯黯鬢慵梳

船槩頻年席未温十季心跡幾朱門
難忘節物偏垂涕有約乾坤不受恩
涉世未妨顏更冷依人何意舌猶存

蕭蕭故業斜陽外共爾無慙蔗吏孫

蹤跡平生苦未閒我貧君病改朱顏料量絕業思傳世
各有名山待閉關曉袂靜看雲氣白夜鐙慵拂劍光斑
偏慙楚客多鄉思依舊春風策蹇還

將至都門畱別洪大六首

黃景仁

翩與歸鴻共北征登山臨水黯愁生江南草長鶯飛
日遊子辭鄉去友情五夜壯心悲伏櫪百年左計負
躬畀白嫌詩少幽燕氣故作水天躍馬行

看人爭着祖生鞭彩筆江湖焰黯然親在名心畱十
一我行客路慣三千誰從貧女求新錦肯向朱門改
舊弦吳市簫聲燕市筑一般淒斷有誰憐

窮交數子共酸辛脉脉臨岐語未申割席管寧休罷
讀分財鮑叔尙知貧初心小負栖岩約後會依然戴
笠人除是白雲知此意幾曾情艷軟紅塵

冷炙殘杯夢亦慵雪痕到處印泥蹤原嘗好客依都
遍鄒季論交別更濃浪許詞場誇姓氏要將人海盪
心胸不妨面似先生黑上帝何曾殺黑龍

身世渾拚醉似泥醉醒無奈聽晨雞詞人畏說中年
近壯士愁看落日低才可升沉何用卜路通南北且
休迷只憐寒食清明後鬼餒坟頭羨馬醫

載酒扁舟障錦車風情昔日擅季華牽寬西子湖頭
月照淚吳王苑裏花已是舊遊如夢境那堪遠別更

天涯馬前細少茸茸碧來歲相看可憶家

題陶太守易東井汲泉圖

君笈官并州五冬而徂春愛此樸塞區唐魏之遺民不
假鞭撲威民氣始一申峩峩三間堂案牘不復陳日出
報早衙野老獻束薪豈不上下孚相與以性真兒童習
君顏不識長吏尊愿者吾教之斐然有其文關堂聘經
師相與恣討論復苦遠汲勞君也疏鑿勤講舍之東偏
比戶得飲淳偉哉十萬錢即澤十萬人報最復遠移千
騎刺楚分忽逢秋雨餘值此黃淮奔遠近决堵墻老幼
屋角蹲君時值倉皇拯溺復止紛立馬尺水間不惜泥
土渾息此百衆鬻魚貫出一門餘人託城墻兀兀萬竈

屯夜火明城樓擊柝衛遠村時時撫循之無間晨與昏
善後計復周俾得息痛呻披圖識君顏廉直厲且溫惟
茲兩州民沐浴其深恩我感此一隅先人蹟猶存先曾祖
歷官山西君也更繼之惠遠澤復臻誰爲使君謠我實
廉吏孫他時國史中補此吏蹟循

酬彭秀才翰

洪子家貧不素飽作客遙憐自辛卯未過社日已離家
憶得出門何草草昇州刺史苦愛客隔歲招呼絕傾倒
數子相隨藉討論六經未熟慙師表君來適館我則喜
共對寒窗坐昏曉避跡曾嫌吳楚囂移家爲歎黃淮擾
已拈經籍過淮南更覓書堂住江島三百五篇頌難輟

六日七分工復早魯兩生看絕業傳楚三戶覺居人少
彭生避地攜暈季洪子舜家念衰老別夢更畝汲米鹽
狂情歷亂辭花鳥雨花亭子南城外我昔來遊興孤矯
壯歲君看有鬢絲少年我詎工文藻彭生彭生本非俗
我有新詩向君讀明日浮雲各去留相思寄我書千幅
寄趙大襄王四絕

趙生讀魯詩篇舉三百五今日鉛槧中例應廢蒙楚

蒙楚悼
亡詩也

築室雲谿東讀書慕不朽亦若顏子淵髮白二十九

兀兀秉禮生一歲值兩碁誰能善居喪吾終望鈿期

時趙

有世母及
妻之喪

得朋信無方結交戒便辟今日士大夫移牀誰遠客
與徐民部大榕同舟述其先人殉節及家僕從死事感

賦此

半日猶遲江上楫一宵更聽官街鼓鼓聲隆隆客難寐

意外逢君倍淒楚譚溪不歇傾耳聽語人復煩屈指數

我悲詩老埋碧血謂趙戶部文哲汝哭先人亦黃土九原可作

晉隨會百身莫贖秦鍼虎墨衰從軍自歲卯丁君先人以

轡辨赤羽飛書贊旁午崎嶇意自激風雲慷慨心寧怯

刀俎箭鋒轉鬪無全目裏瘡夜戰凶半服是時列陣盡

猿鶴憶昨軍門萬貅貽招魂蕭蕭植大旗歸元淒淒忽

飛雨平生氣尚畱須髮慟哭驟猶繫圭組丈夫既死存

全豹國士捐生出五穀先生三業後既可憐共作百夫
防誑有名編五人伍微軀容易裏馬革今子切莫聞雞
舞方今

聖人赫然怒兀兀千軍倍雄武心膂欣看任方叔爪牙
不復歌祈父還聞二月傾巢穴佇看千屯破樓櫓帛米
更番

賜上方

廟謨重疊頒樞府建祠錫爵隆俎豆聚魄凝魂列勲簿
已看戰骨慰泉源復見靈輜下江浦君行記歷川南北
早歲卽依天尺五骨肉方看聚里閭功名期不慙宗祖
君談已竟猶悲憤我感無端自仰俯男兒忠義非偶爾

烈士捐軀未爲苦
明年春後塞草生
詞客還歌戰場古
春望

城隅聊北望
芳草一何多
繁花最撩人
稚禽鳴春和
飄飄襲輕裾
沉沉窺素波
漁唱忽復來
帆從影中過

南村散賑圖爲山陽尉題

河流東來不可當
憶昨魚鼈升君堂
官卑方攝丞簿尉
天險欲合江淮黃
河流決城已旬日
散賑還呼尉官出
尉官耳聾年六十
驗票呼人百無失
大者屋角狂狐犇
小者樹底饑鷹蹲
頭顛頸縮三日餓
共盼賑粟來空村
持瓢舉釜復攜斗
已見千人立沙阜
黃衫小吏足不停
村後村前更招手
溪泥沒髀無肩輿
尉來村北跨一驢

行籌散盡整鞭去不遺索米來豪胥淮陰太守知君績
早晚臺端奏賢跡君今所補非尺寸不見遺黎活千百
憶舍弟

爲賈憐吾弟奔馳屢告勞奉親居舍北食力去江臯歲
火周榆柳年辰卜枯槁尙慙非義養未敢競秋毫

偶成

弱冠始讀書緬焉託經穴不作章句儒平生慕竒節曲
臺日繫肘取與日用切外此三百篇行行富陳說扶風
業雖粹槐里節尤絕磊落一世裏儻容有不屑

禮堂寫六經虎觀集群慙事經百輩後不復有殘缺所
貴其師儒人人善遺說庶幾先聖意得再見施設昌黎

障中流功與魯鄒埒井田與學校不在守陳轍緬此經
濟儒慨焉門戶別

善哉歐陽言六經盡除緯我謂非聖書流傳更滋僞支
離衆家說頗苦隔肝胃邪流混寰區吾儒所深諱功應
闢吾黨何忽歆異類前古與後古怒焉望同志芟夷蘊
崇之而俾無所試浮屠道德言自信無一字

我憂一世儒兀兀釋負擔士生習風流恐復開清談日
用其經常顧欲鄙大凡陳編百年來反復叢謗讒逃儒
或歸禪士也行二三峩峩下忠貞晉世多蒙慙太息通
鄙間憂來念焚俛

遲舍弟不至

別館兩方歇離堂夜已尙躊躇思子意破曉看殘星
春草生門戶鄰花覆屋牆貧家生意足早晚願稱觴

題陶公子花下讀書圖

我昔卑居近谿築鄰花過牆常覆屋少年不識杏與桃
但覺春光艷心目嬌兒恃母無不至竟欲把書升屋讀
鄰花吹墮復吹開我讀書完復書續未因屋窄思遷徙
可柰花殘意蕭肅爾來一室更凄然春日渾如坐空谷
眼中對此空成羨慧眼輸君看春足君家窮海花枝少
故畫疎枝滿橫幅朝朝把卷惜朱顏夜夜看花燒絳燭
居然少壯分今管我鬢初蒼爾顏玉勸君時讀復時看
歲月真如電犇速

讀書

我思古聖賢一一備載記讀書無餘閒安能復營利幸
茲將母暇入室却游戲力食既已周盤飧幸粗備少窮
本孤露離析到曩季長識干祿艱無心學毛義陳編恣
偃仰非欲置論議丈夫一寸心筆墨非可寄千秋萬歲
外有人知此意

憶孫秀才星衍兼寄朱訓導沛

雨中春事忽過半今者已往時難失人生稱意只少年
花枝可看唯二月墻頭燕語初撩亂戶外草生殊鬱勃
已看花氣逼眉宇其柰春愁刻肌骨迎風梅蕊飄屋角
淺笑桃枝倚巖窟可憐花好更落開痛若人生有存沒

如君肯來來已算謂我不思思轉鬱整衣日復望趨承
束帶誰能受迎謁慣經作客甘顏厚不善著書寧口吃
君因漫叟識愚公世總肥秦視瘠越遙思句曲不百里
近苦客齋無十笏喜君比舍得詩人坐讀新篇激林樾
前時一見尤溪慰古道須眉意超忽先生老矣憐徐穉
夫子聖者同臧紇酒兵越席工射覆蠟屐登山歷凹凸
平生學杜能遺貌朱君前以近作見寄并贈余詩數章十得其九非髮鬚
筆端森嚴鋒穎秃君以異采相補黻狂言欲使坐中訕
好句忽來紙上突昌黎和仲舌本強畏子巧言甘木訥
尤驚春去偏冉冉思與酒徒同兀兀榮槁得失休更計
久識此生由造物我飯桃花例得仙君悲石火猶依佛

蟬乾久已難吞篆瓜苦惟應僅畱峙要從方寸息雕鑿
須向口中畱石闕勞生役役本其理嗟我道自爲親屈
三旬望弟復不至彙櫓江心自搖抗男兒青眼當向誰
看我朱門衣卽拂

夜坐

疇管樂貧居衡門巨松陰一與塵世綠久非平生心朝
出暮復還豈不愧素禽偃仰一室餘不欲聞衆音耳目
雖無蹠尙苦俗慮侵我行忘歲時庭草忽已深落月照
我牀恍然思幽尋振步苦不遙咫尺阻密林瑤華信無
多少壯忽至今秉燭有所思遂以成長吟

造物無成心流藏有生息于茲桃李花偶然寄顏色百

物當其榮欣欣亦攀陟感茲羣動意不復能緘默英華
信流露方寸庶彫飾吳生傷疾疾盛守苦淒惻早讀叔
夜書但焉寐先識

寒食醉歸作

身如病鶴形踰躑昨者苦辭歌舞筵繞廊匝室百回步
初五月照空簾前花開桃枝復李枝忽恐春去無來時
含情清淚一飄灑已被鶯燕窺相思小樓西角簫聲永
有客傷春愁歎省可憐五夜起徘徊明燭滿堂陰瘦影
花枝折來非咎春人老亦苦非春人春風吹園雨如塵
夢斷不斷愁侵晨臨街已聞折柳聲苦道明日成清明

曉起

曉聞粥鼓官齋側瞥眼今朝是寒食鄰家屋外數枝春
蜂蝶爭誇好顏色游蜂蛺蝶安得忙拂曉却復經頽墻
三春人稀徑泥滑一雨昨過苔痕香橫塘遠映城西閣
十丈朝曦射羅幕誰從簾底著春衫花好只從衫上落
園空無人少木幽我今不來誰與愁樓高欲隨峰勢側
簾卷已逐波紋流華季作客情如昨綺語銷除愁不作
傷春擬復共孫郎寶馬日高馳郡郭

讀馬令南唐書

神仙空說善調劑畢竟誰將國事醫劫裏萬人筮似豆
空中五嶽走如碁經時肘繫真王印幾日心懸大將旗
莫向新亭更西望年來疆域漸離披

簡寂虛推帝外臣卅年三見海揚塵皖公山下今非昔
固子坡前夢是真天上鯉魚傳吉語宮中烏爪出僊人
東南地大如甌子肯使羣公議得伸

春日偶成

傷春客占舊池臺稱意簾櫳信手開一晌鏡中紅不定
折花人帶日光來

寄呂秀才星垣

前年作客歸里門舊游說子能論文蘭陵城邊數握手
杯酒未洽重辭君識君文名已三載才如百川不歸海
銀河倒注弱水西努力滄溟欲相待

錢公子中銑招飲即出其尊人文敏詩見示感賦二首

三季爲客歎消沉聞說尚書墓少溪顧我久虛泉下望

感公重讀座中箴時讀所經時絕嶠清烽火公昔平貴州苗香要

往事燕臺盼雨霖不爲蒼生畱暮歲杜陵淒斷蜀州吟

清宵同歎雨中扉高閣開筵夜漏微老去詩篇尤澹宕

重來賓客尙依稀郎君彩筆親承久小弟青雲事業非

時樹叅會
報罷 兩過公門豈無意感恩獸爲淚沾衣

旗亭小飲悼馬秀才鴻運

馬卿消渴酒壚邊只住人間三十年黃卷共愁生計累

紅塵苦被世名牽城樓月出誰同上竹屋風吹祇獨眠

今日下河休痛飲更無僮送典衣錢君寄籍順天補博士弟子負以往友

勞疾
病卒

醉歌

年華過眼如飛塵一杯自酌當春辰眼看百事不復闕
只惜風雅無傳人青蓮仙人本長庚醉中揮手騎玉鯨
五花筆采埋九京恨事頻使文章平我今裏古抱積誠
欲生者死死者生後來才弱誰與爭冢中枯骨珍連城
烏呼一杯酒萬世名舉以贈子良非輕我狂亦酌杯中
酒百篇于世應不朽男兒何必事功名落落姓名高北
斗

書陶太守易朝天贈言冊後

三千里路趨朝去四十篇詩錢客回循吏共傳邀異數
帝心仍復念偏灾

名見時問去秋淮安水灾甚悉

頻年舊雨聯心契

歸日新緘許手開不是吳公知賈誼幕中誰得滯通材
寄襄州倅舅氏

浮雲送翁豈有極如翁五十復六十窮愁心跡數端迸
多難人生百憂集兩兒兩女昏嫁畢五嶽催翁理遊笈
浮生寧作車坎軻歲月難同蚓蟠蟄聞翁求祿意有餘
擾擾自曳侯門裾黃塵拜跪顏色苦赤縣簿尉鞭笞俱
坐思一斗復百篇安得轉翁還少年時人愛少翁復老
何所位置于其間白雲谿白雲宅中有茅籬兩蓬壁鄭
公之詩費公易待翁歸來竟牋釋所注有周遺注等翁閒更作
左氏鍼儻能驅我周官癖

重過廢園有感

十二窗櫺敞絳紗關心閒看後時花殘春寥落成秋夢
曉日荒黃似月華憶舊已無機上錦清遊思泛斗間槎
橫塘波影空如咎噪盡官私兩部蛙

年荒

田荒隨分摘園蔬薄暑還看帶露鋤鼎鼎百年生計少
勞勞人海著書初重逢元禮談心切若說涘源濟世疎
青眼幾回南北望感時懷舊鬢慵梳

自儀真放舟至揚州襄汪孝廉端光

不及虹橋修禊辰布帆東下剩殘春鬻慙里俗非吾土
窮憶交游有此人日晚細尋花下路風喧時避竹間塵
重來屈指無流輩董相祠前駐短輪

不雨

消息秋江上連旬望雨霖斗間雲耿耿日畔氣森森
蝮橫猶昔蝗蝻害至今吳鄉頻歲歉愁絕旅人心

寄舍弟

憶把家書讀愁言米價增已知河鯉涸只望雨龍升
八口茲何計三田再不登年荒應殺禮親迎莫燒燈

有客

有客夏傳淮左郡五旬不雨已無禾頻年歸燕思巢木
此日枯魚泣過河賣屋置船移地急荷鋤立澤望恩多
百年土著流離甚辛苦勞人尚作歌

陶太守易守淮安日入古寺見維摩詰旁像周公孔子

侍立因斥維摩象毀之重建惜陰書院中楹祀先聖
先師而使諸生讀書其旁彭少司空元瑞既爲作惜
陰書院記余復繫之以詩

浮屠之言竟如此孔子吾師之弟子空譚惑世已足誅
况敢模金鑄形似居然右孔復左周手搢笏還垂旒
此方儒者不能闡無乃學術人心憂淮安太守行春暇
古壁流觀發驚訝三千畫繪經橫膝五百復驚僧出舍
大呼斥出象與獅搃有法力寧能施正周南面孔東面
盤辟雅拜尊吾師我聞外侮人所召史說無端列三教
謂魏魏詵能驅楊墨世已希奏毀淫祠政尤要羣經插架
梵篋沉太守建堂名惜陰傳之後世俾勿失莫使浮屠

闌入室

丙吉問牛圖

車斑斑兩輪我識漢家丞相尊漢家丞相朝趨朝道
中累累奔百僚車停不行路人咤丞相公然爲牛下仁
心豈止愛一牛丞相自爲陰陽憂長安殺人不置論我
慶此牛丞相問披圖今古服輒同恨生不逢丙相公君
不見三時不雨暑復酷牛喘溪宵汗流足天心似復爲
宏羊丞相誰來問黃犢

孝陵瓜

陵旁三十戶都賣孝陵瓜野本摘來細踈藤隨處花薦
新虛寢殿乞種故侯家忽覺新涼永簾前感物華

雲谿競渡詞在趙大裘玉席上賦即寄蔣氏舅仲并引
谿流一曲渡口數家兩橋則風月居多三徑則人材
最盛僕也少焉棲息長復淹留壑屢居甥樓曾作贅
茲值歸帆之便欣逢競渡之時問畫舫之宋寥頰云
歲歉詢烏衣之消息半屬天涯不無瘠歲之憂益以
勝遊之感值倚樓之招客遂入座以攄詞對爾言愁
爲余命酒然今者雖承雅讌何心烹谿口之魚儻異
時念我狂言爲手補岬頭之柳

雲谿水淺舟難行今年競渡不進城居人閉戶懸艾虎
行客坐岬聽林鷺雲谿渡口晴陽驕一十八株風柳搖
遊蹤至此起歎息欲去被客還招要招要我過谿南室

約把雲谿盛時說我住雲谿二十年風光除我無人述
當時雲谿只兩樓樓檻對映東西流蔣家居南趙家北
兩處日夜從清遊相逢只說天中節容易人生值茲日
龍舟夜謁水神祠便喜明朝是初一晏公祠外當河衝
水清波淺戲五龍一龍前驅四龍竝後者擊水前呼風
還因

國忌龍舟歇夜久盞船復齊出燭影看過第四橋簾鉤
正值初三月兩邊樓閣竝時開午日龍舟次第來齊向
趙家樓下泊開鵝一日戲千回此時却憶豐季樂節底
遊錢恣揮霍海口生魚集市橋湖襄好米填城郭東家
西家集畫船南岍北岍銀盞懸沿河漁叟苦不睡絲竹

徹夜聞喧闐俗奢則敝由來忌荒歉頻年本天意斗米
應須二百錢閉門不敢重游戲雲谿我別今五年蔣家
舊宅聞頗遷移居都向冷坊住開閣誰歎幽人眠閒來
谿口尋蹤跡巷裏居人尙相識路指南頭乳媪居舟橫
北岬篙師宅可憐石徑盡欹斜多半樓臺住小家簾幕
影沉回舞燕管絃聲歇鬧樓雅日光下照官河口趙家
不種春楊柳我向雲谿渡小舟宋寥谿閣頻招手今年
已去明年來我願俗好淳風回相攜士女樂佳節不飲
亦可傾千杯我爲客譜雲谿曲欲寄雲谿兩家讀何時
更續廿年遊除是年豐室家足

寄從舅氏人騏卽題行卷

書來憶我秦淮路
秋到思人越舫齋
十日雨餘開菊徑
五句歸後著芒屨
料量竹石心殊苦
看取花枝影亦佳
只有謝家庭畔樹
尚隨萍梗客天涯

謂小阮重光

夜抵泗州作

快哉風帆不能留
我乘夜月來茲州
舟人興發不避淺
篙急已觸城門樓
城門樓對僧伽塔
月裏頽墻見周匝
傑閣都教水勢沉
佛樓苦被帆檣壓
民人魚鼈厄有期
我豈識有吳支祁
此方戶口最寥落
人實苦瘠蛟龍肥
收帆港口還鳴鐸
月黑波腥香難託
行客終宵歎水風
居民百載無城郭

自州城湮後泗州移
泊州城不復設城郭

道中作

上元縣南逢野叟十里渴走將何求呼余道上馬應馬
羨爾笠邊牛戴牛禾枯浹甸向余語欲到官衙請祈雨
翁乎任爾秧種枯縣官祈雨怕減租

七夕夜坐

屈指看初月關心未及秋一年春夏永七夕古今愁暗
鵲響辭樹明河影入樓此宵成獸立清切數牽牛

約伴

約伴東頭去三更啟曲筵誰知芸閣上望雨亦難眠
舍弟以八月親迎予憫其未知稼穡之艱難而卽有家
室爰作詩二章勗之以成人之義云爾

我年十五六卽爲童子師無父誰復憐門戶獸力支汝

行作螟蛉識母父不知嗟嗟叔父喪千里歸何遲門少
片瓦遺廢讀亦此時汝雖歷飢寒幸母畜汝慈衰宗數
十年變故亦已滋前者汝勿忘後者汝勉之

貧家婚媾遲汝尚未宜匹傷茲季母心急爲而授室晨
昏侍堂幃羹以慰苦節阻勉卅載修冰霜歷周折年衰
心血盡始及抱孫曰願汝勗室人承顏幸無缺

贈史秀才凱卽送至潁州

與君本相知卜舍幸咫尺迢迢兩家巷臨水一畝宅犬
吠過石橋晨扉已知闢綢繆外姻締纒縷復逾昔契濶
屢過從清譚恣閒適浮萍匪長聚去矣自南北舟楫誰
更遙君爲潁陽客傾茲一杯酒屈指分手夕歲暮歸衡

門相期事休息

男兒行

君不見男兒出身當建勳二十作將皇威申長安東頭
第一門去時錢別歸洗塵漢皇重武不重文丞相詎有
將軍尊麒麟閣上十一人磊磊落落當其倫人生功成
亦莫喜計失頭須行萬里

蓬生麻中行

但種麻莫種蓬種麻蓬已生麻中移蓬根植麻側蓬心
飛揚麻性直君不見蓬生麻中有張說百年所爭只一

日

立仗馬行

立仗馬不得鳴丞相以此愚明廷馬不鳴食三品戀棧
人多消祿廩君不見立仗馬生舞馬死丞相之言亦良
旨

卽事

鄉民數千人曉集龍祖殿焚香禱靈雨老小叩頭徧痛
哭對縣官民情亦堪見鄉閭報荒冊堆案驚雪片君等
司牧民無爲數清宴災荒尚啓殺事已動謠諺宴客設
八珍嗟余豈能咽家雖無負郭八口寄吳甸晨昏助祈
禱天豈鑒微賤齋肅告牧民勉思民所便

去冬淮安荒民死十七八天意未可知水荒兼旱魃感
茲財賦地頻復降茲罰抑聞物力侈商賈更輕徭土木

既已繁多金建崇刹奢淫理名禍誰復肯深察盛夏百
草枯炎炎肆誅殺

近復

近復遷城東屋舍八九間非因卜其鄰樂此蹤跡閒久
客偶一歸入室靜掩關兀兀經史陳文草藉以刪燕語
不識疲屢啟慈母顏弱子復數齡提抱不覺頑遠聞剝
啄聲予仲亦已還倘得無事貧偃息安足患

曉起

爐烟幾絲裊歎愁殘魄一綫舜簾鉤雞聲已曉方報曉
蟲韻未秋先警秋秋聲初來隔帷帳遠憶幽人起相望
夢好難尋五夜餘樓高只住三層上

憫旱

山之嶙嶙不解出雲雲之繹繹不解沛澤南山有雷我
聞其聲朝雷興雲暮雷復晴十旬皇皇民力亦屈萬車
遏流江海亦竭

寄遠

昨送北歸人今逢北歸燕傳語北歸人來書附征雁
夜起

遠隨明月去獸望曉星來蟋蟀三兩聲海棠花半開秋
衫全濕露團扇半粘苔戶訝流螢出窗驚電影回非因
馳照遠誰復認池臺

秋風歎

秋風吹復秋雨簾底秋人怨如許牽牛花開不歸家滿
庭又放金錢花花問門鎖誰相省電紫燐紅少人影空
房燭冷眠易驚下塔雨欵看啟明

紅梅閣小憇

靈構非一椽蓬門晝常扃道流習清靜塵跡罕到庭時
邀二三子暇日每一經愛此野圃風竹外做曲櫺北戶
時啟扉圍棋子丁丁中有鶴髮翁服食致百齡矐目不
與言高臥枕道經各欲適褻抱久久還忘形

題江天雲樹圖送陶兵備易至廣東

黃陵廟前官舫開使君遙溯長江來金陵渚邊津鼓響
使君復傍長江上長江一碧吳楚交公來早潮去午潮

江寧太守衡陽宰公官只飲長江水江天尺幅寫入神
湖江送者還百人就中年少揖官舸綠鬢未顏羞似我
君不見江湖初生海日紅來船去帆咸使風我乘素舸
何所從送公西上吾還東

太平訪沈太守業富不值贈公子在廷四首

蹤跡辭賢守心期念友生欵門逢夜雨撫樹識秋聲兩
地余遊倦三年爾業成談經匡鄭事莫更急詩名

今歲江南地愁看八郡荒蝗蝻曾接壤禾黍獨茲方日
晚初離郭秋成驗築場似聞祈雨切澤早徧山鄉秋歎

禾黍甚茂

尊酒雷賓切開筵樂縱譚脫冠懸竹樹拾果貯筐籃後

約知南北時座中有賢人清光此十三桓公臺上望題
句爾何慙

清絕憐公子華年日正東卷圖衣袂碧落紙海雲紅觀
水淵源合譚經志節同他時東觀關應許嗣家風時騰觀海

圖索

題饒上舍晁印譜

元明文敏筆法工六書八體無能通爾來識字益不廣
誰肯細意搜魚蠹省文破體入書舍閣帖堂碑益增價
子雲竒字縱失傳太常說文猶可借豫章先生值此時
乃欲一意追冰斯唐人識字宋人否藉與末俗平嘲喚
祇今白髮看盈把姓氏鑄殘賞音寡宰印寧訛白下羊

隸書不混烏邊馬先生五十動齒牙
只惜四海還無家
攜將絕技廣南去
炎嶠恐乏窮侯芭

中秋偶成四首之一

檀板聲搖燭影紅
韋郎情劫記匆匆
鄉閭一賦傷窮鳥
帷幕三秋盼斷鴻
往事酒傾波影裏
幾時簾動月明中
春人樓閣疑天上
十載遙遙夢未通

至日度清流關作

補壬辰冬

元雲開北嶺
至日度崇關
人馬朝飢極
烏雅掠食還

附鮒軒詩卷第七

陽湖洪亮吉著

茅峰攝山集

乙未丙申

書汪少尹蒼霖民謠三章後

并引

甲午八月河決入淮安城其冬蒼霖奉憲檄運米抵
淮安城下賦詩三章仁人之言知民疾苦矣昔杜甫
讀元結春陵行謂得結輩十數公叅錯天下爲邦伯
天下可安余亦謂今日得蒼霖輩十數人爲令丞子
吏治未必無補蒼霖又嘗以強直爲上官所斥因賦
贈此章非特贈蒼霖亦甫所云庶幾知者聽耳

五十命一官悠悠困簿領山城當孔道坐席不得永憶

昨抵任來東西屢馳騁黔陽竣差委飛檄調至省載米
數十船前輸被災境淮民水中哭聞者爲咽哽風謠譜
三章言重意深警江南財賦地水旱更苦併今年零雨
絕赤地百萬頃山邑命更懸饑寒久延頸心期長官至
爲可急匡拯慷慨前竭誠果遭上司屏丞微顧白事不
斥良已幸歸來臥荒廡逸氣耿耿稽查又蒙檄零雨
泥沒脛流離散清奉不忍溝壑挺我聞咎丞簿得爲民
命請監門繪流圖藍田奏蒙省吾儒所當效不必厭官
冷酌酒讀子詩中心契剛體

九月十三日飲朱博士沛室奉贈二首

博士齋頭飲偏逢月十三官貧愁歎歲節冷喜狂譚百

念營生計吾曹合負擔無窮憂樂意白髮影鬢鬢

苜蓿荒西署先生未厭貧官清雙古柏唵老一間身種
學兒曹切談經士氣淳猶餘憔悴客共爾結東隣

九月十五日沈公子紹祖招飲月上後復移飲王廣文

吉士西舫醉歸贈孫大星衍作

沈生一樓滿貯書其下置酒招癯儒就中年少數爾我
吐納俱有千明珠峩峩縣東王廣文玉骨飲酒無由醺
攜樽晚復酌西舫我醉脫落頭上巾十年作客狂難忍
萬椀急須澆舌本齏腸食蟹苦攻馳髀肉騎驢復消損
我前失路無所歸典衣作客來歛扉洛中先生初釋菜
院南主人思採薇

孫大自言生時夢伯夷入室因字薇隱

忽然相約過谿

步數子于吾亦非故三尺雛童訝欸門主人迎階客四
顧清譚已了進百壺愛客更肯容歡呼燭花低昂眼花
眩失足尚歎旁人扶狂來高歌出門走兀兀橫街屢招
手君從東路邀狂客我頃西行追北斗谿西尚有一燈
紅醉影延回谿路中脫衫懸樹墮涼露振袂過橋迎好
風橋頭匆匆復爾汝爛醉誰知是賓主三更歸路過縣
門側耳還聽數聲鼓

得孫大詩知昨日醉眠處乃古墓也戲賦一首卽寄孫
大

城南路昨日宵眠不知處沙寒月薄影荒荒白項老烏
啼一樹石旣埋沒不計年跣足走上岡頭眠夢中白骨

相爾汝惹起醉魄時流涎古人身後亦足悲烈火燬盡
山南碑當時百縑乞名筆竒字剝落飛成灰青天沉沉
醉歌苦地下何知月三五幽眠時揭紙錢開漠漠酒香
驚沁土枕碑莫更笑客狂猶勝斷隴眠牛傘喬公墳上
故人少誰肯過徃傾千觴酒杯去手即欲愁况復地下
眠春秋荒墳一畝儘容臥未識更有閒人不鬼風吹人
寒露襲幾尺醉魂離地立跨驢明日復經過羸得竒人
攏頭揖

同作

孫星衍

兩生宵來醉眠處却徃經過不能去原頭乃有大臥
人一簣斗起殊嶙峋道旁農人爲予語此墓多年近

開集詩言卷之三
三
畊塢天寒出窟狐作群林空無人鳥呼侶悵然爲憶
昨日遊快意一失成千秋試呼墓中人汝亦能飲不
醉魂飄飄出幽穴知汝見麴涎應流山頭土乾夜寂
莫知爾哀歌動吟魄得非古豪英列屋羅香姬瓊杯
綺食伐天稟坐使螻蟻相凌欺不然朝行碌碌廁官
尹似吏非吏隱非隱黃金買譽立作碑磨滅不博行
人憫君乎名山一息苟足垂若敖雖餒悲何爲君不
見浮名如雲死即歇三寸桐棺喪幽骨才豐德薄肆
語言不及墓底甘淪沒清風朗月去不回知爾至樂
無如歸百年大悟信豪舉回視身世真劫灰吾儕不
飲亦黃土夷躡塵埃各千古一坏榛棘死何靈莫聽

酒人頭上舞

新霽晚步歸小飲沈公子紹祖宅

句曲城東路蕭蕭雨載塗暫晴思策蹇不夜復啼烏地

冷踈門禁年荒減市租華陽山石盡聞已食蒿蘆今歲容

最荒村民先屑石粉食之名觀音粉近復食蘆根

公子能畱客深杯敢盡歡早憐詩思窘未覺酒腸寬粟米應儲種魚蝦僅入餐吾替欣飽食莫更討宵寒

樓上倚聲圖

夏居舫秋居樓月華只來樓上頭吹瓊簫續羌笛梧葉秋飄古墻隙梧飄一葉笛一聲聲遲聲疾已五更秋花如烟隔牆裏石上聽歌人未起

養寂

養寂非予心習勞從所慣非甘棄筋力庶以別芻豢羣
居無一事恐復淡嘲訕才短識亦庸無師古人慢逢迎
畏文士涉歷羞巧宦不作一世人何能寡憂患

得黃大書知家叔自潁州歸

襤被蕭蕭出潁城空囊羞復溯歸程關心鄉落悲年歎
過眼兒童愧世情多病更憐難作達詣人都餉不甞行
惟因騎馬淮南路水碧山青尚送迎

頴歌清絕繫人思開篋欣緘七字詩感激最憐翻楚調
升沉且復任吳兒孤猿獨鶴傷峻路廢瓦頴垣夢昔時
多事更休題綺句春人都已鬢如絲

時黃大寄到綺
憶詩十教首

道士家看鞠

道人半歲不出門種得堦前一畦菊菊枯望雨無消息
日致城西水三斛百錢買水寧忍饑花開道士已典衣
我笑琳宮狂道士看菊朝饑還飲水

前題

孫星衍

道人無家花作命只種此花開歎盛慙陽自說人力
多觸熱我知花骨勁原頭草枯落照紅更上傑閣看
雲峰秋心不及花態濃九月村景如殘冬

讀黃二綺憶詩漫和四首

小閣珠簾動影紋別離消息悵初聞徒教小玉燒心字
枉乞麻姑看手文籠袖紙燈行怯怯牽衣花刺觸紛紛

兒家一片橫塘水，只到門前派已分。

氍毹廳北揖新正，碧玉多時羨長成。乍語已知雷後讖，相逢都尚識前身。消沉楚雨三更夢，來往鄰雞第一聲。剪罷燭花裁罷句，玉釵原不墮塵情。

紅墻一角露薔薇，日晚人來喚鬪扉。說夢故教聲悄悄，傷春偏覺影依依。清修篋底裁番勝，密約樓頭毀嫁衣。最是玉釵淒冷處，蒲團真欲證忘機。

華年作客此蕭辰，已覺涼秋勝姪春。鸚鵡頻離前度劫，芙蓉須認再生人。空从碧落傳私語，只向金僊乞病身。殘月一鉤幽夢醒，笑他還墮軟紅塵。

題沈公子畫幃

東風吹春著花樹有客閉門花裏住春光九月初三
漠漠卷簾流影素幽居隔竹時見山竹外好鳥聲綿蠻
沈生園亭莫上關恐有逸翮宵飛還

聞同人會飲沈公子宅予以事阻不得往戲寄

我來句曲無所爲日夕知從少年飲廣文齋頭酒尚醉
復思騎馬過狂沈沈生無錢能典衣洪子得飲殊忘飢
連朝短晷去尤速誰復料理霜螯肥生家粉壁繪子安
樓上作賦千人看忽思我亦好身手二十落拓吟聲酸
鄰齋兀坐非一時我狂只有群公知撐腸拄腹五百卷
快意不欲爲人師朝來高歌氣如虎客欲出門逢吏阻
人生敗意皆若斯却值升堂打官鼓

憶昨

憶昨寬租 詔頻言下縣官連旬清戶冊累日駐征鞍
大吏徵求急 飢黎歎息看窮鄉無宿食莫更侈傳餐
十月六日同朱大桂芳孫大星衍城南晚步

十日五日一出遊原上草木初辟秋惜哉歲歉寡歡思
且覓二子嗟窮愁市中擾擾無百家落日鼓已鳴官衙
飢民入市競挈攫野店插竹憑欄遮故人住近宮牆左
破壁經時有烟火吏病無能索市租客來聊復供山果
芒屨日晚踏市塵城上月出光愁人斜陽欲沒尚未沒
照曜樹頂棲鳥噴城南城北荒塗永城裏蓬蒿餘百頃
檜柏難尋隱士壇轆轤已斷仙人井前時一雨潤麥田

短麥稍喜抽平阡已看黃口竭樵採忍聽白髮談豐年
道旁一輩還相告日昨征西捷書到時金川大捷百斛襄船
米禁開征人夫喜居人噪我今作客雖一方百里尙得
稱吾鄉眼中見此誰得忍樹赤無皮石無粉

偶書呈朱博士

十餘年來俗不淳水陸食譜宗吳門維揚富人益輕猾
土木侈麗窮竒珍滯祠一方有千百媚禱役役勞心魂
衣裳更厭陳制度袍袖割裂無完純一方好尚匪細事
此事得不尤薦紳吾曹讀書有原本忍釀薄俗憂君親
十年此論不敢發得遇公等眉纔申一門風氣最淳古
兀兀把卷勤人倫廣文雖微有祿入節齋尙得分親朋

喜公招客只一尊五簋不必羅雞豚佳兒四十布作禪
冠服稱體無新陳行之一方俗可敦請以此法遺子孫
苦雨

始聞視北斗初昏見南門陽月倏已除節候尚復溫驚
看未蟄蟲唧唧鳴樹根山雨忽復來急響勢若奔寒暑
理已乖涼燠異旦昏夙有登涉心時擬遊茅山澹旬阻清尊
我友住巷南眼急瞻朝曦予懷亦鬱紆對此屋漏痕
遊城東千佛樓作

原頭蕭蕭北風動騎馬登山不施鞢斜陽入寺紅已微
竹色圍樓綠疑夢竹中添綠莓苔肥慘碧忽訝開雙扉
移鐙入室許相見可惜僧老無完衣樓旁三楹屋深暗

僧言一樓狐復占佛頭經雨已落青畫壁凝霜欲成紺
鐘魚聲中日未昏羣狐擲磚催閉門空廊星踈鬼復語
白骨欲起亾精魂欲言不言還屏息此地年深本難宅
半畝莓苔積殞宮敗墻破塚連苑碧我思僧語無所徵
起視爲別長明鐙樓頭缺月夜半升欲挈襪被陪枯僧

同作

孫星衍

城東佛樓幾年閉塞徑秋榛刺芒利飛磷射屋鳥啄
墻鬼風吹檐斷佛臂此間非墓非戟原豈有厲魄號
煩窵青狸捧骨夜窺月日氣不到羅神姦迎廊一僧
病枯瘠見慣妖蹤訝人跡老蒞出戶曲復斜反鎖空
堂晝深黑樓前冷碧竹作堆逼袖細影明殘暉愁霖

滴塔漬幽血敗粉剝壁生陰苔竹梢朦朧上無路疑
墮中宵夢遊處回頭不憶隔世來過眼復恐今生去
簷牙壓肩樓腳搖驚起穴棟千年鴉屏聲獨立瓦爭
落失勢一墮塊難招原頭日落樹蒼莽既下心神久
恍怳林梢却顧寺角移那得騰身立平壤

晚眺同得景字

惜此歲序遷高原自引領城空氣蕭瑟鬱鬱見遙嶺流
水聲已漸原田百餘頃行當苦寒月野復少遺乘落日
下北城暉暉半樓影荒塗寡人跡枯骨穿棘梗晷短測
景臺泉枯煉丹井村墟炊烟直籬落鐙火永薄霧復四
圍蕭條隔人境

偕孫大張二步月復得景字

初三月雖好初五光尤永一巷敲柝聲雙橋月華影橋
南二三子蹤跡喜馳騁狂孫旣軒宕張子更修整偶復
作一篇先尋句中警嗟余本孤客非子誰復省編摩苦
無暇欲去未得請昨復寄一書還家索衣領牀頭餘病
婦念我迫寒景宵漏定不眠踈窗剪刀冷

丹陽酈布衣 爲予寫雲谿一曲圖時予客句曲而黃

二景仁則遠在淮潁間因并命寫入圖復作詩寄黃
門前水屋下流屋小亦若蜻蜓舟蜻蜓舟輕舉家住楊
柳門深不知處沿谿柳色搖空春春來只思樓上人樓
前流水深三尺樓上人今去爲客谿南狂客唵欲顛月

出喚渡愁無錢沿谿灣環百回走搖盡東風岸頭柳谿
花初開谿水鮮谿禽窺客還少年芒屨布襪岸南立復
有笠影垂吟肩元卿君子雲宅此時莫問樓頭客一在
江南一江北

夜宿茅山元符宮步至印房待月復下飲石壇作

山行數十里破暝入巖腹勞人慣登涉未欲憇征躅携
火出院門荒荒踏叢竹狂尋石千級孤轉徑三曲幽房
經久閉衰草已沒足青苔點朱符元鶚咒紅燭危躄悄
塵慮激響應空谷東山一千頃月色依皺綠光景忽復
新參差辨層屋孤蹤尚登眺道侶已相速樹杪下石壇
山隈面平麓欣茲一尊酒石上手屢屬夜久霧氣清山

虛漏聲促肴殘尚傾榼石冷忽思禱棲羽亦已醒幽人
杳難宿歡棕于此聚頗復念幽獨時張紹甫未得至心賞不可
忘良辰記十六

同作

孫星衍

琳宮鎮山坳高下飛軒櫺征鞍上盤盤日暝客始停
遵途百勞忘尋異千念盈徑微已三折屋暗仍重扃
竝上怯曳衣孤行危建瓴道士然炬來開門導前行
靜覺鼠嚙松微聞鳥梳翎林空虎氣逼草滑虵涎腥
山頭白濛濛寒氣生夜明空窮露華涼誰見風笛橫
悄然步初還遊侶見自驚誰能守幽房客夢冷易醒
自元符宮上大茅峰憇曉霞閣

申旦不復眠視此嵯上月初陽尚未升了了見仙闕冥
濛松樹外復見一星沒樓北客尚眠樓西窗已豁藍輿
額不至久待意鬱勃二里抵一泉流清鑑毛髮延回積
千轉磊磊出山骨原野何鬱紆陰雲氣飄忽層樓自孤
迥燬壁尚高揭峰嶺有五層樓今燬于火原田間山麓百復不居一
歲歉民氣愁山行寡完褐犂鋤復群聚草樹經劬掘野
雉不敢飛窮搜入狐窟疲蹤願登閣幽想已入樾曾言
富仙釀斟酌苦易竭亦感生計微年荒未收秫

同作

孫星衍

晨策登危峰峰危屏鞍騎巖阿氣候交僕從神色異
一目流衣邊雲足滑嵯上翠陷知仙蹤溪斷若鬼斧利

回巒激泉響暗谷聚風勢蟻行信透迤猿升亦凌厲
倒視白日懸仰干黃雲閉寒空四垂光積氣浮厚地
唯聞天雞喧不見井蛙沸靜懷鴻濛如遠猷身世細
誰能逐輕塵擾擾此中寄山樓足高寒飛闌白晝閉
寧惟戀佳釀兼想挈孤被

入蓬壺洞行二里許以燭盡不得入

揆竒愜幽尋百步得數洞巉巖束穴口已復拒徒衆澗

瞑持一鐙幽光破苔縫逕回歎遊侶賈勇得予仲孫大

浦鄭聯足洗踏伏流身輕擬飛鞚仙扃怯靈響鬼壁怵

華同入虛哄百步不一申稍寬復思縱頗欣露巖竇已復出益

甕去脈始及泉回塗漸成術猗猗閃身入叢業壓肩重

惜此燭炬消誰持蠟燈送蝸涎入衣綻蝠嘍補壁空豎
此獸徃心危詞阻羣從岨昏杳無覩地煖已消凍石乳
嗅復馨壁書捫可誦石上有數人題名靈蹤此疑聚溪處列屋
棟想有太古人莓苔閉幽夢

同作

孫星衍

看山不能吞却徃入山腹玉柱旣參差華陽復洄洑
茲遊稍通人所歷亦娛日奇鋒訝孤豎密理看斜矗
冬温蒸厚地溜響滴虛谷初驚石粼粼始見沙漉漉
捫蹤走妖怪穴竅散蝙蝠垂乳甘可餐流膏滑難觸
心疑轉仙逕曠蕩見平陸身輕便僂僂足冷勇踏蹠
道人見纔訝謂此足虵蝮微微濕氛腥慘慘陰霧蓄

子行決獨往我興恥瑟縮惜哉萬丈窟不乞一寸燭
山靈歎搜覽居客恠剗劇莫附杞人憂甘同謝公辱
遊乾元觀尋陶宏景宰相堂舊址

此山產丹砂林木頗不茂十里及鬱岡幽篁始深秀峰
回拓平陸駿足亦已驟山翠忽到門鐘聲及清晝沿林
飛弱雉列級臥頽獸古壁挂笠瓢虛堂祀星宿碑文炫
雷合籤軸遭雨漏尋井識毀垣穿松歷遺構夫君感通
隱信美想華胄元芝究方術玉篋富章奏澗響已出岫
山雲詎歸岫流連若人度沉想莫余覲三歎讀道書孤
懷爲心疚

同作

孫星衍

尋幽轉山腰折杖行數里離岷樹歷歷盡地石齒齒
羣峰已低環茲岡復孤起巖棲寡俗駕客至道人喜
開門響叢竹繫馬落松子檐澁挂薜蘿階荒合椿杞
蕉心冷逾碧茗味苦還美星燈列金僊雷火合石理
窮搜已折屐促坐况陳簋念沉鐘聲前影閉竹華裏
耽竒悵將別臥靜想無始遵路何茫茫霜林亂紅委
偕王三沈大孫大遊駱氏園林

出郭祇一里入村唯數家過橋追落葉搖樹起飛雅上
客畱題急名園春信餘茅籬兩三處只少酒旗斜
自句容至江寧半道欲遊青龍山未果

鳴雞聲未斷一路續山禽古寺出層碧當門轉午陰霜

林鞭影瘦石磴燒痕侵客飯匆匆去幽棲未及尋
自雨花岡北攜酒至臺上痛飲復憇永寧泉二首
岡北岡南路蕭蕭雨黯長大都繞落木不復有居人寒
意欲侵骨酒香思入脣明朝騎馬去無分乞閒身
荒岡千百轉知有永寧泉屋底亂流響原頭野火然村
童供茗具行客臥苔氈到晚逢僧語憐余未解禪

同作

孫星衍

寂寞荒臺路狂眠共子來居人驚腐脇行客看擎杯
無復侵袍草空生貼徑苔客心裊舊迹交手步千回
路轉知泉近冷然漱玉琴頽檐方列坐危徑更幽尋
露肘天風冷鈎衣竹翠深原頭莫招手正爾作鸞音

遊小倉山房即呈袁大令枚

不覺幽居僻孤行入竹中鳥驚穿樹客鶴抵應門童白
髮耽文史青山作寓公園西風月滿二十五房通
初七日雪與孫大飲城南酒樓

此日樓頭飲還撥篋底錢百壺邀冷客雙燭啟離筵詩
許逢人說狂驚入市眠雪花如掌大偏欲墮吟肩
雨夜偕孫大宿承恩寺十笏齋讀僧雨疇詩孫大賞其
破樓鬼拜自鳴鐘句相約爲詩贈之並寄偉然

亦寺中詩僧

寒風蕭蕭催卷簾三更枕側開詩緘虛堂晝短夜苦淹
一僧詩成白髮添危樓初升雨廉霰樓肉倒射酸風尖

鬼聲隨葉墮屋檐欲落不落蛛絲黏琉璃燈昏佛火燭
羨爾險韻還頗拈一詩刻鬼印玉鈐埜光游仲亦已殲
粘詩作符可止疔七字霍若霜鋒鋸一僧垂老甘齏鹽
好句亦復抵十縑雙編携來驚阿咸手擘八法爲書籤
子今往矣口若箝嗟我石闕悲親銜詩腸已澁韻苦纖
刻削心又魂難恬庵深不聞更漏嚴雞唱喔喔來窮閭
新詩寄將不自嫌支公遠公誰得兼函封勿受世俗砭
我詩自有神明監

將至句曲酌酒與孫大別

共被唵宵雨添衣念曉寒故人應話別尊酒足餘歡夢
逐巖更轉詩畱隔歲看雲谿春水濶隨我把魚竿

時擬
同孫

大旋里

夜宿西來庵因憶春初與吳九祖健宿此感賦一首
西來庵畔聞鐘路聊寄頻年此間住故人襖被念宵寒
行客衣裘犯朝露三更騎馬入一村四更風急復出門
馬毛旋冰馬尾凍兀兀鞍上愁吟魂馬頭擊柝聲遙遙
曉星如月照過橋間敲村店市濁酒一醉陡覺冰顏消
眠牛岡頭曙雅起一綫朝曦射林裏居人宵夢尚未醒
客馬嘶風已十里

偶成寄孫大

邑宰容狂客居人識寓公看山荒署裏騎馬驛亭中作
達街杯酒尋幽理釣筒吾交有孫楚詩筆擅宗風

爲林大令光照題劍俠圖

三尺寒雲落苔井飛仙人來月無影秋霜瑟瑟依鬢青
五花靈符佩鎮星蒼松爲橋石爲室相與隔橋論劍術
星文百步森有芒已覺氣冷侵毛骨神仙幾日離岫中
衣袂常帶朝霞紅可憐秋水一渠碧水色欲上搖青腫
華陽仙令杯在手說劍知君飛將後繡綠千年尚不銷
無聊化作杯中酒

鳥翅岡撰梅分得果字

秋仲余始來仲冬歸未果蕭條霜林下凜冽雪花墮園
丁掃枯枝驚見發梅朶勸客時一來寥寥此間坐窗踈
露山角墻缺隱城堞僻徑偶獸尋重門尚深鎖寧知狂

客飲喜與主人左三兩酌濁醪圍爐聚溫火吟篇對蔬

藪

是日以席間
所有分韻

投贈及果蔬薄酒苦易醒誰人復招我

大風登攝山頂望江

山僧出戶驚狂客絕頂立同山木植蒼松岡南閣一層
飛鳥欲下人還登白雲濛濛一招手天風忽吹離立久
雄心直挾海水飛南望天門北京口

白鹿泉

松杉已疑蟄澗龍闌干亦如飲渚虹天青下合水泉碧
山綠暗裏樓臺紅鈴簷飄風看百尺石徑生雲埋四壁
欲從略約飲寒泉怯此巉巖墮危石

桃花澗

寒月欲盡居窮山道人獸客久閉關禽棲深林獸藏穴
只有孤客偏忘還杉身三年長過屋松古一鱗如瞪目
嚴寒尚馱冰雪稀靜揀山泉濯雙足

紫峰閣石龕作

幾年捫壁壁忽崩石頂裂穴藏枯僧窮冬移來暑復出
愛此雲氣時薰蒸幽嵯無風日色斷貼屋驚看蝥蟊滿
枯僧定後眼忽開下視山空地輪轉

與孫大約作攝山詩久不見寄戲簡一首

我生好恠不避讒詩到何沈猶遭芟平生刻骨愛程鮑
謂此駿馬辭羈銜騷壇庶復見黃子能刈惡木培松杉
喜君筆力更食象病虎不足充君饑吾曹生世匪無益

一奇尚救世俗凡風塵顏面日苦醜人復銳意憎青衫
森然落筆兩寒餓豈意共有神明監窮冬登陟本不惡
遊屐捷過隨風帆君狂喜我百無畏深處往往逢麀麇
山川靈秀積肺腑刺者亦遣眉端嵌君畱奇句墜嵩華
岡阜不足窮鑿創

幽居菴雨夜偕王三吉士沈大紹祖孫大星衍聯句三

十韻

茅菴百山腰嶢秃各百杈豹霧釀濕雲吉士虬枝結陰

陣渠荒澗猶澁亮吉脉斷壑誰澹梅梢東春魂紹祖篁

叢定風信廊敗已剥椒星衍階頰尚榮薜杉根破石理

吉士隼爪畫沙印陰陰結垂螺亮吉歷歷伏蹲窺坳奇

臥猶局紹祖 嗥滑墜甘殉盤鵲啾巢寒星衍 饑齧窺枝
迅龕深黑初透吉士 壁合紺誰爨苔綠掩佛臍亮吉 睛
紅閃妖瞬層氛塞巖罅紹祖 積踵陷石躡藤影交怒蛇
星衍 樓形露飛蜃絲垂暗天網吉士 灑濕鮮地覬蟻穴
訝走珠亮吉 蛟宮伏犇汎微濛霑裘毫紹祖 幽滴沐小
鬢胸風短燭焰星衍 石乞浮礎潤呼酒拭敗几吉士 割
鮮偕銛刃饒嫌鴨脚瘦亮吉 渴若鯨口進驕唵帽先側
紹祖 耻醉魄尚振枯僧刻殘香星衍 雛僕匿斷燼狂才
愛披衲吉士 癯客厭垂縉循茲袂褊褊亮吉 愧我髮鬢
鬢無舟遂藏壑紹祖 有骨苦行殯竒懷逼神惡星衍 恠
語奪天吝佳遊眞逝鳥吉士 去日更馳駿良朋偶散一

亮去
大欲先何
時沈
寒月驚過閨
蓬廬大誰息
漏
祖傳舍閨亦

僅狂遊謝
繼絆星衍兒
戲學齟齬莫
聽嶺鐘鳴羈
心逐

轉軻

小除前一日與孫大城北痛飲卽送歸句容度歲

一旬歸客狂難已十日醉眠呼不起我病何能謝友朋
君才頗不容鄉里城門樓西放晚晴我歸惜君還遠行
酒徒無人只爾我兀兀共把深杯傾我憐歲月去不回
日晚聊折墻頭梅墻頭梅花贈行客明日東西復南北
男兒行路亦可憐道上飄零寡顏色君今二十衣仍素
我人中年鬢難黑粟米慙餘損道心文章富後供人役
金陵昔時共酒杯前輩亦復知君才我甘黃金與千擲

君被紅顏惱百回紅顏昨日非今日歲宴相逢又相失
富兒門巷開車輿貧客衣裘獸霜雪荒荒衰柳出層城
冷巷窮門爆竹聲津頭戍鼓方三下屋角踈星已二更
新詩別我何橫放同輩誰能出君上世上兒偏竒細微
里中姥忽驚竒狀還君歌詩酬一卮鄉黨豈足容男兒
人生貧薄亦何厭握手只惜爲歡遲孫郎高歌狂轉甚
別我還因接王沈破產明朝事遠遊典衣此日供荒飲
此間亦有趙與楊累日爲爾稱離觴座中卜子庶同調
送客獸至官河秀官河迢迢夜程黑倦僕離披立船側
一風鼓棹不尋停明日還家已除夕

同作

孫星衍

千杯酬我上北邙不及容我生前狂千言相思寄行
路不及逢君尋君怒君來巷南雙拍肩入市欲藉糟
叩眠六街隆隆塞賓從酌酒還呼乞人共市中先醉
識子兄入座不飲如公榮卜生吾交君未識揮袂徑
使飛千鱗市橋來看立重足更脫纓裾舞鸚鵡我生
志大不自量非薄曩詰如粃糠小儒不答風射耳愛
我如君合心死屈蠅鮑鬼不可呼我識二子今應無
百千年來復誰樂六十日醉真吾徒凡鉛難燒石難
煮此脇應歸濁醪腐眼中絕業合有傳身後榮名苦
無主三更惜別各不知欲去顛倒前相持幽魂如絲
墮空濶側聽鄉語離多時菰蒲蕭蕭夢中過骨冷猶

疑枕君臥

送汪秀才中歸里

不敢居鄉里來遊戀友朋
狂名偏自慰絕業許相矜
我病心無竅君愁眼有稜
明朝風雪路應亦厭飛騰

十六夜偕諸同人步月

破墻明月上從爾復東行
一市燈明威三更酒淺清
遂聲隨岼遠誰羽墜巢驚
無復童年戲牽衣入曲城

句曲與孫大遊烏翅岡撰棋

荒岡野橋谿水清我初來遊
因沈生橋邊古棋百餘朶
瘦影入柏何縱橫孤輓東去
復逾月來此已聽春禽聲
花間氣候亦殊絕墻北飛雨
墻西晴看花人老苦無暇

可惜數日還東行
油衫泥鞮二三子
勸我花底傾餘觥
看花初舒復盛放
不待花落非人情
孫郎高駉值好春
瘦骨我歎支花辰
繞花百匝與君別
明日病馬騎勞人
句曲與孫大別

長亭有春草可以復遠行
我今別君歸憔悴無歡情
可憐手中花不及隄上草
隨我東西南北行
因風零落何能好
一生不合工隱憂
早與俗士成愆尤
閉門冷巷慣飄泊
一刻更歡逢人投
君知我心如皎日
我念君情比明月
落拓君真與世殊
狂名我更從人乞
世人與我爭百季
擾擾禮法拘名賢
讒聲笑口有時止
我共君名入青史
邑中大姓讒馮君
桓生自識楊子雲
里中少年辱

韓信異國偏能重廉蔣君今抑鬱何所爲莫自憂愁減
青鬢我行折君牆上楫數日念爾還東來插楫泥中有
根本君若不來楫瘦損江頭水色深復深不能隨我去
潁陰潁中兒歌亦堪聽對酒聞歌發狂興一日寄一書
百日祇百回莫嫌信使久濶絕江口時有淮船來淮船
遙遙出江汜欲別心難贈知己我去真慙集戟烏君畱
夏作趨庭鯉貽君書籍貯閒廳絕業無如校六經芟除
園草種叢竹俗客不到門嘗扃君憐別語方離口我念
征人復回首曲岸初生黯黯波層城已隔青青柳
社日雨偶成

短牆矮屋橫如艇杏樹垂枝入苔井窗外濛濛濕雨絲

折花聲裏春人醒
蛛絲黏戶暗不開
蒼鼠出牖銜莓苔
三條闕小雨聲滿
靜聽蠟屐衝泥來
此時樓北亦啟扉
細響曲折升層梯
空園初春悵無侶
小兒東風社公雨
憶孫大

所思終不見
日夕對衡宇
暗牖翻月波
驚巢墜棲羽
沿門柝聲響
夢醒識人語
燭燼暗不光
薄帷風自舉
塵虛繪遺跡
琴悵續遙緒
古井時一聲
知零前夜雨

盤馬圖

君如有氣吞西域
兀兀草間騎
一匹馬頭飛
鶴閃神弓
直叱驍驍與爭疾
我騎欵段亦狂
驗雅有男兒一寸心
贈君芻糧戒君御
獸向城西望君去

寒食出遊作

眼明不欲看春水意懶只合尋殘花
殘花飛飛不辭遠風急復入春人家
蕭閒橋北遠市聲我逐燕翦登春城
春城東西夕陽好蝴蝶雙翻女墻草
紅橋白塔臨水旁十里目極黃花黃
黃花叢邊故人住死墓花香最深處
謂馬秀才廣運沿谿楊柳記同攀
詎料都成墓前樹死友已死
生友狂鄉黨欲斥憐孫郎城東乞者
飲君德百徧問爾遊何方我尋春出
亦偶然寂莫歸喚臨谿船聽歌買醉
亦有處耻與俗士同周旋

清明日諸同人餞予旗亭醉後賦此

君知我狂休更激醉中牽人醒不識
君知我倦休復來

夢裏得句醒還猜十年寥寥賞音寡四座誰人手堪把
君今欲看隴頭花使我頻隨富兒馬東門城上放陽春
青眼看春有幾人城中車輿盡東去日莫不斷花間塵
欲行不行誰與共獨客緣知乏人送谿南燕翦忽西飛
十里隨人去如夢

上冢

今朝原上草萬綠慘一望北郭展嫩睛東塘拓新漲全
家茲上冢人語雜烟舫岸柳記昔移山泥識初葬林紅
逗遙溜窗碧啟虛障新月眉際垂春花袖中放遲歸待
溪春薄飲接幽貺十里颺紙錢春人復惆悵

夜泊金山寺

柳絲垂黃不垂碧
雨腳飄青復飄白
風林吹散一萬雅
隨我東來蔽江黑
前舟只聞柔艫聲
風水不定愁宵程
後舟微茫接汝尾
稍辨人聲出蓬底
一更初明山寺鐙
二更雨止歸寺僧
三更棲鳥避光景
塔漾空明七層影

江上曉行

船頭明月已四更
孤客幽夢隨潮生
寺樓疎鐘祇一聲
北風吹舟南岬橫
晨光初浮港口沙
微雨已落江南花
江魚千頭迎日華
水色艷艷明紅紗
朝暎東來月西缺
却覩隔林星景沒
舟人無言去帆疾
欲至真州岸頭歇
遲孫大不至

相識隔百里待來殊不來
酒邊雙淚落身外一花開
病

所製車言卷第七
婦裾應擊狂交札復催城南風與日遲爾上荒臺

遣僕詞寄汪二尹蒼霖

予方愁汝莫哭主人堂前遣一僕主人一步僕即隨三月西來無斗粟朱門騎馬誰家子僕學主人還上視人嗤汝拙汝莫懲遣汝去隨強項丞

雨花岡北小飲復至西天寺久憇

撰巢豈止隨鵲卵捫壁且欲尋蝸涎百壺遊春不知遠
醉倒只乞墻根眠花枝滿身縈綠煙酒面冷貼青苔錢
天桃嬌春柳絲慙竹裏樓高有人占花須隨蝶自悠揚
露眼窺人復明暗原頭少心吹冷香衣上日腳明殘黃
殘黃過水光不沒一半驚看入墻缺谿南古屋三四家

已有幽人盼新月

自岡北至暢春園看牡丹因憶去歲與孫大醉飲處
日晚迷歸路隨雲度北岡野花沿岸白新月過橋黃百
里虛傳札經旬待舉觴臺高更孤上無復昔時狂
落拓居人識相逢索酒錢好春餘幾日爲客入中年竹
冷怕侵鬢枝低更壓肩明朝一雙淚真欲墮花前

上巳日寄孫大

時擬重遊句容

短後衣看逐短輪荒塗擾擾值茲辰銷殘塵海無奇士
寥落雲山隔酒人痛飲摠虛遙夜約狂吟苦覓昔時春
浮萍飛絮都飄泊好向閒中悟此身

重過拈花庵

尚欲隨雲度小谿四山殘月眼都迷塵中惘惘千年宦
夢裏荒荒五夜雞客久竟須忘巧拙塗窮寧復辨東西
拈花庵畔枯僧老一再逢人乞舊題

得句容諸友人札

九十山程折簡呼尚憐狂跡滯窮塗禰衡自欲兒文舉
爰盎偏應弟灌夫爲客百年悲白日論交一輩近黃墟
重來只向閒街走多恐人知舊酒徒

書事

戶勘穴荒里訟寃心清久獸吏庭喧早聞市卒添梅福
已覺衙官少屈原脫屣何能喻妻子挂冠終不夢田園
憑君洗眼看塵海局促誰人尚守轅

客句容署中以縣試不得出寄孫大

夢醒空自惜年華法鼓聲聲報晚衙
兩度拚慙巢暮燕
一春只看隔牆花窺鏡鼠怯穿衣桁
綠壁蟲驚落畫叉
我自懷人不能寐高吟時復振窗紗

偶成

莫學王公寡宦情耻隨平叔竊時名
百年我聽村雞舞
一輩誰先仗馬鳴孤客感時雙鬢改
小樓入夜衆星明
亂雲堆裏重南望水黑山昏斷去程

重至句容

莫歎頻來席未溫
一旬騎馬入朱門
蹇年不復營妻子
岐路翻成戀友朋
烏鵲辭巢知樹冷
狐狸窺院趁燈昏

浮生进入今宵夢，夢破勞勞斷客魂。

寄張紹南

只隔橋南北，離居未得同。酒魂沉盞綠，春夢壓鐙紅。念爾孤生帶憐余，獨轉蓬鄉心與流水。日夕向川東。

觀棋圖

山風颯颯卷床書，日午聊將倦眼舒。攜得橘中雙病叟，三株松下鬥秋儲。

句容遊孔氏園亭

參差黃白一畝花，竹扇闔處知誰家。青衣亭亭復孤立，手搏飛絮團輕紉。深紅淺碧開錦屏，萬朶綴壁如華星。我唵一句一星落，片片飛入谿南亭。閒門却映深深竹。

竹葉濃遮鳥巢綠簷前鳩婦鳴不飛靜看水塘烏浴浴
三月二十日夜與孫大挈榼至城上飲

華堂非不樂相與草間飲擾擾千百中孤生自殊稟君
來攜一榼味復異烹飪曲木藉作盤曲枝勞作枕回瞻
白楊路先有石甓寢酒面鋪月光鬼風吹懍懍

趙大襄王招飲醉後却寄

朝狂飲百觴莫狂飲千鐘恨客只說樊少翁恠君何招
蓋次公立談一語咸失歡醉鄉天地何能寬醒時頗知
客顏色兀兀一尊移面壁酒狂於我不可當一月不出
蓬蒿堂讀書只欲究世務放筆安肯爲詞章胸中之竒
亦思吐意欲上書丞相府直將心跡寄青雲不用頭顱

入黃土

郊行

十日耽狂飲茲遊欲避人衫輕蕩飛雨髮短入流塵僧
古百季衲松閒七尺身東門橋下水照影失青春

癡寺

尺五當門草心知久閉關亂墳三畝地幽夢一房山客
鬢慙行役僧修巖徃還尙畱遺殿址淒絕此松間

種蔬

食力祈無暇經旬獸種蔬狂難知死所儉欲夢生初井
李偏愁咽墻蒿尙欲鉏何因棄貧病知好亦全疎

得孫大書

我書必雙函君書亦百紙書來幾回讀淚落忽不止我
顏如灰君色苦夢慄從君聽街鼓離堂一鐙分構惡病
婦黃頰支多時忽然好句落唵管晦日寄我城南詩華
季只覺犇馳急君匪春人我三十舟楫終慙身世浮龍
虵苦羨秋冬蠶一生一死安足愁生我何不如蜉蝣傭
書朝算自一室摠閱百歲同憂囚離居入夢華陽阪冶
葉倡條識春晚生魂應挂楊柳枝雨濕風飄不能反

日食多事三日月全食

三二

附鮫軒詩卷第八

陽湖洪亮吉著

天台雁蕩集 丙申

獸鶴行寄黃景仁

獸鶴亦不高如人長七尺羅張網布不可以暗飛悄然
墮爾秋原之孤白幽蟾光短不得長一星當天病眼黃
鶴于此時何處翔不隨雅頭青不隨鴨頭碧不隨愁瀉
南不隨悽燕北汝黑汝白不可知汝南汝北我則思君
不見羽毛如霜膝如鐵汝今雖遠遊慎勿使霜毛摧鐵
骨折

飢鶴行寄孫星衍

下魚車言令多ノ
飢鵠爾何來聞自天上墮世人不知爲奇祥聞一驚
反懼禍何爲牽汝頭縛汝腳使汝烏不烏鵠不鵠墻傾
月明庭低露涼秋蟲食之令人心傷徘徊不能行我見
驚是飢鳳凰君不見鳳凰雖已飢光采自不藏猶吐五
色雲高若百尺墻世人文章休目迷我辨毛質皆山鷄
不然何以飢鵠苦飢汝苦肥

病馬行

糝三升糶一尺馬病空槽不能食神駒力屈亦有時馬
今不病主不知青天白日蓋此四野馬辭主人哀鳴其
下鳴聲不欲高恐復驚道邊世人不相知謂馬爲乞憐
文綵十尺絡罔羸主今復飾疥駱駝君不見同生相逢

尙相失空費黃金求死骨

獸居裏黃二

二十力學經初橫三十著書還未成隣家老翁苦搥壁
欲睡獸我呬唔聲園蔬青青食貧如此意何能喻妻子
富人僚壻苦見輕自審貧薄何由齒我貧于世應食力
八口還嫌婦慵織瓜葵未飽緣年歎藥物預儲愁里瘦
雅無親串饒知己遠寄雙縑潤行李肯將心力事時人
月值纔能謀粟米故人已獻長楊賦自說雲霄尙無路
飢寒念爾筋骨瘦百里津門直徒步與君同家谿水頭
午日簫鼓喧中流我貧頗復獸薄俗不遣病婦登高樓
還愁賃屋豪家側簷溜傾庭積卑濕苦唸時復過三更

塘裏竹竿知月直

舟行三塔蕩看月

湖堤昨日崩新漲青石岫嶼紛相向舟人飯罷衝北風
擊鼓船行三塔蕩湖堤灣環湖月白復有斜陽半湖赤
橋門去水只數分波底接天無一尺前帆已碍雅巢過
後艇方驚魚窟出空明積水漾蒲衣寥落居人飯蓮實
船頭明月忽已過不若夢裏聽吳歌前山白雲如絮多
明日急雨翻層波

雨過石白湖

溧陽之南集商舶百錢買舟長十尺推篷漁叟不識人
錯認湖頭販魚客微風吹篷雨腳粗一日一夕穿層湖

水花空明映蓮葉時有菱角翻菰蒲漁人網結湖邊宅
笑指層湖作衣食牀前水淺撈白蝦蠹底泥深採清鯽
五湖天濶煙水通放艇只憶陶朱公按范蠡所泛五湖此其一餘不出當
念蕪湖故人戲語天倘從老作石白湖中龍同行周君界中所言如此
簡黃二景仁

東西南北誰能達一月不寄長安札金陵江頭候消息
兀兀束裝聞欲發泥中垂翅亦其理殿上策名知有幾
時獻賦我貧已是歷三州嗟子何不遠千里男兒脫身
報罷行路旁素面日益塵沙黃黃金臺前集多士笑爾八尺
身空長斬蛟射虎縱一往少年何必齒鄉黨能容卿輩
詎止千雅識國士真無兩平生亦知少所與憶爾唯同

瘦孫語我因作客縮心知女也尋入非貌取

余與孫子訂交因黃

二君家南頭住狂呂百斛龍文亦思舉矜名苦遭時俗

罵尋句唯邀鬼神許可憐蹤跡二三子母病妻愁摠如

此固窮不出誰能勸離俗未遠吾猶耻長貧寧使婦無

禪不遣朋來缺酒尊當時總角共言笑一輩更有誰人

存讀書雖多顏不迂食力既久形非癯乾坤亦憐壯心

在不使齋恨填溝渠別離幾載無苗麥君意欲歸歸詎

昇三間老屋蒿數尺十畝荒田禾半石世奢豈復慮終

始我儉纔能救晨夕瓶無斗粟休謀肉身有葛衣應賤

帛狂來苦欲慕前賢俗薄何能謝其責我今作客苦乏

資女復告我歸無時窮愁屬女休苦思破悶聊寄孫郎

詩

五鼓出句容東門聞孫大已先期走送不值却寄

君乘殘月來我逐荒雞起華陽門邊後先出豈意違君
復數里原頭草荒行接天病馬兀兀楛楊鞭谿橋東西
路還判別夢隨君已零亂君今驚魂不自招我逐暗影
徒飄搖春泥深尺那可跡蠟炬遺灰杳難覓哀笳三更
復五更憶君出城還入城悲來無端念死生此別惘惘
俱吞聲

紅梅閣夜坐贈道士王清真

勞勞定何意擾擾遣久住兀傲七尺身特立百季樹幽
蹤無端心賞僻喜聽禽聲獸人跡卽看松櫟醒醉顏愛

向宵浚坐壇石堂中飛仙人一一古丈夫莓苔陰陰塌
西壁恠此慘綠生汎膚棲真幽人顏色醜月午臺前禮
星斗塵沙十尺障眼脂對面寧能辨誰某蘭心玉質脆
不堅國士何以無長年豈其奇才眩世目不遣白髮垂
盃肩沉心觀物亦如此幾徧楫楫栢難死辭家君欲侶
松喬入世余愁對妻子鑪燵已威飛暗灰道童天曉殊
不回振衣縱步出門去歸路覺我形神摧

寄朱博士沛

君筇送我時城南廣文宅門前青竹竿森森月華直
博士冷官謀餐不能飽頗感招客勤盤中飢梨棗
我愁鬢髮踈君若牙齒缺相識只一年驚看五回別

縣丞輸餉作大尹賑饑詞絕憶窮衙裏都工五字詩

謂汪

蒼霖林
光照

將遊白紵山待同人不至

百日低肩坐看山眼倍明靜餘懸屐想狂即拂衣行破
冢愁尸氣荒邨覓吠聲何因久相待幽絕晚涼生

白紵山半望江北諸山漫賦

前行未及松頂關半嶺已落天門山晴江帆風走十里
望去不越坳堂間江天空濛雲百頃行人舉頭天墜頂
驚濤隨風落耳邊長松蕭蕭日沒景丈夫生世不合閒
履險始尋開心顏吳船百斛看橫渡卧穩亦覺魚龍頑
何時疾帆飛渡我至江北黃河決處看迅流使我軒肩

畫竒策潛行欲索河伯符不佩五嶽真形圖魚頭誰識
可換黑龜眼切莫輕塗朱山川英靈幾人在看此橫流
日歸海杯底銀濤雪浪飛鏡中綠髮朱顏改山雲欲出
山雨從越嶺已覺聲沟沟君不見壯遊能消磊落胸愛
此激電鋪江紅

于湖曲

晉書明帝微行至于湖陰察王敦營壘于湖縣名屬
丹陽郡樂府誤作湖陰曲温尉集亦然今正之

一言不合收斬鼉利劍入座光新磨虬須心懸祖龍坐
拔劍指天雲欲破營門三日兀不開妖夢豈識真龍來
原頭天低日輪黑日在么麼夢中赤將軍大呼蜂目突

十萬犇鯨聳皮骨豺聲一出衆已驚怒叱百馬追龍行
君不見西飛黃塵東掣電赤日上天龍入殿
方布衣薰寫幽居圖見寄賦謝

男兒已自辭官府壯歲應須立門戶八口終嫌無事貧
一身肯作多錢賈感君爲圖伯夷築愧我未學樊遲圃
季豐祭止陳魚菽歲歉賓應缺雞黍承顏竟日說乘麻
入室三時響機杼山田定早輸農稅臘月先聞擊村鼓
波平百尾齊上竿雨急萬菌爭出土瓜桃未熟隣先餉
錢帛可通誰是主過因不事斥官蛙未戢無稽傳市虎
能憂雅欲師唐魏問俗甘不如鄒魯譚知野老慣掀須
讀飭兒曹莫刺股田廬課後童無約種植經存茶乏譜

立談客可贈一困量腹我纔消二誦君不見三間老屋
亦太古兩足木牀穿未補男能辛勤女作苦一月共尋

四十五

姚良年鑄奸鼎歌

君不見山之南鬼止一足行趁趨君不見山之北虵豕
兩頭人不識乾坤浩大何足窮日月匿影于巖側柰何
天生人人復發其覆形幽迹殊詭一一誌篆籀蠶身虎
質非不仁何必責獸皆麒麟援箸攬糲理有饜粿食尚
不嫌雞豚恠哉神奸只食人狂口嚼嚙憎人馴遂令居
高揣肥瘠食盡不懼天公嗔人觀此鼎毛髮逼我謂鼎
陳神鬼惑豺狼當塗狐被効熊羆噬人貉遭責一言君

還縱姦慝百恠誰甘受雕刻強吞弱肉理豈容造物未
必終夢夢森然顏面待鑿削舍此更欲求良工君不見
經蟲離史檣杙飢餐人屍渴人血問工何時鑄饕餮四
十八州爭獻鐵

與孫大飲烏翅岡主人園

烏翅岡頭路春殘屢欵門後來無此客別夜肅清尊病
覺詩篇短狂憐骨相存千杯吾未厭渾欲醺狂孫

賈孝女詩

高郵人翰林檢討賈兆鳳女

一臂落節獲完兩臂碎孝复全刻膚活親奇女子兒臂
若完心即死左臂療母母不亡右臂刳因乞父嘗骨肉
已合肌膚傷肌膚傷兒勿惜親在還能念兒瘡君不見

親身處強家乏食兒合臂創須事織

九井山讀書歌爲朱明經滋年賦

望山山不登卷書書不讀山奇要戴巨鼈首字古須搜
蠹魚腹我聞昆侖高負嶠奇發興欲遣愚公移復聞秦
王墳不韋冢兀兀陳編富周孔腐儒執經休聚喧中郎
發邛須置官寮中苦無名嶽住地下或有奇書看願君
讀書能棄書鼻準磨墨人嗤儒願君入山不識山山雨
滴硯扉嘗關君不見山扉嘗關山徑阻九井九龍稱地
主井泉聲寒誦聲苦願君飲此可釋暑

偶書

收得城西博進錢一旬七日啟華筵閉門只共屠沽飲

蓋殺城東惡少年

七月十二夜借孫大暨王吳二秀才易僧服泛舟訪青
山莊故址薄暝銜醉歸仍至旗亭痛飲四鼓乃別

京江相國孫
布政迺別業

清秋攜客出郭門名園傳自丞相孫當時官富乞休早
聊以暇日娛清尊名園蒼蒼列松柏此地由來遠城北
无山而山名曰奇飛白當門題徑尺平泉莊敬賓客多
往者不樂還高歌鄉閭我識陸恭仲試語舊事勞滄沱
曾言騎馬園南走斥買閒田起岡阜田夫築土經幾時
老去園丁變樵叟橫塘水涸煙雨荒夜久月白西頭廊
傷心并乏狐兔窳祇有曲院藏牛羊山纜一成谿數尺

谿鬻羨魚山鬻石水車載水注旱田山丁移山入豪宅
百年老樹惜不斲大斧摧殘落巖側寒窗无橋户无格
署券園南索昂直可憐憔悴張公子辟債臺高客中死
諸孫寥落寡屋椽依徧相公門下士相公昔日崇清儉
盤馬廳成寡欄檻哲嗣移家志已荒多金築室心還懶
盛衰興廢无百年看田作園園作田林禽埜誰遞相誚
巢樹不定頻遭遷吾曹痛飲愁何著還院僧來借衣著
三更艇子不尋停歸及江城鎖門鑰

八月十三夜偕趙大襄王令姪學愈暨孫大攜酒至覓
渡橋上飲

崩宵飲城東昨復飲城北偏驚里中兒成群喜觀客城

西岸頭七尺橋紅欄却喜挂酒瓢狂孫短趙幸俱集共
說月好輸今宵人生放手即復左遠夢遙遙落飛舸瓠
腰淺角秋正鮮明日縣南誰醉我

中秋夕邀同錢唐郭焜暨孫大呂大攜笛及酒至雲谿

泛舟作

雲谿里中夜四更無多少年只郭橫傾囊攜來一瓠酒
欲覓同輩吹新聲孫郎歌殘意不憚隔岸還招呂生笛
五年圓月歷五方喜此復尋从君徃回洲三面眺明鏡
升樹百尺餐清光歌聲飛來壓簾重可惜谿南百家夢
隨聲吹落波影中宿燕啾啾復離棟吾曹吟魂怕歸東
尺五菱舟載人六風塵明日即別家辛苦牽船不居屋

嘉興煙雨樓

川淒雨復寒天遠雲亦遠寥寥沙際楫擾擾竹中館
鄉集魚鱗豐歲樂鷄犬煙柳積百重坡塘信千轉征衣
旣煩質寒序忽更煖日午侯北風應看去帆滿

雨霽登飛來峰

積竒登茲峰峰卑阻雄眺煙蘿離復翳巖石苦未峭秋
霖雜飛瀑深谷積泥淖窄訝虺蝮居圓摩蝙蝠窺朋僚
默幽濕攀樹引夕照空此邁徃心松門一舒嘯

傷鱗賦

并詩

洪子以丙申之秋蒼皇遠出斯時也聶政有母寄姊嫠
之家文矩別妻歸弟澹之宅十口遠送百錢從行車輪

折於吳門征帆淪于越市猶復踰越險遠窮來會稽狂
嗟墮魂獸處失影鬻故衣於市上備乾糗於日中楊朱
遭岐塗而悲元伯念死友而泣爰作傷鱗之賦以寄所
思其辭曰

鱗兮鱗兮產於西蠡柰何來遊困此越谿惟此越谿匪
子之依投絲於南設餌於西落之青實子不尋食管之
斑斑魚尾之赤所思如何我江我河何時旋歸送子涉
波念此涉波有魴有鯁餉子藻蘋慰子風雨一鱗之困
心焉永傷一士之厄子何不恫惟翔思林惟伏思沼爰
作傷鱗以配窮鳥

有讀傷鱗賦而悲者爲作二詩

囊金達千里貧賤苑里間柰何抱饑寒顧欲處路鳴顰
生足文史於世何所須陶朱一何賢泉明一何愚
北風凌朝至悲我无衣裳念之輟晨餐晨餐亦難望入
市有所需餅餌索少嘗多錢不能供少錢不充腸嗟嗟
復嗟嗟我僕泣路旁

九日登府山望海亭寄里中諸子

沉憂匪不傷夕鬢朝已改侵晨冒幽險飛鳥忽不待山
氣何淒淒危岷匿陽采寧知唵眺處先冒數人在萍梗
離北江浮蹤眺東海行傷居者病去惜僕夫殆彌衡憶
孔融侯生結朱亥徒悲成令節復此念前載歸計辦耦
耕無年願同餒

曉發曹娥江

晨帆縣江開夕騎府山發秋原易風雨喜此天宇豁微
茫數峰轉奮迅百里達蓬寒服朝華檻膩積流沫蘋花
聚川氣蒲節散石髮眼識化隼鳩心傷祭魚獺川程此
迢遞山驛方峭拔甫託東歸雲還緇北來札

虞江舟中晝眠夢孫大

雨淚忽不停心傷枕函重簾帷開虛風秋陽暴幽夢悲
茲溼溼日幽鳥時一啜非无求友志首疾念予仲三句
滯鄉邑百里走相送放楫余已遙犇駒爾難鞿徒云堅
後約待此川澤凍遠恨一以生尋君舊詩諷

晚泊櫟樹灘

西集詩話卷第八
十一
黃悲西逝日紅傷秋末花羈聲出叢薄暗影聚回沙抑
鬱川原棹淒迷山半笳停餐征騎集持火夜程賒推蓬
見孤月何心不憶家

自嵯縣至天台山行雜詩

楓生北山上葉落入西嶺傷此東南風愁看去來影蕭
條算天气悽瑟幽人境露草黃一壇土花紅半井傷禽
旣相戒廐馬行復警寥寥天地心窮秋一溪省

夜唵方倚樹曉夢已入竹風鈴散踈聲懸鐙照悽綠頰
欣謝塵事息仰在溪谷迹感鏃羽禽狂驚失群鹿窮鄉
此畱滯樂歲苦躑躅豈念襄與安徒成歌復哭

青谿多道士華棟祀僊人綠屨封君達醜顏賀季真林

腰束雲岫谷口入風塵川綠疑成雨巖紅忽覺春開窗
惟禽集繫檻野猿馴無由乞靈藥終此駐閒身

鐘沉遂無聲燭滅忽有影還登落月峰眺此犇雲境荒
荒北來水阻此西去嶺客久亦撫心僮勞屢延頸來蹤
匪无戀去志忽不猛寒月无裳衣徒憂涉波冷

山禽呼水禽棲息多在戶夏蟲語秋蟲寒久何忽暑川
原既相間涼燠各有主車馬喧寂中勞勞自爾汝征衣
冒荆棘客飯雜塵土曰發斑竹山言尋白蘋浦

秋心何其紛宵念亦不一思隨麋鹿遊矧有犬馬疾溼
溼及沙岸擾擾駐巖室霧徑杳已迷星塗易相失寒顛
怯風信飢苦藉木實明發登北山行當復三日

台州使院雜詩寄孫大

秋風尙其悲冥雨入空隙林鳩啼檐端晨光慘將白同
儕湫何所衰少斷行跡簾櫳悲深沉青盞挂餘壁階除
展余步墮瓦甫及額竹柏淒一林東西綠苔色回房昔
清讌饑鼠啣歌席誰聽晨鐘鳴聊來視孤客

山樓與水樓高下千百級南城視北城飛鳥亦不及離
離夕雲起裊裊晨氣濕枯薪旣盈路墮果欣可拾獸客
窗際樵居人樓上汲孤猿乍驚窺已復傍人立旅念亦
已消經旬滯鄉邑

秋衾旣迢迢冬夜淒以肅非因念遠人胡爲秉明燭明
燭何搖搖光紅倏成綠裏哉不能寐溪室遣僮僕帷帳

列北隅緇塵拂茵褥衣裳久顛倒書史誰復束昏旦一
日違鳴雞喚人宿

茲邦及鄉邑東西千里遙林禽皆殊聲感歎同枝條抱
疴來幽巖僻喧及崇朝雖曰積驅馳文史亦已勞日晚
忽北風厲廬送塵囂鬱鬱梁棟間巖雲不能消登涉興
轉孤歡讌理必招因悲復成篇歌竟還長謠

西軒夜吟寂北寺鐘聲歇山館落葉深荒黃不因月三
更啟南牖頰仰眺叢樾墮石響北林犇雲動城闕巖要
恠風起老獸亦離穴中野忽一鳴哀聲振寥濶霜嚴肅
帷幔寒至砭肌骨已念无衣裳誰能坐悽瑟

游思雖无方鬱積亦有在自與斯人違沉沉歲時改秦

嘉傷婦病范冉值妻餓禽窮只守巢萍離乃飄海吳雲
既昇威越嶺復崔嵬子有東顧憂予貽後時悔蕭條此
陽月惻愴日无采歸日東郭門何人岸巾待

見有倒松爲橋者

老樹裁爲橋其根施作艇纜辭恠鳥聲已動游魚影

謁禹陵觀窆石

蒼梧之崩竹已斑黃熊之殞血復殷人疑賢聖盡野苑
亦識君父非生還地崩山傾水泉出誰識防風悍侯骨
誅龍于淵首不殊豸鼈于山足不缺茲陵峩峩獨百尺
豐碑蹲南穴列北雲埋山昏人不識四千年來一橫石
當時神功爲劔山山石已破摧天關頽紅尚帶海蛟血

慘綠入骨生端爛江淮修修怨神女生魂不招柰何許
壼山立石石不語鬢絲爲風沫爲雨乾坤功大寧復論
截江作國封末孫我疑無物可酬德庶海作醴山爲罇
君不見驚濤昨日入海門海岸已沒千家村時蕭山海塘屢壞漂
家汝曹面目須感恩不爾摠戴魚頭犇一塚山青一
瓢海疏鑿功深孰能改神祠無窮石不毀息壤千秋復
畱彼

無錫舟次與孫大別倏忽三月詩已代簡

一船如梭眠不尋更覓一船東作客推篷見我燭燼紅
落月懸君布帆白錢唐江頭惡浪軒我別郭子無一言
東西遙遙屢揮手淚落不落中心煩飛蓬无根逐風起

東去一千三百里離家百日不尋書欲覓南谿北谿鯉
山中食桃還憶君足繭遠踏東峰雲貽君許覓鮑家艾
申旦入谷勞樵斤寒風蕭條日西馭破樓懷人獸箕踞
冬窮臘蠶春不生天盡海飛人復去

自黃巖至樂清經盤石斤竹十餘嶺兼望雁蕩諸峰作
舒心及朝陽結念向西日犇星空谷中驅濤廣川末遵
途念寒病履險恃頑質連峰驚西回犇厓此孤突危維
天柱險陰訝地維缺目極泛海舟神迷入山轍離蹤念
松桂幽賞寄芝朮終憶謝守言歸同阮生述

持燈何遙遙照此前路濕心傷戍樓鼓值我夜行急巖
雨何蕭條犇雲及原隰林猿旣哀嘯宿鳥感回集蠶嶺

一以長衣驚北風襲宵餐念難飽僕馬誰更給途憐且
復行嚴程尙三十

盤松岡還長斤竹嶺亦阻非因征客疲兼傷馬行苦遲
遲發長道出堡值亭午前旌旣穿屋後響復沿浦繚續
十里塵巖花澗無主冬川感陰翳昏谷事仰俯藤蔓慎
莫牽先愁客衣補

林紅無天光竹綠補地影藍輿及曛黑顧視不可省十
里勢鬱盤延回歎宵永尋聲始離樹辨響已入井猿慘
落果頰禽驚出林猛居人涉津訝戍鼓隔樓警紛茲菱
粟餉遠復啜巖茗心怯念後來懸燈照山頂

過黃巖六十四條嶺

時逢江都人寄書與汪大端光
自臨海至黃巖六十四里半屬嶺

路故
名

東雲既鬱蒼西嶺亦荒荒古樹人巢聚空灘雁渡忙奇
峰圍作屋橫石卧成梁寥落長松蔭淒清澗壑光海飛
天已盡无復望君方

舟行夜起

徒知川路濶誰識夜還長暗棹穿綵網犇帆碍石梁嚴
程初擊鼓寒月正褰裳露白迷荒徑燈紅出毀墻樓頭
搖旆影樹底角星芒徒歌既難樂空樽行復傷已及鳴
雞店雞聲慘不揚

將至青田作

蓬心初轉白橘實未全丹犇馳此冬月迢遙及越灘村

紅列楓柏郭暗樹松檀廢井迎人少窮鄉候騎單五門
臨細水雙闕峙危壇城隅落帆駛山樓吹角殘誰信奔
灘急真如上嶺難

石門懋誠意書院看飛瀑

黯黯晨光開泠泠布帆疾非因揆虛泉聊爲駐幽室川
原開異境曠朗見遙闕鑿石避險艱沿流戒奔越亭空
注飛雨景短迫寒日靈川競徂息華年緬陳哲噓息失
真氣犇壑斷雲轍時平乏龍虵羣材實蟻蝨流離念文
史倣儻負奇節稷下未奮須隆中猶抱膝埋垣神劍起
篋篋異書出三復名世思孤裏濟時術

石帆山

放舟石帆山山險落帆幅犇流信湍激水淺石矗矗
屹入窗際頰仰欣在目維茲僧宇峻絕頂秀林木墮響
摠入雲危巢猶戴屋延回勢千仞壁立此背腹常瞻東
升雲不見西景伏陰厓畜陽煦十月逗巖馥疊嶺眺不
窮回灘去何速思迎甘始藥未辟子房穀從此亦山居
彌年謝塵躅

冬月寄孫大

同心燭不分懸腕書尤疾綠君傷遙程知余念新別離
牀展冬夢晝闌理宵結瘴嶺一月行蠻灘百重越吳文
三尺簞越嶠千頭橘且欲寄一書何由審虛實時孫大婦痛甚

劇

天台赤城歌寄孫大

赤城黃海天下奇我昔探奇入雲海天台山高一萬丈
結霧蒙雲住仙宰犇車覆舟何不閒數載豈復窺青山
丈夫事業百無就筋力苦瘁登臨間山中之人薜蘿繞
塵面看山亦徒擾犇猿立窞噪豈休笑我虬驅髮蓬葆
黃塵入骨體不輕手扶赤藤上赤京崖窮壑轉忽相失
側耳已聽鳴泉清塵寰下土禽子夏五嶽遊期迫衰謝
我留綠髮不敢遲急復料理居山資人生何爲南北馳
憂患亦苦无窮時巖棲谷汲誰賞心素抱幸有雍門琴
不然雲山蒼蒼萬條路更挂飛瓢覓君去陰肩拍處我
欲狂君亦尋君遂初賦

一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

甌江阻雨夜起望江心寺作

寺地爲宋文信國避難興復

海潮初入雨縱橫
帆落東甌九斗城
夜半題詩亦何意
荒雞聲裏酌先生